

周易尚氏學









尚秉和著

周易
尚氏學



中華書局



周易尚氏學

尚秉和著

*

中華書局出版

(北京王府井大街36號)

新華書店北京發行所發行

四川新华印刷厂印刷

*

850×1168 毫米 1/32·12³/₄。印張·257千字
1980年5月第1版 1980年5月成都第1次印刷
印數 1—6,000册
統一書號: 2013·107 定價: 1.40元

出版說明

本書是對《周易》(包括《易經》與《易傳》)全文的注釋。作者繼承象數學的傳統，認為「《易》辭皆觀象而繫」，故重在以象釋《易》。除了依據《易傳》所取象外，又從《左傳》、《國語》、《逸周書》特別是《易林》中研尋出許多人們久已不談的佚象，並提出覆象、半象等說法，用以解釋《周易》。對鄭玄的爻辰說和虞翻的爻變法，則不予採取。對王弼掃除象數以至宋儒所謂「義理之學」，更認為「空泛謬悠」，表示反對。但對邵陽的先天卦位說，又認為「與《易經》合」，表示贊同。

二千年來解釋《周易》的書，可以說汗牛充棟，各成一家。本書作者在舊《易》學的軌道上繼續研究，在舊《易》學範圍內也稱得上「卓然成一家之言」。《周易尚氏學》是其主要著作之一，我們在文化大革命前已排版付型。學術界有些同志對它評價很高，但大多數人沒有讀過，甚至不知道其人其書，現特印出，供研究者參考。作者和于省吾先生有過交往，我們曾請于先生為本書作序，序中對本書作了評價，現按原樣刊出。為了幫助讀者了解作者生平 and 著述，又將作者自傳加印在書後。付印前還發現斷句有個別不妥處，因書已成型，未予更動。

中華書局編輯部

一九七九年十二月一日



周易尙氏學目錄

于序	一	第九論傳易之人	八
自序	一	第十論消息卦之古	八
說例	一	第十一論先後天之方位	九
總論	一	第十二論易理易象失傳後之易派	一〇
第一論周易二字本詁	一	卷一 上經	
第二論周易大義之認識	一	乾	一三
第三論古易之類別	一	坤	三一
第四論周易誰作	三	屯	四三
第五論重卦	五	蒙	四六
第六論十翼誰作	五	需	四九
第七論十翼篇名	七	訟	五二
第八論象象連經始于何人	七	師	五六

比.....三

卷七 剝.....二九

小畜.....六

復.....二三

履.....七

无妄.....二七

卷四 泰.....五

大畜.....三一

否.....九

卷八 頤.....三五

卷五 同人.....四

大過.....三九

大有.....六

坎.....四三

謙.....七

離.....四八

豫.....九

下經

卷六 隨.....六

卷九 咸.....五三

蠱.....二

恆.....五五

臨.....五

卷十 遯.....六〇

觀.....七


大壯.....六三

噬嗑.....二

晉.....六六

賁.....四

明夷.....七〇



卷十一 家人……………二六

睽……………二八〇

蹇……………二八四

解……………二八七

卷十二 損……………二九三

益……………二九六

卷十三 夬……………三〇三

姤……………三〇五

萃……………三〇九

升……………三二三

困……………三三五

井……………三三九

卷十四 革……………三四

鼎……………三七

震……………三一

目錄

艮……………三五

卷十五 漸……………二四〇

歸妹……………二四三

豐……………二四七

旅……………二五一

卷十六 巽……………二五五

兌……………二五八

渙……………二六一

節……………二六四

卷十七 中孚……………二六八

小過……………二七二

既濟……………二七七

未濟……………二八一

卷十八 繫辭上傳……………二八六

卷十九 繫辭下傳……………二〇六

卷二十

說卦	三三
序卦	三二
雜卦	三三

附錄

左傳國語易象釋	三三九
滋溪老人傳	三五六

周易尚氏學序言

于省吾

一九六二年九月，我去濟南參加孔子討論會，得識尚先生高足盧松安同志，談及先生遺著《周易尚氏學》一書，盧同志打算由私人集資，先印行若干部，以免失傳。當時我建議，最好由中華書局出版，盧同志也同意這樣作。孔子討論會結束後，我到北京，向中華書局負責同志推薦此書，嗣後由盧松安同志將原稿送去，經過審核，認為可以出版。今年三月，中華書局以《周易尚氏學》稿本見寄，要求我作一篇序言。回憶二十年前，與尚先生過從時，得聞易象緒論。拙著《易經新證》先生曾爲之序，獎勵有加，今先生墓已宿草，反而序先生之書，追懷昔游，不禁涕零。茲不揣冒昧，對先生之書妄評得失，僅供讀者作爲參考而已。

易卦起源於原始宗教中巫術占驗方法之一的八索之占。古也稱繩爲索，八索卽八條繩子。金川彝族所保持的原始式八索之占，係用牛毛繩八條，擲諸地上以占吉凶。《易·繫辭》稱庖犧氏（卽伏羲氏）始作八卦，乃指八索之占言之。八索這一名稱，最早見於《左傳》、《國語》。八索之占是八卦的前身，八卦是八索之占的繼續和發展。近年來的學者們，都說八卦與伏羲氏完全無涉，這就未免「數典忘祖」，截斷了易卦的來源。（詳拙著《伏羲氏與八卦的關係》）

原始宗教的八索之占，到了階級社會的西周就發展爲八卦；到了戰國時人所作的《易傳》，又以卦爻辭爲基礎，進一步作哲學理論的推闡。《易·繫辭傳》說：「剛柔相摩，八卦相蕩」；「日新之謂盛德，生生之謂易」；「易之爲書也不可遠，爲道也屢遷，變動不居，周流六虛，上下无常，剛柔相易，不可爲典要，唯變所適」；「易窮則變，變則通，通則久」。由此可見，作者認爲宇宙間的萬事萬物都處於不斷運動、變化和矛盾鬭爭的過程中，誠然具有辯證法的因素。但是，總的說來，還脫離不了否泰、剝復和消息盈虛之說。例如《疊·彖傳》所說的「終則有始」，《繫辭傳》所說的「原始反終」，仍然是循環論者的論調。

左昭二年傳敘韓宣子適魯，「見《易象》與《魯春秋》」。其稱《易》爲《易象》，足徵《易》之爲書是以象爲主的。《易·繫辭傳》也說：「是故易者象也，象也者像也。」因爲辭由象生，故《易》無象外之辭。《周易》的每一卦辭和每一爻辭，往往在幾句話裏有幾種不同的內容，假若不依象以釋辭，則奇奇怪怪，迷離惝恍，既不知其辭之所本，更不知其義之所由生。但是，《說卦傳》所敘的象頗爲簡略，遠遠概括不了易卦中各種各樣的象。於是主漢易以說象者，對於不解之象，則以「卦變」、「爻變」爲釋，故向先生敘清儒解《易》說：「……而以漢人爲依歸，是矣。乃於漢人之曲說，亦靡不依據以爲護符。至求象不得，亦使卦再三變以成其象，奉虞氏爲不刊法則，而易學遂故步自封矣。」（見《焦氏易詁凡例》）

魏晉以前之說《易》者都主象，自王輔嗣掃象不談，專以承乘比應爲解，歷唐至宋，便極盛一時。向

先生說：「王輔嗣深知其謬，而不能求得其象，乃倡爲得意忘象之說，以掩其短，此端一開，程伊川遂謂得其義則象數在其中，本末顛倒。」（見《焦氏易詁凡例》）這是說程氏不能依象數以解卦爻辭，全憑主觀臆想以爲之說，反而說象數在臆想之中，這樣倒末爲本，是極其荒謬的。

先生鑽研《焦氏易林》十餘年，著《焦氏易林注》十六卷，參考各家詁訓，反復推勘，積疑生悟，因而在《易林》中發現了久已失傳而與《周易》有關的內外卦象、互象、對象、正反象、半象、大象等凡百二十餘象的應用規律。驗之於《左傳》、《國語》的占象而合，驗之於《逸周書·時訓》的準象而合，驗之於《周易》卦象也都基本上相合。先生以《易林》逸象與《周易》交融互證，分條加以闡發，著《焦氏易詁》十一卷。今就此書節錄三條於下：

一、乾日：《易林》「乾之泰云，白日皎皎，泰下乾，乾爲日，互震爲白，故曰皎皎。又泰之恆云，踰日歷月，恆互兌爲月，乾爲日，故曰踰日歷月，是《易林》顯以乾爲日也。後思易乾九三云，君子終日乾乾，乾爲日，三居卦末，故曰終日。大畜九三云，日閑輿衛，日亦指乾。」（卷一）

二、兌月：「《易林》復之臨云，月出平地，坤爲地，兌爲月，在下故曰平地。又晉之小過云，月出阜東，小過艮爲阜，互兌爲月，震爲東，故月出阜東。……後思易小畜之月幾望，中孚、歸妹之月幾望，恆象之日月得天久照，蓋皆以兌爲月，故《易林》用之，邵子亦用之也。」（卷一）

三、坤水：《易林》「乾之觀云，江河淮海，天之奧府。按觀下重坤，故曰江河淮海。又坤之升云，



憑河登山，升上坤，坤水，故曰憑河。又訟之泰，弱水之西，坤水、坤柔，故曰弱水。（卷一）「凡易言利往、利涉者，義无不通。特坤水象至東漢失傳，必以坎爲大川，遂爾歧誤，而解益之大川尤扞格難通。」（卷五）「益、利有攸往利涉大川解」。按「川」字原本誤作「利」。

以上所引三條，用《易林》乾日、兌月、坤水之象，與《周易》相證發，六通四辟，若合符契。學者只知離爲日，坎爲月爲水，則多與卦象不相應。先生以《焦氏易詁》爲基礎（讀本書者，須參閱《焦氏易林注》、《焦氏易詁》、《左傳國語易象釋》三書），對於歷來的易象和易解，廣搜博采，評判其得失，取長舍短；同時，又結合其師吳摯甫《易說》的「陽遇陰則通、遇陽則阻」的原理（見本書「說例」）而加以發展，謂「易之道如電然，同性則相遠，異性則相感」（見《易詁》「同人、利涉大川解」），著《周易尚氏學》二十卷。於是久已晦盲的易象，始昭然若揭，可謂發幽闡微，集象學之大成。《焦氏易林注》作墉敍引王晉卿說：「此書將二千年易家之盲詞嚙說，一一駁倒，使西漢易學復明於世，孟子所謂其功不在禹下。」又引陳散原說：「讀尚氏《焦氏易詁》，嘆爲千古絕作。以今世竟有此人著此絕無僅有之書，本朝諸儒見之當有愧色。」

以上所述，主要是說明先生對易象的卓越發明。但是，本書也還存在着某些缺點和錯誤，例如：

一、有關《周易》作者的問題 先生對於畫卦者以及卦爻辭、《易傳》的作者，多因襲舊說。在本書「總論」中「第三論古易之類別」說：「伏羲既畫卦，必更有書以申明其義。……後人謂黃帝始造字，伏

義祇畫卦无文字者，謬也」；「第四論周易誰作」說：「……故夫《周易》卦爻辭，純爲文王一人所作，其欲加入周公者，毫无根據，不可信也」；「第六論十翼誰作」說：「……故《十翼》非孔子不能爲，不敢爲，而紀錄《十翼》者，則孔子之門人也」。像以上各種肯定的說法，都脫離不了舊有圈套。先生對於近年來學者們的若干新說，一概置之不理。縱然他們對於舊解有着一筆抹殺的過分主張，未可盡信，可是，伏羲氏既畫卦又重卦，以及文王作卦爻辭，孔子作《十翼》等傳統說法，畢竟是靠不住的。

二、震象爲丘 《說文》謂「四方高中央下爲丘」，《淮南子·墜形》的「和丘」，高注謂「四方而高曰丘」。按震作三，象四方高中央下之形。丘字卜辭作，金文作，以卦畫有橫無豎驗之，則古文字的丘字正與震象相符洽。《易林》革三三之頤三三說：「尼父孔丘」，（尙先生謂反震爲孔），頤下震爲丘，故曰「尼父孔丘」；又屯三三之噬嗑三三說：「營邱（同丘）是適」，噬嗑下震爲丘（尙先生謂「震往故曰適」），故曰「營邱是適」。這都是《易林》以震爲丘之證。以震爲丘，於《周易》中之言丘者無一不合。賁卦作三三，六五：「賁於丘園」，丘園指「上互」爲震言之，頤卦作三三，六二：「拂經於丘」，丘指內卦爲震言之；渙卦作三三，六四：「渙有丘」，丘指渙「下互」爲震言之。丘與虛古通用。古人多居丘。《說文》謂「虛、大丘也」，又謂「四邑爲丘，丘謂之虛」。升卦作三三，九三：「升虛邑」，馬注謂「虛、丘也」。丘邑指「上互」爲震言之。總之，《周易》中言丘者三見，言虛者一見，都取象於震。而先生有的謂艮爲山以當丘，有的訓丘爲空，又以巽爲虛，既不能一以貫之，又均背於易象。此外，鼎卦作三三，《乾鑿度》

謂「鼎象以器」。毛奇齡《仲氏易》說：「鼎有足有腹有耳有鉉，而卦文俱象之。下畫偶似足，二三四畫奇皆中實，似腹，五畫偶似耳，上畫奇似鉉。」按毛解甚確，而先生於本書從端木國瑚之說，謂「鼎之象不在鼎，而在伏象屯」，舍鼎形之實象而信伏象，未免疏失。

三、訓詁和史實 《說卦傳》以兌爲月，先生據《易林》逸象以兌爲月，用以解易，無一不通。但是，爲什麼以兌爲月，則未加說明。按《說文》：「月、闕也」，《釋名·釋天》：「月、闕也，滿則闕也」，是月、闕聲韻，以音爲訓。再就形言之，古文字月作 D 或 D ，正像月闕形。兌上偶畫中闕，故以兌爲月（其它卦象，與文字形或音有關係者，在此不加詳論）。小過六二：「過其祖，遇其妣」，先生誤從《爾雅·釋親》「母曰妣」以爲之解。按妣爲祖母，《詩·斯干》的「似續妣祖」，《豐年》的「烝畀祖妣」，均以祖與妣對稱。《周禮·大司樂》「以享先妣」與「以享先祖」，相偶爲文。卜辭和金文均稱祖母爲妣，從無以妣爲母者。以妣爲母，始見於戰國末期的典籍，與易辭不符。否九五：「其亡其亡，繫於苞桑」，陸續訓苞桑爲叢桑，甚是。不言繫於桑而言繫於叢桑，自係就鞏固爲言。而先生謂「桑而叢生，其柔可知，繫於柔木，其危可知」，未能允當。坎六四：「樽酒簋二用缶，納約自牖」，約爲勺的借字，卽酌酒之斗。《考工記·鄭注》謂「勺、故書或作約」，是其證。《詩·采蘋》：「於以奠之，宗室牖下」，是古奠祭於牖下之證。「納勺自牖」，是說祭時自牖納勺於樽以挹酒。而先生引《周禮·司約》的「治神之約」以爲之解，乖於本義。《晉卦辭》：「康侯用錫馬蕃庶」，康侯卽《書·康誥》的康叔封，金文作「康侯丰」。而先生誤謂「康侯略如大

侯，爲諸侯之美稱」。益六四：「利用爲依遷國」，依應讀作殷，卽《書序》所說的「成周既成，遷殷頑民」。而先生誤據《說文》訓依爲倚。升六四：「王用享於岐山」，先生謂「紂能囚文王，何不可到岐山」。其實，紂何曾到過岐山？歸妹六五：「帝乙歸妹」，先生謂「帝乙、湯也」。其實，帝乙謂紂父，太乙何曾有帝乙之稱？

總起來說，先生的主要成就就是通過對《焦氏易林》的多年鑽研，在極爲錯綜複雜的情況下，用歸納方法，分析和總結了各種逸象的應用規律，進一步以之詮釋《周易》，基本上都是賸合無間的。因此，《左傳》、《國語》、《易林》和《易卦》的用象，才由前此的對立得到統一。由於《周易》無象外之辭，而先生的絕大發明則在乎象，解決了舊所不解的不可勝數的易象問題，可以說，先生對易象的貢獻是空前的。但是，也無可諱言，先生對《周易》的作者，只沿襲傳統舊說；並且，對某些卦象，以及文字、聲韻、訓詁和史實方面，仍有許多可議之處。不過，前者的若干發明是主要的，後者的某些缺點和錯誤是次要的。由於是非得失係客觀存在，不以個人愛憎爲轉移。有關本書的某些缺點和錯誤，與其使讀者勞神筆墨，一一加以指責，不如先事擇要說明之爲愈。因此，本文不敢阿其所好，爲先生迴短護非，遂不自量地舉出一些事例，評論其得失（當然限於篇幅，很不全面）。庶幾瑕不掩瑜，晶光赫露，而先生的苦心孤詣和一系列的發明，也可以信今而傳後了。

周易尚氏學自序

易理至明也。而說者多誤。說何以誤。厥有二因。一因易理之失傳。太史公曰。易以道陰陽。陰陽之理。同性相敵。異性相感。艮傳云上下敵應。不相與也。謂陽應陽陰應陰爲敵也。中孚六三云得敵。同人九三曰敵剛。謂陰比陰陽比陽爲敵也。陰遇陰。陽遇陽。旣爲敵而不相與。則不能爲朋友爲類明矣。咸傳曰二氣感應以相與。恆曰剛柔皆應。夫陰陽相與相應。則必相求而爲朋友爲類明矣。復曰朋來无咎。謂陽來也。陰以陽爲朋也。損曰一人行則得其友。謂陽行至上而據二陰也。陽以陰爲友也。頤六二曰行失類也。謂陰不遇陽也。至明白也。乃說者于坤上六。謂陰陽相戰爭。相傷而出血矣。于文言謂陰陽相忌相疑矣。以陽遇陽爲朋。陰遇陰爲友爲類矣。同性相敵。異性相感之理一失。于是初四二五三上陽應陽陰應陰者謂之失應。人尙知之。至于陽比陽陰比陰。如夬姤之三四。如頤之六二。說者則茫然。于是全部易。如征凶。往吝。往不勝。壯于趾。其行次且。及慎所之等辭。全不知其故矣。又如陽遇重陰。陰遇重陽而當位者。所謂往吉。征吉。利涉。利往。上合志也。此其義宋蔡淵曾創言之。而未大行。于是全部易爻象若是者。自漢迄清。說者亦莫明其故。而用爻變矣。又如陽爻。下乘重陰者亦多吉。與前臨重陰同也。蹇九三曰內喜之也。說甚明也。乃亦失傳。于是頤上九之利涉。蒙上九漸九三之利禦寇。皆不知所謂矣。有此一因。于是

易解之誤者。十而四五。其次則象學失傳。說卦乃自古相傳之卦象。祇說其綱領。以爲萬象之引伸。並示其推廣之義。如乾爲馬。坤震坎亦可爲馬。乾爲龍。震亦可爲龍。巽爲木。艮坎亦可爲木。非謂甲卦象此物。乙卦卽不許再象也。視其義何如耳。至文王時。又歷數千年。其所演易象。必益廣益精。故周易所用象。往往與說卦不同。說卦以坎爲月。經則多以兌爲月。月生西。坎兌皆位西也。說卦以離爲龜。經則以艮爲龜。離爲龜。取其外堅。艮亦外堅也。此推而益廣也。且有與說卦相反者。說卦以兌爲少女。以艮爲少男。而經則以兌爲老婦。以艮爲祖爲丈夫。說卦以震爲長男。巽爲長女。經則以震爲小子。巽爲少女。女妻卽少女蓋以甲乙言。先生者長。後生者少。而以一人言。則初生者少。行至上而老也。此演而益精也。自東漢迄清。於此等義例。都未能明。見經所用象。爲說卦所無。則用卦變爻變或爻辰以求之。謬法流傳。二千年如一日。加此一因。于是易解之誤者。十而七八矣。以二千年相承之易說。今忽謂其誤。以一人之是。謂千百人皆非。毋乃駭衆。然而易象固在也。易理固存也。本易理以詁易辭。如磁鐵之吸引。由易辭以準易象。如規鑿之相投。固不誣也。以爲之者少。旁無師友之助。以違之者衆。更無聲氣之同。然而我見固如斯也。我說無一創也。以我之說。仍以周易所言之理。推而正說者之誤。俾卦爻辭復其本有之易理也。其先儒舊說。與易理合者。如許慎荀爽九家之詁龍戰。如子夏傳荀爽之詁得敵。靡不因也。其與易理鑿者。雖千百人皆如此言。而必反之。如虞翻以陽遇陽爲朋。陰遇陰爲類等是也。至於卦象之誤者。非我能創造新象。仍周易原有之象。說者失之。今證以左傳國語。周公時訓與卦氣圖。證以焦氏易林

郭璞洞林。迴環互證而得其象也。及其既得而求其本。仍在周易。如坤之爲水爲魚。震之爲輶等象是也。然而我之說不敢必謂其是也。更不敢自匿其非也。故名曰周易尙氏學。以質世之治易者。經者天下之公物。非一人所得私。理者天地之自然。非偏執所能改。倘學易之君子。見是編而揚摧其是非。糾正其疏漏。則日夜所祈禱者也。

說例

一韓宣子適魯。見易象與魯春秋。夫不曰見周易。而曰見易象。誠以易辭皆觀象而繫。上繫云。聖人觀象繫辭焉而明吉凶是也。故讀易者。須先知卦爻辭之從何象而生。然後象與辭方相屬。辭而吉。象吉之也。辭而凶。象凶之也。故甲卦之辭不能施之乙。乙卦之辭不能施之丙。偶有同者其象必同。如小畜六四。升初六。象皆曰上合志。夬姤皆曰其行次且是也。且卦爻辭。往往上語方吉。下語忽凶。上下語不相屬。聖人吐辭爲經。能支離如是乎。象所命也。睽上九曰有豕負塗。載鬼一車。豫九四曰。朋盍簪。剝六五曰。貫魚以宮人寵。聖人庸言庸行。能好怪如是乎。亦象所命也。至王弼掃象。李鼎祚目爲野文。誠以說易而離象。則易辭概无所屬。其流弊必至如宋人之空泛謬悠而後已。茲編所釋。首釋卦爻辭之從何象而生。辭與象之關係既明。再按象以求其或吉或凶之故。還易辭之本來。

一易理無不相通。如大壯初九征凶。以陽遇陽也。而夬初九之往不勝。大有初九之無交害可知。又如隨初九出門交有功。无妄初九往吉。以前遇陰也。而大畜九三之利往可知。又如同人六二吝。以比與應相嫉。遠近不能兼取也。而咸六二之居吉。遯六二之執用黃牛可知。茲編雖多創解。然皆以易解易。非故異先儒。

一乾坤二卦爲六十四卦之根本。其六爻爻辭。祇以明上下。別貴賤。及卦運之興衰。初終之時位。樹六十四卦之準則。至于有无應與。當位不當位之恆例。皆未之及。而六爻之後。復贅以用九用六數語。皆所以明筮例。及用九用六之故。學者須于此先知之。

一易辭本爲占辭。故其語在可解不可解之間。惟其在可解不可解之間。故能隨所感而曲中肆應不窮。所謂仁者見仁。智者見智也。此易理也。易理與義理不同。例如程傳說黃裳元吉。云五尊位。臣居之則羿莽。女居之則女媧武氏。故聖人著爲大戒。陳義可謂正大矣。而於易理則大背。以易辭並無著戒之意也。此編只明易理。至其用則任人感觸之。

一卦名皆因卦象而生。卦名不解。因之卦爻辭亦不解。如睽爲反目。謂兩目不相聽。故一目見爲此。一目見爲彼。三上爻辭是也。此義不知。遂多誤解。又如節爲符節。合以取信。說文所謂竹約也。乃說者概釋爲撙節制節。卦義既誤。故卦爻辭甘苦之義均不知。六十四卦如此者甚多。茲編所釋。先及諸卦得名之義。其有沿革者。亦並考其異同。如睽歸藏作瞿。夬歸藏作規等是也。

一說易之書。莫古于左傳國語。其所取象。當然無訛。乃清儒信漢儒。而遺左國。坎變巽。左氏曰。夫從風。以坎爲夫也。曰震車也。曰車有震武。以震爲車爲武也。震變離。曰車說其輶。以震爲輶也。尤要者。明夷之謙。卽離變艮。左氏曰當鳥。是以艮爲鳥也。鳥黔喙也。于是小過飛鳥之象有著。乃後人于此象均不識。依漢儒以震爲夫。以乾爲武。夫易師莫先于左氏。其可信較漢儒爲何如。故茲編所取象。

除以易證易外。首本之左傳國語。以明此最古最確之易象。

一時訓爲逸周書之專篇。書云周公所作。其氣候皆以卦象爲準。故卦氣圖與時訓不能相離。其所準易象。與易經所關最鉅。如于屯曰雁北鄉。以屯上互艮爲雁。于巽曰鴻雁來。亦以巽爲鴻雁。而漸之六鴻象得解。以艮爲蛤爲蜃。艮外堅故與離同象。而易之貝象龜象得解。以兌爲斧。以艮爲巢爲鷹。皆賴以解。易而用覆象半象尤精。如于復曰麋角解。震爲鹿。艮爲角。角覆在地。故曰解。于鼎下曰半夏生。離爲夏。巽爲艸。初二半離。故曰半夏。而昔儒無知者。除易林外茲編所取象。除左國外。多以時訓爲本。

一焦氏易林。後儒皆知其言易象。然以象學失傳之故。莫有通其義者。如以坤爲水。以兌爲月。以艮爲火。以巽爲少妻。以兌爲老婦。以正反兌正反震爲爭訟。爭訟卽有言爲說卦所無。而皆爲經中所有。說者因誤解經。而失其象。故于易林亦不能解。愚求之多年。亦無所入。後讀蒙之節云。三夫共妻。莫適爲雌。子無名氏。翁不可知。因節中爻震艮。上坎三男俱備。故曰三夫。祇下兌爲女象。故曰三夫共妻。震爲子。艮爲名爲翁。上坎爲隱伏。故曰無。曰不可知。字字皆從易象生。由此以推。凡林詞皆豁然而解。故茲編取象。除左傳國語卦氣圖外。多本易林。

一易中古文甚多。如場作易。趙起作次且。趾作止。佚作失等。不可勝數。先儒除晁說之外。知爲古文者甚少。于是竟讀易爲難易。失爲得失。茲編非好異。凡易之古文。必仍其舊例。如需于血。卽需于沍是也。

一古書多音同通用。而易尤甚。如磐。作盤。作槃。作般。連如。作驢如。甲坼。作甲宅。治容。作野容。刑劇。作形渥。作刑屋。經綸。作經倫。羸。作藁。作纍。作縲。作累之類。皆音同通借。無是非之可言。而世儒必以習見者爲非。罕見者爲是。似未觀其通。茲編反是。

一易用覆象。如大過九五之枯楊。用覆巽。豐上六用覆艮。重門擊柝。以豫上震爲覆艮。荀爽及虞翻皆知之。而不能推行。于是困之有言不信。蒙之再三瀆。用覆象者。遂永不得解。豈知左氏明夷之謙曰。干人爲言。敗言爲讒。謙上震。震爲言。下艮震覆。故曰敗言。言相反故曰讒。易林本之。凡正反震正反兌相背者。不曰爭訟。卽曰有言。于是困震之有言皆得解。此似我創言之。然仍左氏及易林所已言。我拾其說以證易耳。仍非我說也。

一卦有卦情。中孚之鶴鳴子和。以中爻正反震相對也。故下之震鶴一鳴。三至五卽如聲而反。故曰子和。舊解不知子指反震皆自鳴自和又如兌。朋友講習。以初至五。正覆兌相對。若對語然。故曰講習。曰商兌。夬四之聞言不信。兌爲耳。故曰聞。兌爲言。乾亦爲言。乃兌言向外。與乾言相背。故曰不信。此似我創解。然左傳歸妹之睽。曰西鄰責言。不可償也。歸妹兌爲西。震爲鄰。故曰西鄰。而震爲言。震言外向。與兌言相背。故曰責言。與夬之聞言不信義同也。仍非我說也。

一同此一爻。而爻辭吉凶不同。如頤六五曰。居貞吉。下又曰不可涉大川。家人九三曰。嗃嗃悔厲吉。下又曰婦子嘻嘻終吝。先儒無詳其故者。豈知爻有上下。由此爻上取。而象吉者。下取或凶。下取而象吉

者。上取或凶。如漸九三婦孕不育凶。下又曰利禦寇是也。易詞如此者不可枚舉。此三爻特其例耳。治易者如明此例。則事半功倍。

一易辭與他經不同。他經上下文多相屬。易則不然。因易辭皆由象生。觀某爻而得甲象。又觀某爻而得乙象。故易辭各有所指。上下句義不必相聯。如損象曰利有攸往。指上九也。下又曰曷之用。二簋可用享。震爲簋。坤數二。故曰二簋。則指上下互卦也。又如困貞大人吉。以二五皆陽也。有言不信。以三至上正反兌相背也。舊解無知者。故于上下句。常強爲聯屬。致枵枵不合。茲編遇此。先指明易辭之說。何爻何象。至其意義之不相屬者。亦必指明。此自爲一義。

一卦爻辭往往相反。如履象曰不咥人。爻曰咥人凶。无妄象曰不利有攸往。爻曰往吉。是也。又大象每相反以見義。如同人曰辨物。无妄曰時育萬物。是也。先儒无知其故者。豈知卦有卦義。爻有爻義。象有象義。絕不同也。

一易辭皆觀象而生。象之所有。每爲事之所無。故不能執其解。如蒙六三曰見金夫。艮爲金爲夫。金夫指上爻艮。金美稱。左氏所謂式如玉。式如金。是也。朱子謂金夫。蓋以金賂己而挑之。若魯秋胡之爲。是執其解也。又若豫九四之朋盍簪。震爲髮。艮爲簪。而坎爲穿。陰以陽爲朋。以一陽橫貫於羣陰之間。有若簪之括髮。故曰朋盍簪。爲事之所必無。理之所難有。而在易則爲維妙維肖之取象。杜詩云盍簪喧歷馬。謂羣馬繫于一杠之上也。解此語可謂明白如畫矣。乃執者泥其語爲難通。謂簪名漢時始有。

韓非子。周主亡玉簪。李斯逐客論。禮經。均有。而讀爲戢爲撝。又如大畜上九。何天之衢。謂天衢如何負何。而訓爲當。爲語詞。豈知艮爲天失傳象爲背。震爲大塗。于象恰合。若泥其解。則易辭十八九皆不能通矣。故讀易祇可觀象玩辭。而不可泥其解。

一解經惟求其是而已。無所謂派別。自王弼掃象。以野文說易。興於唐而大盛於宋。風氣所播。觀象繫辭之義。至是遂亡。然如邵子之先天卦位。與易經合。既濟以離爲東。坎爲西。與最古易師之左傳合。離變乾而曰敬如君所與漢儒合。易林多用先天象。康成注月令明言巽在未方。易學得是。經始大明。則不能不重也。茲編概不敢盲從。毛黃諸俗說。以言先天象爲戒。

一漢儒以象數解易。與春秋士大夫合。最爲正軌。乃鄭玄於象之不知者。則用爻辰。取象於星宿。虞翻則用爻變。使變出某卦。以當其象。若此者亦不敢從也。

一易義有絕不能解者。先儒雖強說之。實皆無當。如同人九四之吉。自象傳不能詳其故。小畜九二同。易義如此者多有。茲編遇之。必詳言其難解之故。偶有揣測。亦不敢自信也。

一吳摯父先生易說。于大畜云。凡陽之行。遇陰則通。遇陽則阻。故初二皆不進。而三利往。于節云。易以陽在前爲塞。陰在前爲通。初之不出。以九二在前。二則可出而不出。故有失時之凶。此實全易之精髓。爲二千年所未發。愚于易理粗有所入。實以此數語爲之階。故特揭出。以尊師說。

一眼前事物。皆爲易理。俯取卽是。例如雄雞與雄雞見則死鬪。驢馬尤甚。若有宿仇者。是何也。陽遇陽

也。大畜初九曰。有厲利已。厲危已止也。初有應。但爲二三所隔。遇敵故曰有厲。止而不動。則災免矣。象曰不犯災。正釋厲義也。乃舊解謂厲指四爻。厲若在四。尙何貴此應與乎。不識災卽厲。命二變成坎。以取災象。豈知大壯初九。壯于趾征凶。夫初九。壯于前趾往不勝。壯傷也。其故皆在陽遇陽。傷之與災。有何別乎。故夫目前易理。望之似淺。推之實深。昧厥目前。易雖一再言之。總不能知。

周易尚氏學總論

第一論周易二字本詁

吳先生曰。易者占卜之名。祭義。易抱龜南面。天子卷冕北面。是易者占卜之名。因以名其官。史記大宛傳。天子發書易。謂發書卜也。又武帝輪臺詔云。易之卦得大過。易之下之也。說者以簡易。不易。變易。釋之。皆非。愚案。史記。禮書云。能慮勿易。亦以易爲占。簡易不易變易。皆易之用。非易字本詁。本詁固占卜也。

至于周字。鄭康成注周禮三易。于連山歸藏。皆詳釋其義。于周易則缺而不釋。然康成易論云。周易者。言易道周普無所不備。賈公彥云。連山歸藏皆不言地號。以義名易。則周非地號。周易純乾爲首。乾爲天。天能周匝于四時。故名易爲周也。孔穎達則據世譜等書。謂連山爲神農。歸藏爲黃帝。連山歸藏既皆是代號。周易亦然。謂鄭說無據。按三易之名。皆緣首卦。連山以艮爲首。上艮下艮。故曰連山。歸藏以坤爲首。萬物皆歸藏于地。故曰歸藏。周易以乾爲首。乾元亨利貞。卽春夏秋冬。周而復始。無有窮期。故曰周易。鄭論及賈疏所言是也。孔疏所據非也。神農之兼號連山。黃帝之兼

號歸藏。乃因其所演之易名。後人偉其功。卽以爲號。非其易原無名。連山氏所演者。卽名連山。歸藏氏所演者。卽名歸藏也。何言之。連山歸藏皆因卦首之艮坤而得名。顯而易見。二帝之所以有此兼號者。亦猶神農創建農功。卽以神農爲號耳。且連山歸藏。先儒亦謂爲夏商易。益可證連山歸藏之名乃因易而起。非以連山歸藏標代號。如爲代號。胡能又謂爲夏商。孔氏之觀察誤也。周者易之理。十二消息卦周也。元亨利貞周也。大明終始。六位時成。周也。彖傳分釋元亨利貞既畢。又曰首出庶物。卽貞下啓元也。周也。古聖人之卦氣圖。起中孚。終頤。周也。此其理惟揚子雲識之最深。太玄以中擬中孚。以周擬復。終以養擬頤。其次序與卦氣圖。絲毫不紊。而於玄首。則釋其所以然。其罔直蒙酋冥。卽元亨利貞。故以中羨從爲始。更辟廓爲中。減沈成爲終。循環往來。無一非周之理。而於三易終西北始西北之義。尤推闡無遺。西北者戌亥。乾鑿度以戌亥爲天門。莊子云。有乎生。有乎死。有乎出。有乎入。入出而无見其形。是謂天門。天門者无有也。萬物出乎无有。蓋一歲之事。至乾而終。復自乾而始。有无出入。皆以戌亥爲樞紐。故先天艮居戌亥。連山以爲首。月卦坤居戌亥。歸藏以爲首。後天乾居戌亥。周易以爲首。明乎此。而周字之解詁。不待煩言矣。

第二論周易大義之認識

易本用以爲筮。故有卦辭。又有爻辭。其所言皆天地間公例公理。昔人謂專言天道者固非。謂專言

人事者亦非。否泰往來。剝復循環。天道與人事。无二理也。包括萬有。孕育深宏。凡哲學无不枯源于是。而居易俟命。與時偕行。尤學易之準則。時而泰。即使飛龍在天。亦不必喜。時過則亢矣。時而否。潛龍勿用。亦不必憂。時及則舍發也矣。繫辭云。危者使平。易者使傾。其有益於身心性命甚大。故自古深于易者。无不洞達天人。有自然之樂。如宋之邵雍。晉之郭璞。魏之管輅。其最著者也。

第三論古易之類別

伏羲既畫卦。必更有書以申明其義。周禮。小史掌三皇五帝之書。是三皇已有文字。特亡耳。後人謂黃帝始造字。黃帝集其成。非始於黃帝。伏羲祇畫卦无文字者。謬也。周禮太卜掌三易之法。一曰連山。二曰歸藏。三曰周易。其在春秋時。皆三易並占。左傳國語。所謂艮之八。泰之八。及所引繇辭爲周易所无者。先儒皆謂爲二易之辭也。後連山歸藏亡於晉永嘉之亂。祇存周易。今所誦讀者是也。

第四論周易誰作

左傳韓宣子適魯。觀易象與魯春秋曰。吾乃知周公之德。與周之所以王也。周公之德。由魯春秋知之。周之所以王。則由易象知之。蓋文王演易。其憂勤惕厲之精神。備見于易辭。故一觀易辭。凡易辭皆易象。即知文王之所以王。是春秋人以文王演易。繫辭云。易之興也。其當殷之末世。周之盛德邪。

當文王與紂之事邪。是孔氏以文王演易。後太史公揚子雲之屬。亦以文王演易于美里。旣曰演易。則卦爻辭皆文王所作。自西漢以前。無異議也。祇京氏積算法云。西伯父子。推爻考象。加乎星宿。局于六十四所。二十四氣。夫以五星二十八宿及二十四氣入卦。乃占筮之事。京舉此以明其術之所本。正言周公作卦氣圖與時訓也。非謂周公作易。至東漢王充馬融陸績之儔。忽謂文王演卦辭。周公演爻辭。孔穎達朱子等皆信之。而究其根據。則記載皆無。孔穎達以升六四言王。明夷六五言箕子。旣濟九五言西鄰受福。及韓宣子見易象。知周公之德爲解。豈知升六四言王以震爲王。震爲陵。形兩歧。故曰王用亨于岐山。岐歧通也。即使有所指。亦指殷王。文王終身服事殷。故盼王來享。情見乎辭。今謂不合自稱爲王。以文王追諡爲說。故疑爲周公。其謬一也。至明夷六五之箕子。與彖傳之箕子。絕對不同。彖傳之箕子。紂臣也。六五之箕子。則趙賓讀爲菱茲。劉向荀爽讀爲菱滋。王弼讀爲其茲。蜀才讀爲其子。而焦氏易林則讀爲孩子。孩子指紂。與論衡讀微子之刻子爲孩子同也。古多音皆音喜。皆與箕音通。且以六五之君位。而使紂臣居之可乎。馬融知其不可。以箕子演疇。有帝王之德爲解。然何以解于箕子之明夷。彖傳謂箕子晦其明。今謂箕子明夷。則竟不明矣。其謬二也。至旣濟九五之東鄰西鄰。原以離坎爲東西。以離爲牛。以互震爲祭。純是觀象繫辭。乃漢人忽有東鄰指紂。西鄰自謂之曲說。在文王固不合。在周公尤不合。周公時何來紂與爲鄰。且語意之膚淺。聖人有若是者乎。其謬三也。至韓宣子觀易象之語。解已見前。且杜注云。易象春秋。文王周公之制。謂文

王制易象。周公制春秋。解甚分明。今忽因吾乃知周公之德一語。述孔舊說。謂周公遭流言。亦得爲憂患。必亦演易。尤爲虛妄不實。其謬四矣。故夫周易卦爻辭。純爲文王一人所作。其欲加入周公者。毫无根據。不可信也。西谿易說云。文王囚中演易。周公未必生。卽生亦子雲家之竄鳥也。豈能演易。駁孔說至詳。

第五論重卦

孔穎達云。王輔嗣以爲伏羲重卦。鄭玄以爲神農重卦。孫盛以爲夏禹重卦。史遷以爲文王重卦。今以諸文驗之。說卦云。昔者聖人之作易也。幽贊于神明而生著。凡言作者創造之謂。非伏羲不足以當之。故乾鑿度云。垂皇策者羲。明著在六爻之後。非三畫之時。伏羲旣用著。卽伏羲已重卦矣。今依王輔嗣爲得其實。按孔說是也。鄭以爲神農重卦者。蓋以周禮太卜。有三易經卦皆八。其別皆六十有四之文。鄭彼注云。別卽重卦。而世譜等書。謂神農兼號連山。故鄭謂其始重卦。惟杜子春謂連山爲宓戲易。賈公彥云。連山以艮爲首。上艮下艮。故曰連山。若然。宓戲畫卦。卽重爲六十四卦。愈無疑也。

第六論十翼誰作

自太史公揚子雲班孟堅諸儒。皆以爲孔子所作。无異論也。至宋歐陽公始疑之。然如乾坤彖傳。除

揚子雲外。无有通其說者。蓋非聖人不能爲也。其餘若文言之同聲相應。同氣相求。陰凝于陽必戰諸章。及繫辭之維妙維肖。蹈虛御空之語。雜卦之錯雜位置。鼓舞顛倒之言。試思誰能爲之。又誰復敢如此爲之。卽零辭斷句。若小象。朱漢上謂其音聲皆與律呂相應。律呂之學。爲愚所不知。以解經論。如謂大畜九三爲上合志。升初六亦謂與上合志。頤六二謂行失類。皆全易大旨所關。蓋周易若无十翼。左右推測。與二易等亡耳。人仍不知其義蘊也。惟十翼解釋元亨利貞之義。彖象傳與文言不同。又或彖傳與家傳。文言與文言亦不同。由是知十翼之義。有采集古易說者。如元者善之長八句。左傳襄九年。穆姜曾述此古義曰。然固不可誣也。謂此古易說可信也。又如說卦帝出乎震八句。乾爲天一節。文與連山同。而夫子采之。此其所可考者。其不可考。如文言一再釋乾六爻之義。疑亦采集古說。故義不同。蓋自宓戲至孔子。有數千年之久。前後筮法。雖有不同。而理則无二。其間易說必多。其爲夫子所常常稱述者。門人從而輯錄之也。有蒼萃夫子之說者。夫子之說。如彖傳言時乘六龍以御天。言雲行雨施。文言亦言之。而上下繫辭意重複者尤多。蓋皆夫子所說。前後不一時。而記錄者亦未必爲一人。故辭重意複如是。而非夫子自爲也。蓋周易得夫子之十翼。門戶始開。而十翼幽奧之辭。其難解過於周易。朱子云有文王之易。有孔子之易。孔子之易卽十翼。故十翼非孔子不能爲。不敢爲。而紀錄十翼者。則孔子之門人也。疑雜卦或夫子自爲之。其錯次卦位。上經先一陽卦。次二陽三陽次四陽。而損益則次於上經之第十卦。否泰則次於下經之第十卦。其位次與經同。其義蓋與經大異。此等改作。七十子

不敢也。惜其大義失傳久。元有能說者。

第七論十翼篇名

十翼篇名。史漢皆未詳說。依揚子雲所擬。則象傳文言說卦序卦雜卦共五篇。而玄攤。玄瑩。玄掄。玄圖。玄告。皆擬繫辭。似繫辭原爲五篇。足成十翼之數。而孔穎達謂經有上下。則以上象一。下象二。上象三。下象四。上繫五。下繫六。文言七。說卦八。序卦九。雜卦十。後儒又各有分配。然無關宏旨。故略而不詳。

第八論象象連經始于何人

象象原各自爲篇。而今本皆附于經文之下。後儒謂費直專以十翼解易。象象連經。始于費直。此無稽之言。史但言直以十翼說易耳。安見其以象象連經。不合一。史言費直无章句。以象象連經。是有章句也。不合二。劉向校諸家易。獨費直與中古文合。設以象象連經。向早言之矣。尙能與中古文合乎。不合三也。考三國志高貴鄉公傳云。象象本不連經。今鄭玄注連經何也。是以象象附於經文下者。實始于康成也。

第九論傳易之人

漢書儒林傳云。商瞿子木受易於孔子。以授魯橋庇子庸。子庸授江東馯臂子弓。子弓授燕周醜子家。子家授東武孫虞子乘。子乘授齊田何。漢興。田何授雒陽周王孫。梁人丁寬。丁寬授田王孫。田王孫授施讎梁丘賀孟喜。由是得孔氏嫡傳者。有施孟梁丘三家之學。三家中以孟喜能兼明陰陽。畢田生之業。孟喜授焦延壽。延壽授京房。由是又有京氏之學。此外有高相。專明陰陽災變。自言出于丁將軍。費直專以十翼解易。其傳授不明。此西漢傳易之大略也。

第十論消息卦之古

亦曰月卦。曰候卦。曰十二辟卦。爲全易之本根。大玄之綱領。清儒毛西河等。動以月卦屬之漢人。此大誤也。干寶周禮注引歸藏云。復子。臨丑。泰寅。大壯卯。夬辰。乾巳。姤午。遯未。否申。觀酉。剝戌。坤亥。是月卦已見於二易。故坤象及上六爻辭。非用月卦不能解。明以坤居亥也。左傳得復卦。曰南國蹙。射其元王中厥目。以復居子。尤爲顯著。後漢人注易。往往用月卦而不明言。以月卦人人皆知。不必揭出。其重要可知已。

第十一論先後天之方位

八卦圓布四方。各有其位。而先後不同。蓋易之道一動一靜。互爲其根。先天方位。乾南坤北。離東坎西。一陰一陽。相偶相對。乃天地自然之法象。靜而无爲。惟陰陽相對必相交。坤南交乾。則南方成離。乾北交坤。則北方成坎。先天方位。遂變爲後天。由靜而動矣。周易所用者是也。然周易雖用後天。後天實由先天禪代而來。不能相離。故說卦首以天地定位。山澤通氣。演先天卦位之義。再明指後天。誠以經中如坤卦蹇卦。以坤爲西南。從後天位。而既濟九五。則以離爲東。坎爲西。從先天位。說卦不得不兼釋也。及後天方位。以說卦明指人知之。先天方位。至魏晉而失傳。以余所考得。西漢焦延壽。于先天方位无不知。易林皆用之。詳焦氏易詁九家注同人曰。乾舍于離。同日而居。夫曰乾舍于離。是以乾居南也。後荀爽亦曰乾舍于離。相與同居。夫曰乾與離同居。是亦以乾居南。荀爽又注陰陽之義配日月云。乾舍于離。配日而居。坤舍于坎。配月而居。是不惟以乾居南。並以坤居北。又注家人云。離巽之中有乾坤。是以離與乾同位。巽與坤同位。故曰離巽之中有乾坤。又鄭玄注月令。季夏。國多風欸。云辰之氣乘之也。未屬巽辰。又在巽位。按季夏爲未月。巽初主丑未。故未屬巽辰。又在巽位者。言未在西南。巽亦在西南。故云未在巽位。孔氏不知先天卦位。故此句不能釋。是先天方位。在兩漢皆未失傳。至魏管輅。謂乾必宜在南生。以乾位西北爲不合。而疑聖人矣。則以

先天位已失傳。輅但見其尾。不見其首也。歷魏晉迄唐。无有知者。至宋邵子揭出。易本始大明。而黃梨洲毛西河等。以邵氏所傳。本於道士。肆力摺擊。若非是不足以衛道者。而耳食者流。不加詳察。懵然從之。成爲風氣。實左傳閔二年。大有之乾曰。同復于父。敬如君所。所者位也。復者復其位也。離變乾。乾爲父。故同復于父。乾爲君。乾之所在南。離亦在南。故人之敬離位。如乾位也。又成十六年卦遇復。曰南國蹙。射其元。王中厥目。夫乾爲王爲首。凡學易者皆知之。陽氣自北射南。故離目受咎。乾亦在南。故乾首亦受咎而被射也。杜注但知離在南。故能釋目象。不知乾南。故王象元象不能釋也。又萬裕灃云。左傳如山嶽則配天。風行而著于土。川壅爲澤。震之離亦離之震。是艮與乾同位西北。巽與坤同位西南。坎兌同位西。震離同位東。左氏已備言之。故荀爽鄭玄資以注經。他若乾鑿度。言先天義尤多也。

第十二論易理易象失傳後之易派

凡春秋人說易。无一字不根於象。漢人亦然。惟古書皆竹簡。本易散亡。王莽亂起。中原經兵燹者十數年。至漢末。西京易說皆亡。獨存孟京二家。以无師莫能傳習。于是韓宣子所謂易象者。頗多失傳。東漢儒者。知說易不能離象也。于象之知者說之。其不知者。則當敬闕其疑。乃虞翻浪用卦變。鄭玄雜以爻辰。虛僞支離。使人難信。王輔嗣遂乘時而起。解縛去澀。掃象不談。唐李鼎祚所謂野文。

也。自是易遂分爲二派。其以輔嗣爲宗者。喜其無師可通。顯於晉。大於唐。而莫盛於宋。所謂義理之學也。實所謂義理者。於易理無涉。朱子晚年。深悟野文之非。詆訾程傳先辭後象之顛倒。然卒不敢改其本義。以違忤時尙。易學之衰落。蓋莫甚於此時。其以荀虞爲宗者。號爲漢易。以別於野文家。極力復古。惟其所宗。適當易象失傳之後。于象之不知者。仍用卦變爻變。奉虞氏遺法。爲天經地義。于是焦循變本加厲。于象之不知。義之不能通者。以一卦變爲六十四。以求其解。其弊遂與談空者等。然漢學家于訓詁必求其眞。無空滑之病。少越軌之談。一洗元明以來講章之霾霧。于初學較便也。

周易尚氏學卷一 上經

三三三

乾。元亨利貞。

說卦乾健也。子夏傳元始也。亨通也。利和也。貞正也。蓋天之體以健爲用。而天之德莫大於四時。元亨利貞。卽春夏秋冬。卽東南西北。震元離亨兌利坎貞。往來循環。不忒不窮。周易之名。卽以此也。後儒釋此者。莫過於太玄。玄文云。罔直蒙會冥。罔北方也。冬也。未有形也。直東方也。春也。直而有文也。蒙南方也。夏也。物之修長也。會西方也。秋也。物皆成象而就也。有形則復於無形。故曰冥。故萬物罔乎北。直乎東。蒙乎南。會乎西。冥乎北。罔舍其氣。直觸其類。蒙極其修。會考其就。冥反其奧。罔蒙相極。直會相救。出冥入冥。新故代更。將來者進。成功者退。已用則賤。當時則貴。按大玄闡發此四字之理。至矣盡矣。除彖傳外。无此深奧明晰之解釋也。其所謂直蒙會。卽震春離夏兌秋。卽元亨利也。所謂罔冥。卽坎冬。卽貞也。必以二字擬貞者。蓋以子復爲界。子復者冬至也。故由亥坤至子復爲冥。由子復至泰寅爲罔。罔不直也。冬至以後。萬物雖枉屈。不能見形於外。然陽氣已生。與冬至前之冥然罔覺者異矣。故曰罔舍其氣。舍者蓄也。養也。卽彖傳所謂保合太和也。

或曰彖傳釋此。純指天道。然象不曰春夏秋冬。必曰元亨利貞者何也。曰乾之德无所不統。无所不包。言元亨利貞。則天時人事。盡括於其中。

惟此四字。義蘊宏深。非一解所能盡。彖傳象傳。皆釋貞爲正。而大貞。小貞。不可貞。貞吝。貞凶。不利君子貞。義皆不通。而彖象傳遇此皆不釋。似委爲不知而闕疑者。文言曰。貞固足以幹事。又釋貞爲固。然於貞凶貞吝等辭。仍不能通。此彖象傳與文言不同也。

尤異者。乾象傳以萬物資始釋元義。以雲行雨施品物流形釋亨義。以大明終始六位時成釋利義。以天道變化各正性命釋貞義。是以四德平列也。而於屯隨之元亨利貞。則釋曰大亨貞。於臨无妄革之元亨利貞。則釋曰大亨以正。舍利不言。祇爲二德。是彖傳與象傳。所釋不同也。文言曰元者善之長。亨者嘉之會。利者義之和。貞者事之幹。是以四德平列。尤爲顯著。乃下又曰乾元者始而亨者也。利貞者性情也。則以元亨爲一義。利貞爲一義。亦爲二德。此文文言與文言所釋不同也。昔儒以彖象傳釋貞字。與文言不同。疑十翼非出一手。愚謂彖傳當爲一人作矣。而前後所釋不同。文言當爲一人作矣。而前後所詁仍異。此無他。乾健之德。不可名言。似必再三釋。方能畢其義蘊也。

然則元亨利貞四字。究以何解爲當乎。曰其在乾則確爲四德。彖傳之所釋。宏深透闢。於四德各有推闡。而以天道變化。各正性命。保合大和。釋貞之原理。尤幽隱難識。故文言曰。君子行此四德。蓋四德缺一。卽不成爲天時。不成爲人事。故太玄以罔直蒙酋冥擬之。並著其義曰春夏秋冬。指其方

曰東西南北。則亦以元亨利貞爲四德也。

至於貞吝貞凶。不利君子貞。其義與乾元亨利貞之貞。絕不相同。案周禮春官。天府季冬陳玉。貞來歲之蠹惡。注貞謂問於龜卜。鄭司農曰。貞問也。易曰。師貞丈人吉。又左傳哀十七年。衛侯貞卜。國語貞於陽卜。皆以貞爲卜問。而師貞丈人吉。前鄭引以解周禮。是以貞爲卜問。已有先例。愚以爲大貞小貞貞吝貞凶不利君子貞。皆宜詁作卜問。與乾元亨利貞之貞。判然爲二義。不得混同。五經字同而義異者多矣。不獨此也。蓋貞有正義。又有貞固貞定二義。朱子兼采之。曰貞正而固也。豈知兼二義。仍不能盡通。近儒王陶廬先生又以全易貞字皆釋作卜問。於文理可通矣。然若乾之利貞。亦釋作卜問。則乾德不全矣。似不盡協也。

蓋元亨利貞。合之爲乾德。分之爲八卦之德。故卽爲六十四卦之根本。彖或曰亨。或曰元亨。或曰貞。或曰利貞。或曰亨利貞。或曰利貞亨。或曰元亨利貞。似以此四德。爲衡量卦德之準的者。然如无妄凶卦也。亦曰元亨利貞。則似別有標識。而非論卦德。端木國瑚曰。易遇東南方春夏之卦。則曰元亨。遇西北方秋冬之卦。則曰利貞。由其言推之。屯下震春也。故曰元亨。上坎冬也。故曰利貞。隨下震春也。故曰元亨。上兌秋也。故曰利貞。臨下互震故曰元亨。上坤下兌。故曰利貞。无妄下震故曰元亨。上乾爲冬。故曰利貞。革下離互巽。故曰元亨。上兌爲秋。互乾爲冬。故曰利貞。其餘雖不盡當。然大概如是也。總之元亨利貞。春夏秋冬。東南西北。仁義禮智。一二三四。茲數者。合之一之。

混而同之。融會貫通。遺貌御神。天人不分。陶冶既久。然後知此四字。已括盡易理。非言詮所能盡。而能申其義者。前惟彖傳。後惟揚子雲。

初九。潛龍勿用。

九者老陽之數。動之所占。潛隱也。陽息初復。一陽伏羣陰之下。故曰潛。物莫神於龍。故借龍以喻陽氣。復子時當冬至。一陽初生。伏藏地下。故曰勿用。又卦位初爲士。未出世之君子。德亦如是也。

九二。見龍在田。利見大人。

初二於三才爲地。二在地上。故稱田。乾爲大人。二雖不當位而居中。利見者。言大人宜於此時出見也。鄭康成謂利見九五之大人。非。五无應也。陽息至二臨。陽出地上。由潛而顯。大人亦如此也。

九三。君子終日乾乾。夕惕若。厲无咎。

乾爲君子。爲大明。故爲日。晉順而麗乎大明。大明謂離日也。故乾亦爲日。易林困之泰云。陰雲四方。日在中央。以泰上坤爲雲。下乾爲日也。又蹇之咸云。日月並居。以咸上兌爲月。互乾爲日。餘證尚多。皆詳焦氏易詁中。三居下卦之終。故曰終日。曰夕。惕。憂思也。厲危也。憂危故无咎。陽息至三泰。萬物思奮。人事亦如是。三四於三才爲人爻。人居天地之中。宜乾惕有爲也。厲許慎作賁。後易家多從之。而文言作厲。並以危釋厲義。注莫古於十翼。似當從也。

九四。或躍在淵。无咎。

易林九家荀爽。皆以乾爲江河。故乾亦爲淵。躍。起也。四居上卦之下。故曰躍淵。或者。言事不一定。可則爲之。慎審而行。故无咎也。陽息至四大壯。百果草木甲坼之時也。

九五。飛龍在天。利見大人。

五於三才爲天位。又爲天子位。貴而得中。故曰飛龍在天。大人於此。居極尊之位。履萬物之上。嚮明而治。聖人作而萬物覩。故亦曰利見大人。九五陽息至五爻。萬物繁榮。相見之時也。

上九。亢龍有悔。

王肅曰。窮高曰亢。上九居卦之極。故曰窮。在六爻之上。故曰高。高則易危。窮則事盡。故有悔。按乾盈於巳。盈則虧。滿則損。乃天道之自然。太玄云。成功者退。又中首次六云。月闕其搏。不如開明於西。是其理也。

用九。見羣龍无首。吉。

此文王以筮例示人也。易之本爲六七八九。七九陽。八六陰。今遇陽胡以祇言九。不言七。則以周易以九爲用。與二易殊也。用者動也。變也。用九者。言遇九則動。遇七則不動。若作用捨詰。則周易竟不用七八矣。不用七八。則揲著時常不遇九六。將何以爲占。蓋九六占爻。七八占象之義。治易者十六七皆忽之。故其義常晦。見羣龍无首吉者。申遇九則變之義也。九何以必變。陽之數九爲極多。故曰羣。陽極反陰。乃天地自然之理。乾爲首。以陽剛居物首。易招物忌。變坤則无首。无首則能以柔

濟剛。故吉。无。說文云奇字。王育謂天屈西北爲无。此節自古說者常有數蔽。見說吉卽疑爲占辭。不知其申用九之義。一蔽也。見說羣龍。卽疑羣龍指上六爻。不知其言九。二蔽也。見說羣龍无首。卽疑六爻全變。不知其指揲著之三變成一爻言。三蔽也。甚至以此爲爻辭。四蔽也。龍統浮泛。銓釋乾健大義。五蔽也。豈知六十四卦。六爻之後。獨乾坤二卦。有此贅語者。誠以乾坤者陰陽。六十四卦。皆乾爻坤爻所積而成。乃乾卦祇言九不言七。坤祇言六不言八。不申明其故。揲著者胡所遵循。故於乾坤六爻之後。申曰用九用六。復恐人不解用九用六之義。又曰見羣龍无首吉。利永貞也。其詳說皆在周易古筮考中。

彖曰。大哉乾元。萬物資始。乃統天。

繫辭云。彖者材也。材財通。孟子有達財者。而財與裁通。泰傳后以財成天地之道。漢人上書。伏惟裁察。每作財察。然則材卽斷也。卽裁度也。元亨利貞者。彖辭也。此則釋彖者。先儒名曰彖傳。十翼之一也。自太史公揚子雲班固。皆以爲孔子作。乾元者。乾之元氣也。於時配春。故曰資始。統說文紀也。史記樂書樂統同。注統領也。統天者。言乾元之德統領萬物。總治一切。九家釋統爲繼。謂乾德統繼天道。後諸家又有訓統爲始爲本爲合者。皆非也。按此釋元義。

雲行雨施。品物流形。

此釋亨義。於時配夏。乾交坤成坎。坎爲雲爲雨。故曰雲行雨施。坤爲品物。乾入坤。故曰流形。乾施

坤受。和而爲雨。品物潤澤。萬物潔齊。相見乎離。亨之義也。

大明終始。六位時成。時乘六龍以御天。

此釋利義。於時配秋。乾爲日。故曰大明。日始於離。終於坎。以成晝夜。積晝夜以成四時。六位者六爻。爻各有時。時而至秋。萬物成熟。故曰時成。太玄擬之曰。會西方也。秋也。萬物皆成象而就。釋時成之義也。文言曰。利義之和也。兌正秋。兌悅故和。秋成故利也。然乾之六時。果何屬乎。六龍者六陽。乾陽卦。故其所乘之時皆陽時。卽子寅辰午申戌。乾鑿度所謂乾貞十一月子。左行陽時六是也。言乾而乾三子可知。若坤之所乘。則六陰時。乾鑿度所謂坤貞六月未。右行陰時六是也。時乘六龍以御天。卽言乾乘六陽時以統御天道。自漢以來。不知時乘六龍。卽乾乘六陽時。籠統解說。與上句六位時成。无以異。而傳義愈晦矣。

乾道變化。各正性命。保合太和。乃利貞。

此釋貞義。於時爲冬。萬物自有而入无。由動而之靜。故曰變化。太玄擬貞爲冥。曰有形則復於无。故曰冥。又曰冥者明之藏也。出冥入冥。新故代更。入冥者變。出冥者變後而化也。變化者天道必然之理也。性命者精神。太和者元氣。正者定也。周禮天官。宰夫令羣吏正歲會。正月要。注正定也。各正性命者。言萬物入冬而形氣定也。保合者固也。保合太和。言萬物靜定而无爲。正所以養育其生命也。各正性命。保合太和。略如人入夜寢息。休養神明。繫辭云。尺蠖之屈。以求信也。龍蛇之

蟄。以存身也。精義入神。以致用也。正謂此也。貞者元之本。元者貞之著。下文曰首出庶物。卽貞下啓元之義也。後儒捨冬義。以既濟定說貞者。皆未當也。

首出庶物。萬國咸寧。

元亨利貞。相循環者也。貞非寂滅無爲也。乃所以植元亨之基。故夫冬盡春來。貞久元至。首出庶物者。元也。言又復始也。春生震仁。故曰咸寧。萬國咸寧者。言如聖君當陽首出。萬邦有慶也。

乾象傳簡括宏深。自非聖於易者。不能爲也。自漢以來。除太玄外。无有明其義者。而詁六龍爲六位。利貞爲既濟定。尤謬誤之大者。首出庶物二語。解者皆不誤矣。而皆不知於元亨利貞之後。再綴此語者。乃所以示四德循環之義。朱子云。不貞則无以爲元。又曰四德循環无端。知此義矣。乃訖未明指再綴此語之故。豈知六龍與六位无別。則六龍句爲贅語。首出庶物。與萬物資始理同。而不疏其循環之義。則首出句又爲贅語。烏乎可哉。揆厥原因。皆由不確知元亨利貞。卽春夏秋冬。卽東南西北。象傳與文言雖未明言。固皆本此爲義。特義奧語文。後儒遂歧於索解。及揚子雲揭出春夏秋冬。東南西北二義。然後知象傳所言者。皆元亨利貞之原理。及其所以然。義遂明徹。然罔直蒙會冥之演元亨利貞。除范望司馬溫公外。他儒无言者。於以知太玄之難讀。等於易也。

象曰。天行健。君子以自強不息。

繫辭云。象者像也。像此者也。先儒以其推闡一卦之義。謂爲大象。亦十翼之一。王引之云。爾雅行道

也。天行健。謂天道健也。與地勢順爲對文。按左傳襄九年。晉伐鄭。杞人從趙武斬行栗。注行道也。由是以推。疊剝復象傳皆曰天行。皆天道也。凡大象專以人事言。言天道強健不息。君子法之也。潛龍勿用。陽在下也。見龍在田。德施普也。

初陽伏在下。德施普。言陽和之德。普及萬物也。下音戶。詩邶風凱風。爰有寒泉。在浚之下。有子七人。母氏勞苦。下音戶。與苦韻。此亦同也。

終日乾乾。反復道也。

乾盈則反巽。坤盈則復震。乾坤者震巽之終。震巽者乾坤之始。

或躍在淵。進无咎也。飛龍在天。大人聚也。

躍。釋文云上也。初與四相上下。初潛淵底。故曰或躍在淵。言由初躍四也。時可進故无咎。五天位。故曰在天。聚原作造。釋文云。劉歆父子皆作聚。聚與文言雲從龍。風從虎義合。且向歆所據皆中秘古文。必无誤。故從之。

亢龍有悔。盈不可久也。用九。天德不可爲首也。

陽在上乾盈。盈則必虧。故曰不可久。陽極則變。不變則剛柔不能相濟。凶之道也。故无首吉。

文言

此卦爻辭全爲文王作之證也。彖傳申彖意。故曰彖曰。大象申卦義。小象申爻義。故曰象曰。此則合

卦爻辭總述之。而制此乾坤之卦爻辭者。文王也。故曰文言。繹文王所言耳。仍彖曰象曰之例。並無其他深奧。乃劉瓛曰。依文而言其理。故曰文言。姚信曰。乾坤爲門戶。文說乾坤。六十二卦皆放焉。訖不得解。揆其因皆由王充馬融等。謂文王制卦辭。周公制爻辭。後儒惑其說。疑但言文王。或遺周公故也。

曰元者善之長也。亨者嘉之會也。利者義之和也。貞者事之幹也。君子體仁足以長人。嘉會足以合禮。利物足以和義。貞固足以幹事。君子行此四德者。故曰乾元亨利貞。

李鼎祚云。元爲善長。故能體仁。仁主春生。東方木也。亨爲嘉會。足以合禮。禮主夏養。南方火也。利爲物宜。足以和義。義主秋成。西方金也。貞爲事幹。以配于智。智主冬藏。北方水也。李氏此詁。最爲透徹。與太玄罔直蒙酋冥理合。識周易真諦。蓋此八句。爲最古之易說。梁武帝任鈞臺謂爲文王所言。固無根據。然穆姜卽述之。可見其爲舊說。故孔氏復述之。而歐陽公謂左氏著書。亦欲信今傳後。若本孔子之言。而以爲穆姜。其誰傳信之。謂文言非孔子作。按左氏所紀古人言行。皆古人實有是言。有是行。而後紀之。非並無是事是言。盡左氏所造作也。觀穆姜述是語已曰。然固不可誣也。卽謂古易說之可信。而不我欺也。且周易之興。至春秋已數百年。所傳古訓。必已多矣。然則穆姜述之。孔氏復述之。事之常耳。必謂甲述之爲真。乙再述之卽僞。似不然也。左氏非傳易者。其是否見十翼。未可知也。蓋文言皆雜採古易說。薈萃而成之。故此處以四德釋元亨利貞。下又曰元亨

者。始而亨者也。利貞者性情也。又爲二德。與前不同。顯爲採集古說之證。不過古人質。不似後人之必曰某某云耳。

初九曰。潛龍勿用。何謂也。子曰。龍德而隱者也。不易乎世。不成乎名。遯世无悶。不見是而无悶。樂則行之。憂則違之。確乎其不可拔。潛龍也。

吳先生曰。易。當讀如論語丘不與易之易。按孟子易其田疇。趙岐云。易。治也。初潛在下。與世无涉。故曰不易世。不成名。遯世无悶者。言甘於隱遯。不見是而无悶者。言人不知亦不愠也。樂則行。憂則否。堅決自守。利祿不能移。威武不能屈。故曰確乎其不可拔。莊子應帝王確乎能其事。注確堅也。

九二曰。見龍在田。利見大人。何謂也。子曰。龍德而正中者也。庸言之信。庸行之謹。閑邪存其誠。善世而不伐。德博而化。易曰。見龍在田。利見大人。君德也。

二居下卦之中。故曰正中。庸言庸行中也。中則言必信。行必謹矣。閑邪使不入。則中不亂。存誠使不出。則中可守。善世中也。善世而伐。則偏而不中。不伐若己无所與者。則時中矣。人能如是。其德必博。而化必廣。二雖未升五爲君乎。然君德已具。必升五也。

九三曰。君子終日乾乾。夕惕若厲无咎。何謂也。子曰。君子進德修業。忠信所以進德也。修辞立其誠。所以居業也。知至至之。可與言幾也。知終終之。可與存義也。是故居上位而不

驕。在下位而不憂。故乾乾因其時而惕。雖危无咎矣。

修辭者立言也。誠者法則也。居者蓄也。積也。業以積而高大也。爻至三而極。其境至高。識其高而必達其境。故曰可與言幾。說文幾微也。繫云。幾者動之微。吉之先見者也。爻至三而終。其道已窮。識其窮而必赴之。故曰可與存義。義者宜也。

九四曰。或躍在淵。无咎。何謂也。子曰。上下无常。非爲邪也。進退无恆。非離羣也。君子進德修業。欲及時也。故无咎。

欲及時用其學。以濟天下。故不避其嫌。四與初相上下。初潛四躍。初退四進。

九五曰。飛龍在天。利見大人。何謂也。子曰。同聲相應。同氣相求。水流溼。火就燥。雲從龍。風從虎。聖人作而萬物覩。本乎天者親上。本乎地者親下。則各從其類也。

此與象辭之大人聚義同也。乾坤初爻交震巽。故曰同聲相應。上爻交艮兌。故曰同氣相求。中爻交坎離。故曰水流溼。火就燥。溼燥以方位言。荀爽謂坤溼乾燥者是也。坤原居北方。北方溷陰沍寒。故曰溼。乃乾自南往交坤成坎。故曰流溼。乾原居南方。南方炎燉焦灼。故曰燥。乃坤自北往交乾成離。故曰就燥。此於先天南北之乾坤。變爲後天之離坎。至明白矣。乾若不在南。如何流北。坤若不在北。如何就南。故夫方位不明。易本立失。所關至鉅。坤爲雲。易林困之泰云。陰雲四方。又未濟之升云。雲興蔽日。皆以泰升上坤爲雲。乾爲龍。故曰雲從龍。坤爲風。易林訟之剝云。烈風雨雪。大壯

之剝云。乘風駕雨。皆以剝下坤爲風。陸績云。風土氣也。巽坤之所生。故爲風。按陸說是坤本爲風也。乾爲虎。故曰風從虎。風雲者陰。龍虎者陽。言陰必從陽也。乾虎之象。易林師之乾云。三姦成虎。小畜之乾云。東遇虎蛇。皆以乾爲虎。此象昔儒无知者。後會稽如敦和始發之。近師俞樾襲其說。謂虎陽物。君象。京虞以坤爲虎。馬以兌爲虎。皆不如九家以艮爲虎之義長。艮何以爲虎。以得乾之上爻。猶震得乾初亦爲龍也。是乾本爲虎也。故履革皆以乾爲虎。說與易林闇合。聖人作者。乾爲聖人。坤爲萬物。聖人作而萬物覩。卽比象也。仍陰從陽也。天地者陰陽。本乎天者親上。謂陽性上升順行。故乾二必上升坤五。以與陰類。本乎地者親下。謂陰性下降逆行。故坤五必下降乾二。以與陽類。故曰各從其類。陰陽相遇方爲類。與朋友同。若陰遇陰陽遇陽。則爲敵矣。不朋不類也。頤六二曰。行失類也。以所遇皆陰。至明白也。乃由漢迄今。无有察覺者。

按此節舊解所以不明徹者。一由于類字義失。二由于乾虎。坤雲。坤風。象失。三由于不知此說陰陽相感之理。以著大人聚及利見之義。四由于不知此言先天象。故兩兩對舉。震巽對故相應。陰陽相應也。艮兌對故相求。陰陽相求也。水流溼。陽求陰。火就燥。陰求陽也。水火對也。雲從龍。風從虎。言陰陽不相離。乾坤對也。皆所以著陰陽類之理也。二千年以來。惟一茹敦和識虎爲陰象之非。其功過荀虞遠矣。

又親上親下二語。使人識陰陽交之所以然也。親上者居上。親下者居下。則陰陽氣不交而爲否矣。

親上者居下。親下者居上。則陰陽氣接而爲泰矣。各從其類。統相應相求各語而言之也。

上九曰。亢龍有悔。何謂也。子曰。貴而无位。高而无民。賢人在下位而无輔。是以動而有悔也。

在上故貴。失正故无位。失位故无民。乾爲賢人。既非九五之位則臣下也。三无應。故曰无輔。有此三因。故動而有悔。

潛龍勿用。下也。見龍在田。時舍也。終日乾乾。行事也。或躍在淵。自試也。飛龍在天。上治也。亢龍有悔。窮之災也。乾元用九。天下治也。

舍發也。詩舍失如破。易林家人之大有云。仲春孟夏。和氣所舍。皆以舍爲發。作舍棄者固非。以舍爲舒之段字者亦非也。自試者試其可否。上治者居上治民。天下治申用九之故也。用九者剛變柔。言天下未治。治之以剛。若天下已治。則當濟以柔。明用九之故。因天下已治也。此治字與上治治字相呼應。後人因不識用九真諦。故籠統解說。多誤者。○王弼曰。此一章全以人事明之。

潛龍勿用。陽氣潛藏。見龍在田。天下文明。終日乾乾。與時偕行。或躍在淵。乾道乃革。飛龍在天。乃位乎天德。亢龍有悔。與時偕極。乾元用九。乃見天則。

王弼云。此一章全以天氣明之。彖傳曰。時乘六龍以御天。卽乾乘六陽時也。初乘子。陽氣雖生而未出。故曰潛藏。二乘寅。陽出地上。百物思奮。故曰文明。三乘辰。百菓草木。長養興起。故曰與時偕

行。四乘午。陽盈於巳。消於午。陰起用事。代有終。故曰乾道乃革。其以二上變成革爲說者。非也。五乘申。百菓草木。至秋成熟。乾德乃見。故曰位乎天德。廣雅位正也。言正當天德之時也。上乘戌。陽氣將盡矣。故曰與時偕極。陽極反陰。陰極反陽。乃天道之自然。故曰乾元用九。乃見天則。則者法也。一定之理也。

乾元者始而亨者也。利貞者性情也。乾始能以美利利天下。不言所利。大矣哉。大哉乾乎。剛健中正。純粹精也。六爻發揮。旁通情也。時乘六龍。以御天也。雲行雨施。天下平也。

性之與情。清惠棟阮元姚配中洪震煊胡繹諸儒說之。可謂詳盡矣。而利貞何以謂之性情。只以六爻正成既濟爲說。無能瞭解者。則以自東漢以來。於利貞之真諦不明也。易林中孚之坤云。符左契右。相與合齒。乾坤利貞。乳生六子。合齒者交也。卽乾坤利貞也。蓋貞之爲義屬冬。消息卦坤起午。至亥而爲純坤。與原居亥之純乾相遇。陰牝陽。天地合德。陰陽和姤。萬物本以出生。故曰乾坤利貞。乳生六子。然則利貞之爲和合明矣。故六十四卦言利貞者。二五无不交。否則卦體自相交。如中孚小過者也。彖傳曰。各正性命。保合太和。正易林所本也。且夫陽之喜陰。陰之喜陽。乃天地自然之性。本其性之所喜。以陽求陰。以陰承陽而和合焉。則由性而入於情矣。情者欲也。感也。利貞者性情。卽謂陰之凝陽。變化和合。乃天地固有之性情。感之極正者也。崔觀云。不雜曰純。不變曰粹。精者專一。極形容乾德之大。發揮者變動也。言六爻遇九六卽變動也。旁玉篇云。非一方也。通者感

也。應也。陰陽相感故相通。繫辭云。探賾索隱。鈎深致遠。又曰旁行而不流。皆謂正象之旁。尚有伏象。故曰索隱。曰鈎深。曰旁行。而震與巽相對。艮與兌相對。陰與陽絕異也。而文言曰同聲相應。同氣相求。蓋陰陽未合。有陰陽之分。陰陽既合。則和同混一而不分矣。故曰同。同則通。故易辭與易林用象。正伏常不分。而其所以能旁通之故。則仍陰陽相求相感固有之理。故曰旁通情也。時乘六龍義見前。雲行雨施。萬物亨通。故曰天下平。

君子以成德爲行。日可見之行也。潛之爲言也。隱而未見。行而未成。是以君子弗用也。

此言潛龍仍志在行道。與甘心隱遯鳴高者異。然而勿用者時未可也。夫子蓋恐山棲谷隱之流。執初爻爲口實。故首以成德爲行。明儒者之責任。舊解鮮有當者。俞樾云。日爲日之訛。似當從之。

君子學以聚之。問以辨之。寬以居之。仁以行之。易曰見龍在田。利見大人。君德也。

寬博。居蓄也。言蓄德廣博也。君德既具。待升九五。則不惟居之。且行之矣。德者行之本。仁者行之用。

九三。重剛而不中。上不在天。下不在田。故乾乾因其時而惕。雖危无咎矣。

君子終日乾乾夕惕若。是自朝及夕。无不乾惕也。故曰因時。所以然者。初二剛。三仍剛。故曰重剛。陽遇陽則窒。又卦以二五爲中。三失中。上不及五。下不居二。故不敢自懈也。

九四。重剛而不中。上不在天。下不在田。中不在人。故或之。或之者疑之也。故无咎。

侯果曰。下繫云。兼三才而兩之。謂兩爻爲一才也。初兼二地也。三兼四人也。五兼六天也。四是兼才。非正。故言不在人。朱子疑四非重剛。豈知重剛與卦位無涉。乃謂上下爻也。疑則慎。慎故无咎。夫大人者。與天地合其德。與日月合其明。與四時合其序。與鬼神合其吉凶。先天而天弗違。後天而奉天時。天且弗違。而況於人乎。況於鬼神乎。

大人者五。五天位。二地位。上下昭列。尊卑判分。而五與二相往來。故與天地合其德。五坎位。坎月。二離位。離日。火爲水妃。東西終始。故與日月合其明。夫天地日月。先天四中象也。惟大人能則之。元亨利貞。卽春夏秋冬。四時之序。將來者進。成功者退。已用則賤。當時則貴。循環往來。不差忒。故曰與四時合其序。夫震春離夏兌秋坎冬。卽後天之四中象也。惟大人能兼之。消息卦。乾生于東。神也。坤死于西。鬼也。生則吉。死則凶。乃乾雖主生。不殺亦不能成歲功。故生死遞嬗。吉凶代更。亦惟大人能合之。先天之象。天地日月。牝牡雌雄。二儀肇分。法象自然如此。雖天亦不能違。後天之象。震兌坎離。互興迭廢。時而生。時而壯。時而老病死。人如此。物亦如此。天地亦如此。夫事而至于天不能違。人與鬼神。不待言矣。

亢之爲言也。知進而不知退。知存而不知亡。知得而不知喪。

進也。存也。得也。陽之事也。退也。亡也。喪也。陰之事也。六者相對待。相循環。至上九亢極矣。極則宜變而知所返。懵不知返。故有悔也。按此專釋上九亢龍之義。兼申下文用九之故。知退卽用

九也。

其唯聖人乎。知進退存亡。而不失其正者。其唯聖人乎。

此專釋用九之故也。知進復知退。知存復知亡。故用九也。見羣龍无首。卽知退也。卽陽變陰也。故夫用之爲變。觀此而益明矣。自荀虞以來。不知此節係專釋用九之義。浮泛解釋。然文言此處舍用九不釋。是其辭未畢也。李鼎祚知此說用九。而以乾元用九。天下治也爲解。仍不知知退知亡。卽釋用九及无首之義。

周易尚氏學卷二 上經

三三三

坤。元亨。利牝馬之貞。君子有攸往。先迷後得主。旬利。旬西南得朋。東北喪朋。安貞吉。

元亨。謂二五也。乾元亨二五獨吉。坤亦然。元亨並無陰陽之分。虞仲翔謂坤含光大。凝乾之元。終于坤亥。出乾初子。故元亨。案彖傳曰。至哉坤元。是坤亦言元。不專屬乾。坤六五云。黃裳元吉。是其證。乾爲馬。坤爲牝。貞卜問也。利牝馬之貞。卽利牝馬之占也。牝馬柔順。言陰必順陽也。君子有攸往。言具坤德之君子。有所行也。惠棟端木國湖泥於坤爲小人之象。謂君子指陽非也。地道无成。故不可先。先則迷而失道。惟隨陽之後。以陽爲主。則靡不利也。西南得朋。東北喪朋。舊解以朋字類字失詁。故鮮得解者。馬融荀爽以陰遇陰爲朋。虞翻謂失之甚矣。乃用參同契。月三日出庚。震象。八日見丁方。兌象。兌二陽爲朋。庚西丁南。故曰西南得朋。三十日坤象。月減乙癸。癸北乙東。故曰東北喪朋。苦心搜索以求朋象。豈知兌之爲朋。以陰遇陽。非以二陽。陽遇陽同人謂之敵剛。陰遇陰中孚謂之得敵。然則虞說與馬荀背易理等耳。然支離穿鑿。則過於馬荀矣。復曰朋來无咎。蹇九五曰。大蹇朋來。解九四曰朋至斯孚。皆以陰得陽爲朋。而坤逆行。消息卦自西而南陽日增。自東

而北陽遞減。增則得朋。減則喪朋。而坤道无成。故安靜貞定則吉也。

彖曰。至哉坤元。萬物資生。乃順承天。坤厚載物。德合无疆。含弘光大。品物咸亨。

何休公羊傳元年注云。元者氣也。萬物資坤元以生。坤元實順天以行。故天道廣大无疆。惟坤之德能合之也。萬物皆孕毓於地。故曰含弘。萬物皆成長於地。故曰光大。光大則咸亨矣。

牝馬地類。行地无疆。柔順利貞。君子攸行。

陰陽合爲類。乾爲馬。故馬與地類。而牝馬尤與地類。君子攸行者。謂柔順利貞之德。爲君子所法也。九家謂乾來據坤。爲君子攸行。失傳旨。

先迷失道。後順得常。西南得朋。乃與類行。東北喪朋。乃終有慶。

夫曰行曰終。乃自西而南。自東而北而逆行也。非以西南東北相對待也。明矣。消息卦自西而南陽日增。故曰西南得朋。陰以陽爲類。故曰乃與類行。消息卦自東而北陽遞減。故曰東北喪朋。夫事有終必有始。喪朋之地始於巳。終於亥。坤行至亥。陽喪盡而爲純坤。乃反曰有慶者何也。則以周易之位。乾原居亥。純坤與純乾相遇。天地合德。萬物由此出生。故曰有慶。易凡言有慶者。皆謂陰遇陽。大畜晉睽六五。皆上承陽。故皆曰往有慶。易林中孚之坤云。符左契右。相與合齒。乾坤利貞。乳生六子。太玄玄文云。入冥出冥。新故代更。皆說有慶之故也。後儒皆承用虞氏解。謂坤行至西南。月又將生明爲有慶。是不知終爲何處也。終者艮象亥方。周禮宰夫。及大司徒歲終注。皆曰周季冬也。

周季冬爲亥月。又爾雅釋天云。月在壬曰終。壬亦亥方。是終指亥方甚明。說卦云。艮成終。終於亥也。故夫洞明易理者。莫過於焦延壽與揚子雲也。焦氏易詁。有詳說。可參閱。

安貞之吉。應地无疆。

坤道主靜。故曰安。易林云。乾坤利貞。乳生六子。安貞卽利貞。利貞卽天地合德。合則相感。故曰應地无疆。

象曰。地勢坤。君子以厚德載物。

王弼曰。地形不順其勢順。是王弼之本。作地勢順也。宋衷曰。地有上下九等之差。故以形勢言其性。夫曰性則亦讀爲順也。而皆未引說卦坤順爲詁。是愈證宋王本之皆作地勢順。故不引說卦爲證。蓋坤古文作𡳿。而𡳿爲順之段字。故宋王皆讀𡳿爲順。自正義改作坤。而順字遂无由識。至清儒王引之等。據說卦乾健坤順之文。謂天行健。卽天行乾。地勢順卽地勢坤。夫乾坤之爲天地。不惟說卦言之。象象傳並言之。故以天代乾。以地代坤。今不從宋王注。以坤爲順之訛字。若作𡳿則不訛。謂天行健卽天行乾。地勢順卽地勢坤。是天行天地勢地也。尙可通乎。王又謂𡳿卽川字。川與坤順聲近。故借川作坤。是尤不安。夫坤古作𡳿。是古文作𡳿也。隸書原以變古文之繁重。若𡳿字本卽簡易。故隸書常因而不改。大戴禮保傳篇。易之乾𡳿。家語執轡篇。此乾𡳿之美。後漢輿服志。堯舜垂裳。蓋取諸乾𡳿。北史太和三年。𡳿德六合殿成。又坤字之見於漢碑者。無不作𡳿。再徵之金文。周師匍敦

銘云。用作𠄎宮寶。王陶廬云。𠄎卽坤字。由此證𠄎卽坤。非有所借也明矣。引之謂順因川而得聲。愚以爲順因𠄎而得聲。推之訓馴巡紉等字皆然。引之蓋泥於說文坤下无重𠄎之文。謂𠄎非坤本字。王陶廬云。玉篇𠄎下注曰古文坤字。廣韻亦曰古文以坤爲𠄎。二書皆胚胎於說文。據此說文必有𠄎字。後奪之耳。不然二書不敢臆造。又云釋文原云。𠄎本又作坤。坤今字。今改爲坤本又作𠄎。𠄎今字。文理謬戾已極。是皆因孔氏改𠄎作坤。後人遂并釋文而亦改矣。按王說是也。詩周頌有夷之行。釋文云。𠄎苦魂反。字亦作坤。此處釋文應同。然則坤本作𠄎。徵之金石傳記无不然。漢本易之作地勢順。徵之宋注王注亦无不然。然今本易何以訛作地勢坤。則以漢本易。坤原作𠄎。乃借𠄎爲順也。何言之。順旣因𠄎而得聲。在古文例常段借。如大壯卦以易爲場。夬以次且爲越趨。小畜以血爲恤。皆因其得聲之字而段借。今以𠄎段順。正其例耳。孔氏知𠄎卽坤。不知𠄎爲順之段字。遂竟改作坤矣。若宋王則皆讀作順也。以宋王本皆作𠄎也。作𠄎則人易知爲順矣。其以說卦爲解者。於字之沿革。盡失其義。厚德載物者坤。君子取以爲法。虞仲翔必謂君子爲乾亦非。

又易以𠄎爲大川。焦氏易林以𠄎爲水。爲江河淮濟。九家注疊亦以坤地爲水。邵子坤水之象之所本也。蓋𠄎卽川字卽水字。故易林復以坎爲土。邵子復本之。疑古以水土爲一物。能合而不能分。比曰地上有水。師曰地中有水。證以古文。稽之卦象。而益信矣。金文水作𠄎。兩旁畫不連。劉潤琴云。效鼎涉作𠄎。殷契衍作𠄎。困作𠄎。又永字從水。而金文作永。是皆水字兩旁畫皆不斷。可證𠄎川水三字。古文皆同。

初六。履霜。堅冰至。

陽進陰退。陽順陰逆。故陽自七進九爲老陽。陰自八退六爲老陰。陰極則變。故易用六也。於卦爲姤。時當夏至。一陰初生。初震爻故曰履。陰微故以霜爲喻。乾爲冰爲堅。坤行至上當亥方。與乾相遇。故曰堅冰。言五月微陰初見。馴至亥月而極寒。必然之勢。當憬然悟也。干寶以五月无霜。謂陰氣既動。則必至於履霜。必至於堅冰者非也。霜卽喻此微陰。微陰見故曰履霜。非有待於後也。其待者乃堅冰也。

象曰。履霜。陰始凝也。依郭京讀馴至其道。至堅冰也。

乾爲堅冰。言陰生於午。至亥純坤與純乾相遇。故曰至。

六二。直方大。不習无不利。

二爲坤本位。坤二之利。與乾五之利同也。後人泥於乾動爲直。及小往大來之文。必以直大屬之乾。於是經義遂迂曲而不得解。豈知直方大皆謂坤。象傳文言所釋至明。文言云。直其正也。正謂二。二得位中正。故曰直。象傳云。含弘光大。大謂坤。坤萬物資生。焉得不大。蓋方者地之體。大者地之用。而二又居中直之位。故曰直方大。後儒見象傳未言大。便疑大爲衍文。然陸德明時。漢魏六朝本具在。從无謂大字衍者。況文言引亦有大字乎。陰消至二遯。前承重陽。得主有利。故不習无不利。文言釋曰。不疑其所行。正謂二承陽也。

象曰。六二之動。直以方也。不習无不利。地道光也。

六二與九五相上下。故曰動。陰順陽。故曰地道光。

六三。含章可貞。或從王事。无成。有終。

坤爲文。故曰章。坤閉故曰含章。陰消至三否。正君子儉德避難之時。故雖有文章。含而不露。貞靜自守。荀虞謂三陽位。以陰據其上。故曰含章。後儒多從之。非也。文言釋章爲美。仍坤象。非謂陽位也。否上乾爲王。三承重陽。故曰從王事。三不當位故或之。與或躍在淵義同。言慎審也。陰順陽。故无敢成。成法也。式也。言不敢作法也。陰始姤。代乾終事。故曰有終。○按純坤无乾。王事之象何來乎。須知乾息從復始。坤消從姤始。故復姤亦爲小父母。坤消至三。上乾如故也。故曰從王事。彼夫訟三曰從王事。履三曰武人爲于大君。皆以上承陽。茲與之同。觀初爻曰。履霜堅冰至。言陽將以次消也。故卦雖无乾。爻辭皆視乾而繫也。先儒坐不明此理。又鮮能以易解易。故說王事皆无著。

象曰。含章可貞。以時發也。或從王事。知光大也。

時不可。故俟時而發。或從王事。知時至矣。故曰光大。

六四。括囊。无咎无譽。

坤爲囊。揚子方言。括關閉也。坤閉故曰括囊。陰消至四八月觀。天地將閉塞矣。陰在三否。陰陽平均。故或從王事。至四則陰盛陽衰。時不可矣。故括囊。言无所表著也。无與于世。故无咎譽。

象曰。括囊无咎。慎不害也。

慎故无咎。不害即无咎也。

六五。黃裳元吉。

坤爲裳。色黃。故曰黃裳。坤爲下。裳者下飾。五位正中。黃者中色。故曰黃裳元吉。元者善之長。五位極尊。故曰元。元謂五。大有鼎皆曰元吉。皆謂六五。毛奇齡謂五降二承乾爲元吉。以元專屬乾。非也。

象曰。黃裳元吉。文在中也。

坤爲文。黃裳文飾。言所以吉者。以居中位也。

上六。龍戰于野。其血玄黃。

陰至上六。坤德全矣。故萬物由以出生。然孤陰不能生也。荀爽云。消息之位。坤在于亥。下有伏乾。陰陽相和。故曰龍戰于野。坤爲野。龍者陽。說文壬下云。易曰龍戰于野。戰者接也。乾鑿度云。乾坤合氣戌亥。合氣即接。九家云。玄黃天地之雜。言乾坤合居。夫曰相和。曰合氣。曰合居。則戰之爲和合明矣。皆與許詰同也。而萬物出生之本由于血。血者天地所遺氤氲之氣。天玄地黃。其血玄黃者。言此血爲天地所和合。故能生萬物也。易林說此云。中孚之坤符左契右。相與合齒。乾坤利貞。乳生六子。夫曰符契。曰合齒。則乾坤接也。即龍戰于野也。消息卦。坤亥下即震子出。故曰乳生六子。彖傳

云。乃終有慶。慶此也。惟荀與九家。皆以血爲陰。仍違易旨。易明言天地雜。則血非純陰可知。純陰則離其類矣。胡能生物。至侯果謂陰盛似陽。王弼干寶謂陰盛逼陽。陽不堪故戰。以戰爲戰爭。後孔穎達朱子。因經言戰又言血。疑陰陽兩傷者。皆夢囈語也。清儒獨惠士奇用許說謂戰者接也。陰陽交接。卦无傷象。識過前人遠矣。

象曰。龍戰于野。其道窮也。

陰至上六而極。故曰窮。窮盡也。

用六。利永貞。

此亦明筮例也。八六皆陰。今遇陰。胡以祇言六不言八。則以六爲用而變七也。利永貞。申用六之故也。六何以必變。六爲老陰。陰極不返。則太柔矣。文言曰。貞固足以幹事。永貞則健而陽矣。故象曰以大終。大者陽。言陰極則變陽也。

象曰。用六永貞。以大終也。

陽大陰小。以大終者。言陰極必返陽也。舊解因不知用六義意。故說大終。无有當者。

文言曰。坤至柔而動也剛。至靜而德方。後得主而有常。含萬物而化光。坤道其順乎。承天而時行。

坤柔動剛。義與用六大終同。言坤雖至柔。遇六則變陽矣。故曰動剛。後得主而有常者。言最後變六

爲陽。以陽爲主也。

積善之家。必有餘慶。積不善之家。必有餘殃。臣弑其君。子弑其父。非一朝一夕之故。其所由來者漸矣。由辯之不早辯也。易曰。履霜堅冰至。蓋言順也。

坤爲積爲殃爲惡。故曰不善。坤多故曰餘。又爲臣子爲弑爲夕。君父則指乾也。坤消陽故曰弑君父。此正申明履霜堅冰至之理。陰在姤至微耳。積之不已。則陽可全消。其禍有不可勝言者。故曰餘殃。餘者多也。此本世界之公理。人事之自然。而李鼎祚忽以夫子不語怪力亂神爲疑。若餘慶餘殃。有類於神道感應之說者。眞可謂汗蔑聖言。不識語旨矣。漸孔疏云。徐而不速謂之漸。辯說文判也。別也。謂宜別之於先也。順與循同義。蓋言順者。仍循其道則至堅冰之意。荀爽謂臣順君命而成之。背經旨。不可從。文言釋初六噬吸經髓。超妙絕倫。使人惕然省。憬然悟。釋上六祗以陰凝陽天玄地黃。逗露坤地生物之本。由於天地交。而總不明言。仍還經文昆侖語氣。由此見聖人之言。寧使人不易知。而不能不文。太玄云。不約則其旨不詳。不要則其應不博。不沈則其意不見。眞能窺見藏道之故者哉。

直其正也。方其義也。君子敬以直內。義以方外。敬義立而德不孤。直方大。不習无不利。則不疑其所行也。

直則不撓。故曰直其正。言二中正也。方則不詭隨。故曰方其義。言不苟同也。正直發於心。故曰直內。內直則必敬矣。故曰敬以直內。義方以接物。故曰方外。外方則無不宜矣。故曰義以方外。敬義

之德立於下。五陽應於上。故德不孤。蓋陰消至二遯。前承重陽。二五應子。乾先坤後。陽唱陰和。得主有利。故不疑其所行。舊解祇惠棟知以二五相應說不孤。最爲卓識。

陰雖有美。含之以從王事。弗敢成也。地道也。妻道也。臣道也。地道无成。而代有終也。

陽革於午。陰代陽用事。以訖於亥。故曰代有終。凡終皆謂亥。象傳曰。乃終有慶。說卦曰萬物之所成終。終皆謂亥。內經與莊子。所謂天門者此也。自復子至乾巳皆成事。陽主之。故地道無成。自姤午至坤亥皆終事。陰主之。故曰代有終。言代陽終事也。終字從冬。言一年之事。至亥冬而終也。子卽陽復故艮居亥而艮卽爲終。成者法也。式也。周禮天官太宰。五曰官成以經邦治。注。官成謂官府之成事品式。又秋官士師掌士之八成。注。八成猶八法。然則成者法也。地道無成者。謂坤柔不敢先創爲法式。祇能代陽終事也。成與終虛實先後。絕對不同。漢宋衷以成名爲說。清惠棟謂成與終同義。夫成與終義誠可通。但此曰無成。曰有終。則判然二事。不得混同也。

天地變化。草木蕃。天地閉。賢人隱。易曰。括囊无咎无譽。蓋言謹也。

陰消至四八月觀。由元亨而入利貞。天地之氣。將變易矣。觀下坤爲茅茹爲草。巽爲木。坤閉艮止。故曰草木蕃。蕃與藩通。詩大雅四國于蕃是也。又周禮地官大司徒。九曰蕃樂。注。杜子春讀蕃樂爲藩樂。謂閉藏樂器而不作。賈疏。藩謂藩閉。然則草木蕃者。言草木至八月而生氣藩閉也。自漢以來。无不以蕃息爲解。豈知此與下天地閉賢人隱。平列爲證。以釋括囊之義。若作蕃息。與括囊何涉。

乎。乾象傳云。乾道變化。各正性命。保合太和乃利貞。言元亨時過。利貞時至也。故曰變化。此變化與彼變化同也。變化之微。在物則草木黃落。在天則陽氣閉藏。在人則賢哲隱遯。謹慎也。釋括囊之故也。

君子黃中通理。正位居體。美在其中。而暢于四支。發於事業。美之至也。

地色黃。黃中色。五中位。故曰黃中。玉篇理文也。坤爲文。故曰理。黃中通理者。言由中發外。有文理可見也。正位居體。卽體居正位。坤爲體爲事業。言有黃中之德者。身必潤。事業必成也。

陰凝于陽必戰。爲其嫌於无陽也。故稱龍焉。猶未離其類也。故稱血焉。夫玄黃者。天地之雜也。天玄而地黃。

凝王弼本作疑。釋文云。荀虞姚信蜀才作疑。茲從其多者。然疑卽凝字。莊子達生篇。用志不分。乃凝于神。卽凝于神也。詩大雅靡所止疑。傳疑定也。正義音凝。可見疑凝本通。孟喜王弼詁作疑似之疑。致與經旨全背。夫陰陽相求相應。何疑忌之有。又何來戰爭。天地若至於戰爭。又胡由相雜。是皆由戰字失詁。不知相雜者爲何義也。陰凝陽卽陰化陽。陰極於亥。與伏乾相遇。坤上乾下。坤外乾內。陽不見。故曰嫌于无陽。稱龍所以明有陽也。陰陽合爲類。離則爲獨陰獨陽。獨陰獨陽不能生。卽不成爲血。旣曰血。卽陰陽類也。卽天地雜也。其血玄黃者。言此血非陰非陽。亦陰亦陽。爲天地所和合。故能生萬物也。舊解不知陰陽合爲類。又不知此言大地生物之本。故未離其類四句。舉不

知其所謂。

三三三

屯。元亨。利貞。勿用有攸往。利建侯。

上坎爲險。下震爲動。動乎險中。故名曰屯。屯難也。止也。諸家皆以乾通坤爲元亨。三之正成既濟爲利貞。按以乾通坤爲元亨。初五得位。乾元以通是也。以三之正成既濟。爲利貞非也。利貞者利於貞定也。勿用有攸往。申其義也。端木國瑚謂遇春夏卦。卽曰元亨。秋冬卦卽曰利貞。易本以時爲主。說頗勝於舊解。屯由震春以至坎冬。一年氣備。故曰元亨又曰利貞。乾初勿用。往遇險。故曰勿用有攸往。侯君也。主也。震爲君。初臨萬民。五居尊位。故曰利建侯。

彖曰。屯。剛柔始交而難生。動乎險中。大亨貞。雷雨之動滿盈。天造草昧。宜建侯而不寧。

始交爲初五也。前乾坤二卦。皆純陽純陰莫能交。屯下震以乾交坤初。上坎以乾交坤中。以其次純乾純坤之後。剛柔雜始見。故曰始交。難謂坎也。塞傳云塞難也。卽指上坎。動而遇險。故曰難生。下雷上雨。坤爲多故曰滿盈。造始也。草雜亂。昧冥昧。坤爲茅茹爲亂。故曰草。地黑故曰昧。易林艮之晉云。釜飢草土。卽以晉下坤爲草。爲釜。天造草昧者。言天地之運。始於草昧。故宜建侯於此時。使萬物有主也。

諸家皆用虞翻說。謂剛柔始交。爲坎二交初。如是穿鑿。又何不可謂萃四交初。蓋虞氏不知始字承

前兩卦乾坤而言。而以為指屯初二。故誤解若是。後閔道光間。卞斌周易通解。亦謂始交指初五。然則此義百年前已發之。

象曰。雲雷。屯。君子以經綸。

經綸據釋文。王弼本作經綸。今本作經綸者。乃孔本也。因將王注亦改之矣。釋文又云。黃穎曰經綸匡濟也。本亦作倫。案釋名云。綸倫也。為之有倫理也。論語正義引鄭玄云。論者。綸也。理也。然則綸倫論。字微異。義則同也。若以卦象言。震為言。初至五正反震。似論於易象較切。若正義所云劉表鄭玄作淪。似不合矣。

初九。磐桓。利居貞。利建侯。

磐桓。釋文云旋也。爾雅釋水鉤盤。郭注水曲如鉤。流盤桓不直前也。禹貢西傾因桓是來。注。桓隴阪名。其道盤旋。曲而上旋。即不能直前也。盤磐通。釋文云。本亦作盤。馬又作槃。又或作般。皆以音同通用。外坎故利居貞不動。震為主。建侯則坤民有主。故利。

象曰。雖磐桓。志行正也。以貴下賤。大得民也。

坤為民。陰賤陽貴。陽在下。故曰以貴下賤。陽為大。初陽臨羣陰。故曰大得民。

六二。屯如遭如。乘馬班如。匪寇婚媾。女子貞不字。十年乃字。

陰遇陰得敵。故屯遭不進。釋文云。遭。馬行不進之貌。班。子夏傳相牽不進兒。鄭作般。般盤同。亦

盤桓不進也。又震爲馬。坤坎皆爲馬。馬多故曰班如。言行列不前也。吳先生曰。漢書車班班。往河間。義同此也。五坎爲寇。二與五應。故曰匪寇。曰婚媾。乃二前爲三四所阻。下爲初陽所牽。體又爲坤。坤虛故不字。字妊育也。震爲孕。左傳昭元年。武王邑姜方震太叔是也。故震爲妊育。王引之力闢宋耿南仲朱子以字爲許嫁之非。其說是也。今河北尚呼牝牛爲字牛。義本此也。坤爲年。數十。故曰十年乃字。言二五應與雖難。然究爲正應。久必合也。

象曰。六二之難。乘剛也。十年乃字。反常也。

此難字與象傳難生難字不同。彼指坎。此謂乘剛字難也。說者多混而同之。非。乘剛勢逆。故字難。六三。卽鹿无虞。惟入于林中。君子幾。不如舍。往吝。

鹿。虞翻王肅皆作麓。鹿麓古通。詩瞻彼阜麓。周語作阜鹿。韋注鹿山足也。三爲艮初。正山足也。卽鹿者。言至山足而從禽也。卽就也。虞備虞也。孟子曰。有不虞之譽。義同此也。言田獵而无備虞。焉能有禽。震爲木。艮亦爲木。故曰林中。坤虛故空入林中。幾者事之先見者也。舍去也。言君子見幾而去也。上无應故往吝。艮爲君子。淮南子說此云。夫施薄而望厚者。未之有也。又三國志陳琳傳。易稱卽鹿无虞。夫微物尚不可欺。夫所謂欺。卽无備虞也。王弼云。雖見其禽而无其虞。徒入于林中。亦詰虞爲備虞。乃孔疏忽謂虞爲虞官。失王義矣。左傳隱五年。不備不虞。不可以師。正與此无虞義同。

象曰。卽鹿无虞。以從禽也。君子舍之。往吝。窮也。

從禽義與卽鹿同。吝。遯古通。說文行難也。三无應得敵故行難。吝字初見。說文口部引作吝。云恨惜也。是部引又作遯。云行難。愚以爲凡言往吝者。宜從行難義。祇言吝者。宜從恨惜義。此曰往吝。卽行難也。

六四。乘馬班如。求婚媾。往吉。无不利。

坎坤皆爲馬。故亦曰班如。艮爲求。四與初本爲正應。婚媾而已。然必求者。以二三爲阻也。知其阻而求之。故往吉也。四上承陽。下有應。故曰无不利。

象曰。求而往。明也。

艮火故曰明。艮陽在上亦明。自艮火艮明象失傳。諸家皆以三變互離爲明矣。豈知旅九三云。焚其次。易林大壯之遯云。火爛銷金。皆以艮爲火。說詳焦氏易詁中。

九五。屯其膏。小。貞吉。大。貞凶。

坎水故曰膏。坎陷故屯其膏。蓋五雖下履重陰。然坤民三分之二。爲初所有。四又應初。五雖君位。實无一民。故膏澤无所施也。小謂二。五應二。陰得陽應故吉。大謂五。五虛擁尊位。威柄下移。孤露无輔。故大貞凶。震爲威。坤爲柄也。貞卜問也。諸家強以貞正說之。夫正而有大小。已不詞矣。大正而凶。益悖理矣。惠士奇知其不安。又以固爲說。其不協與正无異也。

象曰。屯其膏。施未光也。

坎爲隱伏。故曰未光。

上六。乘馬班如。泣血漣如。

坎爲血。坎水故曰漣如。詩衛風。泣涕漣漣。釋文。泣貌。坎憂懼。下无應。故有是象。

象曰。泣血漣如。何可長也。

上六居卦之極。故曰不長。

三三

蒙。亨。匪我求童蒙。童蒙求我。初筮告。再三瀆。瀆則不告。利貞。

艮少。坎隱伏不明。故名曰蒙。蒙釋也。不明也。二得中有應故亨。艮爲童蒙。爲求。而二至上正反艮。自二言若求五。自五言若求二。有互相求之象。然二陽也。陽大明。五陰也。陰迷。我謂二。匪我求童蒙。童蒙求我者。言二不必求五。五自來應二也。傳曰志應。言二五相應與相上下也。舊解詰實匪字。定謂二不應五者非也。坎爲聖爲通故爲筮。比曰原筮。亦以坎爲筮。震爲言。故曰告。而二至上正反震。言多。故曰瀆。瀆褻瀆也。震反爲艮。艮止故不告。昔賢說此。總不知再三瀆之故何在。由正覆象並用之義。失傳故也。又筮象亦失傳。故初筮不知何所指。豈知坎在下故曰初筮。專指九二。艮坎皆冬日卦。故曰利貞。

彖曰。蒙。山下有險。險而止。蒙。蒙亨。以亨行。時中也。匪我求童蒙。童蒙求我。志應也。初筮告。以剛中也。再三瀆。瀆則不告。瀆蒙也。蒙以養正。聖功也。

志應。言二五互求也。坎爲聖。故曰聖功。

象曰。山下出泉。蒙。君子以果行育德。

艮爲君子。爲堅。爲果。震爲行。故曰果行。果行者。言堅定不易也。傳曰。致果爲毅。是其義也。震爲生爲德。故曰育德。以者。法也。言君子法蒙象。而果毅其行。養育其德也。

初六。發蒙。利用刑人。用說桎梏。以往吝。

發啓也。詩大雅。思齊篇曰。刑于寡妻。左傳襄十三年。一人刑善。數世賴之。注皆訓刑爲法。是刑與型同。利用刑人者。言宜樹之模型。使童蒙有所法式。得爲成人。永免罪辟也。坎爲桎梏。說文。桎足械。梏手械。四无應。故往吝。說文引作遴。云行難也。吝遴古通。漢書魯安王傳。晚節遴。王莽傳。性實遴。義皆爲吝。以往。王安石。朱震。王宗傳。朱子。皆訓爲以後。大誤。

象曰。利用刑人。以正法也。

正平也。坎爲平。故曰正法。言以法則示人。俾童蒙有所則效。卽釋刑人之義也。

九二。苞蒙。吉。納婦。吉。子克家。

陽居陰中。故曰苞蒙。五陰來應。故曰納婦吉。震爲子。艮爲家。五艮體。二應之。故曰子克家。克者

能也。言能任家事也。

象曰。子克家。剛柔接也。

接與龍戰于野戰字義同。言交接也。

六三。勿用取女。見金夫。不有躬。无攸利。

取娶同。坤爲女。見金夫。不有躬。申勿用之故也。金夫者美稱。詩有匪君子。如金如錫。如圭如璧。左傳。思我王度。式如玉。式如金。皆以金喻人之美。艮爲金。爲夫。人徒知乾爲金。不知艮堅亦爲金。易林隨之屯云。金玉滿堂。以屯之互艮爲金也。人徒知震有夫象。不知三男皆爲夫。比曰後夫凶。以艮爲夫也。易林復之剝云。夫亡從軍。以剝上艮爲夫也。三與上艮應。故曰見金夫。坤爲躬。三體震。震爲行而決躁。故見金夫而亟欲往上。不顧四五之阻。故曰不有躬。女行如此。不順。故无所利也。

象曰。勿用取女。行不順也。

坤爲順。震躁動。故不順。案此爻舊解。虞翻以陽爲金。謂三爲二所淫。朱子謂金夫。蓋以金賂已而挑之。若魯秋胡之事。均堪噴飯。若夫王弼以金夫爲剛夫。毛大可惠棟等用卦變。又以兌陽爲金。皆非。故夫卦象一失傳。無論若何揣測。皆不能當。其關係之重若是。

六四。困蒙。吝。

四无應。承乘皆失類。故曰困。

象曰。困蒙之吝。獨遠實也。

實爲陽。初三五皆近陽。四獨否。故曰獨遠實。

六五。童蒙吉。

艮爲童蒙。上承陽。下應二。雖不當位。而居中。故吉。

象曰。童蒙之吉。順以巽也。

上承陽。順陽而行。下與二相上下。故曰順以巽。

上九。擊蒙。不利爲寇。利禦寇。

艮手爲擊。亦啓發之意。上應在三。三坎爲寇。道窮於上。故不利爲寇。然艮爲堅爲守。下擁羣陰。勢衆。故利禦寇。坎彖傳云。王公設險以守其國。守謂互艮也。能守故利。

象曰。利用禦寇。上下順也。

君子守其前。小人隨其後。故利禦寇。上下順者。言坤民順上也。

三三

需。有孚。光亨。貞吉。利涉大川。

乾爲行。行而遇險。故曰需。需待也。歸藏作溥。坎兌皆水。故溥。溥溼也。而溥與濡音義並同。楊氏

古音云。溥人余切。歸藏易。需卦作溥。同濡。案孟子。是何濡滯也。是溥有遲義。古文多省筆。疑需爲古文濡字。與歸藏同。且濡滯亦有須義。與彖傳不背。周易本因二易而作。溥濡需不過字形之輾轉耳。音義並同也。卦辭皆指九五。五上下皆陰。故有孚。互離故光。得位故亨。貞吉者。卜問則吉也。坤爲水。爲大川。易林賁之損云。龍蛇所聚。大水來處。以損互震爲龍蛇。互坤爲水。又師之復。淵泉隄防。水道利通。亦以復坤爲泉爲水。此外九家。說蠱之利涉大川云。此卦乾天有河。坤地有水。二爻升降。出入乾坤。利涉大川也。亦以坤爲大川。利涉謂五。言五居坤中。孚於上下而利也。故彖傳以位乎天位。往有功釋之。而虞翻謂往指二。二失位。變陰涉坎。故利涉。夫以坎爲大川。涉之而利。則不必需矣。是背卦義也。彼夫蹇无坤也。而曰利西南。以蹇五居坤中也。需五亦居坤中。坤爲大川。當位而尊。上下皆孚。故曰往有功。五居外。故曰往。非必內卦往外卦。方謂往也。此卦祇五爻能利涉。他爻無利者。自坤水象失傳。不知五所涉者爲坤水。爲大川。必以坎爲大川。於是易之利涉大川。無一得解者。

彖曰。需。須也。險在前也。剛健而不陷。其義不困窮矣。需有孚光亨貞吉。位乎天位。以正中也。利涉大川。往有功也。

須待也。待則不陷於險中。故不困窮。釋需之故也。位乎天位。往有功。皆謂九五。謂九五居坤水之中。上下皆孚。有功卽利涉。虞翻以二當之。失彖傳旨矣。

象曰。雲上于天。需。君子以飲食宴樂。

坎爲雲。故曰雲上於天。二四兌。兌口。故曰飲食。兌悅。故曰宴樂。乾爲君子。言君子飲食宴樂。從容以俟也。

初九。需于郊。利用恆。无咎。

乾爲郊。初臨重陽。陽遇陽得敵。不能行。故利用恆。恆久也常也。言潛龍勿用。守常不變也。守常不動。故无咎。陽遇陽行難。需而不進。故象曰不犯難行。大畜初九曰。有厲利已。厲與難皆指二三。此與鼎九二慎所之。大有初九曰无交。大壯初九曰征凶。夬初九曰往不勝。姤九三曰其行次且。皆因陽遇陽。乃二千年說者。皆以需坎爲難。謂初不取四。爲不犯難。豈知難爲二三。二三皆陽。陽遇陽行難。故不取四而用恆。非以坎爲難而不取也。故夫同性相敵。異性相感之理不明。則易本立失。此不犯難及有厲利已等辭。所以永不得解也。

象曰。需于郊。不犯難行也。利用恆无咎。未失常也。

陽遇陽得敵需而不進。故曰不犯難行。難指二三。

九二。需于沙。小有言。終吉。

沙近水。二較初略進。故曰需于沙。二至四伏艮。艮爲沙。有言者爭訟也。乾爲言。見左傳。兌口亦爲言。見易林。乃兌言向外。與乾言相背。故爭訟。夬四之聞言不信。卽如此取象也。兌爲小故小有言。

有言不吉。然而吉者。象曰衍在中。以居沙衍之中也。穆天子傳。天子遂東征。南絕沙衍。蓋水中有沙曰衍。故曰衍在中。以象中位也。象曰。雖小有言。以吉終者。明有言本不吉。然而吉者。以得中位也。虞翻用半象。謂三四震象半見。爲小有言。穿鑿之說也。凡易云有言。及聞言不信。有言不信者。皆爭訟也。非言之有無也。左傳昭五年。以謙爲譏。首發其義。焦氏易林。暢述其旨。於是二千年有言誤解。盡行暴露。與利涉大川同。說詳焦氏易詁中。

象曰。需于沙。衍在中也。雖小有言。以吉終也。

解見前。

九三。需于泥。致寇至。

震九四云。震隊泥。以坎爲泥也。九三去險益近。故曰需于泥。坎爲寇。三近坎。故曰致寇至。

象曰。需于泥。災在外也。自我致寇。敬慎不敗也。

坎爲災。災在外。明尚未懼災。致寇至。明寇尚未至也。致之故在我。我能敬慎。則不至矣。不至則不敗。乾爲惕。故曰敬慎。

六四。需于血。出自穴。

血。洫之省字。古文如此者。不可勝數。且溝洫亦坎象也。諸家以坎有血象。便作需于血。不辭甚矣。兌爲穴。易林乾之咸云。反得丹穴。豫之兌云。秋蛇向穴。皆以兌爲穴。言四之所處。前臨溝洫。故曰

需于沍。而居兌穴之上。故曰出自穴。毛奇齡惠棟焦循等。皆以坎爲穴。用象旣誤。故于出義不合也。祇姚配中點出字得解。

象曰。需于血。順以聽也。

四陰宜順五陽。坎爲耳。故曰聽。聽從也。

九五。需于酒食。貞吉。

坎爲酒。食。實也。頤自求口實。鄭作食。是食實可通用。坎中實。故坎爲食。易林履之蹇云。天下饒食。謙之坎。食非其任。皆以坎爲食。酒食在上。兌口承之。故曰需于酒食。貞吉者。卜問吉也。

象曰。需于酒食。以中正也。

五位中正。釋貞吉之故也。

上六。入于穴。有不速之客。三人來。敬之。終吉。

互兌爲穴。上來應三。則入於兌穴矣。而陽必上升。故曰不速之客。馬云。速召也。乾爲人。上應在三。故曰三人來。坎爲畏懼。故曰敬之。言陰宜順陽也。上居卦終。故曰終吉。

象曰。不速之客來。敬之終吉。雖不當位。未大失也。

象明曰不速之客來。來而不當位。言三升上。不當位也。非謂上六本不當位。王弼不明升降之理。便謂初上無位。眞妄說也。荀爽云。上退居三。雖不當位。承陽有實。故未大失。固的解也。

三三

訟。有孚。窒惕。中吉。終凶。利見大人。不利涉大川。

乾陽上升。坎水下降。乃乾即在上。坎即在下。違行。氣不交。故曰訟。二陽居陰中。故有孚。坎中實。故窒。坎憂故惕。二雖不當位。居中。故吉。二无應。遇敵。故終凶。九五中正。故利見大人。坤爲大川。二入之不當位。无應與。不能出。若解則能出。沈淪於坤水之中。故曰不利涉大川。

彖曰。訟上剛下險。險而健訟。訟有孚窒惕。中吉。剛來而得中也。終凶。訟不可成也。利見大人。尙中正也。不利涉大川。入于淵也。

剛來得中謂二也。中正謂五也。坤爲淵。易林震之復云。藏匿淵底。言復陽居坤下。故曰藏匿淵底。是以坤爲淵也。今二入居坤中。故曰入於淵。而上无應不能出。沈溺淵中。故曰不利。

象曰。天與水違行。訟。君子以作事謀始。

需水上乾下。故氣交。反之則背道而馳。愈去愈遠。故曰違行。行道也。違行言異道而行也。坎爲謀。坤爲事。二居坤中。故曰作事。二无應。故入不能出。若慎始則免矣。卦氣以下爲始。王弼云。凡訟之起。契之不明。孔疏由於初時契要之過。慎始制契。則訟端絕。按乾坎皆爲信。契要者信也。王注優於各家。

初六。不永所事。小有言。終吉。

事。訟事也。訟始於初。然初有應。初四相上下成中孚。各當位。則訟事息矣。故曰不永所事。坎上下兌口相背。故有言。有言即訟也。不永故曰小有言。有應故終吉。

象曰。不永所事。訟不可長也。雖小有言。其辯明也。

兌口多。故曰辯明。

九二。不克訟。歸而逋。其邑人三百戶。无眚。

坎爲隱伏。故曰逋。上无應。故不克訟。不克訟故逋。逋逃也。逃歸何處乎。二居坤中。坤爲邑爲百爲戶。茹敦和曰。坎數三。故曰其邑人三百戶。言二逃於坤邑之中也。坎爲眚。二逋坤中。孚於上下。故无眚。眚。釋文馬云災也。

象曰。不克訟。歸逋竄也。自下訟上。患至掇也。

上謂五。五剛。二與爲敵。故曰自下訟上。吳先生曰。掇。借爲輟。止也。愚按集韻掇音輟讀若朵。逸周書曰。綿綿不絕。蔓蔓若何。毫末不掇。將成斧柯。不掇即不輟。言毫末雖微。長而不止。即成斧柯。然則掇輟古通用。又河北方言謂人避事曰掇避。正與此同。掇或作躲。玉篇身也。无避匿之義。非也。歸而逋。即輟訟矣。輟之故因不克訟而有患也。釋文鄭作憊。憂也。近師俞樾又作綴。言禍患之來。聯綴不已也。但小象原以釋經文。作憊作綴於逋義皆无涉。若作輟。則正釋逋義也。逋而輟訟。訟止故无眚。

六三。食舊德。貞厲。終吉。或從王事。无成。

乾爲舊爲德。坎爲食。三承重陽。故曰食舊德。失位故貞厲。承陽有應故終吉。三承乾。乾爲王。故曰從王事。坤柔故无成。義詳坤六三前釋。

象曰。食舊德。從上吉也。

從上卽承乾。

九四。不克訟。復卽命。渝。安貞。吉。

陽遇陽則窒。故不克訟。巽爲命。卽。就也。安也。初有應。言復初而安命也。渝變也。訟則爭。爭則不安。不訟則變而爲安貞矣。故吉也。

象曰。復卽命。渝安貞吉。不失也。

失與軼通。荀子哀公篇。其馬將失。卽其馬將軼也。軼突也。過也。左傳隱九年。懼其侵軼我也。說文車相出也。卽從後出前也。不軼卽不前出也。釋安貞之義也。與隨初。比二。小畜初。同。

九五。訟元吉。

五位極尊。故曰元。五中正。故訟吉。

象曰。訟元吉。以中正也。

有中而不正者。有正而不中者。中且正。无不吉。

上九。或錫之鞶帶。終朝三褫之。

說文鞶大帶也。錫命也。上應三。三巽爲帶。乾大故曰鞶帶。乃巽爲隕落。故終朝三褫之。褫奪也。坤爲夜。乾爲朝。上居乾終。故曰終朝。與乾三終日同義。上應三。三體離。離卦數三。此數失傳。祇易林洞林邵子用之。故曰三褫。先儒不知巽爲隕落。象本左氏。後祇易林用之。褫之故。全在巽。故无得解者。豈知中孚初九云。有它不燕。以應四巽也。姤九四。包无魚。鼎九四。鼎折足。大過九四。有它吝。皆以應初巽也。例甚明也。釋文褫鄭本作挖。惠氏棟據淮南人間訓。盜挖其衣被。高誘注云。挖奪也。是仍與褫同。乃宋項安世周易玩辭。引鄭注曰。三挖。三加之也。後楊慎臧琳朱芹等。頗祖述其說。謂三挖其紳。以爲誇耀。故象曰不足敬。但論語之拖紳。因孔子病臥。君來視。故加紳於朝服。以爲敬。今非病臥。曰束紳垂紳皆可。曰拖紳。似不合也。

象曰。以訟受服。亦不足敬也。

乾爲敬。旋得旋失。故不足敬。

周易尚氏學卷三 上經

三三

師。貞。大人吉。无咎。

師。衆也。坤舍於坎。俱居子方。坤坎皆爲衆。故曰師。猶乾舍於離。俱居午爲同人也。貞。卜問也。大人。正義作丈人。子夏傳作大人。崔憬李鼎祚從之是也。此與困貞大人吉同。皆謂二。乾九二云。利見大人。利見故吉。陸續鄭王等皆讀爲丈。謂震爲長子。丈者長也。故曰丈人。豈知二得中。臨御萬民。大人之事。以二爲大人。於象方合。丈人則於卦名不類矣。陸續丈人爲聖人。王謂丈人爲莊嚴之稱。皆曲說也。且子夏傳爲韓嬰所作。臧庸據七略。謂嬰字子夏。今按藝文志有韓氏二篇。注曰名嬰。其篇數與隋唐志子夏傳卷數同。疑卽子夏傳。與田何同時。皆秦遺老。其所據當无誤也。

彖曰。師衆也。貞正也。能以衆正。可以王矣。剛中而應。行險而順。以此毒天下而民從之。吉又何咎矣。

震爲帝爲王。故曰可以王。二應五。坎險坤順。震爲行。故曰行險而順。易林以坤爲害。坎爲毒。震爲從。干寶云。毒荼苦也。按列子宋陽里華子病忘。闔室毒之。注毒苦也。師旅之興。不無所苦。然非師

旅不能安天下。故民從之而吉也。吳語云。吾先君闔廬。以與楚昭王毒逐於中原柏舉。義與此同也。馬融訓毒爲治。與行險而順。義不相應。行險卽毒。順卽民從也。他若王弼之訓毒爲役。崔憬訓爲亭毒。俞樾訓爲督。皆不協。是皆因坎毒之象。人不盡知。故衆說紛紜也。豈知噬嗑六三云。遇毒。以坎爲毒。象甚明也。

象曰。地中有水。師。君子以容民畜衆。

地中所容畜。莫多於水。故君子法之。

初六。師出以律。否臧凶。

坎爲律。律法也。臧善也。否臧。卽失律也。失律故凶。

象曰。師出以律。失律凶也。

坎爲失。故曰失律。

九二。在師中。吉。无咎。王三錫命。

居下卦之中。故曰在師中。吉。失位宜有咎。在師中。故无咎。震爲王爲言。故曰命。震數三。錫子也。王三錫命者。言王以官爵或車服器物。錫子有功。而告命之也。曲禮一命受爵。二命受服。三命受車馬。言二爲卦主。撫馭萬邦。而日有所錫子也。舊解謂六五爲君。錫命於二。於卦義全背。祇荀爽謂王指二爲得解。

象曰。在師中。吉。承天寵也。王三錫命。懷萬邦也。

五天位。言二必升五。爲羣陰所承也。故曰承天寵。坤爲萬邦。言二臨萬邦。而有所錫予者。正所以懷念萬邦。坎爲懷也。故夫舊解謂六五錫二者。不惟於經背。於象傳亦背矣。

六三。師或輿尸。凶。

坎爲尸。震爲輿。管輅以坎爲棺槨。故曰輿尸。夫陳師而出。輿尸以還。其无功甚矣。故曰凶。蓋坤爲死。三失位无應。以陰遇陰。得敵。故凶如是。

象曰。師或輿尸。大无功也。

大无功。卽太无功。

六四。師左次。无咎。

次舍也。震爲左。故曰左次。古人尙右。左次則退也。四前臨重陰。陰遇陰得敵。其行難矣。知難而退。故无咎也。

象曰。左次无咎。未失常也。

未失常者。言四當位。量力自處。故不改其常。

六五。田有禽。利執言。无咎。長子帥師。弟子輿尸。貞凶。

田獵。禽獲也。釋文云。徐本作擒。王陶廬云。說文无擒字。其見於經傳者。皆作禽。展獲字禽。不

從手。是其證。下應二陽故有禽獲。二震爲言。利執言者。言師出有名。如湯武歷數桀紂之罪。漢高討殺懷王者是也。故无咎。五應二。二震主爻。震長子。居師中爲主。故曰長子帥師。二亦坎主爻。坎爲震弟爲尸。故曰弟子與尸。與尸故貞凶。貞卜問也。言五宜與震。不宜與坎。與坎。則使不當矣。

象曰。長子帥師。以中行也。弟子與尸。使不當也。

二居中爲震主。故爲羣陰之師。二坎陷於陰中。不可使。使則有與尸之禍也。宋衷虞翻謂弟子指六三。非是。皆因三爻有與尸字而誤。

上六。大君有命。開國承家。小人勿用。

大君指二震。震爲君爲言。故曰大君有命。坤爲國。二升五居坤中。故曰開國。坎爲室爲家。二升五仍坎體。羣陰承之。故曰承家。小人指上六。二升五雖開國承家。上六獨居五後。乘陽勢逆。不順承五。比之後夫凶。卽此爻也。故戒曰勿用。宋衷虞翻解開國承家是矣。然二升五於上六何涉。卽以勿用爲戒。必有故也。不申其故。祇以坤爲小人。籠統說之。胡可乎。惠棟知其不安。仍不能得其故。竟謂小人指初三。益淆亂矣。

象曰。大君有命。以正功也。小人勿用。必亂邦也。

二升五位正。故曰正功。坤爲邦爲亂。上六反君道。故曰必亂邦。

三三三

比。吉。原筮。元永貞。无咎。不寧方來。後夫凶。

比親也。輔也。坎坤同舍于子。故曰比。唐以前。先天象失傳。故卦名不得解。清毛大可黃宗羲等知之而不認。後學不察。相率以言先天爲戒。而自命爲漢易。豈知康成注月令。于季夏云。未屬巽辰。又在巽位。巽若不在西南。未能在巽位乎。是先天方位。鄭且明言之。九家注同人云。乾舍于離。與日同居。荀爽注同人云。乾舍于離。相與同居。注陰陽之義配日月云。乾舍于離。配日而居。坤舍于坎。配月而居。已一再言之乎。比之義即以坎坤同居也。原者田也。左傳僖二十八年。原田每每。注高平曰原。周禮太卜原兆注。原原田也。按古皆井田。每每者。井與井相間之形。坤爲拆。象原田。故曰原筮。坎爲筮。坤爲原。原筮。猶言野筮也。曲禮云。外事以剛日。鄭注。外事郊外之事。儀禮士喪禮。筮于兆域。兆域在郊外。卽原筮也。而干寶因周禮三卜。一曰原兆。卽訓原爲卜。可謂大謬。按周禮。太卜掌三兆之法。一曰玉兆。二曰瓦兆。三曰原兆。注。言龜兆似玉瓦原之璽鑄。然則原者原田。田必有璽鑄。象龜兆之形。故曰原兆。豈以原爲卜乎。故原指坤。于訓卜固非。孔穎達謂原爲原究。朱子謂原爲再。王夫之謂原爲本。俞樾謂原爲始。爲本。益浮泛不切。故夫說易而不求象。未有能當者也。元謂九五。永貞者永定也。坤爲亂。故曰不寧。方。詩小雅方舟爲梁。漢書韓信傳云。今井陘之道。車不得方軌。注皆訓方爲併。方來。謂下四陰並來歸五也。舊解不求卦象。訓方爲將。爲四方。皆

失之。艮爲夫。上六獨居艮後。故曰後夫。下四陰皆承陽。獨上六乘陽不順。故凶。此卦因原象筮象夫象失傳。故自漢迄今。无得解者。

彖曰。比。吉也。比。輔也。下順從也。原筮元永貞无咎。以剛中也。不寧方來。上下應也。後夫凶。其道窮也。

上謂五。下謂四陰。上六居卦之極。故曰道窮。

象曰。地上有水。比。先王以建萬國。親諸侯。

先王謂五。坤爲萬國。國必建侯。坤多故曰諸侯。五南面稱尊。撫臨天下。故王者取以爲法。親卽比也。

初六。有孚比之。无咎。有孚盈缶。終來有它。吉。

坎爲孚。五爲卦主。故亦孚於初而比之。初失位。本有咎。比五故无咎。坤爲缶。初居缶之最下。去五雖遠。然坎雨下注。始於四。以次及初。至初而缶盈矣。故曰有孚盈缶。陽性上升。五升上剝。剝窮上反下。則初陽復矣。故曰來。以其有待。故曰終來。有它謂有應於他方也。大過九四曰有它吝。謂應初也。中孚初九曰有它不燕。謂應四也。此兩卦皆有應。而皆不吉者。以得敵爲害也。故不安。故吝。此曰有它吉者。以陽來反初。當位有應。故吉。苟爽以非應釋有它。清易家多從之。豈知大過中孚皆有應。而亦曰有它。則夫有它之。不指非應甚明。虞翻謂初動成屯得正故吉。豈知此謂之變。不謂之

來。更不得謂之終來。曰終來。固確有所指。且果如虞說。初動之正。乃初爻自變。益不得謂之有它。理甚明矣。虞亦知其說之有罅。復申曰在內稱來。夫爻在外曰往。在內曰來。如需訟之往來得中。否泰之大小往來。皆是。茲曰終來。若僅在內稱來。復何有始終之可言乎。失經旨矣。它古蛇字。易林以坤爲它。損之比云。大它當路。使季畏懼。以比下坤爲它。不讀爲誰他之他。繫辭云。龍它之蟄。以存身也。龍爲乾。它爲坤。言蟄於戌亥也。林所本也。而巽亦爲蛇。故大過九四。中孚初九。亦曰有它。後儒頗有用焦說者又一義也。

象曰。比之初六。有它吉也。

六二。比之自內。貞吉。

二應五。故曰自內。言自內比五也。二當位中正。故曰貞吉。

象曰。比之自內。不自失也。

言自內比五。不敢安逸也。失通佚。諸家作得失詰。非。

六三。比之匪人。

虞氏逸象乾爲人。六三不當位無應。承乘皆陰。行失類。故曰比之匪人。言不得陽也。

象曰。比之匪人。不亦傷乎。

三獨失實。故可傷。

六四。外比之貞吉。

四承五。外比卽從上。貞吉者。卜問則吉也。

象曰。外比于賢。以從上也。

陽爲賢指五。

九五。顯比。王用三驅。失前禽。邑人不誠。吉。

九五伏離。當陽得位。嚮明而治。故曰顯比。王謂五。三驅獵禮也。漢書五行志。田狩有三驅之制。注。三驅之禮。一爲乾豆。二爲賓客。三爲君庖。又晉書五行志。登車有三驅之制。又劉聰傳。校獵上林。將軍負戟前導。行三驅之禮。良數三。故曰三驅。前禽謂下四陰。上爲後。故知前爲下。失逸古通。逸前禽者。喻人皆來比。無所誅殺。任其逸也。坤爲邑。不誠謂王師寬大。所至之邑。百姓仍安居樂業。人人親附。不驚誠也。說文誠敕也。廣韻言警也。左傳桓十一年。鄭人軍其郊。必不誠。言無備虞也。

象曰。顯比之吉。位正中也。舍逆取順。失前禽也。邑人不誠。上使中也。

九五中正。故顯。逆迎也。下四陰皆逆我者也。逆而來歸。理應舍之。故曰逸前禽。如紂師之倒戈歸周是也。王注禽順行背我而走者。則射而取之。按順行與我同嚮。同嚮卽背我。上六是也。故取之。此四字祇王注得解。虞翻謂舍逆指上六。前禽指初。豈知後夫如得舍。尙何云凶。初有孚盈缶。卽孚

於五。又安得獨不及初。而後儒皆從之。異已。上使中者。言五所遣師徒。合乎中道。故無過舉。得不誠也。唐郭京舉正。稱得輔嗣真本。以舍逆取順。在失前禽下。朱芹引李清植曰。考象傳。屢以禽與東部字韻。屯三爻禽與窮韻。恆四爻禽與容韻。此又與中韻。郭京所改。顯失易韻。今按詩小雅呦呦鹿鳴。食野之芩。韻與此同。焦氏易林用韻如此者尤多。而履之夬以禽與功韻。與象傳尤符。蓋古音原如此。今晉人讀禽爲輕。正與古音合。郭京所稱輔嗣本。無論真僞。不可從也。

上六。比之无首。凶。

坎爲首。首謂五也。而五爲坎主。上六乘陽。首爲所蔽。故曰无首。大過上六曰滅頂凶。旣濟上六曰。濡其首。與此義同也。而復於此爻。更曰反君道。无首卽反君道。反君故凶。荀虞皆不知首指五。故說皆不切。清惠士奇更實指曰首指上。謂木一在下爲本。一在上爲末。末卽首。意謂上六爲末爻。故爲首也。說尤穿鑿。

象曰。比之无首。无所終也。

道窮故无所終。

三三

小畜。亨。密雲不雨。自我西郊。

卦上下皆陽。一陰止於內。故曰小畜。畜止也。太玄擬之曰斂。云陽氣大滿於外。微陰小斂於內。是

其義也。旁通豫坤爲雲。上下皆坤爻。故曰密雲。兌爲雨。乃兌雨前遇巽風。爲風吹散。雲過日出。故不雨也。兌爲西。伏坤爲我。乾爲郊。故曰自我西郊。言密雲起自西郊。過而不留也。舊解多從虞翻。以半坎爲雲。旣曰半坎。於密義似不合也。人知坎爲雲。不知坤亦爲雲。易林困之泰云。陰雲四方。日在中央。以泰上坤爲雲也。人知坎爲雨。不知兌亦爲雨。上繫云。潤之以風雨。風謂巽。雨謂兌也。睽上九往遇雨。亦以兌爲雨。

彖曰。小畜。柔得位。而上下應之。曰小畜。健而巽。剛中而志行。乃亨。密雲不雨。尙往也。自我西郊。施未行也。

雲下降方爲雨。尙往者。言雲氣爲風所吹。散而往上。故不能雨。又離火上炎。將密雲衝散。不能下落爲雨。故膏澤未施也。上往純對下施言。

象曰。風行天上。小畜。君子以懿文德。

懿美也。乾爲德。離明。故曰文德。離明照天下。巽風散布四方。故曰懿文德。

初九。復自道。何其咎。吉。

復來也。初爲陽本位。陽來初。故曰復。來初當位。故曰復自道。乾爲道也。初前臨重陽。行難。宜有咎。然當位有應。遯世无悶。故无咎也。

象曰。復自道。其義吉也。

義者宜也。言行誼如此。宜其吉也。

九二。牽復吉。

復來也。伏艮手。故曰牽復。玉篇云。牽速也。禮學記君子之教喻也。道而不牽。姤九三象云。其行次且。行未牽也。皆訓牽爲速。牽復者。速來也。言來居二得中也。若作陽復解。則九二失位。何復之有。又按九二失位无應。承乘皆陽。本不吉。茲曰吉者。徒以得中也。

象曰。牽復在中。亦不自失也。

二雖不當位而在中。故吉。清儒多從虞翻。以五牽二。令二變陰應五爲說。若然。則各卦非先變既濟。不能說也。惑亂後學。莫此爲甚。失佚古通。速復故曰不自失。言不自安逸也。

九三。輿說輹。夫妻反目。

輹正義作輻。而馬融以爲車下縛。鄭玄訓爲伏兔。則皆作輹。茲從馬鄭。伏坤爲輿。伏震爲輹。輹者輿所恃以行。乃輿在內而輹在外。則輿脫輹矣。乾爲夫。坤爲妻。巽得坤之初爻。故亦爲妻。巽爲白眼。卦二至上。正反巽。白眼與白眼相反。是反目也。三上无應。下乘重陽。故有是象。震輹象失傳。左傳僖十五年。筮遇歸妹之睽。曰車脫其輹。夫歸妹之睽。卽震變離。震變離則震象毀。故曰車脫其輹。輹伏兔。上承車箱。下輊車軸。子夏傳釋名。皆以輹爲車屐。因在箱下。有若履然。故左傳以震爲輹。屐。震象也。虞氏改作腹。非也。

象曰。夫妻反目。不能正室也。

坎爲室。坎伏不見。故曰不能正室。言夫无如妻何也。

六四。有孚。血去惕出。无咎。

四卦主。五陽孚之。故曰有孚。釋文血馬云當作恤。憂也。是馬以血爲恤之省文。而荀爽王弼等。直讀爲血。非也。坎爲恤爲惕。乃坎伏不見。故曰恤去惕出。言不憂懼也。四當位有應。上承重陽。故无咎。

象曰。有孚惕出。上合志也。

上謂五上。五上皆陽。四承之。陰遇陽得類。故曰合志。此與升初六之上合志義同也。巽爲志。易林姤之小過。心志不親。小過中爻正反巽。故心志不親。又蒙之升。成子得志。亦以升下巽爲志。蓋心志在內。而巽爲伏。故巽爲志。

九五。有孚攣如。富以其鄰。

孚謂孚於四。四卦主。陽喜陰。故下三陽亦孚於四。繫引也。牽也。言陽皆孚四。有若牽引連接也。九家謂五孚下三爻。虞翻強命二變謂五孚二。並非。陽於陽不孚也。五天子位。巽爲利。五乘之。故富。伏震爲鄰。富以其鄰。言五之所以富。以鄰於四也。九家謂五以四陰作財。與下三陽共之。故曰不獨富。深得經旨。

象曰。有孚攣如。不獨富也。

不獨義見前。

上九。旣雨旣處。尙德載。婦貞厲。月幾望。君子征凶。

雲上往。至上九而極。兌爲雨。兌覆向下。是雨已下施也。故曰旣雨。旣已也。詩召南江有汜。其後也處。毛傳。處止也。旣處者。言雨已止也。德者雨澤也。尙德載。言雨澤下降。乾施坤受。地得載其德澤也。巽爲婦。柔之爲道不利遠。高處在上。非婦德所宜。故婦貞得此爻者。厲也。兌爲月。互離爲日。月西日東。相望。幾。孟荀作旣。孟云。旣望十六日也。納甲法。十五日夜乾象。月盈甲。十六日平明巽象。月退辛。上九處巽之終。正旣望也。旣望則陽將消。又三無應。故征凶。自兌月象失傳。小畜歸妹中孚之月幾望。舊解皆以坎爲月。豈知易之言月。十九皆謂兌。說卦象。與經所用象。不盡同也。易林復之臨云。月出平地。以臨上坤爲地。下兌爲月也。又家人之小畜云。杲杲白日。爲月所食。以小畜互離爲日。兌爲月。兌月侵入離體之半。故曰爲月所食。兌月象。後惟邵子知之。而清易家皆不信。豈知邵子所用。與易林合。與易合哉。

象曰。旣雨旣處。德積載也。君子征凶。有所疑也。

吳先生曰。古得德同字。德積載。卽雨澤得爲大地所載也。巽爲疑。下无應。陽遇陽。故疑。

履虎尾。不咥人。亨。

爾雅釋言。履者禮也。故太玄卽擬爲禮。禮莫大於辯上下。定尊卑。卦上天下澤。尊卑判然。人之行履。莫大於是。故曰履。乾爲虎。四虎尾。兌在乾後。故曰履虎尾。履躡也。言三躡乾後也。乾爲人。兌口爲咥。人在外故不受咥。彖傳曰。柔履剛。言三步乾剛之後也。荀爽謂三履二。祇以下卦爲說。豈知卦名。皆合上下卦取義。无取一卦者。且三履二。是柔乘剛。與卦義正相背。非也。

象曰。履。柔履剛也。說而應乎乾。是以履虎尾。不咥人。亨。剛中正。履帝位而不疚。光明也。說而應乎乾。謂三應上也。五下履巽。巽爲病宜有疚。疚卽病也。然而不疚者。以五履帝位而中正也。互離爲日故光明。人知坎爲病。不知巽亦爲病。故說疚象无有合者。豈知巽爲隕落。當然亦爲病。易林。巽之鼎云。病傷不治。以鼎下巽爲病。兌之蠱云。瘡瘍多病。以蠱上艮爲瘡瘍。下巽爲病也。由易林推之易。遯九三云。有疾厲。豐六二云。往得疑疾。易原以巽爲疾病。故易林本之也。集解。荀注多利貞二字。兌秋乾冬正合。然他本皆无。

象曰。上天下澤。履。君子以辨上下。定民志。

謙坤爲民爲志。艮止爲定。民志之所以不定者。以不知上下也。上天下澤。尊卑顯然。故君子法之。以定民志。周公制禮。是其事也。

初九。素履。往无咎。

四无應。二陽。陽遇陽得敵。宜有咎。然而无咎者。以能素位而行也。故曰素履。言屏去浮華。安常蹈素。循分自守也。能如此。故往无咎。

象曰。素履之往。獨行願也。

得敵无應。故曰獨行。甘於獨行。故无咎也。先儒於同性相違之義。知者鮮。故獨行之故。尤有詳者。

九二。履道坦坦。幽人貞吉。

伏艮爲道路。比陰得中。故坦坦。坦坦者寬平也。兌爲昧无應。故曰幽人。居中故貞吉。

象曰。幽人貞吉。中不自亂也。

象多釋貞爲正。此以不亂釋貞。明貞有正定二義也。

六三。眇能視。跛能履。履虎尾。咥人凶。武人爲于大君。

說文。眇。一目小也。兌爲小。離目。故曰眇能視。震爲履。二三半震。故曰跛能履。眇而視。跛而履。皆力不足而不止之象。故象曰不足以有明不足以與行也。三正在乾虎後。故曰履虎尾。象言不咥。此言咥者。蓋以上下卦言。乾虎在外。兌在後。故不咥。而以爻言。四虎尾。上虎首。三應在上。上必來三。虎首回噬。故三獨受咥而凶也。伏震爲武人。乾爲大君。三承乾。故曰武人爲于大君。言武人忠于大君。陰順陽。代終事。與訟三之從王事同。象釋曰志剛。剛卽謂大君。志剛卽釋爲義也。虞翻謂三失位。變得正成乾。直以武人變爲大君。失之。近師俞蔭甫謂此與坤訟六三之或從王事同義。略

露曙光。特又以三升乾上釋爲字仍誤也。震武之象。國語重耳筮遇貞屯悔豫。皆有震。曰車有震武。武足迹也。震健。故震爲武。易林本之。遇震卽言武。於是履及巽之武人。象始大明。

象曰。眇能視。不足以有明也。跛能履。不足以與行也。咥人之凶。位不當也。武人爲于大君。志剛也。

三承重陽。故曰志剛。言志在順陽而行。卽坤六三訟六三之所謂從王事也。巽爲志。

九四。履虎尾。愬愬終吉。

子夏傳。愬愬恐懼也。四當乾末。正爲虎尾。乾爲惕。故爲懼。然下孚於三。三陰。陽得陰志行。故終吉。小畜九五云。有孚。謂孚于四陰。此與同義。又大有上九吉。隨九四有孚。皆以下乘陰而吉。昔賢不究陰陽相孚之理。但云懼則吉者。非也。

象曰。愬愬終吉。志行也。

陽孚陰故曰志行。巽爲志。

九五。夬履。貞厲。

夬決也。絕也。言五承乘皆陽。上下應予絕也。貞卜問。厲危也。五居互巽之上。巽隕落。故危。否九五云。其亡其亡。兇九五云。孚于剝。有厲。亦皆以居巽上。故危也。

象曰。夬履貞厲。位正當也。

五正當巽上。故貞厲。

上九。視履考祥。其旋元吉。

視履謂三。祥。吉凶之朕兆。上處履之終。故可回視已往之行事。而察其善惡之徵祥。三上相上下。上來三。則皆當位。故曰其旋元吉。旋復也。來也。元吉。大吉也。祥荀作詳。詳詳古通。

象曰。元吉在上。大有慶也。

五陽獨上有應。故大有慶。

周易尚氏學卷四 上經

三三

泰。小往大來。吉。亨。

陽性上升。陰性下降。乃陰在上。陽在下。故其氣相接相交而爲泰。泰通也。陽大陰小。爻在外曰往。在內曰來。故曰小往大來。泰寅月卦。陽長故亨。

彖曰。泰。小往大來吉亨。則是天地交而萬物通也。上下交而其志同也。內陽而外陰。內健而外順。內君子而外小人。君子道長。小人道消也。

陽上升。陰下降。故氣交。坤爲萬物。爲心志。交則萬物氣通。心志和合。故曰同。坤志象失傳。易林屯之益云。心勞且憂。益互坤。以坤爲心。又需之否云。毛羽憔悴。志如死灰。以否下坤爲志爲死。詳焦氏易詁易象補遺內陽外陰。內健外順。內君子外小人。將老氏宗旨。括盡無餘。乾爲君子。坤爲小人。泰本候卦。陽長故陰消。

按上經始乾坤。終水火。而以太泰爲樞紐。明否泰剝復。皆天地自然之法象。循環之原理。君子所宜居而安也。靜之象也。下經始咸恆。終既未濟。而以損益爲樞紐。明吉凶失得。進退變化。全在人爲。

君子所以自強不息也。動之象也。而否泰損益。皆序於第十卦後者。數至十則盈。盈則變也。象曰。天地交。泰。后以財成天地之道。輔相天地之宜。以左右民。

財裁同。釋文荀作裁。釋言疏。財裁音義並同。漢時臣工上疏。裁察每作財察。是其證。財成卽裁成也。互震爲左。互兌爲右。坤爲民。以左右民者。孔疏左右助也。以助養其民也。虞翻謂坤富稱財非。初九。拔茅茹。以其彙。征吉。

初應在四。四坤爲茅茹。此象失傳。易林剝之坤云。荻芝俱死。以坤爲荻芝。又同人之屯云。蓬蒿代柱。大屋顛倒。屯互艮爲屋爲柱。互坤爲蓬蒿。故坤亦爲茅茹。茹菜屬也。詩鄭風茹蔥在阪。前漢食貨志。菜茹有畦。茅。說文菅也。茹與茅爲二物。以其彙者。言茅與茹同拔。連類以及也。四有應。故征吉。

象曰。拔茅征吉。志在外也。

初應在四。故曰志在外。外坤爲心志。

九二。苞荒。用馮河。不遐遺。朋亡。得尚于中行。

釋文云。荒本亦作亢。說文引同。許云水廣。虞云大川也。晁氏云。漢易皆作亢象辭。亢河是一事。象數无田穰之荒。作荒始於王弼。按晁說是也。亢河爲對文。王弼蓋以坤爲亂。改作荒。豈知坤爲水。亢與河皆坤象也。苞今本作包。唐石經增改作苞。釋文亦作苞。二應在五。五坤爲大川。爲河。言二

必上升。有苞括大川。馮涉長河之勢。斷不以其遼遠而不及也。陰以陽爲朋。亡往也去也。朋往者。言二必往五。得尙居中正之位也。舊詁因坤水象及朋義失傳。故无有得解者。禮記少儀有亡而無疾。晉語請從此亡。注皆訓爲去。

象曰。苞荒。得尙于中行。以光大也。

五位尊。故曰光大。

九三。无平不陂。无往不復。艱貞无咎。勿恤其孚。于食有福。

陂傾也。復返也。陽息至三天地分。故曰平。然三居卦終。乾三云。終日乾乾。反復道也。言陽至三而盈。將反初成巽也。故曰无平不陂。无往不復。巽隕落故傾平陂往復。雖相循環。然三本當位。能艱貞自守。必无咎也。坤爲憂恤。臨六三云。既憂之无咎。以坤爲憂。易林大壯之損云。使毋憂歎。以損互坤爲憂也。詳焦氏易詁。三臨之孚於羣陰。故无恤。兌口爲食。坤多故曰于食有福。乾爲福也。

象曰。无往不復。天地際也。

廣韻際邊也。畔也。三應在上。三上居天地之極。極則返始。釋平必陂。往必復之故也。宋衷曰。三位在乾極。應在坤極。以極詁際字。最爲明晰。乃惠棟李道平等解釋宋注。竟從小爾雅謂際者接也。天地際。卽天地交接也。豈知乾極坤極。正釋際義。際若爲交接。與无往不復之義何與哉。失宋義矣。其他更无有能得解者。易理之失傳。更甚於易象矣。

六四。翩翩。不富。以其鄰不戒以孚。

震爲飛。故曰翩翩。坤虛。故曰不富。以與也。震爲鄰。以其鄰不戒以孚者。言四及五上。皆有應子。下孚於陽也。陰得陽應必吉。故曰不戒以孚。戒告誠也。震飛之象。易林屢用之。同人之坎云。出於幽谷。飛上喬木。以坎互震爲飛也。證之易明夷初九云。明夷于飛。易即以震爲飛。舊解以離爲飛。若泰无離象也。

象曰。翩翩不富。皆失實也。不戒以孚。中心願也。

坤爲心志。按益九五云有孚惠心。以互坤爲心也。否初象云志在君也。以坤爲志也。易林以坤爲心志。證尤多。舊解皆以坎爲心志。自得此象。凡易言心志者。始皆得解。中心願者。言陰喜應陽也。陽爲實。失實。言无陽。

六五。帝乙歸妹。以祉元吉。

震爲帝。坤貞乙。故曰帝乙。兌爲妹。震爲歸。婦人謂嫁曰歸。歸妹謂嫁妹也。正中爻震兌象也。祉福也。以祉元吉者。言二升五。五來二。來二卽歸各當其位。永爲儷耦。故元吉也。象釋曰中以行願。卽謂五願歸居二也。帝乙或謂爲成湯。或謂爲紂父。

象曰。以祉元吉。中以行願也。

五位尊。故曰元吉。中以行願。卽謂五願歸二也。

上六。城復于隍。勿用師。自邑告命。貞吝。

復覆通。詩陶復陶穴。說文引作覆。是其證。艮爲城。兌爲隍。城池也。三至上艮覆。正當兌澤。故曰城覆于隍。九家云。城覆于隍。國政崩也。崩卽謂艮覆。京房於復卦。朋來无咎。朋作崩。與此義同也。又易林歸妹之泰云。傾奪我城。使家不寧。城傾。卽謂泰三至上艮覆。釋此爻也。坤爲師。震爲言。爲告命。坤陰下降主退。故曰勿用。吳先生曰。呂挹之省文。挹損也。言自挹損其告命。如後世之下詔罪己也。貞吝。言卜問不吉。泰極將返否故也。

象曰。城復于隍。其命亂也。

坤爲亂。其命亂者。言泰極返否。爲天地自然之命運。无可避免。此命字與告命異。諸家混同之。非。

三三

否之匪人。不利君子貞。大往小來。

陽上升。陰下降。乃陽卽在上。陰卽在下。愈去愈遠。故天地不交而爲否。否閉也。泰上六象傳云其命亂也。言泰極反否。乃天地自然之命運。必至之理。非人力所能爲。此曰否之匪人。仍其義也。陽往外而誦。陰來內而信。故不利君子貞。貞卜問。其以正爲說者。無論若何斡旋。皆不能通。

象曰。否之匪人。不利君子貞。大往小來。則是天地不交。而萬物不通也。上下不交。而天下无邦也。內陰而外陽。內柔而外剛。內小人而外君子。小人道長。君子道消也。

天氣本上騰而在外。地氣本下降而在內。愈去愈遠。故氣不交。氣不交故萬物不通而死矣。坤爲萬

物爲邦國。乾上坤下。君民不親。上下閉塞。而邦必亂。故曰无邦。否七月卦。陰長陽消。故曰小人道長。君子道消。

象曰。天地不交。否。君子以儉德辟難。不可榮以祿。

乾爲德。儉約也。坤閉故曰儉德。言歛抑自守也。互巽爲伏。故曰辟難。坤爲患爲難。言遯世不出。以避世難。乾爲祿。艮爲榮。巽伏故不可榮以祿位。言當否之時。遯入山林。高隱不出也。

初六。拔茅茹以其彙。征吉。亨。

陰皆有應。故辭與泰同。泰茅茹象。指應爻。此則用本象也。

象曰。拔茅征吉。志在君也。

坤爲志。乾爲君。志在君。言上應四也。

六二。苞承。小人吉。大人否亨。

苞今本作包。依唐石經及釋文。下同。包苞古通用。禹貢。草木漸包。注包叢生。釋文。字亦作苞。是包苞古不分。爾雅釋言云苞積也。疏。孫炎曰。物叢生曰苞。詩唐風。集於苞栩。亦以苞爲叢。是苞有多意。衆義。坤爲衆。苞承者。言下三爻皆承陽有應也。小人謂二。二得中有應。故小人吉。凡陰得陽應必吉。陽得陰應不皆吉。而否卦陽氣上騰。不能下降。故大人否亨。大人謂五。否不。言五雖得二應而不亨也。朱升釋承爲胥。卦既无此象。荀爽謂二爲四所包。朱震謂二爲五所包。夫四五若能下

施包二。則大人不否亨矣。非也。

象曰。大人否亨。不亂羣也。

坤衆故曰羣。坤爲亂。亂雜也。不亂羣。言五不能下施應二。俾天地相雜也。故否亨。虞翻謂坤三陰。亂弑君。大人不從。故不亂羣。豈知不亂羣。卽仍天地不交之義。言五不能交二也。羣義卽釋苞義也。

六三。苞羞。

此苞字與上同義。仍坤衆坤羣象也。羞。說文進獻也。左傳隱三年。澗谿沼沚之毛。可薦於鬼神。可羞於王公。杜注羞進也。國語楚語下。於是乎每朝設脯一束。以羞子文。注亦作進。苞羞者衆進也。否本陰長之卦。故羣進而消陽也。

象曰。苞羞。位不當也。

六三不當位。進至於四。或與上相上下。則當位矣。言所以進者。以不當位也。釋苞羞之故也。自荀爽釋爲羞恥。朱升釋爲饒羞。位不當之義。皆莫知所指矣。

九四。有命。无咎。疇離祉。

命。說文使也。廣韻召也。有命言有所使命也。巽爲命。周語襄王錫晉文公命。蓋四履羣陰之上。萬民坤爲民順承。故有所錫命。四不當位。宜有咎。得羣陰使命。故无咎。頤上九云。利涉大川。與此義

同也。疇儔同。荀子勸學篇云。草木疇生。注疇同儔。前漢韓信傳。其疇十三人。義亦同儔。儔衆也。下坤爲衆。離附著。祉福。疇離祉者。言衆陰同附陽。得主而受福也。孔疏訓疇爲匹。匹謂初。言初得陽應而受福。然象釋曰志行。荀爽謂志行于羣陰。固統三陰言。不專指初也。

象曰。有命无咎。志行也。

四履重陰。得行其志。故曰志行。

九五。休否。大人吉。其亡其亡。繫于苞桑。

說文人依木則休。休者憩息也。休否者。言當否之時。而休息以俟也。蓋初四三上相上下。則既濟成。五當位居中。宜靜俟也。舊解釋爲休美。與其亡義背。似非也。九五爲大人。故曰大人吉。九五巽體。巽爲桑。坤爲多。故曰苞桑。陸績京氏易傳注云。苞桑則叢桑也。巽爲繩。爲繫。故曰繫于苞桑。乃巽爲隕落。五雖居中得正。而風隕在下。故有其亡之懼。蓋繫在大木。方能鞏固。桑而叢生。其柔可知。繫於柔木。其危可知。其亡其亡。繫于苞桑者。言時時慮亡。如繫于苞桑之不足恃也。王陶廬云。唐石經初刻作包。後增改作苞。按禹貢草木漸包。傳釋爲叢生。仍與苞同。自風隕象失傳。後儒不知危亡之故。在五履巽。於是舊解皆以堅固爲說。遂與易象不協矣。

象曰。大人之吉。位正當也。

五位尊而中正。故曰位當。

上九。傾否。先否後喜。

侯果曰。傾覆也。上應在三。三巽爲隕落。故曰傾否。言傾否而出之盡也。然當未覆之先。則仍否也。

故曰先否。上反下則成震。震爲樂爲後。故曰後喜。

象曰。否終則傾。何可長也。

否終則傾。言否終則泰復。不能長否。

按否泰云。大小往來。○。无平不陂。无往不復。終則曰城復于隍。其命亂也。否則曰否之匪人。皆言天地否泰之運。循環往來。自然如此。不假人爲。爲上經天地水火之樞紐。明天道本如斯。不可易也。至下經第十卦之損益。則曰損益盈虛。與時偕行。曰損剛益柔。曰損下益上。損上益下。曰見善則遷。有過則改。所言皆履世之大經。修治之極軌。无絲毫委心任運之意。以爲咸恆既未濟之樞紐。明人事宜如斯也。盡人事。聽天命。斯學易之功也。

○ 否字疑衍。大小往來疑當作小往大來。

周易尚氏學卷五 上經

三三三

同人于野。亨。利涉大川。利君子貞。

荀爽曰。乾舍於離。相與同居。九家曰。乾舍於離。同而爲日。天日同明。故曰同人。是乾之居南。漢儒已言之矣。又荀爽注陰陽之義配日月云。乾舍於離。配日而居。坤舍於坎。配月而居。不惟乾南。且言坤北。而惠徵君以爲此漢儒言先天之鐵證也。而欲滅其迹。曰荀氏用鬼易。以乾歸合離。坤歸合坎釋之。按乾歸爲大有。坤歸爲比。而荀氏所言者。則同人師。乃離歸坎歸也。於游歸恆例。尙不能知。而欲滅其證。其誰信之。故夫同人卦義。舍九家荀爽說。无有當者。伏坤爲野。正義云。野以喻寬廣。言和同于人。宜無遠弗届也。易林九家荀爽皆以乾爲河爲海。是乾亦爲大川。利涉謂五。中正有應。故傳釋爲乾行。乾爲君子。故利君子貞。貞卜問也。

彖曰。同人。柔得位得中而應乎乾。曰同人。同人曰。同人于野。亨。利涉大川。乾行也。文明以健。中正而應。君子正也。唯君子爲能通天下之志。

坤爲天下。五應二。故能通天下之志。詳解在焦氏易詁中。

象曰。天與火。同人。君子以類族辨物。

易以陰陽相遇爲類。王引之繁稱博引。釋類爲比。豈知皆非易之所謂類。族。正義云。聚也。聚居一處。故曰同人。然所以能聚者。以其類也。設失類而爲純陽或純陰。則不能聚矣。類族方能合異爲同。乾陽物。坤陰物。同一物也。而分陰陽。辨別也。明也。同人五陽一陰。陰雖少。然五陽之所類也。卽五陽之所同也。同則不分。然陰物陽物。判然不同。辨而明之。方知同之中有異。易之道。同性相遠。異物相感。自類字失詁。義遂不明。

初九。同人于門。无咎。

初於二陰獨近。故曰同人于門。象曰。出門同人。亦謂二近初。初出門卽遇也。虞翻以乾爲門。命四變陰以應初。若卦爲家人者。而惠棟姚配中皆宗之。朱漢上強命初變。以艮爲門。若卦爲遯者。而毛奇齡焦循宗之。是皆曲說害理。二坤爻。坤亦爲門戶也。

象曰。出門同人。又誰咎也。

誰咎謂无咎。

六二。同人于宗。吝。

乾爲主爲宗。二五正應。故同人于宗。但卦五陽皆同于二。今二獨親五。則三四忌之。致吝之道也。下繫云遠近相取。而悔吝生。遠謂應。近謂比。遠取應則不能近取比。如无妄六二往應五而利。則不

繫初。近取比。則不能遠取應。如中孚六四絕類上則不應初。而馬匹亡。是也。是故遠近萬不能兼取。同人六二遠應五。則有近不承陽之嫌。近承陽則失遠應。故吝也。彼夫咸六二遯六二皆有應。象皆與此同。乃咸六二曰居吉。遯六二曰執之。皆戒其動。俾遠近皆不取。不取則悔吝免也。舊說皆不知其故在三四。故鮮有得解者。

象曰。同人于宗。吝道也。

許慎五經異義云。易曰同人于宗吝。言同姓相取。吝道也。按此皆不明易理。不知吝之故何在。而爲此穿鑿之說。同人二與五。與大有五與二同也。乃大有五應乾。无同姓之嫌。此獨曰同姓。尙能通哉。

九三。伏戎于莽。升其高陵。三歲不興。

巽爲伏。爲寇盜。象失傳。詳焦氏易詁爲草莽。故曰伏戎于莽。乾爲山。爲陵。象失傳。詳焦氏易詁巽爲高。乾爲行。故曰升其高陵。乾爲歲。離卦數三。故曰三歲。三陽遇陽。得敵。其行塞。故升高不興也。

象曰。伏戎于莽。敵剛也。三歲不興。安行也。

敵剛卽陽遇陽。安行謂行難。

九四。乘其墉。弗克攻。吉。

巽爲墉。四居巽上。故曰乘其墉。乘墉據高。故不能攻之。然此爻不當位。无應子。承乘皆陽。困極

矣。爻辭曰吉。則不得其義。象曰困而反則。似亦不得的解。而爲此无可奈何之解。獨虞翻命四變陰。當位有應。承乘皆陽。人人皆知其吉矣。然四變陰。則巽墉象毀。四居坎上。而謂乘其墉則不合矣。

象曰。乘其墉。義弗克也。其吉。則困而反則也。

則法也。反則。言循分自守也。

九五。同人先號咷而後笑。大師克相遇。

此與屯六二義同。屯二欲上應五而爲三四同性之陰所隔。故屯遭不進。然與五爲正應。十年乃字。終必合也。同人九五欲應二。而爲三四同性之陽所阻。故先號咷。然與二爲正應。終必相遇。故後笑。伏震爲笑爲後。虞翻以互巽爲號咷。卦伏坤。故曰師。相遇。謂遇二也。從前不能相遇者。以三四之伏戎爲害也。後克而勝之。故與二相遇。

象曰。同人之先。以中直也。大師相遇。言相克也。

端木國瑚曰。同人先天乾二中直。五无應。故號咷。後天離中虛。五得應。故後笑。以先後天解同人之先後。及中直之義。雖未確切。較勝於舊解。

上九。同人于郊。无悔。

居外卦之上。故曰同人于郊。乾爲郊。上乘陽无應。遠居郊外。曠莫與儔。故曰志未得。伏坤爲志。

象曰。同人于郊。志未得也。

三三

大有。元亨。

離乾皆居南。故曰大有。與同人義同也。元亨謂五也。五得尊位。故曰元。上下應故曰亨。坤五曰元吉。比五曰元永貞。損五益五鼎五。皆曰元吉。是其證。

彖曰。大有柔得尊位。大中而上下應之。曰大有。其德剛健而文明。應乎天而時行。是以元亨。

五天位二應之。故曰應乎天。離爲夏。萬物相見。故曰時行。

象曰。火在天上。大有。君子以遏惡揚善。順天休命。

離爲惡人。乾爲善。二五相應。而皆不當位。九二云。有攸往。是二必往五也。二往五是揚善也。二往五則五下居二。是遏惡也。乾爲天爲命。陰承乾。故曰順天休命。休。美也。

初九。无交害。匪咎。艱則无咎。

初无應。陽遇陽失類。故无交。无交故无害。然須艱貞自守。方无咎也。

象曰。大有初九。无交害也。

九二。大車以載。有攸往。无咎。

伏坤爲大車爲載。按考工記。車人。大車。牛車也。兩轅。牛在轅內。凡載物皆用大車。與馬車迥異。馬車皆小車。一轅。兩服在左右。專備人乘。若載物必大車也。故曰大車以載。上有應。往則得位。故无咎。

象曰。大車以載。積中不敗也。

二得中。承乘皆陽。故曰積中。乾爲實。故爲積也。陽上升。故曰大車以載。義則本文。象則用伏。盧氏以乾爲大車。乾似无此象。

九三。公用亨于天子。小人弗克。

三爲三公。兌爲亨。天子謂五。小人謂四。四不中不正。失位无應。故曰小人。三兌體。可受亨於五。然而弗能者。以四亦陽害之也。

象曰。公用亨于天子。小人害也。

九四。匪其彭。无咎。

釋文云。彭。子夏傳作旁。虞作庭。云作彭作旁。聲字之誤。王陶廬云。諸家易俱不作庭。此仲翔故生異說。與先儒爲難。按說文云。彭。鼓聲也。釋名彭旁也。然則彭之與旁。音義並同。詩魯頌以車彭彭。毛傳。有力有容也。齊風。行人彭彭。毛傳多也。集韻云。強盛也。然則彭之義。爲聲容盛大无疑。兌爲剛魯。故曰彭。離爲文。故曰匪。考工記。且其匪色。注。匪采貌也。少儀。車馬之美。匪匪翼翼。

注。行而有文也。匪其彭者。言文采之盛大顯著也。

象曰。匪其彭无咎。明辨晢也。

明辨晢卽釋文盛之義。蓋離爲嘉會爲禮。有禮則有文。上下秩然。明辨以晢。故无咎也。

六五。厥孚交如。威如。吉。

孚。信也。五陽全孚於五。故曰交如。離南面嚮明而治。故曰威如。

象曰。厥孚交如。信以發志也。威如之吉。易而无備也。

五孚於諸陽。得行其志。孚卽信。故曰信以發志。伏坎爲信爲志也。居尊位。人皆敬之。左右咸宜。故不必有所戒備。

上九。自天祐之。吉无不利。

五天位。祐助也。王弼云。餘爻皆乘剛。上獨履柔。故吉利也。

象曰。大有上吉。自天祐也。

三三

謙亨。君子有終。

山本高而在地下。故曰謙。謙不自足也。三承乘皆陰。故曰亨。艮爲君子。坤爲終。故曰君子有終。謙
謙同。漢書藝文志。易之謙謙。尹翁歸傳。溫良謙退。注皆云同謙。謙不足也。少也。故彖傳以盈爲對

文。

彖曰。謙亨。天道下濟而光明。地道卑而上行。天道虧盈而益謙。地道變盈而流謙。鬼神害盈而福謙。人道惡盈而好謙。謙尊而光。卑而不可踰。君子之終也。

艮爲天。爲光明。象本易林。實易以艮爲天爲光明之處甚多。詳焦氏易詁。荀爽謂陽來成坎。日月之象。故光明。非。居下卦。

故曰下濟。濟止也。言一陽止於三而成艮也。艮止也。坤爲卑。居上卦。故曰卑而上行。互震爲行也。天道虧盈四句。申有終之原理。變毀也。坤爲虧。爲毀。爲害。爲惡。爲鬼。震爲神。象失傳。詳焦氏易詁爲人。艮一陽在上。故尊。艮爲官。爲君子。人知之。乃爲尊。又不知。祇易林以艮爲貴爲尊。而光。卑謂居下卦。虞翻謂

三位賤。故卑。非也。卑而不可踰者。艮爲山。艮止坎險。故雖卑退。而不能踰越。終獲福也。

象曰。地中有山。謙。君子以裒多益寡。稱物平施。

裒王弼本作哀。釋文云。鄭荀董蜀才皆作裒。取也。裒哀音同通用。陽來內故曰益。艮手故曰取。說卦坤爲衆。故爲多。剝下五陰。互三坤。多極矣。今上來益三。居中以界上下。坤爲物。下物雖寡。陽來益之。上下物等。故曰稱物。坎爲平。物稱故施平。虞因艮多節謂艮爲多。非。多白眼。多心。多眚。多字若可取象。則巽坎皆可爲多。不祇艮也。

初六。謙謙君子。用涉大川。吉。

初臨坎水。坎險坎陷。本不易涉。然初居下卦之下。謙而又謙。卑以自牧。故可用以涉此大川。而無

不吉也。

象曰。謙謙君子。卑以自牧也。

揚子方言。牧司也。治也。

六二。鳴謙。貞吉。

玉篇。鳴聲相命也。震爲鳴。二承之。三陽爲二友。損。一人行則得其友。是也。詩小雅。嚶其鳴矣。求其友聲。言二得承三。遂其所願。故得意而鳴也。二當位。故貞吉。

象曰。鳴謙貞吉。中心得也。

中心得。申鳴謙之故也。卦體坎。坎爲中爲心。

九三。勞謙。君子有終。吉。

坎爲勞卦。故曰勞謙。艮爲君子。艮成終。故曰君子有終。

象曰。勞謙君子。萬民服也。

三臨羣陰。坤衆故曰萬民服。

六四。无不利。撝謙。

釋文撝麾同。指撝也。

象曰。无不利撝謙。不違則也。

則謂三。言四順三。而發擣其謙德也。陰順陽。故无不利。子夏傳擣謙化謙也。蓋化於三而不違之也。則純指三言。各家泛論之。非也。

六五。不富。句以其鄰。利用侵伐。无不利。

坤虛故不富。震爲鄰。爲侵伐。以與也。言五與四順三以征不服。无不利也。震爲威武。故爲侵伐爲征。李鼎祚謂六五離爻。離爲戈兵。故爲侵伐。毛奇齡惠棟用之。非也。

象曰。利用侵伐。征不服也。

上六反君道。故曰不服。荀爽謂指五似非。

上六。鳴謙。利用行師。征邑國。

俞樾云。六二鳴謙。傳曰中心得。此曰志未得。何相反若是。疑鳴當作冥。與豫升上六同例。按俞說是也。豫上六冥豫。釋文云鄭讀爲鳴。鳴冥古蓋同聲相假。猶攄之作衷也。坤爲師爲邑國。震爲征爲行。人衆勢強故利。然以冥謙行之。昧於事情。故難得志。宋襄公是也。

象曰。鳴謙。志未得也。可用行師。征邑國也。

上應在三。三坎爲志。志未得。言上爲四五所阻。應三難也。

二二三

豫。利建侯行師。

雷出地上。得衆志行。故豫。豫。和樂也。歸藏作分。言震雷上出。與地分離也。又一陽界於五陰之間。使上下分別。與周易義異。震爲君。故曰建侯。與屯同義。坤爲師。順以動。故利行師。

象曰。豫。剛應而志行。順以動豫。豫順以動。故天地如之。而況建侯行師乎。天地以順動。故日月不過。而四時不忒。聖人以順動。則刑罰清而民服。豫之時義大矣哉。

艮爲天。坤爲地。艮爲日。坎爲月。順故不過不忒。坎爲刑罰。坤爲民。坤順故刑罰清而民服。艮爲時。震卦數四。故曰四時。坎爲聖。虞氏逸象李鼎祚以震爲聖。非。

象曰。雷出地奮。豫。先王以作樂崇德。殷薦之上帝。以配祖考。

震爲樂。爲仁德。爲帝。爲薦。薦進也。殷盛也。艮爲祖考。象失傳。祇易林知之。實小過六二過其祖。卽以艮爲祖。

詳焦氏易詁。古帝王作樂。皆以象其功德。用以郊天。使祖考配享。雷出地奮。聲容象之。故先王取以爲法。震爲王。

初六。鳴豫。凶。

初應四。四震爲鳴。故曰鳴豫。爻在此而象在應。如蒙三之金夫。泰二之包元憑河。及此爲易之通例。自此例不明。於是明夷初九之飛及翼。皆以離爲象矣。初六得敵。不能應四。故凶。

象曰。初六鳴豫。志窮凶也。

窮者極也。初爲二三所隔。應四難。故曰志窮。

六二。介于石。不終日。貞吉。

釋文云。介古文作𠄎。鄭古八反。云磨𠄎也。馬作𠄎。云觸小石聲。案說文。𠄎刮也。古黠切。廣韻搯𠄎物也。音憂。搯𠄎即磨𠄎。皆觸堅不相入之聲。又莊子馬蹄篇。加之以衡扼。齊之以月題。而馬知介倪。陸云介徐古八反。亦音憂。介者觸。倪倪同。介倪者。卽馬因感觸月題等物之磨𠄎。因而睥睨也。是莊子亦以介爲觸。然則𠄎𠄎介音義並同。蓋非觸堅。不能有磨憂之聲。然則介于石卽觸于石。艮爲石。二前遇之。故觸于石。易之道。異性爲類。同性相敵。二五无應。承乘皆陰。如觸于石之不相入。觸石不入。故君子見幾而作。不俟終日也。舊解𠄎字是。而義則不詳。須知𠄎于石。乃危辭。以形容二之失類。故繫云介如石焉。寧用終日。斷可識矣。艮爲終日。易林大過之艮云。終日至暮。不離其鄉。以艮爲終日。坎爲暮也。夫居中位。而又能危惕自警。故貞吉也。宋翔鳳以說文无𠄎字。有𠄎。便謂𠄎爲𠄎字。豈知晉孔坦答劉聰求降書曰。何知幾之先覺。𠄎石之易悟。桓溫傳。亦曰𠄎如石。所以成務。不止鄭作𠄎也。

象曰。不終日。貞吉。以中正也。

二當位。故中正。

六三。盱豫。悔。遲有悔。

說文。盱。張目也。爾雅。盱。憂也。又詩小雅。云何盱矣。鄭箋病也。艮爲視。衆失傳。祇易及易林用之。詳焦氏

易詁。坤爲病。故曰盱。諸爻獨三得承陽。然失位。故睢盱上視。有憂悔也。艮止故遲。有又通。遲有悔者。言遲疑不決。又有悔也。盱豫句。悔一字句。

象曰。盱豫有悔。位不當也。

位不當。釋盱豫之故。

九四。由豫。大有得。勿疑。朋盍簪。

孟子。由由然與之偕。注。由由。自得之貌。由豫者。從容和樂也。坎爲疑。上下四陰附之。陽遇陰則通。故曰大有得勿疑。陽以陰爲朋。盍合也。簪與筓同。所以括髮。朋盍簪言羣陰歸四。有若簪之括髮也。臧庸云。象盍簪者。取一陽橫貫于五陰之中。可謂觀象獨深。又杜詩。盍簪喧櫪馬。言羣馬繫于一杠之上。故以盍簪爲喻。此語解易。可謂明白如畫矣。艮爲簪。易林。恆之咸云。簪短帶長。以咸艮爲簪。復之節語同。亦以節之互艮爲簪。凡易林象。无不本於易。子夏傳爲韓嬰作。在漢易爲最古。卽作簪。故焦氏亦讀爲簪。與子夏傳同。至東漢則多改字。其詳皆在焦氏易詁中。後之人於筓簪括髮之形象。茫昧失考。故於易象維妙維肖之朋盍簪三字。皆不知其故。而尤以謂漢以前无簪名者爲失考。儀禮簪衣於裳。韓非子周主亡玉簪。李斯諫逐客。宛珠之簪。謂漢以前无者非也。

象曰。由豫大有得。志大行也。

志謂坎。上下五陰皆孚于四。故曰志大行。

六五。貞疾。恆不死。

坎爲疾。震生故曰不死。五以陰柔處尊位。乘剛勢逆。故常疾。然久而不死。以處中位也。如齊田得民。姜亦不遽亡也。

象曰。六五貞疾。乘剛也。恆不死。中未亡也。

中未亡之故。以得中故也。

上六。冥豫。成有渝。无咎。

冥昧不事事。功之成者。必漸墮矣。故曰成有渝。然當位。目前雖无大咎。久則禍至。故象曰何可長。

象曰。冥豫在上。何可長也。

何可長。言不足恃。

周易尚氏學卷六 上經

三三三

隨。元亨利貞。无咎。

歸藏曰馬徒。馬徒。卽周禮太僕職所謂前驅。越語勾踐親爲夫差前馬。注前馬前驅。在馬前也。按震爲馬。互艮爲徒隸。馬徒皆隨貴人馬。前行以辟道。而兌爲口。爲傳呼。於卦象頗合。茲周易名隨。似取隨時之義。震春。故曰元亨。兌秋。故曰利貞。言春而夏可賅。言秋而冬可賅。元亨利貞。卽春夏秋冬。周而復始。循環不窮。故曰隨。隨時而動。不過不忒。故无咎。

象曰。隨。剛來而下柔。動而說。隨。大亨貞无咎。而天下隨時。隨時之義大矣哉。

王肅本。隨時。皆作隨之。將卦義全失。朱子從之過矣。故夫讀易以明理爲先也。

象曰。澤中有雷。隨。君子以嚮晦入宴息。

艮爲君子。艮止故宴息。兌爲昧爲晦。震往。往而遇兌。故曰嚮晦。巽伏。故君子法此象。以嚮晦入宴息。

初九。官有渝。貞吉。出門交有功。

官。蜀才作館。見釋文。惠棟云。官。古文館。以穆天子傳。官人陳牲爲證。按作館是也。艮爲館。下卦艮覆。故曰館有渝。渝變也。初至四爲正覆艮。象覆卽於覆取義。易通例也。自覆象失傳。渝之故舊解皆不能說其所以然。而用覆之辭。如蒙象。如中孚之二三爻。詰皆誤矣。渝而得位。故貞吉。與下貞凶爲對文。艮爲門。初臨之。而震爲出。故曰出門。出門則有交接。陽遇陰則通。故有功。凡陽臨重陰者无不吉。此其一也。

象曰。官有渝。從正吉也。出門交有功。不失也。

失與佚通用。佚逸也。震動故不佚。言不敢安逸也。此與比六二不自失。小畜九二亦不自失。皆讀爲佚。與吉韻。義詳比九五失前禽注。

六二。係小子。失丈夫。

此爻舊解。淆亂至今者。一由卦象失傳。二由同性相敵之理不明也。初震爲小子。四艮爲丈夫。二近初。故係小子。爲六三所隔。不能承四。故失丈夫。易林家人之巽云。孩子貪餌。以伏震爲孩子也。孩子卽小子。是焦氏以震爲小子。義卽本此也。又復之剝云。夫亡從軍。以剝上艮爲夫。是艮爲丈夫。焦氏仍本之易。蓋以二人言。初生者長。後生者少。故說卦以震爲長子。艮爲少子。而以一人言。則初少上老。故經以震爲小子。艮爲丈夫。先儒不知經取象。往往與說卦不同。不敢直認。豈知象傳所釋至明也。

象曰。係小子。弗兼與也。

二居初四之間。近初遠四。故曰弗兼與。虞翻謂二應五。以五爲小子。五爲少女。焉能爲小子。失之遠矣。

六三。係丈夫。失小子。隨有求。句得。句利居貞。

三近四承陽。故上係丈夫。爲二所阻。故下失小子。象謂志舍下。是明以震爲小子。艮爲丈夫也。隨有求句。與下隨有獲對文。艮爲求。陰承陽故有得。巽爲利。咸六二云。居吉。茲云利居貞。似亦以動爲戒。蓋上无應。靜而承陽則吉。動則不利。舊解謂之正應上。於居義相背。非也。

象曰。係丈夫。志舍下也。

下謂初。經以艮爲丈夫。以震爲小子。可謂明白矣。

九四。隨有獲。貞凶。有孚。在道以明。何咎。

下乘重陰得民。故有獲。不當位。前遇敵。故貞凶。然下孚於衆。光明正大。遵循正道。亦无咎也。艮爲道。爲光明。虞氏命三四全變成離。取明象。迂曲失經旨。大畜彖傳曰。剛健爲實。輝光。剛健謂乾。輝光謂艮。是

艮爲光明。易有明文。

象曰。隨有獲。其義凶也。有孚在道。明功也。

其義凶者。謂四本不凶。而凶者以不當位也。大畜頤上九皆下孚于陰而吉

九五。孚于嘉。吉。

易林每以震爲嘉。蓋本此也。嘉指二。五孚於二。二震體。故曰孚于嘉。

象曰。孚于嘉。位正中也。

二五皆當位。故曰正中。

上六。拘係之。乃從維之。王用亨于西山。

伏艮爲拘爲山。兌西故曰西山。兌口故曰亨。王謂五。三至上正反巽。巽爲繩。故曰係。曰維。虞翻曰。兩係稱維。正反兩巽。詩所謂繫之維之也。卦以隨爲義。六窮于上。五恐其去。拘係之。從維之。或卽其隱居之處而宴享之。言六无所隨。而五必隨之也。西谿易說云。先儒說易。遇西山西鄰。皆曰文王事也。可謂大謬。

象曰。拘係之。上窮也。

窮盡也。

三三二

蠱。元亨。利涉大川。先甲三日。後甲三日。

左傳蚩爲蠱。而歸藏作蜀。詩豳風蛸蛸者蠹。蠹葵中蠹也。詩豳蜀已有虫。再加虫俗字。然則蜀亦蟲。與蠱義同也。蠱敗也。壞也。卦上山震木。爲材木之所出。乃下卦爲巽。巽隕落故敗。又巽爲蟲。

蟲蠹物朽腐。大過曰棟桡。易林旅之履云。木內生蠹。蠹卽蠱。皆以巽也。故壞。禮王制。執左道以亂政疏云。蠱者損壞之名。周禮秋官庶氏。掌除毒蠱。鄭注毒蠱蟲物而病害人者。又翦氏。掌除蠹物。凡庶蠱之事。注蠱。蠹之類。又史記秦德公二年。初伏。以狗禦蠱。注蠱惡氣。是蠱之爲蠹爲腐壞甚明。又左傳云。女惑男。風落山。謂之蠱。女惑男。男敗。風落山。山敗。亦以敗壞說蠱。荀爽謂蠱爲事。朱子蓋以爲不安。又曰壞極而有事。夫卦名皆由卦象而生。謁蠱爲事爲惑。皆正訓不誤。而此則義爲敗壞。亦卦象所命也。彖曰巽而止蠱。亦以敗壞爲說。若必拘序卦而訓爲事。則此句義難通矣。陽得陰則通。坤爲大川。爲事。剛往坤上。下履重陰。容民得衆。故曰利涉大川。曰往有事。乾元爲甲。蠱之先爲泰。乾爲日。三爻故曰先甲三日。乃由泰反否而蠱爲之始。初爻上爲蠱。二三隨上成否。甲之在下者反上。先甲變爲後甲矣。故又曰後甲三日。蠱旁通隨。隨者由否反泰之始。上爻下成隨。四五隨下成泰。甲之在上者反下。後甲又變爲先甲矣。否泰相循環相終始。來往詘信。天道固如是也。

彖曰。蠱剛上而柔下。巽而止蠱。蠱元亨而天下治也。利涉大川。往有事也。先甲三日。後甲三日。終則有始。天行也。

行道也。泰者隨之終。蠱者否之始。故曰終則有始。

象曰。山下有風。蠱。君子以振民育德。

風止山下。氣鬱不通。故蠱。蠱則不生育。振而作之。所以救蠱而育德也。象義有因卦象而取法者。有反省者。茲則反省者也。

初六。幹父之蠱。有子考。无咎。厲終吉。

初雖不當位。然上承重陽。與上合志。與升初六同。故吉。易林以震巽爲父母。詳焦氏易詁朱漢上以復姤爲小父母。復姤仍震巽。初伏震。故曰父。曰子。幹正也。能正父蠱。故曰有子考。逸周書諡法云。考成也。左氏襄十三年禰廟疏。考成也。言有成德也。有子考者。卽謂有子能成就先業也。故无咎。風隕故厲。承陽故終吉。馬融王肅讀考字絕句。王注作考无咎。非也。

象曰。幹父之蠱。意承考也。

意承考。謂初上承重陽。能承繼先德也。承順也。巽象。

九二。幹母之蠱。不可貞。

巽爲母。貞定也。不可貞。言二宜升五也。

象曰。幹母之蠱。得中道也。

二五得中。

九三。幹父之蠱。小有悔。无大咎。

三震體。故亦曰父。按九三上雖無應。然當位。前臨重陰。與大畜九三象同。當吉。乃大畜九三利往。

此云小悔无大咎者。以體下斷也。凡巽體上爻多不吉。先儒不知其故在本弱。故多誤解。
象曰。幹父之蠱。終无咎也。

九三前臨重陰。利往。故終无咎。

六四。裕父之蠱。往見吝。

裕寬也。虞云不能譴父過也。前遇敵。陰遇陰則窒。故往吝。

象曰。裕父之蠱。往未得也。

六五。幹父之蠱。用譽。

得中。有應。上承陽。而艮爲名。故可致聞譽。

象曰。幹父用譽。承以德也。

德謂陽。承以德。言上承陽也。

上九。不事王侯。高尚其事。

三震爲王。爲諸侯。上不應之。故曰不事王侯。言不事王侯之事也。高居物表。逍遙事外。故曰高尚其事。

象曰。不事王侯。志可則也。

則法也。不事王侯。若共伯和吳季札之流是也。作奉事者非。

臨。元亨利貞。至于八月。有凶。

釋詁。臨視也。穀梁哀七年。有臨天下之言焉。注。臨撫有之也。卦以震君臨四陰。正撫有也。故曰臨。臨辟丑。陽息卦。故曰元亨。左傳云。不行之謂臨。行而不已。則至八月而凶矣。故又曰利貞。言利於貞定也。月卦始子復。至未遯正八月。故鄭陸虞皆以八月爲遯。而虞氏以弑君父說凶義則非。弑君父皆否遯所同有。胡獨八月凶乎。按易林恆之臨云。神在丑。破逆爲咎。不利西南。商人休止。臨辟丑。震爲神。故曰神之在丑。乃行至未而破丑。故曰破逆爲咎。又按漢書翼奉傳。平昌侯三來見臣。皆以正日加邪時。孟康曰。謂乙丑之日。丑爲正。日加未而來。未破丑。故曰邪時。陸績易傳。至于八月凶。注曰。建丑至未也。入遯。亦以未破丑說凶義。徒以弑君父爲說。何以辭於其他消卦乎。凡易言八月七日。皆言爻數。後儒往往以殷正周正爲說。皆夢囈語也。

象曰。臨。剛來浸而長。說而順。剛中而應。大亨以正。天之道也。至于八月有凶。消不久也。遯消卦。故曰不久。

象曰。澤上有地。臨。君子以教思无窮。容保民无疆。

震兌皆爲言。故曰教思无窮。坤爲民。震爲仁。故曰容保民。坤廣大。故曰无疆。

初九。咸臨。貞吉。

咸感也。初二爻皆有應。故皆曰咸臨。貞卜問也。

象曰。咸臨貞吉。志行正也。

坤爲志。應在坤。皆當位。故曰志行正。

九二。咸臨。吉。无不利。

陽遇陰則通。故曰无不利。

象曰。咸臨吉无不利。未順命也。

二必升五。得尙於中行。而卦以不行爲義。故曰未順命。

六三。甘臨。无攸利。旣憂之。无咎。

說文。甘美也。三獨近二。陰順陽。言甘於順二也。然不當位。无應。故无所利。坤爲憂。知无所利而憂之。故无咎也。

象曰。甘臨。位不當也。旣憂之。咎不長也。

不長謂不久。

六四。至臨。无咎。

虞翻曰。至下也。謂下應初。當位有實。故无咎。

象曰。至臨无咎。位當也。

六五。知臨。大君之宜。吉。

知音智。言宜知幾也。震爲大君。象失傳。詳焦氏易詁九二震主爻。應在五。二五相上下。皆當位。故曰大君之宜。言二宜升五也。

象曰。大君之宜。行中之謂也。

二五皆中位。故曰行中。知臨者。言宜知幾。與二相上下也。

上六。敦臨。吉。无咎。

陽息卽至三。上稍止卽有應。故曰敦臨。敦與屯與頓皆通。有止意待意。義詳復卦。言稍待卽有應。故曰志在內。內謂三也。故復五六亦曰敦復。言五少遲。陽卽息至二。有應。與此同也。舊解訓敦爲厚。非。

象曰。敦臨之吉。志在內也。

言頓止之故。因陽息卽至三。有應也。易之道貴將來。將來有應。故吉。不然內无應。何吉之有。凡云志在內。志在外者。皆謂應爻。九家謂志在二升五。清儒皆宗之。由誤解敦字故也。

三三三

觀。盥而不薦。有孚顒若。

五得尊位。下臨萬民。艮爲廟堂。萬民瞻仰。故曰觀。易林以艮爲觀爲視。象失傳。詳焦氏易詁蓋卽本此

也。國之大事。在祀與戎。禮之可觀。莫盛乎宗廟。宗廟之可觀。莫盛乎祭祀。初盟降神也。馬融云。進爵灌地以降神也。卦巽爲白茅。茅在地上。坤水沃之。縮酒之象也。灌地降神。其誠敬之心。孚於神明。顯敬也。及至薦牲則禮簡略。孔子曰禘自既灌而往者。吾不欲觀之矣。與此義同也。

彖曰。大觀在上。順而巽。中正以觀天下。觀。盥而不薦。有孚顒若。下觀而化也。觀天之神道。而四時不忒。聖人以神道設教。而天下服矣。

坤爲天下。天下化則服矣。此聖人所以以神道設教也。觀亦候卦。故曰四時。臨曰元亨利貞。亦四時也。

象曰。風行地上。觀。先王以省方觀民設教。

坤爲方爲民。艮爲觀。故曰省方。曰觀民。巽爲命。故曰教。先王巡狩四方。觀風問俗。宣布教化。亦若風行地上也。

初六。童觀。小人无咎。君子吝。

釋文。馬云童猶獨也。鄭云釋也。而虞翻以艮爲童。詰與鄭同。按馬說是也。太玄玄衝云。童寡有也。而易林每以坤爲寡。初坤體。上无應。陰遇陰失類。孤寡極矣。故曰童觀。其在小人。獨行踽踽。尚可无咎。若君子則狹隘爲病矣。故吝。蓋童之象不在艮。而在坤。初何以孤寡。則以上无應而行失類也。

象曰。初六童觀。小人道也。

道行也。

六二。闕觀。利女貞。

說文闕閃也。傾頭門中視也。二應五。坤爲門。二在門中。上窺九五。而坤爲閉爲羞。故羞縮不敢正視而闕觀也。聖人取象之精。非注視卦象。不知其微妙如此也。闕觀乃妾婦之行。故利女占。若在丈夫。則可醜矣。

象曰。闕觀女貞。亦可醜也。

醜謂不莊。

六三。觀我生。進退。

凡我生皆謂應與。詩小雅。雖有兄弟。不如友生。易以陰陽相遇爲朋友。故謂應與爲我生。三應在上。故曰觀我生。進退。上巽爲進退。進退者上下也。三與上相上下。謂三宜進居上。上宜退居三。各當位也。故象曰不失道。

象曰。觀我生進退。未失道也。

道行也。

六四。觀國之光。利用賓于王。

艮爲國爲光。四獨近五。故曰觀國之光。曰賓於王。王謂五。巽爲利。言利於朝。觀天子作賓王家也。巽爲旅客。故曰賓。

象曰。觀國之光。尙賓也。

尙賓者。言賓於上也。

九五。觀我生。君子无咎。

此我生謂二。五應在二。二坤爲民。故象曰觀民。九五爲觀之主。亦艮之主。艮爲君子。下觀萬民。撫卹教養。故无咎也。

象曰。觀我生。觀民也。

觀民卽指二。二坤爲民。

上九。觀其生。君子无咎。

諸家或釋生爲出爲性爲道。一人前後。詰卽不同。似非。按其。謂五。生指三。上應在三。三坤體。民下附。皆五之民也。上貴而无位。高而无民。宜高尙其事矣。乃猶不忘情。欲應三而觀其生焉。故象曰志未平。

象曰。觀其生。志未平也。

巽爲志。

噬嗑。亨。利用獄。

噬齧也。嗑合也。亨通也。夫上下之不能相合者。中必有物間之。齧而去其間。則合而通矣。國家之有刑獄。亦復如是。民有梗化者。以刑克之。則頑梗去。而上下通矣。故曰利用獄。震爲口。頤利求口實是也。爲口故曰噬。雷電合居於東。故曰合而章。震爲口。初至四。正反震口合。上離。正反兌口合。故曰噬嗑。自覆象失傳。及震爲口之象亡。噬嗑之義。遂晦而不明。卦一陰一陽。剛柔交。故曰亨。坎爲獄。折獄之道。不明則人不服。不威則衆不從。今威明並濟。故利。

象曰。頤中有物曰噬嗑。噬嗑而亨。剛柔分。動而明。雷電合而章。柔得中而上行。雖不當位。利用獄也。

有物謂四。四在頤中。故曰有物。頤上下陽。中四爻皆陰。陰順陽。故求得口食。今四陽橫互於中。陽遇陽爲仇爲敵。不順。齧去此物。則合而通。故曰噬嗑而亨。卦陽爻與陰爻相間。故曰剛柔分。雷電合居於東。故曰合而章。五不當位。然文明以中。斷制枉直。不失情理。故利用獄也。

象曰。雷電。噬嗑。先王以明罰勅法。

罰法皆坎象。勅正也。威之用。明則離之用也。

初九。履校滅趾。无咎。

震爲趾。坎爲校。初臨重陰。利往。往而遇坎。坎在震上。故曰屨校。校械也。屨貫也。言以械貫於震足之上。足不見。故曰滅趾。初當位。故无咎。

象曰。屨校滅趾。不行也。

此言人初有過。其過尙微。故罰亦從輕。使有所懲。而不至積累其罪。以至於誅。所謂小懲大戒也。初本利行。行而遇險。故不行。

六二。噬膚滅鼻。无咎。

震爲噬。二艮體。故曰膚。曰鼻。言艮膚艮鼻。爲震口所噬。隱伏於坎水之下。故曰滅。二乘剛。故有是象。按滅趾有類於刖刑。滅鼻有類於劓刑。皆初犯罪。刑之輕者。皆冀其有所懲於後也。二得中。故可免於咎。

象曰。噬膚滅鼻。乘剛也。

乘剛不順。

六三。噬腊肉。遇毒。小吝。无咎。

說文腊乾肉也。艮堅故曰腊。坎爲肉。故三爻四爻五爻皆言肉。坎爲毒。遇毒者。坎在前也。坎肉象。詳焦氏易詁。然有應故小吝。无咎。王弼曰。噬以喻刑人。腊以喻不服。毒以喻怨生。按三不當位。以斯用刑。民必不服。豈惟不服。怨毒以生。言小民不知懲戒。仍積惡不悛也。

象曰。遇毒。位不當也。

三陽位。

九四。噬乾肺。得金矢。利艱貞。吉。

肺。玉篇。肉帶骨也。離艮皆爲火。坎肉居中。故曰乾肺。艮爲金。坎爲矢。詳焦氏易詁。四艮主爻。故曰金。亦坎主爻。故曰金矢。坎陷故利艱貞。按周禮大司寇以兩造兩劑。禁民獄訟。入束矢鈞金。然後聽之。茲云得金矢。仍寓止訟之意。夫令民入金矢。原欲止其獄訟。茲曰得金矢。是訟者不止。而益深其罪也。

象曰。利艱貞吉。未光也。

坎隱伏故曰未光。升五則光矣。

六五。噬乾肉。得黃金。貞厲。无咎。

離火故仍曰乾肉。離色黃。五履艮金上。故曰得黃金。貞卜問。失位。故貞厲。得中。故无咎。按五位雖尊。然不當位。以斯噬物。物亦不服。其堅有如噬乾肉之難。夫據尊位。能行其戮者也。乃物仍不服。不知誠懼。則其怙惡不悛。頑堅難化也明矣。故曰得黃金。言其堅愈進也。得黃金非吉辭。如吉則下不曰貞厲矣。

象曰。貞厲无咎。得當也。

得當者。得中也。

上九。何校滅耳。凶。

坎爲校爲耳。上應在三。三坎體亦艮體。艮爲背爲何。坎校在艮背上。耳則遮矣。故曰滅耳。易爻在此。而象全在應者。此其一也。王弼曰處罰之極。惡積不改者也。罪非所懲。故刑及其首。及首非滅。滅耳非懲。凶莫甚焉。正義曰。罪未及首。猶可戒懼歸善。罪已及首。性命將盡。非復可戒。故云及首非戒也。校既滅耳。將欲刑殺。非可懲改。故云滅耳非懲也。

象曰。何校滅耳。聰不明也。

滅耳則有害於聰。故曰不明。

三三

賁。亨。小利有攸往。

歸藏作焚惑。焚惑火星。史記察剛氣以處焚惑。曰南方火。主夏日。丙丁是也。卦上艮爲星。離亦爲星。下離爲火。艮亦爲火。離主夏位南。艮納丙亦南。故曰焚惑。於象恰合。至周易作賁。賁。釋文云。傳氏作斑。文章貌。鄭云文飾貌。太玄擬作飾。按卦一陰一陽相雜。相雜則有文。故曰斑。曰文飾。又按爾雅。龜三足曰賁。卦離艮皆爲龜。而震爲足。數三。正龜三足也。初二曰其趾其須。九三云濡如。六四云皤如。言其形也。上九云白賁。言其色也。雜卦云。賁无色也。艮爲黔。坎爲隱伏。爲黑。亦无

色。无色卽不明。不明故象言无敢折獄。蓋山下有火。與地下有火略同。地下有火明夷。山下有火等耳。故孔子筮得賁不樂。以與明夷同也。後人謂山下有火。明不及遠。皆讀下爲旁。故其義永不能通。前一義舊解皆從之。後一義鮮有述之者。故引信其義。以俟深於易理者定奪焉。

亨謂二。離夏故亨。傳所謂柔來文剛也。小謂五。分泰二居上。五得中承陽。故曰小利有攸往。言利往五也。唐郭京舉正。謂小爲不。非。

彖曰。賁亨。柔來而文剛。故亨。分剛上而文柔。故小利有攸往。天文也。文明以止。人文也。觀乎天文以察時變。觀乎人文以化成天下。

卦剛柔相雜故曰文。離日坎月。艮星震辰。天文。離禮震樂。人文。離夏震春坎冬。故曰以察時變。震爲生。艮爲成。爲天。故曰化成天下。朱子云。先儒說。天文上當有剛柔交錯四字。

象曰。山下有火。賁。君子以明庶政。无敢折獄。

山下非山旁。火在山下。與地下同。直明夷耳。後儒謂明不及遠者誤也。艮爲君子。明庶政。象每以相反見義。如同人曰類族辨物。无妄曰時育萬物。蠱曰振民育德皆是。茲因賁不明。君子反以明庶政。坎爲獄。折獄須明。離在下不明。故无敢折獄。而无敢折獄。尤賁爲无色无明之確徵。

初九。賁其趾。舍車而徒。

初應在四。四震故曰趾。坎爲車。初在車下。當然不乘而徒也。蓋初九正當勿用之時。安於徒步。以

遂其志者也。

象曰。舍車而徒。義弗乘也。

徒謂徒步。義弗乘者。言志行高潔。不肯苟乘也。

六二。賁其須。

艮爲須。象失傳。詳焦氏易詁。艮須在上。下離文之。故曰賁其須。其指上卦。言六二之須。謂上艮也。泰

二往上成艮。故曰興。二因得當位居中。故曰與上興。侯果謂三至上有頤象。二在頤下。故有須象。

雖巧切。不知艮卽爲須也。

象曰。賁其須。與上興也。

興起也。與上興。卽喜上興也。

九三。賁如濡如。永貞吉。

坎水故曰濡如。陽貞於三當位。前臨重陰。故曰永貞吉。

象曰。永貞之吉。終莫之陵也。

之往也。三應在上。上艮爲陵。乃上不應。故終莫之陵。永貞於三吉也。又前臨重陰。皆順三。无有陵越之患也。

六四。賁如皤如。白馬翰如。匪寇婚媾。

左傳宣二年。蟠其腹。疏蟠腹貌。卦三至上互大離。離爲大腹。故曰蟠如。釋文蟠荀作波。鄭陸作蟠。音煩。按蟠通番。番音煩。鄭陸讀煩聲是也。凡易如此等辭。往往用韻。疑番與翰協。詩大雅中伯番番。徒御嘽嘽。戎有良翰。番與翰協。與此同也。陸績云。震爲白。爲馬。按震爲羽翰。翰象尖傳。詳焦氏易詁。翰如馬行貌。言疾如羽翰也。四乘坎。坎爲寇。疑其逼己。豈知四當位。下有正應。三无能害之。終得與初婚媾也。

象曰。六四當位。疑也。匪寇婚媾。終无尤也。

疑謂疑三。坎爲疑。

六五。賁于丘園。束帛戔戔。吝。終吉。

艮爲丘園。坤爲帛。乾圓約其兩端。故曰束帛。子夏傳。五匹爲束。三玄二纁。象陰陽。戔戔。馬訓爲委積。虞作多。易林旅之豐云。束帛戔戔。賻我孟宣。似亦以盛多爲訓。俗解因戔通殘。便訓戔戔爲薄物。又或作殘落者非也。儀禮士冠士虞禮。周禮大宗伯注。皆以束帛爲十端。每端丈八尺。兩端合卷。總爲五匹。皆與子夏傳同。然則束帛五匹者。乃先王之定制。戔戔乃形容束帛之盛。謂薄物固非。殘落尤謬也。下无應故吝。上承陽。故終吉。彖謂小利往。以此。

象曰。六五之吉。有喜也。

五承陽。故有喜。

上九。白賁。无咎。

賁而曰白。其爲物也明矣。若訓爲飾爲文爲斑爲黃白色。范望太玄觀首上九注爲色不純。高誘呂覽賁字注此二字皆不能通。諸儒據繪事後素。曲爲之說。无當也。蓋艮爲賁。賁无色。故曰白賁。

象曰。白賁无咎。上得志也。

下乘重陰。故曰得志。言陽得陰而通也。大畜上九曰道大行也。損上九曰大得志。益九五曰大得志。頤上九曰大有慶。與此義皆同。乃二千年舊解。少能知其故者。眞可喟也。

周易尚氏學卷七 上經

三三三

剝。不利有攸往。

剝候卦。時當九月。陰消陽。柔變剛。雜卦云剝爛也。蓋陰消陽。柔變剛。皆以漸而及。非猝然爲之。有似於樹木老皮之剝落。歸藏作僕。僕與撲通。莊子人間世。蚩蚩僕緣。僕緣卽撲緣。撲擊也。而幽風八月剝棗。傳剝擊也。是僕與剝義同也。不利有攸往。謂陰不宜再長也。傳曰小人長。陰長則陽消。故往不利。

彖曰。剝。剝也。柔變剛也。不利有攸往。小人長也。順而止之。觀象也。君子尚消息盈虛。天行也。

艮爲視爲觀。象失傳。詳焦氏易詁。觀卦卽順而止。今一陽在上。下觀羣陰。仍觀象也。剝本消卦。然相對者必息。一消一息。一盈一虛。天道循環本如此。不足異也。

象曰。山附於地。剝。上以厚下安宅。

上謂上九。坤爲厚爲下。艮爲宅爲安。

初六。剝牀以足。句蔑。句貞凶。

初震位。故曰足。以及也。周語。太宰以史祝。管子服制。官吏以命士。鹽鐵論大論篇。呻吟稿簡。誦死人之語。則有司不以文學。以義皆同及。剝牀以足。卽剝牀及足也。艮爲牀。易林比之賁云。展轉空牀。內懷憂傷。以賁艮爲牀也。剝全體艮象。故屢言牀。虞翻不知此象。以坤消乾初。成巽爲牀。而惠棟又謂巽爲木。坤西南卦。設木於西南奧。乾人藉之。牀之象也。故夫一象之失傳。可使名家易。迂曲至于如此。眞可歎也。蔑釋文云。荀作滅。象曰滅下。蓋荀之所本。王陶廬云。蔑滅古通。周語而蔑其人民。文選鄰里相送方山詩。音塵慰寂蔑。注皆作滅。故王注云猶消也。惟滅屬下讀。似難爲句。滅說文盡也。剝牀以足蔑者。言牀足被剝盡也。故卜問凶。虞翻下屬爲句。訓爲无。謂初失位。故曰蔑貞。謂失正也。然二爻當位。亦曰蔑貞。則不合矣。而清易家多從之。非。

象曰。剝牀以足。以滅下也。

滅下卽釋蔑義。

六二。剝牀以辨。句蔑。句貞凶。

釋文云。辨徐音辨具之辨。足上也。馬鄭同。薛虞云。膝下也。王弼亦云足上。按馬鄭王等似皆以二在初上。故云足上。虞翻謂爲指問。王引之讀爲踣。踣膝頭也。俞樾謂辨通胖。胖脅側也。似皆未安。按周禮天官小宰六曰廉辨。注杜子春云廉辨或作廉端。故賈疏云經本作廉端。是辨端音近通用。端

首也。剝牀以端。是剝及牀頭也。剝之而盡故貞凶。

象曰。剝牀以辨。未有與也。

未有與。言上无應。

六三。剝无咎。

釋文一本作剝之无咎。非。按之字。乃從象辭而衍。无者是也。三處五陰之中。獨能從善不黨於上下

二陰。故曰失上下。

象曰。剝之无咎。失上下也。

六四。剝牀以膚。凶。

四艮體。艮爲膚。故曰剝牀以膚。足辨膚皆指牀言。膚猶言牀面也。人臥牀。身與牀切。剝及於是。故言近災。自王肅以膚指人身言。豈知剝及人身。則災及矣。胡得曰近。乃後儒惑之。謂牀不能稱膚。王引之謂王弼云。剝牀之足。剝牀之辨。下文亦可曰剝牀之膚乎。夫牀既可曰足。曰辨。又何不可稱膚。似皆惑於肅說。故拘泥若是。

象曰。剝牀以膚。切近災也。

六五。貫魚以宮人寵。无不利。

坤爲魚。象失傳。詳魚氏易詁。除易林外。後唯郭璞知之。洞林璞筮遷徙。得明夷。曰嗟呼黔黎。時漂異類。

桑梓之邦。其爲魚乎。明夷上坤爲魚。爲邦。震爲桑梓。故曰桑梓之邦。其爲魚乎。剝重坤。故曰貫魚。艮爲宮爲寵。以宮人寵者。周禮九嬪注云。女御八十一人當九夕。世婦二十七人當三夕。三夫人當一夕。是天子之宮人進御。每夜九人或三人。故曰貫魚以宮人寵。言宮人之寵御。以次而進。若貫魚也。卽五率羣陰以承陽。魚貫而進也。詩邶風宴爾新婚。不我屑以。箋以用也。以宮人寵。卽用宮人寵也。蒙之用說桎梏。益之利用爲依遷國。皆與此以字義同也。此與豫九四之朋盍簪。皆爲易象之最神妙。而最難於形容者。王陶廬云。易辭有非注視卦象不能解者。此等是也。而二千年來。因簪象魚象之失傳。遂改簪爲戢爲攢。以求與坎象合。命剝五變巽。以求與魚象合。而易理遂亡於解說矣。杜甫云。盍簪喧樾馬。鮑照云。魚貫度飛梁。皆此二句之確證。而杜詩尤非真知易者。不敢如此道也。宋蔡弼注杜詩。遂誤爲宴朋友。

象曰。以宮人寵。終无尤也。

五得承陽。故无尤悔。

上九。碩果不食。君子得輿。小人剝廬。

艮爲果。碩大也。孤陽在上。故曰碩果。震爲食。震覆故不食。震食象失傳。詳焦氏易詁。卦一陽未消。腓餘在上。是其義也。艮爲君子。坤爲大輿爲載。艮在坤上。乘輿之象也。故曰得輿。坤爲小人。艮爲廬。候卦陰終消陽。故曰剝廬。君子得輿。由上視下取象。小人剝廬。由下視上取象。

象曰。君子得輿。民所載也。小人剝廬。終不可用也。

坤爲民。艮爲終。

三三三

復。亨。出入无疾。朋來无咎。反復其道。七日來復。利有攸往。

陽反故曰復。出入反復。皆對姤言。復者姤之反。若舍姤不言。則復何所自乎。入者入巽。出者出震。

坤爲疾。象失傳。詳焦氏易詁陽通故无疾。陰以陽爲朋。剝窮上反下故曰朋來。陽遇陰故无咎。陽自姤

而消。消至剝上。六日。反復則七日。自復而息。息至夬上。六日。反姤仍七日。循環不已。故曰反復

其道。七日來復。復陽長。故曰利有攸往。

彖曰。復。亨。剛反。動而以順行。是以出入无疾。朋來无咎。反復其道。七日來復。天行也。利有攸往。剛長也。復其見天地之心乎。

震動坤順。故曰動而以順。天行。天道也。言陰陽剛柔往來消長。天道固如斯也。此天地之心也。坤

爲心。象失傳。詳焦氏易詁此以爻數括天地間之公例公理。其謂卦氣起中孚。至復爲七日。不惟於數不

合。祇六日七分。且於理大謬。是皆執於自姤至復爲七月。經言七日故疑也。豈知易辭皆舉一例。包括

萬有。十日數至七必相反。辰數亦然。卽以日言。幽詩云一之日。二之日。日皆謂月。侯果已言之矣。陰陽相

遇爲朋。自此象失傳。皆用卦變。俟陽息至二成兌。二陽爲朋。虞氏之說訛誤至今。

又五行志。京房易傳曰。復崩來无咎。讀朋爲崩。是用覆象。謂剝艮覆在下爲山崩。而易林遇此象。亦往往曰山崩。京所受也。其詳皆在焦氏易詁中。覆象久失傳。後惟惠棟用此說。實易言覆象者。不止此也。

象曰。雷在地中。復。先王以至日閉關。商旅不行。后不省方。

曰至日則兼二至言也。姤云。施命誥四方。卽誥戒商旅將閉關也。易林晉之解。所謂二至之戒也。蓋古最重二至。漢書薛宣傳。日至休吏。所繇來久。後漢魯恭傳。易五月姤用事。先王施命令止四方行者。是夏至亦休息。與冬至同。坤爲門戶。故曰關。震爲商旅。坤閉故曰閉關。曰不行。坤爲方。震爲王。

初九。不遠復。无祇悔。元吉。

復在內。故曰不遠復。嚴元照云。祇從氏非。此當從氏。氏是同用。故王肅作禪。坎祇既平。京房亦作禪。王陶廬云。唐石經卽作祇。氏是古同部。故得同用。若氏則另爲一部。不同部者不相假。古之例也。然則今作祇者誤也。祇鄭云病也。段玉裁云。鄭蓋借祇爲疾。按祇之訓病。詩小雅何人斯。壹者之來。俾我祇也。毛傳祇病也。茲訓爲病。正本毛傳。段謂借祇爲疾非。病猶蓄也。復出入无疾。故无蓄悔。乾元通。故元吉。

象曰。不遠之復。以修身也。

坤爲身。陽微故宜修養以待。

六二。休復。吉。

休者俟也。俟陽息至二故吉。

象曰。休復之吉。以下仁也。

仁者初也。陽主生故曰仁。以下仁者。言下陽卽息至二。靜俟則吉也。

六三。頻復。厲。无咎。

虞翻曰。頻蹙也。三失位。故頻復。按頻古文顛字。故云頻蹙。三失位。承乘皆陰。又无應子。失類極矣。故頻復厲也。知其危厲而振奮焉。則无咎矣。

象曰。頻復之厲。義无咎也。

六四。中行獨復。

文言乾九四云。中不在人。中謂三四。居一卦之中也。又繫辭云。其初難知。其上易知。若夫雜物撰德。非其中爻不備。中爻謂中四爻。卽下所謂二與四三與五也。四居卦中。獨與初應。故曰中行獨復。虞翻謂四不在二五。何得稱中行。豈知三四稱中爻。易固有明例也。

象曰。中行獨復。以從道也。

道謂初。從道謂應初。

六五。敦復。无悔。

敦與屯通。詩大雅鋪敦淮漬。箋敦當作屯。揚雄甘泉賦。敦萬騎於中營兮。注敦與屯同。又按豳風云。敦彼獨宿。卽屯彼獨宿也。屯者止也。次也。而敦又與頓同。爾雅釋丘。丘一成爲敦丘。疏卽衛風之頓丘。頓亦止也。史記王翦傳三日三夜不頓舍。是也。是敦有止意待意。敦復者言五應在二。陽卽升二。五稍待卽有應也。故臨上六亦曰敦臨。以上六亦稍待。陽卽息三。有應也。舊詁皆訓爲敦厚。非。

象曰。敦復无悔。中以自考也。

向秀曰。考察也。五中位。應在二。亦中位。陽息卽至二。五有應。故无悔。中以自考者。釋敦之故。易之道貴將來。言頓止以待中二之陽息。自考省也。與臨上之志在內義同。

上六。迷復。凶。有災眚。用行師。終有大敗。以其國君凶。至于十年不克征。

凡上六多不吉。上窮也。坤爲迷爲死喪。故有災眚。坤爲衆故爲師。坤爲死喪。故行師終有大敗。坤爲國。震爲君。象失傳。詳焦氏易詁故曰國君。坤爲十年。震爲征。不克征。言不能興起也。比上六後夫凶。師上六小人勿用。皆以其不承陽也。他爻皆可承陽。獨上六不能不承陽則背叛君命。而殃及國君。故曰以其國君凶。君者國之本。國君受脅。根本動搖。故其凶至于十年也。

象曰。迷復之凶。反君道也。

反君道。卽謂上六不承陽。舊解皆以不順君命爲反君道。然上六之何以獨反君道。其故无能明者。此與六五敦復。及臨之敦臨義晦同也。

三三

无妄。元亨利貞。其匪正有眚。不利有攸往。

震巽爲草木爲禾稼。下艮爲火。故焦京王充皆以无望爲大旱之卦。而乾爲年。巽爲入。年收失望。故曰无妄。元亨者。謂乾元通也。初當位。前臨重陰。五中正。故乾元以通。利貞者。利於貞定也。正亦定也。匪正謂三上。三上不當位。妄動。故有眚。眚病也。巽爲疾病。其匪正有眚者。言不能貞定而躁動。卽有眚也。不利有攸往。仍以動爲戒也。震爲決躁。躁動于內。外與剛健遇。必无幸矣。故曰不利有攸往。妄釋文云。馬鄭王肅皆作望。謂无所希望也。按此訓最古。史記春申君傳云。世有毋望之福。又有毋望之禍。今君處毋望之世。事毋望之主。是自戰國卽讀爲望。作毋亡。亡古文妄之省。王陶廬云。妄望同音相借。大戴禮文王篇故得望譽。望譽卽妄譽。史遷受易於楊何。固无誤也。又按雜卦云。无妄災也。故太玄擬无妄爲去。漢書谷永傳。遭无妄之卦運。應劭云。天必先雲而後雷。雷而後雨。今無雲而雷。无妄者无所望也。萬物无所望於天。災異之最大者也。後漢崔篆傳。值无妄之世。王充論衡。易无妄之應。水旱之至。蔡邕鄧皇后諡議。消无妄之運。舉兩漢之人。无作虛妄及失亡解者。无妄猶孟子所謂不虞也。六爻爻辭皆不虞之事。又无妄災也。以艮火象失傳之故。皆莫知

災之自來。而焦京以无妄爲大旱。易林履見。詳焦氏易詁之卦。其故自荀虞莫明矣。卞斌云。匪正宜作匪貞。經无作正者。虞翻知巽爲禾稼。而不知艮火象。故不知大旱之義。斥京氏爲非。詁爲亡失。不亡失則卦吉矣。然何以解於雜卦之无妄災及彖傳。彖傳曰。无妄之往何之矣。天命不右行矣哉。无妄若爲吉卦。而曰天命不右。曰无所往。有是理乎。虞翻最忌鄭學。鄭作望故駁之。其所謂俗儒。殆卽指鄭。後懼懼何妥竟作虛妄解。益與傳背。世豈有忠信之人。天命不右。往无所合者哉。害理亂道。莫斯爲甚。

彖曰。无妄。剛自外來。而爲主於內。動而健。剛中而應。大亨以正。天之命也。其匪正有眚。不利有攸往。无妄之往。何之矣。天命不佑。行矣哉。

震爲主謂初也。先儒謂遯上來初。故曰自外來。震爲躁卦。躁動於內。而外遇乾剛。故所之不合。五剛中。二有應。故曰剛中而應。大亨者。元亨也。以正者。利貞也。元亨利貞。循環來往。天命固如斯也。乾爲天。巽爲命也。臨傳云。大亨以正。天之道也。天命與天道同也。故時當元亨而動。時當利貞。卽不宜動。不宜動而強動。違天者也。違天而行。天所不福。右福也。何之者。言時值无望。无往而可也。蓋易之旨。陽剛不宜在外。在外則氣窮。有陽九之厄。故卦辭以行爲戒。以貞定爲主。

象曰。天下雷行。物與无妄。先王以茂對時育萬物。

與舉也。天下雷行。萬物震恐。舉失其求望。茂與懋通。勉也。對答也。言因雷而勉答天威。傅亮文云。祇服往命。茂對天休。潘岳秋興賦。覽花時之時育兮。是茂對連文。時育連文。古讀如是。釋文作

茂對時。非也。艮爲時。震巽皆爲草莽。而震爲生。故曰時育萬物。卽嚴畏天命。順時育物也。象有以相反爲義者。如蠱曰振民育德。剝曰上以厚下安宅。明夷曰用晦而明。及此皆是也。虞仲翔不知此旨。據象言時育。證萬物皆死之非。審如是也。將蠱曰振育。亦可謂之不蠱。剝曰安宅。亦可謂之非剝。尙可通乎。

初九。无妄。往吉。

陽遇陰則通。故往吉。

象曰。无妄之往。得志也。

得志謂往遇二陰也。大畜九三云。上合志。渙九二云。得願。上皆无應。皆以前遇二陰。虞翻不知此爲易不刊之定理。命四爻變陰。初得應釋得志。清儒從之。訛誤至今。

六二。不耕穫。不菑畲。則利有攸往。

穫說文刈穀也。詩小雅于此菑畲。疏菑災也。始災殺其草木也。故說文云。不耕田也。畲說文三歲治田。詩周頌。如何新畲。傳一歲曰菑。二歲曰新田。三歲曰畲。爾雅同。獨鄭康成及虞翻謂田二歲曰畲。皆以在二爻。豈知詩明曰新畲。是第一年菑田。第二年便爲新田。然尙未柔和也。故第三年爲畲田。觀詩不曰畲新。而曰新畲。鄭虞誤也。蓋二居艮震之間。震爲耕爲菑乃前遇艮。艮止。故不耕不菑。艮手爲穫。艮成終。爲畲。不耕而穫。不菑而畲。爲必无望之事。故象以未富爲釋。據坊記引則爲凶。

字。又據說文引畬下多田字。段玉裁以爲卽凶之形訛字。然則則爲凶字無疑。乃王注謂不耕而穫。不菑而畬。祇代終。不造始。臣道固如是也。故利往。如王詁是亦穫亦畬也。與象未富之義不合。按易林无妄之訟云。不耕而穫。家食不給。謂既不耕。穫必無得。故家食不給。讀雖與王同。而義則與小象不背矣。又禮坊記引此鄭彼注云言必先耕乃得穫。先菑乃得畬。安有無事而取利者乎。皆正詁。宜從。二有應。故利往。此自爲一義。與上二句不相屬。與困象同。

象曰。不耕穫。未富也。

六三。无妄之災。或繫之牛。行人之得。邑人之災。

无妄之災。猶不虞之災也。艮爲牛。象失傳。詳焦氏易詁補遺巽爲繫。故或繫之牛。震爲行爲人。巽爲盜。

故行人之得。艮爲邑。艮火故曰災。言或繫之牛。被行人牽去。居者反有盜嫌。遭詰捕之禍也。爻辭取象。神妙已極。乃自艮牛艮火象失傳。自虞翻以來。皆用卦變。致妙用全失。蓋三不當位。而巽伏爲盜。象失傳。詳焦氏易詁補遺故有是象。災之无妄。莫過於此。

象曰。行人得牛。邑人災也。

九四。可貞。无咎。

陽遇陽則窒。下又无應。不宜於動。故曰可貞。貞定也。然得重陰履之。故亦无咎。

象曰。可貞无咎。固有之也。

固有卽謂二陰。虞翻亦用卦變說之。非。

九五。无妄之疾。勿藥有喜。

巽爲疾。爲草莽。故爲藥。无妄之疾。言疾之愈已失望。乃勿藥而愈。其喜可知。五應在二。震爲笑。故有喜也。勿藥者。言巽藥爲艮火所焚也。

象曰。无妄之藥。不可試也。

不可試。言此爲事之偶然。非所期望。不可嘗試。蓋五雖當位有應。然承乘皆陽。未爲全吉。

上九。无妄。行有眚。无攸利。

上應在三。巽爲疾病。爲眚。爲利。然四五遇敵。故行有眚而无所利也。

象曰。无妄之行。窮之災也。

三三

大畜。利貞。不家食吉。利涉大川。

乾爲大。乾陽上升。爲艮所止。故曰大畜。陽爲艮畜。故利於貞定也。兌爲食。艮爲家。皆在外。故不家食吉。坤爲大川。上居坤水之顛。下履重陰。得行其志。故曰利涉大川。與頤上九之利涉大川同也。

彖曰。大畜剛健篤實輝光。日新其德。剛上而尙賢。能止健。大正也。不家食吉。養賢也。利

涉大川。應乎天也。

剛健篤實。謂乾。輝光謂艮。艮爲日。故曰日新。艮爲君子。故曰尚賢。曰養賢。五天位。上孚於五。故曰應乎天。

象曰。天在山中。大畜。君子以多識前言往行。以畜其德。

識。論語女以爲多學而識之者歟。注識記也。乾爲前。爲言。爲行。爲德。艮止於下。故多識前言往行。以畜其德。艮爲君子。

初九。有厲。利已。

厲危也。已止也。初有應。似利往。然二三皆陽。遇敵。故曰有厲。初勿用。故利已。言往應四則有災也。舊解皆不知有厲之故在二三。於是虞氏命二變成坎。四在坎體。以取災象。經義之晦。至於如此。眞可歎也。

象曰。有厲利已。不犯災也。

不犯災。釋利已之故也。災卽厲。指二三。

九二。輿說輹。

伏坤爲輿。震爲輹。二應在五。五震體。乃輿在內。輹在外。故曰輿脫輹。車之行全恃輹。輹脫則車不能行。二承乘皆陽。陽遇陽則窒。故有是象。舊說以二應五。便謂利涉大川指二者非也。如二能利

涉。焉有此象哉。然爻辭无吉凶。无咎悔。故象曰中无尤。言无尤之故。以得中也。

象曰。輿說輶。中无尤也。

九三。良馬逐。利艱貞。日閑輿衛。利有攸往。

乾爲良馬。震爲逐。三多懼。故利艱貞。乾爲日。爾雅釋詁。閑習也。詩秦風遊於北園。四馬既閑。傳亦訓閑爲習。震爲輿衛。日閑輿衛者。言車馬已閑習。利於行也。三臨重陰故行利。

象曰。利有攸往。上合志也。

三遇重陰。陽遇陰則通。故曰上合志。上謂四五。此與升初六之上合志同。初六之上謂二三。陰遇陽則通。與陽遇陰同也。虞翻謂上爲上爻。故易本一失。說无不誤。

六四。童牛之牯。元吉。

釋文。童牛无角牛也。按太玄更次五云。童牛角馬。不今不古。卽謂牛无角也。牯釋文云。陸作角。劉云牯之言角也。九家作告。云牛觸。角著橫木。所以告人。按劉陸作角者是也。牯角。音同通用。艮爲牛。象失傳。詳魚氏易詁。艮少故爲童牛。而艮爲角。四居艮初。有若初生之角。言小牛角初生也。四應初。故吉。

象曰。六四元吉。有喜也。

應在初陽故有喜。盧浙云。說文牯牛馬牢。牛在牢則範而不越。故吉。於艮止義亦合。

六五。豮豕之牙。吉。

爾雅釋獸。豕子猪豮豕。注云。俗呼小豮猪爲豮子。是豮豕爲小豕。艮少象也。二兌爲牙。五應之。故曰豮豕之牙。言小豕初生牙也。按艮爲黔喙。獸之黔喙者莫過於豕。疑艮或有豕象。又姤以巽爲豕。大畜三至五伏巽。或仍以巽爲豕也。李鼎祚深知豮豕二字皆由象生。然求之不得。謂五應二。二坎爻爲豕。非。又盧浙云。坤雅以牴繫豕。謂之牙。牙者繫之者也。繫而不去故吉。亦與艮止義合。

象曰。六五之吉。有慶也。

六五承陽。故有慶。晉六五。睽六五。皆上承陽。皆曰往有慶。茲與之同。

上九。何天之衢。亨。

艮一陽在上爲天。又爲背。故曰何。艮爲道路。故曰何天之衢。左傳昭二年戶諸周氏之衢。注衢道也。又爾雅釋宮。四達謂之衢。何天之衢者。言陽在上不爲所畜。通達之甚。象曰道大行。亦釋衢爲道。大行卽謂其通達。虞翻釋何爲當。王弼竟釋何爲何乃。朱子取之。益非。蓋皆以天衢如何負何爲疑。豈知易辭皆攝取象之精神。而不能執其解。執則易辭无一可通。

象曰。何天之衢。道大行也。

艮爲天。易林豫之旅云。入天門。隨之蹇云。戴瓶望天。皆以艮爲天。

周易尚氏學卷八 上經

三三

頤。貞吉。觀頤。自求口實。

鄭玄曰。頤者口車輔也。震動於下。艮止於上。口車動而上。因輔嚼物以養人。故謂之頤。按左傳輔車相依注。輔輔頰。車牙車。凡物入口。牙車載之。故曰車。輔在上不動。車在下動而上。故曰因輔嚼物。頤上艮。輔也。不動者也。下震。牙車也。動而上。因輔以嚼物者也。故鄭釋最得卦義。頤能養人。故貞吉。艮爲觀爲求。震爲口。坤爲物。故曰口實。實者食也。言口含物以自養也。虞翻謂離爲目。鄭玄謂二五皆離爻故能觀。豈知艮一陽在上爲光明。爲目。爲觀。象失傳。詳焦氏易詁。不必用卦變及爻位也。

彖曰。頤貞吉。養正則吉也。觀頤。觀其所養也。自求口實。觀其自養也。天地養萬物。聖人養賢以及萬民。頤之時大矣哉。

天地謂初上。坤爲萬物爲民。艮爲君子爲賢。伏乾爲聖人。

象曰。山下有雷。頤。君子以慎言語。節飲食。

艮爲君子。震爲言爲食。正反震言語相背。有相訟意。慎則訟息。飲食者人之所欲。震爲口。正反艮手相對。有爭意。節則飲食平。慎與節皆艮止象。此易用覆象。最爲神妙之語。舊說。惟易林能闡其義。說詳焦氏易詁

初九。舍爾靈龜。觀我朵頤。凶。

離爲龜。以剛在外。艮亦剛在外。故頤。損。益。皆以艮爲龜。此其義。唯易林知之。屯之震云。龜鼃列市。以震互艮爲龜。泰之節云。龜厭河海。以節互艮爲龜。虞翻用卦變。以晉離爲龜。易取象无此迂曲也。初爻艮覆。故曰舍爾靈龜。朵。釋文云動也。人食物則頤動。初應在四。四當頤中。故曰觀我朵頤。言初當位。擁有羣陰。貞靜自養。斯亦足矣。乃舍其自有之靈寶。而闕觀他人之寵祿。四艮體艮爲貴。爲官則躁競貽譏。而殃咎或至。故曰凶。按初當位有應。前臨重陰。陽遇陰則通。本无凶理。隨初。出門有功。益初。利用爲大作。其證也。此則凶者。以艮震相反覆。內動外止。故宜靜不宜動。屯初云。利居貞。是其義也。屯初至五。亦頤也。由此悟隨初有功者。以外兌。兌悅震喜。益初利用爲大作者。以外巽。同聲相應。故皆動而吉。獨屯。初利居貞以外坎。坎爲險難。故宜貞定。其故全在外卦。頤外艮。艮止故不宜動。舊解皆不詳凶之故何在。則易理失傳。不能觀其會通也。

象曰。觀我朵頤。亦不足貴也。

言初本可貴。反因妄動而不足貴也。

六二。顛頤。拂經。于丘頤。征凶。

顛與闐通。禮玉藻。盛氣顛實。注顛讀爲闐。而闐與賓通。前漢游俠傳。人無賢不肖闐門。注闐與賓字同。賓塞也。三四五皆陰。故曰賓頤。丘前漢息夫躬傳。寄宿丘亭。師古云。丘空也。經常。拂違也。丘頤空頤也。蓋頤以空爲用。今乃賓塞。違頤之常。故曰賓頤。拂經于丘頤。前得敵故征凶。其以顛頤拂經爲句。或以拂經于丘爲句者。非。

象曰。六二征凶。行失類也。

二无應。前遇重陰。陰遇陰則窒。故曰征凶。陰陽相遇方爲類。今六二不遇陽。故曰失類。象義如此明白。乃二千年易家。皆以陰遇陰爲類。於是文言之各從其類。坤象傳之乃與類行。繫辭之方以類聚。及此皆失解。與朋友同。說詳焦氏易詁

六三。拂頤。貞凶。十年勿用。无攸利。

吳先生曰。拂頤猶不可口也。貞占也。坤爲十年。三不當位。承乘皆陰。故十年不用。无攸利也。按三有應。陰得陽應多吉。此獨不吉者。以四五得敵。應上甚難。故曰无攸利。

象曰。十年勿用。道大悖也。

艮震皆爲道路。乃艮震上下象皆相反。故曰道大悖。玉篇悖逆也。言艮震皆有覆象相逆也。艮震皆爲道。乃上卦覆震。與下震相逆。下卦覆艮。與上艮相逆。象下一悖字。尋味无窮。

六四。顛頤。吉。虎視眈眈。其欲逐逐。无咎。

六二无應。以陰實頤。故凶。六四有應。實頤以陽。故吉。艮爲虎爲視。眈眈視貌。說文云視近志遠。坤爲欲。逐逐言所欲在初。乃爲二三所阻。不能遽遂其欲。故逐逐不已。

象曰。顛頤之吉。上施光也。

初陽應四。故曰上施光。三有應不當位。故凶。四當位有應。故吉。然四雖有應。爲二三所隔。難以下施。故須初上施而吉也。

六五。拂經。居貞吉。不可涉大川。

拂經。王注作拂頤。五不當位。故拂頤。居安也。安居五位。順上承陽。故貞吉。若下涉坤水。陰遇陰。則窒。故不可也。

象曰。居貞之吉。順以從上也。

上陽。故當順從。

上九。由頤。厲吉。利涉大川。

由自得也。義詳豫九四。九四下乘重陰。故曰由豫。此亦下乘重陰。故曰由頤。然高居萬民之上。恐逸豫隨之。故振厲方吉也。坤爲大川。陽遇陰則通。故利涉大川。此與五爻舊解所以全誤者。一由坤水象失傳。必用虞翻再三變之法。始得坎爲大川。二由類字失詁。故不知利涉不利涉之故何在也。

象曰。由頤厲吉。大有慶也。

大有慶。謂上九乘重陰。

三三

大過。棟撓。利有攸往。亨。

過失也。謂中四陽陷於陰中。失其用也。說文棟極也。爾雅棟謂之桡。郭璞云。屋脊也。易林以坎爲棟爲屋極。大過本大坎也。坎以中爻爲棟。大過以三四爲棟。撓。釋文云。曲折也。兌毀折。巽隕落。故棟撓。以易理言。陰承陽則利。利有攸往。應指初。升初六曰允升。曰上合志。大過初與升初同。而四有應。故往利也。虞翻知陽爻无利往者。乃謂二變應五故利往。如虞說。傳云棟撓本末弱。本謂初。初亦失位可變也。尙何弱之有哉。乃自宋朱震以來。卽承其說。甚矣其不思也。

彖曰。大過。大者過也。棟撓。本末弱也。剛過而中。巽而說行。利有攸往。乃亨。大過之時大矣哉。

卦氣圖。大過十月卦。閉塞成冬。故曰大過時。

大過過字。彖傳未明釋。後儒或以過往爲說。先天位兌左巽右中過乾或以過盛爲說。此說尤不協。四陽五陽卦多矣。胡此獨盛皆有可疑。愚按太玄擬大過爲失。言四陽爲陰所錮。失其用也。故漢人皆謂大過爲死卦。易林明夷之大過云。言笑未畢。憂來暴卒。又大壯之大過云。道絕不通。商旅失意。又旣濟之大

過云。身加檻纆。囚繫縛束。太玄又擬爲劇。劇甚也。病也。皆謂陰大賊陽。陽失其用。與易林說合若符契。

象曰。澤滅木。大過。君子以獨立不懼。遯世无悶。

不曰澤中有木。而曰澤滅木。此漢人死卦之說所由來也。滅者人之所懼。君子則獨立不懼。巽爲寡故曰獨。乾爲惕故曰懼。兌悅故不懼。陽陷陰中。陰伏不出。故曰遯世。遯世宜有憂矣。乃君子則遯世无悶。以兌悅在終也。大象每反以見義。此亦其一也。

初六。藉用白茅。无咎。

藉薦也。凡以物承物曰藉。曲禮執玉。其有藉者則謁。無藉者則襲。注藉藻也。疏執玉必有藻以承玉。巽爲伏。初在下。故曰藉。巽爲白爲茅。茅柔物。初陰故曰藉用白茅。又祭時藉茅于地。用以縮酒。而巽爲漏。井九三甕敝漏於象尤切。

象曰。藉用白茅。柔在下也。

初柔在下。承陽故无咎。

九二。枯楊生稊。老夫得其女妻。无不利。

巽。爲楊。爲隕落。爲枯。易林泰之咸云。老楊日衰。條多枯枝。噬嗑之否云。朽根枯樹。是以咸否互巽爲枯也。稊鄭作蕒。木更生。按詩衛風手如柔荑。傳云。如蕒之新生。然則蕒爲木新生之條。蓋稊

萬同字。莊子知北遊云。在荑稗。釋文云荑本又作稗。是其證。乾爲生。巽爲木。巽柔。故曰枯楊生稗。伏震爲老夫。巽爲女妻。女妻者。少妻。二下孚於陰。故無不利。巽爲利也。易林遇震卽曰老夫。遇巽卽曰少齊。曰少姬。本此也。詳焦氏易詁虞翻以乾老爲枯。豈知乾實雖老不枯。又以乾老爲老夫。兌爲少女。創二應上初應五之例。以圓其說。是貞悔不必拘。而應與常例可破也。乃清儒翕然從之。異已。祇俞樾以虞說爲不通。知用旁通。打破二千年之謬誤。爲功甚偉。特又以太過二五與頤二五相升降以取象。豈知巽卽爲少妻。兌卽爲老婦。易林有明徵。不必如是穿鑿也。故夫象一失傳。雖以俞氏之深識旁通。且洞明陽順陰逆之理。亦无如何也。

象曰。老夫女妻。過以相與也。

過以相與。言其不當。非謂初可過四應五。二可過五應上也。

九三。棟桡。凶。

初爻本弱。故棟桡。上雖有應。然四五皆陽。得敵。九三不能應上。故曰不可以有輔。

象曰。棟桡之凶。不可以有輔也。

輔。佐助也。

九四。棟隆。吉。有它吝。

巽爲高。四居巽上。故曰棟隆吉。有它吝者。言四應在初。四若它往應之。則爲二三所忌。而致吝矣。四與三不同。三與初同體。本弱无如何。若四只不與初應。則吉也。

象曰。棟隆之吉。不桡乎下也。

不桡乎下。卽不應初。

九五。枯楊生華。老婦得其士夫。无咎无譽。

兌爲反巽。故仍曰枯楊。兌爲華。易林否之咸云。華落實稿。以咸上兌爲華。需之剝云。老婦亡夫。以剝伏兌爲老婦。又否之中孚。老妾據機。以中孚下兌爲老妾。伏艮爲士夫。故曰老婦得其士夫。五比陰志行故无咎。下无應。故无譽。虞翻以五應初巽爲老婦。易无此例也。蓋易有伏象。伏卽旁通。卽對象。人知之。而旁通之原理。鮮能明之。文言云。旁通情也。情者感也。言陰陽不能相離也。故夫茅茹坤象也。泰初爻亦言之。雲雨坤坎象也。小畜亦言之。否初言茅茹。小過言雲雨。則用正象。易林本之。正伏象常不分。畧如見一男子。可推知其家必有婦。見一婦人。可推知其家必有夫也。然非以夫爲婦。以婦爲夫。使男女无別也。易繫辭取象可用伏。而義則正也。彼夫王引之譏虞翻用旁通。致陰陽无別。是皆於旁通情。情字失詁。故於易理隔閡如斯也。大過老夫士夫。皆在對象。而自荀虞以來。皆苦於本象求之。胡有得乎。

象曰。枯楊生華。何可久也。老婦士夫。亦可醜也。

匹配失宜。故可醜。

上六。過涉滅頂。凶。无咎。

乾爲首。故爲頂。澤水在上。故滅頂。與比之无首義同也。滅頂則死故凶。大過之爲死卦在此。然上六當位有應。凶則有之。咎則无也。故象曰不可咎。

象曰。過涉之凶。不可咎也。

不可咎。言致命遂義。殺身成仁。屬於天者雖凶。而咎則未有也。

頤大過四象在先天處四隅。而包天地水火於其中。天地水火四正卦。上經首尾也。亦卽離坎也。而卽列於離坎之前。以結上經。最耐尋味。

三三三

習坎。有孚。維心亨。行有尙。

歸藏曰。犖。李過曰。犖者勞也。以萬物勞於坎也。黃宗炎曰。物莫勞於牛。故從牛。按說文犖駁牛也。坤爲牛。陽入坤中。色不純。故曰犖。而牛爲物之最勞者。故取於駁牛。周易名坎。則取於陷險二義。上下坎故曰習。羅汝懷云。習當爲褶。禮玉藻帛爲褶。注衣有表裏而无著也。急就篇注。褶謂重衣。皆重複之義。而褶又假襲。禮楊襲。書卜不襲吉。故習當作襲。彖曰。重險。象曰水洊至。卽釋習坎之義。自注有便習之說。後儒多從之。夫諳練于行事。此事理之常。豈有諳練于行險者哉。按羅說是也。彖傳象傳。皆有明釋。王注及正義。詁爲便習。此所以有野文之譏也。孚。信也。有孚謂二五居中。遇陰。陽孚於上下陰也。舊解不知孚之故。在陽遇陰。故說皆不當。坎爲心。亨通也。心亨亦謂二

五。傳所謂剛中也。行有尙則專謂五。五往外得尊位。故曰有尙。曰有功。

象曰。習坎。重險也。水流而不盈。行險而不失其信。維心亨。乃以剛中也。行有尙。往有功也。天險不可升也。地險山川丘陵也。王公設險以守其國。險之時用大矣哉。

水流若盈。則非坎矣。既曰坎則不盈也。坎爲失。爲信。陽居中。故不失其信。五天位。居坎中。故曰天險。艮止故不可升。二地位。居坎中。故曰地險。艮爲山爲丘陵。坎爲川。故曰山川丘陵也。震爲王公。艮爲國。爲守。爲時。爲天。

象曰。水洊至。習坎。君子以常德行。習教事。

洊。再也。重坎故曰再至。艮爲君子。震爲德行爲言。故曰教。習則教之不已。而德行有常矣。
初六。習坎入于坎窞。凶。

說文窞坎中更有坎。王肅云。坎底也。字林云。坎中小坎。一曰旁入。案王肅說是也。初居坎之最下。故入于坎底。

象曰。習坎入坎。失道凶也。

震爲大塗。故曰道。初於震无應。故曰失道凶。

九二。坎有險。求小得。

二失位。故有險。陰爲小。二居中。孚於上下陰。故曰求小得。

象曰。求小得。未出中也。

象曰未出中。言五无應。故曰未出。有應則上升五而當位。所得大矣。

六三。來之坎坎。檢從鄭向本且枕。入于坎窞。勿用。

三居上下坎之間。來內爲坎。之外亦坎。故曰來之坎坎。孟子狗彘食人食而不知檢。趙岐云檢歛也。又釋名云。枕檢也。所以檢項也。然則枕與檢義同。檢且枕。仍承來之坎坎言。言內外俱受檢制。既檢且枕。仍與初爻之入坎窞同。夫前檢後枕。來往既陷于險境。其不能用也必矣。故曰勿用。

象曰。來之坎坎。終无功也。

勿用故曰无功。艮爲枕。易林需之大壯云。婚姻配合。同枕共牢。大壯通觀。以艮爲枕。坤衆故同枕。六四。樽酒。簋贰用缶。納約自牖。終无咎。

坎爲酒。震爲尊。故曰尊酒。震爲簋。簋祭器。以盛黍稷。中爻正覆震。故曰簋贰。贰二同。曲禮雖貳不辭。注貳謂重穀。此簋貳與損之二簋同。缶說文瓦器。簋贰用缶者。言用瓦簋。周禮旒人爲簋。疏祭宗廟用木簋。今用瓦。祭天地尙質。器用陶匏。郊特牲亦云。器用陶匏。象天地之性。王夫之謂缶瓦也。與禮經合。得其義矣。約神約也。周禮秋官司約。掌六約。治神之約爲上。治民之約次之。爻辭言尊簋。則祭神也。故知此約爲神約。注神約命祀郊社羣望及祖宗也。漢書高帝紀。約先入關者。注約要也。呂覽淫辭。秦趙相與約。注約盟也。艮爲牖。震爲言。故曰納約自牖。言詔明神而要誓。薦其

盟祝之載辭於牖下也。又春官詛祝作盟詛之載辭。以敍國之信用。坎爲信。故要誓于神也。四承陽當位。故无咎。艮爲終。故曰終无咎。酒缶牖咎爲韻。

象曰。樽酒簋贰。剛柔際也。

四承陽故曰剛柔際。際說文會也。

九五。坎不盈。祗既平。无咎。

坎不盈。義見前。祗京虞作禪。曰安也。鄭云當作坻。小丘也。按易字不能定者。當定之以象。鄭於復卦无祗悔。訓祗爲病。茲又訓爲坻。誠以坎不盈。與祗既平爲對文。則祗爲實字无疑。又五爲艮主爻。艮山故曰坻。而坻與氏通。說文。氏巴蜀名山岸脅之堆。旁箸欲落墮者。曰氏。氏崩聲聞數百里。揚雄賦響若氏隤。而文選解嘲作坻隤。應劭云。天水有大坂名曰隤坻。韋昭云。坻音若是理之是。是坻與氏通。俞樾云。祗既平。卽氏隤之氏。氏隤卽平矣。古本易蓋止作氏既平。後人誤加示耳。案鄭詁爲坻。蓋卽疑祗爲氏。俞說正與鄭合。而韋昭音坻爲是。由是證祗坻禪音皆山氏得。從氏者誤也。王引之謂鄭作宛在水中坻之坻爲誤。豈知鄭並未作坻。坻毛傳云小渚。釋水云。小洲曰渚。茲曰小丘。明非渚也。以鄭作坻與解嘲同。與說文同也。不然鄭豈不知仍詁爲病。使前後一律哉。坎爲平。故曰坻既平。坎不盈爲一事。坻既平又爲一事。上下對文。詁祗爲安者固非。仍詁爲病。於象雖合。於義未安也。

象曰。坎不盈。中未光大也。

陽陷陰中。雖得中而未光大。

上六係用徽纆。寘于叢棘。三歲不得。凶。

劉表云。三股爲徽。兩股爲纆。皆索名。以繫縛罪人。虞翻云。徽纆黑索也。徽纆之象。虞用卦變。以觀巽爲繩。非也。蓋坎爲矯輶。物之能矯輶者。莫過於繩。故以徽纆取象。坎爲棘。上坎下坎。故曰叢棘。寘示通。周禮朝士鄭司農注及穀梁宣二年范寧注引。皆作示于叢棘。而詩鹿鳴示我周行。鄭則云示當作寘。寘置也。寘于叢棘。舊解皆謂以黑索繫罪人。置于獄。或議于九棘之下也。三歲不得。言三年不得出也。茹敦和云。坎爲三歲。

象曰。上六失道。凶三歲也。

上六應在三。三震爲道。乃三不應上。故曰失道。

案以叢棘爲獄者。虞說也。虞謂獄外種棘。張惠言以不知所本而疑之矣。以周禮秋官朝士爲本。使公卿議于九棘之下而定罪者。鄭說也。然不曰九棘。而曰叢棘。文王演易之時。仍殷制。殷是否有三槐九棘之制。不可知。則亦可疑也。況爻詞曰三歲不得。不得者不能遂其願也。象曰。上六失道。失道者。言所爲不當也。不當故不得。於入獄詞意皆不合。按列子說符篇。臣有所與。共擔繯薪菜者。曰九方皋。是微繯可以約薪菜。揚雄酒箴云。子猶瓶矣。居井之湄。不得左右。牽于繯微。是微繯可爲

井索。胡爲必束縛罪人。若以叢棘爲疑。詩云。園有棘。其實之食。又云墓門有棘。斧以斯之。是棘常生于墓門及園囿。羽獵賦。斬叢棘。夷野草。吳志諸葛恪傳。升山赴險。抵突叢棘。是叢棘常生于山林。安在必爲獄。故易林需之坎云。鑿井求玉。非卞氏寶。名困身辱。勞无所得。上二句謂所施不得地。釋寘于叢棘。及失道之義也。下二句謂徒勞无功。釋寘于叢棘。三歲不得之義也。依易林此釋。似言微纆所以繫物。然施于叢棘。則杈枒刺激。難于施設。故久不得。不得之故。則由於所寘失道也。如是則不得與失道之故。與上文皆協洽矣。微纆皆繩索名耳。繫物之用甚多。必謂專繫罪人。无乃執乎。

三三三

離。利貞。亨。畜牝牛吉。

乾交坤爲坎。坤交乾爲離。坎爲隱而離則明矣。凡相對之卦。其義皆對。二五中正。故利貞。二五麗於陽中故亨。坤爲牛。離得坤中爻。故亦爲牛。俞云。說文牝畜母也。牝牛卽母牛。虞翻謂以離爲牝牛爲俗說。豈知左傳昭五年。明云純離爲牛。由是證虞翻未見左氏。

彖曰。離。麗也。日月麗乎天。百穀草木麗乎地。重明以麗乎正。乃化成天下。柔麗乎中正。故亨。是以畜牝牛吉也。

五爲天位。離日兌月。象失傳。詳焦氏易詁。皆在五。故曰日月麗乎天。禮王制郵罰麗于事。注麗附也。言

日月附于天也。二四互巽。爲百穀。爲草木。而二爲地位。故曰麗乎地。從王肅不作土。兩象故重明。萬物得日以化成。

象曰。明兩作。離。大人以繼明照于四方。

嚮明而治。故曰大人。重明。故曰繼。

初九。履錯然。敬之。句无咎。

王注。錯然敬慎之貌。處離之始。故宜慎所履以敬爲務。避其咎也。按初爲震爻。震爲履。錯然。蓋又有鄭重不苟之意。故曰敬。以敬之連无咎讀者非。

象曰。履錯之敬。以辟咎也。

六二。黃離。元吉。

坤色黃。離得坤中爻。故曰黃離。得中故大吉。

象曰。黃離元吉。得中道也。

九三。日昃之離。不鼓缶而歌。則大耋之嗟。凶。

三居離終。故曰日昃。故象曰不可久。此爻全用伏象。伏震爲鼓爲缶爲歌。伏艮爲堅。故易林常以艮爲壽爲老。釋言耄老也。蓋三居下卦之終。時已遲暮。故曰不鼓缶而歌。詩坎其擊缶。缶固古樂也。而三居互艮之初。艮爲大耋。言不及時行樂。則將有衰老之嗟也。震爲樂。震反爲艮則嗟矣。此與中

孚六三之或鼓或罷。或泣或歌。皆正覆象並用。與雜卦震起艮止。兌見巽伏之義同也。而能識此旨者。在古則左傳。在西漢則易林。後則无知者。

象曰。日昃之離。何可久也。

九四。突如其來如。焚如。死如。棄如。

九四雖失位。然其凶不至如此之甚。蓋此爻之義。仍取覆象。自覆象失傳。故說者皆莫明其故。離二至四巽。巽順。三至五巽覆。卽不順矣。兌剛鹵。故突如其來如。突與云同。亦作𤇗。說文云不順忽出也。從倒子。易曰突如其來如。不孝子突出不容於內也。云亦作𤇗者。說文𤇗下云。或從倒古文子。卽易突字。按古文子作𠂔。倒之卽爲𤇗。惠棟校集解。竟改爲𤇗。然說文明曰卽易突字。是古本易作突與今同。改作𤇗非也。巽覆故不順。子體倒故曰不孝子。不孝子无所容于世。體離故焚如。兌毀折故死如。棄如。說文棄捐也。從𤇗。𤇗不孝子也。故匈奴傳。王莽造焚如之刑。如淳云。焚如死如棄如者。謂不孝子也。不畜於父母。不容於朋友。故燒殺棄之。按如淳及許慎之說。皆與象傳无所容義合。蓋古義如此也。

象曰。突如其來如。无所容也。

六五。出涕沱若。戚嗟若。吉。

目汁出曰涕。五離爲目。兌爲雨水。夬九三。往遇雨。革傳水火相息。水出自目。故曰涕沱。沱說文水別流。

言涕被面而支溢也。清儒皆以伏坎爲涕。於卦象之神妙全失。兌口爲嗟。若者語辭。象本不吉。然而云吉者。以麗於陽中也。

象曰。六五之吉。麗王公也。

乾爲王爲公。謂四上。

上九。王用出征。有嘉。折首。獲匪其醜。无咎。

此與大有鼎上九義同也。大有上九云。自天右之。吉无不利。鼎上九云。大吉。蓋大有鼎中爻皆不利。凡中爻不通利者。上九必利。大畜中爻爲艮所畜。至上九忽亨。則以上九高出庶物。不爲所畜也。大有鼎離與大畜理同也。茹敦和云。離有征伐象。明夷九三曰。南狩。得其大首。晉上九曰。維用伐邑。皆爲離上爻。蓋一陽突出兌說之上。而兌爲斧鉞。離爲甲兵。故曰王用出征。兌爲毀折。乾爲首。先儒皆謂坎折坤。則離亦折乾也。皆以中爻故離有殺象。既濟云東鄰殺牛是也。折首謂殺敵。于思泊云。號季盤折首五百。執訊五十。不戢毀。女多禽折首。執訊。徵之金文。皆謂殺敵。非謂魁首。按于說是也。匪與分古通。周禮地官。廩人以待國之匪頒。注匪讀爲分。獲匪其醜者。謂匪頒所獲醜虜於有功。以爲奴隸也。

象曰。王用出征。以正邦也。

征正也。折首獲醜。皆正邦之事。邦象未詳。諸家皆以坤爲邦。按三至五伏艮。艮爲邦。

周易尚氏學卷九 下經

三三三

咸。亨。利貞。取女吉。

咸感也。歸藏曰欽。詩秦風憂心欽欽。傳思望之。心中欽欽然。蓋以少男仰求少女。有欽慕之情。是欽亦有感意。與咸義同。六爻皆有應。故曰亨利貞。少女在前。少男在後。而艮爲求。兌爲悅。艮男求女。兌悅應之。得婚姻之正。故曰取女吉。

彖曰。咸。感也。柔上而剛下。二氣感應以相與。止而悅。男下女。是以亨利貞。取女吉也。天地感而萬物化生。聖人感人心而天下和平。觀其所感。而天地萬物之情可見矣。

否三上交。故曰柔上而剛下。山澤通氣。故曰二氣感應以相與。艮止兌悅。故曰止而悅。兌上艮下。故曰男下女。天地感即陰陽和合。和合則萬物生。聖人感人則仁義兼施。仁義浹則天下和平。蓋天地萬物之事。莫不由感而通。由感而成。而其所以能感之故則情也。故曰其情可見。

象曰。山上有澤。咸。君子以虛受人。

艮爲君子。艮男下兌女。卑以自牧。故曰以虛受人。虞翻曰。否坤爲虛。乾爲人。今坤虛。三受上。故

以虛受人。

初六。咸其拇。

拇。釋文馬鄭薛云。足大指也。初在下震爻。故曰咸其拇。咸及拇。則欲行矣。

象曰。咸其拇。志在外也。

外謂四。初應在四。初四相上下。則各當其位。足者人所恃以行。今感在拇。故欲之外也。巽伏故亦爲志。見易林。亦失傳象也。

六二。咸其腓。凶。居吉。

脛腓所恃以行。感及於腓。則欲前進。乃進而凶者何也。按二當位。承陽有應。與革二至上同。革六二征吉。此應與之同。然而凶者。以革義取革新。故利于征。若咸則義取陰陽相感。感在五爲正應。乃三四亦陽。二獨與五。則爲三四所忌。故動凶居吉。此與同人六二同。二同于五。原爲正應。然而吝者。以三四亦陽。二不與同而獨同五。則招忌也。其故皆在三四。近比三則失五之正應。遠應五則有近不承陽之嫌。遯六二繫以牛革。亦戒其動。以遯二與同人咸體同也。腓。說文脛腓也。腓。說文脛腓也。段玉裁云。腓腸謂脛骨後之肉。腓之言肥。似中有腸者。故曰腓腸。按段釋腓腸。至爲明晰。卽今俗所謂腿肚也。莊子天下篇。禹腓無胫。注胫細毛也。腓因勞受摩措。故胫不生。然則腓爲脛肚明矣。人之行恃脛。感及於脛。必前進矣。進則有咎。故曰凶。居則不動而承陽。故曰居吉。此爻凶

義。鮮有詳其故者。崔憬謂二應五。失艮止義。惠棟謂二比三。失五正應。義皆未備。

象曰。雖凶居吉。順不害也。

二承陽有應。當位。本无凶理。象辭恐人生疑。故釋其故。言爻辭雖云動凶居吉。然陰順陽爲天職。六二但上承諸陽。亦无害也。傳意似重近取。不必遠應也。翼經之大。莫過於此。

九三。咸其股。執其隨。往吝。

巽爲股。股在腓上。故感及於股。陽遇陽則窒。上雖有應。不能往也。往則爲四五所忌而吝生矣。若初二則隨三者也。三下履重陰。止於是可矣。執者止也。止於三下比於陰。不必前進。否則吝窮也。

象曰。咸其股。亦不處也。志在隨人。所執下也。

股所以行。故曰不處。巽爲志。乾爲人。言初二志在隨三。故三之所執。宜於下也。

九四。貞吉。悔亡。憧憧往來。朋從爾思。

四不當位。承乘皆陽。故必貞定無爲。方免悔吝。朋謂初。爾謂四。憧憧思不定也。蓋四來應初則三害之。初往應四。則二害之。故初四不宜動。宜靜。然阻愈多則感愈切。朋從爾思者。言初不得應陽。而慕思四也。

象曰。貞吉悔亡。未感害也。憧憧往來。未光大也。

下繫云。凡易之情。近而不相得則凶。或害之。三近四。二近初。然三亦陽。爲四敵。二亦陰。爲初敵。

故二三爲初四害。知其害而不動。害斯免矣。故曰未感害也。初四相上下成離。離爲光大。今不能相上下。故曰未光大。

九五。咸其脢。无悔。

脢。說文背脊肉也。鄭虞同。伏艮。艮爲背。故曰咸其脢。當位得中。故无悔。脢居人身之上。故象曰志末。末謂上六。言九五感上。近而无阻。故无悔也。案五正應在二。而捨二感上者。以三四害之也。象曰。咸其脢。志末也。

大過云。本末弱。以上爲末也。茲曰志末。謂五爲三四所阻。不能應二。故捨遠取近。感在上也。

上六。咸其輔頰舌。

虞翻曰。耳目之間曰輔頰。按說文。輔。人頰車也。頰。面旁也。左傳輔車相依注。輔。輔頰。車。牙車。正義云。易以輔頰舌三者並言。則三物也。故鄭注頤卦云。頤者口車輔也。震動於下。艮止於上。口車動而上。因輔嚼物以養人。按鄭所謂口車卽牙車。牙車在口下。故曰動而上。輔在口上。故曰因輔嚼物以養人。是輔與牙車對。在口中。頰在面旁。居口上。與頤連。不過頰在上。頤在下。頰以骨言。頤以肉言耳。是輔與頰確爲二物。又皆爲口之屬。故與舌並言。兌爲口爲言。輔頰舌皆兌象。所以言者。感及于是。則言說多矣。故象曰滕口說。來矣鮮云。舌動則輔應而頰隨之。三者相須用事。皆所以言者。皆兌象。

象曰。咸其輔頰舌。滕口說也。

釋文。滕達也。九家作乘。虞作滕。鄭云送也。按鄭虞說非也。朱子云。滕與騰通。卽達也。李鼎祚本正作騰。

三三二

恆。亨。无咎。利貞。利有攸往。

咸男下女。男求女。得婚姻之正。夫婦之道既立。則長男在前。長女在後。夫倡婦隨。終身以之。故受之以恆。恆常也。久也。卦六爻皆有應。故亨利貞。易林大畜之未濟云。乾坤利貞。乳生六子。利貞者和合也。二五應初承重陽。四臨重陰。故曰利有攸往。虞翻謂終變成益者是也。

彖曰。恆。久也。剛上而柔下。雷風相與。巽而動。剛柔皆應。恆。恆亨无咎利貞。久於其道也。天地之道。恆久而不已也。利有攸往。終則有始也。日月得天而能久照。四時變化而能久成。聖人久於其道而天下化成。觀其所恆。而天地萬物之情可見矣。

泰初四相上下成震巽。故曰剛上而柔下。震巽相反覆。乾坤者震巽之終。震巽者乾坤之始。故曰終則有始。疊先甲三日。後甲三日。終則有始。與此理同也。夫婦者天地也。天地之道。循環往來。恆久不已。乾爲日。兌爲月。日月久照。恆也。震爲春。巽爲夏。兌秋。乾冬。四時反覆。无有窮期。恆也。乾爲聖人。震巽爲草木。故曰萬物之情。

象曰。雷風。恆。君子以立不易方。

雷風同聲相應。可常可久。立而易方。則不恆矣。故此卦六爻皆有應。而爻辭皆不取。論語有勇知方。注。方義也。立不易方。卽蹈義而行。无或違也。

初六。浚恆。貞凶。无攸利。

浚深也。虞翻云。乾初爲淵故深。深謂陽。乃泰初陽上居四。四陰下居初。雖皆失位。而仍有相求相交之象。故曰浚恆。乃四陽爲二三所隔。不能應初。若初則可應四也。惟初遠應四。則有近不承陽之嫌。爲二三所忌。故曰貞凶。无攸利。貞卜問。巽爲利也。

象曰。浚恆之凶。始求深也。

爻在初稱始。宜靜不宜動。況陰居初失位。尤不宜動。以違恆久之義。乃初六求與四陽交。不知二三之有厲。故曰浚恆之凶。始求深也。言凶之故在初六求與四交也。焦氏易林泰之恆云。蔡侯適楚。流連江濱。蹢躅歷月。思其后君。巽爲草莽。故爲蔡。叢木爲楚。故震爲楚。言初求四。故曰蔡侯適楚。乾爲江海。初在乾下。故曰流連江濱。乾爲日兌爲月。初前臨乾兌。故曰蹢躅歷月。初求交四。震爲君。故曰思其后君。林詞專釋此爻與四之關係。而曰思其后君。釋求深之義。尤爲明白。故本焦義以爲詁。

九二。悔亡。

二不當位。前臨重陽。宜有悔矣。然得中位。進雖不利。中正自守。亦无悔也。

象曰。九二悔亡。能久中也。

乾爲久。爲三四所隔。不能應五。故久於中。卦以恆爲義。久中故悔亡。

九三。不恆其德。或承之羞。貞吝。

乾爲德。三承乘皆陽。宜靜不宜動。倘亟於應上。而四或害之。則羞吝生矣。故貞吝也。又三居巽上。

下撓。進退不定。亦不恆之一因也。

象曰。不恆其德。无所容也。

乾爲德。承乘皆陽。進退有阻。故曰无所容。

九四。田无禽。

震爲田獵。禽獲也。下應初。三二遇敵。爲阻。故无禽。按四前臨重陰。例之豫四。大壯解豐。四爻皆

吉。茲獨不吉者。卦以恆久貞定爲義。故不取利往也。

象曰。久非其位。安得禽也。

乾爲久。乾四失位。故曰久非其位。

六五。恆其德。貞婦人吉。夫子凶。

二五爲夫婦。乾爲德。六五下遇重陽。而正應在九二。通利極矣。陰得陽應。終身順承。故貞婦人吉。

乾爲夫。大過九二。老夫得女妻是也。故夫子謂九二。六五者九二之婦。本爲正應。然二若應五而從婦。則三四遇敵。橫犯災難。故曰夫子凶。大畜初九曰。不犯災。需初九曰。不犯難行。二卦初九。皆有正應。而皆二三得敵。故曰災難。茲與之同。

象曰。婦人貞吉。從一而終也。夫子制義。從婦凶也。

五應二。故曰從一而終。坤爲義。乾制義者也。陽得陰應。本无足貴。況應之而犯災難乎。故曰從婦凶也。

上六。振恆。凶。

上六居動之極。故曰振恆。振起也。卦以貞靜恆久爲義。振則於恆德或違。故凶。
象曰。振恆在上。大无功也。

爻至上而窮。不宜動。大謂三。三欲應上。爲四所隔。故曰大无功。

周易尙氏學卷十 下經

三三三

遯。亨。小利貞。

遯月卦辟未。陰長陽消。小人道長。君子道消。遯者退也。避也。當陰盛之時。勢須退避。否則其禍有不可勝言者矣。故曰遯亨。蓋以行止論。潔身退隱。否所謂儉德避難也。無所謂亨。而以禍福論。防微慮遠。不事王侯。高尚其事。優游事外。亨莫亨於是矣。故傳曰遯而亨也。陽大陰小。小利貞者。謂宜貞定也。傳曰浸而長。謂陰方長。長則消陽。故利於靜。不利於動也。

彖曰。遯亨。遯而亨也。剛當位而應。與時行也。小利貞。浸而長也。遯之時義大矣哉。

五當位。二有應。故曰剛當位而應。然而不能不遯者。時不可也。故曰與時行。遯太早則有過情之譏。如嚴光是也。太晚則不能遯。沈溺於小人之中。而不能免。如劉歆是也。行而宜之之謂義。故夫子極歎時義之大。

象曰。天下有山。遯。君子以遠小人。不惡而嚴。

凡卦皆合上下卦以立名。乾健艮止。皆無退義。然而遯者。以乾與艮先後天皆居西北也。西北者幽

潛无用之地。太玄謂曰冥。冥者明之藏也。故曰遯。乾爲君子。遠遯在外。故曰遠小人。五應二。故曰不惡。然以有阻隔故。絕難爲與。故曰不惡而嚴。蓋外不與絕。內實遠之也。

初六。遯尾。厲。勿用有攸往。

爻象初爲尾。初往應四。則爲同性之二所阻。危厲之道也。勿往則免矣。

象曰。遯尾之厲。不往何災也。

艮爲止。在艮宜靜。勿用有攸往。則无災矣。

六二。執之用黃牛之革。莫之勝說。

艮爲牛。无妄六三或繫之牛是也。二居中。故曰黃牛。易林既濟之艮云。伺候牛羊。同人之无妄云。負牛上山。皆以艮爲牛。艮爲皮革。執持也止也。艮手爲執。言二得中正。宜貞定自持。如牛革之固。莫能勝我而說去也。仍小利貞之旨也。說脫同。

象曰。執用黃牛。固志也。

巽爲志。牛革者至固之物。持志如是。貞定極矣。故曰固志。固則不動。不動則不消陽。

九三。係遯。有疾厲。畜臣妾。吉。

巽爲繩。故曰係。艮止故曰係遯。言係戀而不卽遯也。巽爲疾。三无應。往遇敵。故有疾厲。然下有重陰。承順於三。畜臣妾則吉。艮爲臣妾也。巽疾象。詳履卦彖傳注。艮臣象亦本易林。易林夬之坎云。

君臣擾憂。坎中爻艮震。震爲君。艮爲臣。故曰君臣擾憂。又兌之艮云。臣圍其君。亦以艮爲臣。蓋艮爲僮爲僕。故爲妾。臣與僕古不分。故爲臣。由是知蹇六二曰。王臣蹇蹇。小過六二曰。遇其臣。易原以艮爲臣也。

象曰。係遯之厲。有疾憊也。畜臣妾吉。不可大事也。

廣韻。憊。羸困也。陸績云。大事謂天下之政。潛遯之世。但可居家。畜養臣妾。不可治國之大事。

九四。好遯。君子吉。小人否。

虞翻曰。否。乾爲好爲君子。陰稱小人。按四與初有應。好遯者。外不與小人絕。當禍患未形之時。從容而遯也。然知幾其神。惟君子能之。若小人則係戀而不去也。故曰君子吉。小人否。

象曰。君子好遯。小人否也。

否不也。小人不肯退。不退則凶咎至矣。

九五。嘉遯。貞吉。

乾爲嘉。五居中當位。下有應與。不必遯也。乃識微慮遠。及此嘉時而遯焉。故曰貞吉。

象曰。嘉遯貞吉。以正志也。

五應在二。二互巽。巽爲伏。故爲心志。虞翻用卦變謂四與初已易位。三已變成坎。上來之三。成坎爲志。夫聖人觀象繫辭。其所用象。乃在三變之後。迂曲如此。使後學烏從測之哉。

上九。肥遯。无不利。

子夏傳釋肥爲饒裕。虞翻以乾盈爲肥。皆非。後漢張衡傳。注引淮南九師訓云。飛而能遯。吉孰大焉。易林需之遯云。去如飛鴻。節之遯云。奮翅鼓翼。王弼云。增繳不能及。並皆讀爲飛。朱芹引姚寬西溪叢語云。肥古作蜚。蜚蜚同字。是肥卽蜚。蜚卽飛也。蓋上九居極上。高飛遠引。无有阻隔。故无不利。而乾爲行。故爲飛。乾九五飛龍在天是也。

象曰。肥遯无不利。无所疑也。

上九逍遙世外。故无所疑。

三三

大壯。利貞。

雜卦云。大壯則止。序卦云。物不可以終壯。故授之以晉。晉者進也。是亦訓爲止。故與進對文。太玄擬爲格。格阻也。亦止也。又擬爲夷。夷傷也。故馬虞皆訓壯爲傷。吳先生曰。傷則必止。二義相因。按說卦震爲蕃。蕃有閉義。詩四國于蕃。箋云蕃屏也。周禮大司徒蕃樂。杜子春讀蕃爲藩。謂藩閉樂器而不用。是蕃與藩通。大壯之所以爲止者。以震藩屏閉在前也。四不應初。二三遇敵。下陽全爲四所格阻。故曰利貞。言利於貞定不動也。卽止也。不止則傷。四五兩爻是也。鄭王謂爲強盛。然注莫古于十翼。莫精于太玄。皆不如是言。疑非易本旨。

象曰。大壯。大者壯也。剛以動。故壯。大壯利貞。大者正也。正大而天地之情可見矣。

大謂乾。乾在下爲四所格。故曰大者壯也。蓋剛宜靜。剛而動必多阻格。釋壯之故也。利貞者。貞定。乾象傳云。各正性命。保合太和。乃利貞。天地之情。本如是也。

象曰。雷在天上。大壯。君子以非禮弗履。

震爲履。震履乾。即卑履尊。非禮甚矣。陸績曰。君子見卑履尊。終必消除。故以爲戒。大象每相反爲義。此其一也。

初九。壯于趾。征凶。有孚。

初應在四。四震爲趾。乃四亦陽。初失應。故壯于趾。言趾有所阻格也。又二三亦陽。陽遇陽則窒。故征凶。有。說文有不宜有也。春秋傳日月有食之是也。依說文。有孚者。謂不宜於有也。即不孚也。正與象辭孚窮之義合也。

象曰。壯于趾。其孚窮也。

初得敵。无應。故孚窮。

九二。貞吉。

二得中。故貞吉。與下貞厲爲對文。

象曰。九二貞吉。以中也。

二承乘皆陽。得敵。似不吉。然而吉者。以位中也。

九三。小人用壯。君子用罔。貞厲。羝羊觸藩。羸其角。

三應在上。小人謂上六。君子謂三。乃上六欲應三。而爲五所格。故用壯。三欲應上。而爲四所格。故用罔。罔无也。言三上皆失其用也。故卜問厲。中爻互兌。故曰羝羊。四震爲藩。羸纏繞也。三在下卦之上。於爻象爲角。羝羊觸藩。羸其角者。言三欲上升。爲九四所阻格。若羝羊以角觸藩而不能決。角反爲藩所困也。荀爽以五爲角。五爲角。則藩已決矣。胡有羸象哉。震藩象。易林乾之豐云。藩屏周衛。同人之師云。藩屏湯武。皆以震爲藩。而藩與蕃通。說卦震爲蕃。卽易林所本也。

象曰。小人用壯。君子罔也。

罔猶否也。

九四。貞吉。悔亡。藩決不羸。壯于大輿之輹。

四前臨重陰利往。故貞吉无悔。故藩決不羸。震爲輿。爲輹。象曰尙往。是四往五也。四往五。震象毀。而兌爲毀折。故曰壯于大輿之輹。蓋卦以止爲義。藩決則進。進則有傷。五爻喪羊相因而至矣。虞翻因不知輹象。改輹爲腹。非。

象曰。藩決不羸。尙往也。

尙往言上進居五。

六五。喪羊于易。无悔。

兌爲羊。兌毀折故喪羊。易。釋文云。陸作場。謂疆場也。古文往往如是。說文場田畔也。詩小雅。疆場有瓜。喪羊于場。言喪羊于田畔也。諸家作難易解。不辭甚矣。惟場象无有詳者。按震爲阪。說文阪坡也。山脅也。詩小雅。瞻彼阪田。場旣爲田畔。疑仍震象也。然雖喪羊。下有應得中。亦无悔也。

象曰。喪羊于易。位不當也。

位不當。釋喪羊之故也。

上六。羝羊觸藩。不能退。不能遂。无攸利。艱則吉。

卦全體兌象。故仍曰羝羊。上欲應三。而爲五所格。五亦陰得敵。三之藩在四。上之藩在五。故退欲來三。爲藩所阻。進欲前往。而道已窮。故不能退不能遂。巽爲利。巽伏故无攸利。然上當位有應。艱貞自守。終吉也。

象曰。不能退。不能遂。不詳也。艱則吉。咎不長也。

釋文云。詳審也。審慎也。言不能退不能遂之故。咎在不慎審於始而妄動也。鄭虞王肅王弼皆釋詳爲善。於義亦通。三上爲正應。終必和合。故曰咎不長。

三三

晉。康侯用錫馬蕃庶。晝日三接。

離出地居五。南面嚮明而治。故曰晉。晉進也。四諸侯。康美也。大也。禮祭統。康周公注。康猶褒大也。易林隨之恆云。實沈參虛。封爲康侯。康侯畧如大侯。爲諸侯之美稱。猶詩之言齊侯。言平王也。坎爲馬。坤亦爲馬。坎爲衆。坤亦爲衆。故曰用錫馬蕃庶。艮爲手。故曰錫。錫予也。言康侯恭順。來賓于王。錫賁衆多。雜卦。晉晝也。艮爲手。數三。離爲晝。故曰晝日三接。侯果曰。大行人職曰。諸公三饗三問三勞。諸侯三饗再問再勞。子男三饗一問一勞。卽天子三接諸侯之禮也。晝日三接。卽一晝三覲也。

彖曰。晉。進也。明出地上。順而麗乎大明。柔進而上行。是以康侯用錫馬蕃庶。晝日三接也。明出地上謂離。順謂坤。柔進而上行謂五。進居地上。得君位也。

象曰。明出地上。晉。君子以自昭明德。

明出地上。自然顯著。德不求明而自明。故學易之君子。取法乎此。以自昭明德。言明德在己。自然昭朗。視能進與否耳。苟進而上行。未有不顯著者。昭正義云。周氏等作照。按昭照古通。无異義也。初六。晉如摧如。貞吉。罔孚。裕无咎。

初陰。二三亦陰。得敵。故進而見摧。有應故貞吉。然初雖應四。以爲二三所隔。應之甚難。故曰罔孚。裕緩也。言初與四終爲正應。緩以俟之。則无咎也。與屯六二。十年乃字義同也。舊解皆不知得敵之理。虞翻以失位詒摧如。以罔孚詒罔孚。遂歧誤百出矣。

象曰。晉如摧如。獨行正也。裕无咎。未受命也。

初陰遇陰得敵。故曰獨行。有應故曰正。未受命者。言初居勿用之位。尚未膺官守之命也。

六二。晉如愁如。貞吉。受茲介福於其王母。

二无應。進遇坎。坎爲憂。故曰愁如。貞吉者。卜問吉也。介虞九家皆訓爲大。坤爲母。伏乾爲大爲福爲王。故曰受茲介福於其王母。王母謂二。言二雖不宜於進。然得中爲坤本位。必受此大福也。舊解謂王母指六五。六五亦陰。焉能福二。故夫陰遇陰陽遇陽。敵應之理不明。說易无不誤也。

象曰。受茲介福。以中正也。

言二所以受茲大福者。以得此中正之位也。若六五則中而不正。各家因曰王母疑非五莫能當。豈知下坤方爲母。伏乾故曰王母。易林此例甚多也。

六三。衆允悔亡。

施氏於升初六允升。讀作執。執進也。此允字當與之同。故吳澄亦讀作衆執。衆執者衆進。坤爲衆。言羣陰並進而承陽也。故曰悔亡。虞翻詁允爲信。朱子從之。與象傳上行之義不合。

象曰。衆允之志。上行也。

坎爲志。上行謂進而承陽。卽釋執義。可見施讀合也。

九四。晉如鼫鼠。貞厲。

釋文子夏傳作碩鼠。云五技鼠也。古蓋音同通用。艮爲鼠。爲穴。坎爲盜。鼠居穴中。伺隙盜竊。晝伏夜動。四失位。前臨夷主。下擁萬民。而坎爲隱伏。爲畏怯。欲進居五。恐下民生疑。欲下應初。又恐失五位。進退周章。有類於鼫鼠。故貞厲也。

象曰。鼫鼠貞厲。位不當也。

位不當。卽謂不中不正。

六五。悔亡。矢得勿恤。往吉。无不利。

六五得尊位。嚮明而治。故悔亡。矢輔嗣作失。茲從孟馬荀虞鄭王肅諸家。坎爲矢。五坎體。是得矢也。坎爲恤。得矢爲用。故勿恤。承陽故往吉。坎矢象。噬嗑九四云得金矢。以坎爲矢也。易林常用。乃至漢末竟失傳。

象曰。矢得勿恤。往有慶也。

往遇陽。故曰往有慶。虞翻強命五變得乾爲有慶。豈知六五上下皆乾陽。五居其中。往承陽故有慶。若五變爲陽。往遇陽得敵。尙能有慶哉。

上九。晉其角。維用伐邑。厲吉。无咎。貞吝。

爻例上爲角。故曰晉其角。坤爲邑。離上九云。王用出征。有嘉折首。是離有征伐象。蓋離爲甲兵。故維用伐邑。然下應柔爻。故必振厲方吉无咎。以不全吉。故貞吝。

象曰。維用伐邑。道未光也。

離爲光明。至上光將熄矣。夫王道大光。則无用征伐。用征伐必未光也。

三三

明夷。利艱貞。

鄭云。夷傷也。日出地上。其明乃光。至其入地。明則傷矣。按二至四互坎。故曰艱。坤安故曰貞。利艱貞者。言當明夷之世。宜以艱苦貞定自守也。

彖曰。明入地中。明夷。內文明而外柔順。以蒙大難。文王以之。利艱貞。晦其明也。內難而能正其志。箕子以之。

離文明。坤柔順。離內坤外。故曰內文明而外柔順。坎爲難。故曰以蒙大難。坤爲文。震爲王。故曰文王。文王囚羑里。幾經艱難。而後出之。故曰以蒙大難。坤爲黑。坎爲隱伏。明伏地下。故曰晦其明。坎在下。故曰內難。坎爲志爲正。故曰內難而能正其志。震爲子爲箕。故曰箕子。易林賁之屯云。章甫薦屨。箕子佯狂。以屯震爲箕子也。箕子紂諸父。故曰內難。紂囚箕子。箕子佯狂爲奴。晦明不用。僅以身免。故曰箕子以之。以用也。易凡於人名地名。无不從象生。除焦延壽外。无知此者。震箕象形。易林屨用。

象曰。明入地中。明夷。君子以莅衆。用晦而明。

坤爲衆。震爲君子。莅衆謂三也。用晦而明。言君子處明夷之世。仍自昭明德也。

初九。明夷于飛。垂其翼。君子于行。三日不食。有攸往。主人有言。

此與師六五義同也。辭在五而象全在應。初應在四。四體震。震爲飛爲翼。坤爲下。故曰垂其翼。震爲君子。爲行。數三。離日故曰三日。震爲口爲食。坤閉。故三日不食。震爲往。爲主人。爲言。故曰有攸往。主人有言。蓋初雖應四。而爲三所阻隔。故飛則不能高。行則不得食。凡有所往。而爲主人所惡。責讓不安。左傳僖十五年。晉絃遇歸妹之睽曰。西鄰責言。以歸妹上震爲責言也。震言外向。與我相背。故曰責言。茲曰有言。與責言義同也。易林同人之坎云。鼓其羽翼。飛上喬木。以坎中爻震爲鼓爲飛。爲羽翼。又易林蒙之艮云。攬飯把肉。以就口食。以艮中爻震爲口爲食也。易頤象曰。自求口實。以頤下震爲口食也。乃震飛震翼震口之象皆失傳。舊解皆以屬之離。離在地下。且爲初爻。胡能飛哉。若食象益茫然不知所指。

象曰。君子于行。義不食也。

初潛龍勿用。況當明夷之世。方自晦之不暇。當然不得祿食也。

六二。明夷于左股。用拯馬壯吉。

釋文云。股。馬王肅作般。孫堂云。般盤之省。漢碑盤字常作股。股常作般。然則馬王雖作般。義仍作股。漢時般股通用不分也。互震爲左。巽爲股。巽伏不見。故曰夷于左股。三震爲馬。拯。鄭云承也。子夏傳作拊。仍音承。用拯馬壯吉者。言二承三。三陽。故壯吉也。舊解獨惠棟謂馬謂三。而謂三拊

二故壯。則又非。承者順。謂陰順陽。象釋曰順。卽釋拯義也。

象曰。六二之吉。順以則也。

則者法也。陰以陽爲則。順以則。謂陰順陽。釋拯馬之義也。乃舊解皆不知其所謂。故愈說愈晦。豈知象以解經。順卽謂拯也。

九三。明夷于南。句狩。句得其大首。不可疾。句貞。

三遇坤。坤爲夜爲黑。震爲南。左傳成十六年。晉筮遇復曰。南國蹇。以坤爲國。震爲南也。三南遇坤。故曰明夷于南。震爲狩爲大。坎爲首爲獲。故曰得其大首。言得其渠率也。詩大雅昊天疾威。傳。疾猶急也。不可疾。言雖得其大首。不可持之過急也。貞謂宜安定也。疾與貞相對爲義。舊讀疾貞連文。九家謂不可疾正。最爲害理。獨項氏玩辭。以貞自爲句。與經義合。又舊讀以南狩連文。義亦不協。

象曰。南狩之志。乃大得也。

陽遇陰故大有得。

六四。入于左腹。獲明夷之心。于出門庭。

震爲左。坤爲腹。爲門庭。爲心。四坤體。故曰入于左腹。坤闔故曰獲明夷之心于出門庭。震爲出。言行至四入坤。悉明夷之故。正在於是也。四當位有應。故無吉凶。坤心之象。益九五云。有孚惠心。心

謂二。二坤體也。又益九五象云。大得志。志亦謂坤。故易林需之否云。志如死灰。以坤爲死爲志。人第知坎爲心志。不知坤亦爲心志。故易辭多誤解。

象曰。入于左腹。獲心意也。

坤爲心意。故曰獲心意。舊解多以三升五成坎爲心意。穿鑿無理。不可從。

六五。箕子之明夷。利貞。

震爲箕子已見前。據易林。此箕子則孩子也。夬之中孚云。道路不通。孩子心憤。以中孚互震爲孩子。又家人之巽云。孩子貪餌。以伏震爲孩子。又損之大畜云。嬰兒孩子。未有知識。以大畜上艮爲嬰兒。互震爲孩子。凡易林取象。无不本之易。易他處无孩子象也。宋吳棫韻補云。古亥字音喜亦音其。按亥字既讀爲其。則其字亦必讀爲亥。淮南子時則訓。爨其燧火。高誘注。其讀爲該備之該。卽爨該燧火也。其既讀爲該。於是亥孩刻菱。與其箕常通用。書微子。我舊云刻子。論衡作我舊云孩子。孩子謂紂。言久知其愚蒙昏憤也。是應爲孩子。而作刻子。墨子非攻篇。紂播棄黎老。賊誅孩子。是孩子卽箕子。古之所謂誅。不盡是殺。賊誅孩子。卽幽囚箕子也。是應爲箕子。而作孩子。故此處六五之箕子。漢趙賓又作菱茲。夫墨子以孩子作箕子。則明夷六五之箕子。易林作孩子。正與墨子合。與論衡同。孩子皆謂紂也。孩箕刻菱。皆非訛字。以音同古通用。猶磐桓之磐。或作盤。作槃。作般。皆非訛字也。易林云。嬰兒孩子。未有知識。釋孩子之義也。六五天子位。孩子之明夷。謂紂昏

蒙。惟其指紂。故彖傳推及於文王箕子。不然。彖傳之箕子。胡以無一異讀哉。故易林姤之明夷云。西戎爲疾。幽君去室。明夷六五君位。坤黑。故曰幽君。坎爲室。六五在坎外。故曰幽君去室。幽君卽釋孩子之義。又困之明夷。遽悉作雲。蒙覆大臣。坤爲雲。亦釋昏蒙之義。又京房易傳明夷云。君暗臣明。不可止。君暗謂六五。臣明謂六二。亦以五爲君。不以爲紂臣。又象傳曰。孩子之貞。明不可息也。貞正也。言孩子居天子之正位。天子一日萬幾。故明不可息。若箕子已晦其明矣。有何不可息。古今釋者千百家。於此語未有能通者。蓋文王與微子。不欲明斥紂。故以孩子爲代名。猶麥秀歌之謂狡童也。觀墨子以箕子爲孩子。則此之箕子。亦爲孩子。易林之讀。獨得其真。自孩箕音同通用之義弗明。竟作紂臣矣。豈知孩子卽謂紂。與微子之孩子同。彼夫趙賓作菱茲。劉向荀爽作菱滋。蜀才作其子。王弼作其茲。惠棟作亥子。雖與象傳義不合。然皆知作紂臣之必非。乃孔疏不從王注。而從馬融。竟作紂臣解。疏已。五本君位。馬融作紂臣解。亦知其不安。而以箕子演嚆。有君德爲解。益可證易林以孩子爲紂之精。五承乘皆陰。下又无應。故曰利貞。謂宜艱貞自守不妄動也。

象曰。箕子之貞。明不可息也。

上六。不明晦。初登于天。後入于地。

明夷之初爲晉。晉日在地上而爲晝。故曰初登于天。乃晉覆成明夷。日在地下而爲夜。故曰後入于

地。入地故晦而不明。卦正如彼。覆則如此。此文王示序卦之義也。

象曰。初登於天。照四國也。後入於地。失則也。

坤爲國。震卦數四。故曰四國。則謂三。上爲四五所格。不能應三。故曰失則。此則字與六二順以則。謙六四不違則義同。皆謂陽。舊解皆不知失則之故何在。泛說之。非。

周易尚氏學卷十一 下經

三三三

家人。利女貞。

歸藏曰散家人。卦以一陽一陰。散處於卦內。又上卦巽風。下卦火炎上。均有散意。故以爲名乎。馬融曰。家人以女爲奧主。長女中女。各得其正。故曰利女貞。然彖傳曰。男正位乎外。似家人兼男女言。特女貞尤利耳。又考太玄擬家人爲居。云躋膚赫赫。爲物城郭。萬物咸宅。是以家人初上爻皆陽。故曰膚。曰城郭。而人宅其中。故曰家人也。義似較各家爲優。二四得正。承陽有應。故利於女子之占也。

彖曰。家人女正位乎內。男正位乎外。男女正。天地之大義也。家人有嚴君焉。父母之謂也。父父。子子。兄兄。弟弟。夫夫。婦婦。而家道正。正家而天下定矣。

女正位乎內謂二。男正位乎外謂五。二五者夫婦。卽天地也。卽父母也。父母皆得正位。故曰嚴君。嚴君者尊也。卦下五爻皆得正。故曰父父。子子。兄兄。弟弟。夫夫。婦婦。初震爻。震爲子。爲兄。爲夫。三艮爻互坎。坎艮皆爲弟。巽爲婦。父子兄弟夫婦皆得正。則家正。家齊則國治。故曰天下定。

象曰。風自火出。家人。君子以言有物。而行有恆。

巽木生火。火動生風。故曰風自火出。物。孔疏云事也。按周禮地官。司門幾出入之不物者。注。衣服視瞻。不與衆同。及所操物。不如品式者。然則不物卽違常。卽不法也。言有物者。卽言不離乎經常也。

初九。閑有家。悔亡。

釋文。馬云閑闌也。防也。離中虛外堅。故離有閑義。卽太玄所謂爲物城郭也。能閑其家。故悔亡也。荀鄭訓閑爲閑習。似非。

象曰。閑有家。志未變也。

初應在四。四體坎。坎爲志。志未變者。言初與四爲正應。无敢或渝。所謂行有恆而家道正也。其以遯爲說者。皆因不得解而穿鑿也。

六二。无攸遂。在中饋。貞吉。

禮月令百事乃遂。注遂猶成也。公羊傳桓八年。大夫無遂事。注遂專事也。坤道无成。六二應五承三。順以巽可矣。不必專事也。故曰无攸遂。六二得中。故曰在中饋。饋餉也。周禮天官。膳夫掌王之饋。注進食於尊曰饋。在中饋者。言坤道順從。無敢專事。職供中饋。酒食是議也。貞吉者。卜問吉也。

象曰。六二之吉。順以巽也。

順以巽。言承三應五也。

九三。家人嗃嗃。悔厲吉。婦子嘻嘻。終吝。

釋文。嗃嗃。馬云悅樂自得兒。荀作確確。按離外堅。荀讀是也。嘻嘻鄭云驕佚笑樂之意。然同在一爻。吉吝不同者。蓋三居離上。離外堅。有堅確自守。安不忘危之意。故曰家人嗃嗃。嗃嗃則守正安常。故厲而吉也。而三前臨巽風。巽爲婦。爲進退。爲躁動。爲聲應。故曰婦子嘻嘻。嘻嘻則悅而淫矣。故曰終吝。嗃嗃之象下取離。嘻嘻之象上取巽。誠以同此一爻。或吉或吝。必有其故。而先儒无言者。探測如此。

象曰。家人嗃嗃。未失也。婦子嘻嘻。失家節也。

失佚古通。未佚者言不敢放逸也。若嘻嘻則淫佚而不中節矣。故曰失家節。失。下讀得失之失。上讀佚。以與節韻。

六四。富家大吉。

乾爲富。四承重陽。當位有應。體坎。坎爲室家。故曰富家大吉。凡上卦爲巽。四當位無不吉者。如小畜觀益巽渙中孚。六四皆吉。惟不當位者。雖臨重陽。不盡吉也。此易例也。虞翻強命三變成艮。最爲害理。三當位。胡爲使失正哉。

象曰。富家大吉。順在位也。

言富之故。以順陽也。五得位。故曰順在位。

九五。王假有家。勿恤。吉。

五天子。故曰王。假釋文更白反。注至也。案虞書。格子上下。傳。格至也。是王弼陸德明皆讀假爲格。與萃之王假有廟同。王假有廟。言王以至誠感格神明。王假有家。言王以至德感格家人。無有不正。故無所憂而吉也。

象曰。王假有家。交相愛也。

交相愛。謂二五交孚。卽釋格義。諸家皆釋假爲大。與交相愛之義相去甚遠。故唯王注爲得也。

上九。有孚。威如。終吉。

上九居家之上。爲全家所翊戴。故曰有孚。曰威如。上居卦終。故曰終吉。

象曰。威如之吉。反身之謂也。

巽究成震。震爲威。言震巽相反覆。故曰反身。虞翻命三變成陰。以說反身。三當位。胡能使變。乃惠棟不知其強說。謂蹇上六志在內爲反身。夫蹇三上皆當位有應與。若家人則三上皆陽。艮傳所謂敵應也。上胡能反三哉。

三三三

睽。小事吉。

歸藏作睽。說文鷹隼視也。禮玉藻視容睽睽。注驚視不審貌。夫驚而懼。視而不審。則視象必至乖違明矣。至周易曰睽。義與睽略同。睽乖也。說文目不相聽也。卦三至五兩目相背。相背則視乖。聽從也。不相從。則一目視爲彼。一目視爲此。如三上所言是也。蓋卦之得名。全以卦象。六書故。睽反目也。與說文義同。自反目之義失。舊解於三上爻辭皆莫詳其故矣。小謂陰。六五得中有應。故小事吉也。

象曰。睽。火動而上。澤動而下。二女同居。其志不同行。說而麗乎明。柔進而上行。得中而應乎剛。是以小事吉。天地睽而其事同也。男女睽而其志通也。萬物睽而其事類也。睽之時用大矣哉。

火性炎上而即居上。水潤下而即居下。愈去愈遠。故二女同居不同行。坎爲志也。然所以睽者。以同爲女也。若夫天地男女。其形雖睽隔。而其功用。无不和合而同也。其心志无不相感而通也。即推而至於萬物。若繁隲不可計數矣。然只有物即有陰陽。有牝牡。陰陽牝牡。則必合而爲類无疑也。故睽亦有時有用也。

象曰。上火下澤。睽。君子以同而異。

同者同爲女。異者不同行。君子法之。不拘於一。

初九。悔亡。喪馬。勿逐自復。見惡人。无咎。

震爲馬。兌二折震。震毀。故曰喪馬。震爲復。二必升五。升五則下成震。故曰自復。離爲惡人。初前遇之。兌見。故曰見惡人。蓋初居潛龍之位。勿用之時。居易俟命。无所動作。故悔亡而无咎也。

象曰。見惡人。以辟咎也。

言无咎之故。在辟之也。

九二。遇主于巷。无咎。

五爲卦主。豐九四云。遇其夷主是也。二應之。離爲巷。故曰遇主于巷。有應得中。故无咎。離巷象失傳。易林无妄之小畜云。鱸鰕去海。遊於枯里。街道迫狹。不得自在。小畜上巽爲魚。故曰鱸鰕。乾爲海。巽在外。故曰去海。離爲枯爲里爲街巷。說文巷里道。詩鄭風巷无居人。傳曰巷里塗。離上下陽中虛。儼然里巷也。巷爲里道。故象曰未失道。巷象失傳。故舊解无不誤。不足怪也。

象曰。遇主于巷。未失道也。

得應。故曰未失道。

六三。見輿曳。其牛掣。其人天且劓。无初有終。

兌爲見。坎爲輿。爲曳。坎輿在前。而三居坎後。故曰見輿曳。互離爲牛。掣鄭作挈。云牛角皆踊也。

踊起也。說文作𦣻。云角一仰一俯。子夏傳作𦣻。云一角仰。案𦣻𦣻同字。皆音摯。義皆同。又易林大畜之睽云。傷破妄行。觸壁觥牆。亦以角踊爲說。不以滯隔爲訓。祇王弼作𦣻。音與諸家同。義與諸家異。非也。其牛𦣻者言牛角騰踊上出也。天。馬融云剝鑿其額曰天。虞翻云黥額爲天。割鼻爲劓。黥卽古之墨刑。馬云剝鑿殆誤也。艮爲額爲鼻。艮伏不見。故曰劓。兌上毀缺。故曰天。惟古刑无名天者。俞樾云。天爲兀字。古文天作𠂔。以形近。故兀訛爲天。莊子云。魯有兀者。釋文云。則足曰兀。其人兀且劓。猶因九五曰劓則也。按三震象半見。故曰則足。俞氏之說或是也。又胡安定云。天當作而。古文相類。傳寫遂誤。在漢法有罪。髡其鬢髮曰而。又周禮梓人。作其鱗之而。亦謂髡其鬢髮。按之而。注訓爲頰頰。釋文云秃也。玉篇亦訓頰爲秃。賈疏亦无髡其鬢髮之解。然頰之爲秃。字書皆同。則而者秃也。秃則天然无髮。不必受刑。似胡說不如俞說優也。三不當位。故初不吉。有應承陽。故曰有終。

象曰。見輿曳。位不當也。无初有終。遇剛也。

位不當故无初。遇剛故有終。

九四。睽孤。遇元夫。交孚。厲无咎。

坎爲孤爲夫。虞翻強令四變成震。以取夫象。豈知左傳襄二十四年。筮遇困之大過。坎變巽。曰夫從風。以坎爲夫也。坎者乾元之精。故曰元夫。比曰元永貞。是其義也。四上下皆陰。故曰交孚。坎險故

曰厲。交孚則志行。故厲无咎。

象曰。交孚无咎。志行也。

坎爲志。志行。言陽得陰則孚也。此爻舊解。皆用虞氏爻變。取夫象。信漢儒不信左氏。豈不異哉。

六五。悔亡。厥宗噬膚。往何咎。

同人六二云。同人于宗。以五陽爲宗。宗主也。坤先迷後得主是也。茲以九二爲宗。艮爲膚。以剛在外也。故離亦爲膚。二兌體。兌口逼近離膚。故曰厥宗噬膚。然二爲正應。二五相上下。各得位。故往无咎。離膚象。易林師之井云。范子妙材。戮辱傷膚。井互離。兌毀折。故曰戮辱。離兌連體。故傷膚。是焦氏以離爲膚也。井中爻亦睽也。

象曰。厥宗噬膚。往有慶也。

得陽應。故曰有慶。

上九。睽孤。見豕負塗。載鬼一車。先張之弧。後說之壺。匪寇。婚媾。往遇雨則吉。

睽爲反目。目反故所見不同。一目見爲豕。一見爲鬼。一目見張弧而懼。一見說壺而喜。一見爲寇。一見爲婚媾也。見字統全爻而言。反目之精神全出。舊解若祇見豕負塗者。由不知睽之取象。在反目也。離爲見。互坎爲豕。爲塗。爲車。爲鬼。坎數一。故曰一車。坎爲弧爲矢。張弧則欲射我矣。離爲壺。說遺也。而坎爲酒。遺我以壺酒。則意善也。坎爲寇。三雖坎體。而應上九。則婚媾也。寇則非矣。

兌爲雨。上往居三。故曰遇雨。三上相上下。各當位。故吉。上之內。宜曰來。然蹇五往外也。曰朋來。需三往上也。曰三人來。蓋自本位言則曰來。去本位言則曰往。不能執也。壺。王弼作弧。茲從京馬鄭王肅翟子玄。說。釋文始銳反。晉稅。

象曰。遇雨之吉。羣疑亡也。

坎爲疑。疑之故全在坎。上往三成大壯。天雷一震。坎象消釋。故曰羣疑亡。坎爲衆。故曰羣疑。卽上所見諸象也。

三三

蹇。利西南。不利東北。利見大人。貞吉。

重坎故曰蹇。坤在西南。五往居坤中。得中有應。故曰利西南。艮居東北。三陽窮於上而多凶。故不利東北。大人謂五。往得尊位。故利於出見。傳所謂往有功也。往五當位居中。故貞吉。

彖曰。蹇。艱也。險在前也。見險而能止。知矣哉。蹇利西南。往得中也。不利東北。其道窮也。利見大人。往有功也。當位貞吉。以正邦也。蹇之時用大矣哉。

坎險艮止。故曰見險而能止。此卦義也。虞翻於利不利之故。蓋茫然莫解。復以參同契月出庚之說。解利西南。月滅癸之說。解不利東北。豈知茲所謂西南確指坤位。坤爲邦。五居坤中。故曰正邦。而翻則曰月生西南。夫月於三日出庚。庚豈西南哉。眞管輅所謂美而僞也。

象曰。山上有水。蹇。君子以反身修德。

見險而止。反身修德。以俟之而已。文言云。進德修業。乾三云。君子終日乾乾夕惕若。修德之事也。艮爲身。反身者反而求諸己。不徒止而不前也。艮身象。艮彖云。艮其背不獲其身。以艮爲身也。故易林需之坎云。名困身辱。勞无所得。坎中爻艮。艮爲名。爲身。坎隱伏。故名困身辱。虞翻用卦變。以坤爲身。不知艮亦爲身也。

初六。往蹇。來譽。

四不應。二至四坎。初臨之。故往蹇。來居初。靜而不動。則有譽也。艮爲名。故曰譽。

象曰。往蹇來譽。宜時也。

宜時。正義作宜待。釋文云。張氏作宜時。鄭本作宜待時。虞同。茲從張氏。艮爲時。宜時者。謂時宜如此也。阮校云。石經待也二字。漫漶。而不言上有宜字。可見鄭虞讀似非。

六二。王臣蹇蹇。匪躬之故。

艮爲臣。五爲王。二應五。故曰王臣。艮爲僮僕。古臣僕不分。故艮亦爲臣。二臨重坎。故曰王臣蹇蹇。蹇蹇言劬勞也。艮爲躬。匪躬之故。言所以劬勞如此者。乃從王事。匪爲私也。艮臣象。損上九云。得臣無家。小過六二云。遇其臣。遯六三云。畜臣妾吉。皆以艮爲臣也。

象曰。王臣蹇蹇。終无尤也。

有應故无尤。尤古音怡。詩鄘風大夫君子。無我有尤。與下之協。此與上時下之協。與詩同。故正義上象作宜待非。

九三。往蹇。來反。

往遇險。反據下二陰則利也。故曰往蹇來反。

象曰。往蹇來反。內喜之也。

內謂下二陰。陰欲承陽。故曰內喜之。釋來反之故也。

六四。往蹇。來連。

正義。馬云連亦難也。王弼云。往來皆難。是亦訓連爲難。蓋四居上下坎之間。故往來皆難。荀爽謂與至尊相連。朱子謂連於九三者皆非也。又屯上六云。泣血漣如。淮南子引作連如。蓋與此義同。亦連爲難之一證。

象曰。往蹇來連。當位實也。

坎爲實。當位實者。言四位當。惟所值上下皆實。故進退難也。坎剛中故爲實。易林屯之師云。李梅冬實。師震爲李梅。坎爲冬爲實也。舊解皆以乾爲實。致此句義不明瞭。豈知此實字謂坎。上下坎。方能明來往皆難之義也。

九五。大蹇。朋來。

當位居尊。故曰大蹇。陰以陽爲朋。陽往陰中。故曰朋來。虞翻以下卦伏兌爲朋。豈知象傳曰中節。卽謂五居坤中。如合符節。釋朋義也。

象曰。大蹇朋來。以中節也。

言五在陰中。陰陽相遇。如符節之合。

上六。往蹇。來碩。吉。利見大人。

上窮故往蹇。來碩謂應三。三陽故曰碩。爾雅釋詁。碩大也。陽大故曰碩。利見大人。謂順五。五爲大人。

象曰。往蹇來碩。志在內也。利見大人。以從貴也。

應三故曰在內。三體坎。故曰志在內。五天子位。故曰從貴。

三三三

解。利西南。无所往。其來復吉。有攸往。夙吉。

震出險故曰解。歸藏作荔。荔與離通。上林賦。荅遯離支。離支卽荔支。干祿字書。離支。俗作荔支。是離荔音同通用。離卽解也。義與周易同。坤位西南。四居坤初。前臨重陰。陽得陰則通。故利西南。五得敵。故不利往。來復於二。各當其位。故曰其來復吉。有攸往。謂二往五。夙早也。禮記孔子問居。夙夜基命宥密。疏夙卽昕也。昕明也。二坎爲夜。五震爲晨。二往五則由夜及晨而天明矣。明故

吉也。舊解於吉之故。皆言早往得位故吉。而王注詰夙爲速尤誤。豈知詩書皆以夙與夜對言。夙爲早者。言早晨也。非速也。

彖曰。解。險以動。動而免乎險。解。解利西南。往得衆也。无所往。其來復吉。乃得中也。有攸往夙吉。往有功也。天地解而雷雨作。雷雨作而百果草木皆甲坼。解之時大矣哉。

坎險震動。震在外。動而出險。故曰解。六五前遇陰。故曰无所往。來居二。居中當位。故吉。九二往居五。故有功。雷震坎雨。是天地解也。震爲春。爲百果草木。離爲甲。孫星衍云。甲皮也。震動故甲坼。坼說文裂也。言草木當春。得雷雨胚胎迸裂。蓓蕾怒發。芽蘖潛滋。而外甲坼也。史記律書。甲者言萬物剖符甲而出。又禮月令。其日甲乙。鄭注云。時萬物皆解孚甲。皆甲坼之的解也。乃馬陸皆讀坼爲宅。云根也。愚以爲坼宅音同。故通用。若以宅爲根。則古无此訓。且草木未得雷雨之先。豈皆无孚甲无根乎。鄭康成蓋讀與馬陸同。而知其難通。故又曰。皆讀如人倦之解。以濟其窮。若曰皆甲宅。卽解甲宅也。豈知甲宅卽甲坼。不必如是穿鑿。且甲可解。根如何解哉。是仍不通也。然由鄭說。可悟以宅爲根之非矣。乃雅雨堂刻本從惠棟校。竟改集解甲坼爲甲宅。豈知荀注本作甲坼。故曰草木萌芽。萌芽。卽釋坼義也。若作宅。荀胡以不釋。且釋文早言之矣。明本集解可證也。陸道平作纂疏。不顧荀注義如何。亦改作宅。致傳文與注不相應。眞可異已。釋文只云馬陸作宅。後集荀注者。如孫堂如馬國翰。皆改荀注作宅。可謂盲從。

象曰。雷雨作。解。君子以赦過宥罪。

坎爲罪過。震爲解。故赦過宥罪。

初六。无咎。

承陽有應。雖失位。得无咎也。

象曰。剛柔之際。義无咎也。

際交也。言初承陽。剛柔交際。故義得无咎。

九二。田獲三狐。得黃矢。貞吉。

坎爲狐。坎陷故爲獲。二應在五。五震爲田獵。數三。故曰田獲三狐。坎爲矢。互離色黃。故曰得黃矢。貞吉者。卜問吉也。諸家皆以離爲矢。離雖爲甲兵。然若斧象則專屬兌。矢則專屬坎。坎爲棘爲匕爲直爲穿。故爲矢。經從未以離爲矢。

象曰。九二貞吉。得中道也。

離爲道。二中位。故曰中道。

六三。負且乘。致寇至。貞吝。

三不當位。坎爲車。三在車上。故曰乘。上震向外視之艮。艮爲負何。故曰負且乘。坎爲寇。三上下皆坎。故曰致寇至。古者君子方得乘車。若負戴則爲小人之事。今負且乘焉。望之不似。則盜賊從而生。

心。故曰致寇至。言招致使來也。致卜問吝矣。貞吝與上貞吉爲對文。故夫從虞氏以貞吉爲之正者非也。

象曰。負且乘。亦可醜也。自我致戎。又誰咎也。

說文戎兵也。寇至故謂致戎。

九四。解而拇。朋至斯孚。

拇。陸績云。足大指也。王肅云。手大指。手指於震象不合。故陸注是也。震爲足。四前遇重陰。陽遇陰則通。故曰解而拇。言利往也。復象云。朋來无咎。陰以陽爲朋。九四前遇重陰。下乘陰。陰孚於陽。故曰朋至斯孚。言上下陰共孚於四也。彖傳謂往得衆。指此爻也。舊解皆從虞翻說。謂四陽從初。下兌故朋至斯孚。致孚義全晦。

象曰。解而拇。未當位也。

解而拇。前進也。四失位。進至五則當位矣。申解而拇之故也。

六五。君子維有解。吉。有孚于小人。

震爲君子謂四。君子維有解。言四宜升五。當位而吉。小人謂陰。四升五成坎。坎上下皆陰。有孚維心亨。故曰有孚于小人。

象曰。君子有解。小人退也。

君子有解。謂九四升五。小人退。謂五退居四。釋爻義可謂至明白矣。

上六。公用射隼于高墉之上。獲之无不利。

震爲公爲射爲隼。伏巽爲墉爲高。六居巽上。故射隼于高墉之上。蓋卦爲重坎。上六履重坎之上。動作如意。故獲之无不利也。震射左氏象。震爲鴻鵠故爲隼。俱見易林。詳焦氏易詁

象曰。公用射隼。以解悖也。

坎爲悖。上六居重坎之外。故曰解悖。

周易尚氏學卷十二 下經

三三三

損。有孚。元吉。无咎。可貞。利有攸往。曷之用。二簋可用享。

貞我悔彼。以我之陽。益彼之上。故曰損。歸藏作員。朱彝尊謂卽損卦。然歸藏以益爲誠。則此未必取義於損。按員古作云。商頌景員維何。箋員古文作云。以此例之。歸藏必原作云也。說文。云山川氣也。象回轉形。後人加雨作雲。是云卽雲字。卦上艮下兌。說卦山澤通氣。氣卽雲。中互坤。坤正爲雲。卦二至上正反震。震爲出。雲出澤中。至上而反。正回轉之形。與說文合。與卦象合。六爻皆有應。故曰有孚。二陽遇陰。乾元通。故曰元吉。可貞。言二不宜升五再損也。利有攸往謂上也。上九下乘重陰。頤曰利涉大川。利涉卽利往也。爾雅釋詁。曷止也。而曷與惕通。詩大雅。汔可小惕。傳惕息也。息止義同。故集韻云。惕或作曷也。而惕與甜通。詩甘棠篇。召伯所憩。釋文。憩本又作惕。曷之用言憩息之時也。上卦艮。故云憩。震爲簋。坤數二。故曰二簋。兌爲享。享饗通。左傳成十二年享以訓恭儉。釋文享本亦作饗。又莊四年止而饗之。周語。大臣饗其祿。注皆訓饗爲食。曷之用二簋可用享。言當休暇之時。可以二簋爲享。二簋雖儉。然處損時。亦可也。清儒承荀氏舊說。見言簋卽以

爲祭宗廟。侈陳禮制。豈知儀禮公食大夫禮。宰夫啓簋。詩秦風於我乎每食四簋。凡宴享皆用簋。非必祭宗廟始用也。且於易義之謂何矣。崔憬以曷爲何。荀爽等祇說二簋可用亨。不及曷義。於是清儒如惠棟焦循張惠言孫星衍等。亦不釋曷義。祇一姚配中襲崔憬說。疑非也。

象曰。損下益上。其道上行。損而有孚。元吉。无咎。可貞。利有攸往。曷之用。二簋可用亨。二簋應有時。損剛益柔有時。損益盈虛。與時偕行。

貞我悔彼。內與外。上與下。其親疏迥不相同。故夫以內陽益外。則我損矣。上下卽內外也。泰三往上。故曰其道上行。震爲應。二至四震。乃上卦震覆。若反聲相應者。故曰二簋應。與中孚之鶴鳴子和理同也。二簋應有時。言時當惕息。用二簋享。正與時應也。泰極還否。損者泰之終。否之始。損剛益柔有時者。按卦氣。損爲七月卦。時已當否。陽日減。陰日增。正損剛益柔之時。不可不預知也。時當益則益。時當損則損。益則盈。損則虛。乾盈坤虛。應時而行。所謂窮則變。變則通也。

象曰。山下有澤。損。君子以懲忿窒欲。

震爲決躁。爲武人。故爲忿。乃上卦震覆爲艮。艮止故曰懲忿。二至上正覆震。震爲口有爭食象。坤閉故曰窒欲。學易之君子。因以取法焉。

初九。已事遄往。无咎。酌損之。

已虞作祀。晁氏云。已古文祀字。按金文沈子它敦銘。用鬯饗已公。已公卽祀公。初應在四。四震爲

祭祀。兌爲饗。遄速也。祀事過往者。言宜往應四也。當位故无咎。所應爲陰。故曰酌損。象曰。已事過往。尙合志也。

尙上同。上謂四。初四婚媾。故曰合志。四坤爲志。其用卦變以坎爲志者。非也。

九二。利貞。征凶。弗損。益之。

三已損矣。二不宜再損。故利於貞定也。震爲征。二陽臨重陰。更利於征。然二往五則下愈損。故征凶也。弗損者。卽貞於二不動。不再損下也。弗損卽益二矣。故曰益之。夫貞我悔彼。泰三陽三陰。而陽全在我。此所以爲泰也。損我一陽以益外。已非善徵。若損之不已。則成否矣。否天地閉。賢人隱。故於二爻著以爲戒。曰利貞。曰征凶。舊解惟王弼能識二之不宜往五。謂剛全上則剝道成。若虞翻則謂二不征之五則凶。故反經爲說。豈知二陽得五陰爲應。利往誠爲常例。獨損二因其利往。再損內也。故因以爲戒。乃後世如惠棟張惠言等。多祖述其說。獨姚配中識虞義之反經。乃又以利貞爲之正。二之正成陰。陰與陰不相應。故征凶。仍以卦變爲穿鑿。然則不獨易象失傳。易理之失傳更甚也。

象曰。九二利貞。中以爲志也。

中謂二。言志貞於二。不前進也。故曰中以爲志。舊解无不誤者。

六三。三人行則損一人。一人行則得其友。

乾爲人。泰三陽原爲三人。今成兌。損一人矣。損三以益上。上乘重陰。陽以陰爲友。故曰一人行則得其友。友謂四五。舊解以下應兌爲友。故於三則疑之故。無有通者。

象曰。一人行三則疑也。

三陽上行則成否。否上九爲四五所阻格。所謂敵也。敵則相疑相忌。而不相友矣。釋得友之故也。易於陰陽相遇爲朋友之故。言之可謂明白矣。乃自荀虞以來。以兌二陽艮二陰爲朋友。相承至今。豈知陽遇陽陰遇陰。艮謂之敵應。中孚謂之得敵哉。

六四。損其疾。使遄有喜。无咎。

坤爲疾。四得陽應。故曰損其疾。遄往也。坤爲憂。乾爲喜。使遄有喜者。言往得陽應而喜也。坤疾象失傳。舊解故多不當。

象曰。損其疾。亦可喜也。

疾損故可喜。

六五。或益之十朋之龜。弗克違。元吉。

艮爲龜。漢書食貨志注。蘇林曰。兩貝爲朋。朋值二百一十六。元龜十朋。艮爲朋友。坤數十。故曰十朋之龜。言陽在上五得承之。若大寶之益也。陰順陽。故曰弗克違。五卦位最尊。故曰元吉。艮龜象失傳。侯果謂內柔外剛龜之象。豈知艮卽爲龜。

象曰。六五元吉。自上祐也。

上爲陽。五承之。故曰自上祐。祐福也。釋文或作佑。无言漢人作右者。惠棟擅改之。後學盲從之。於是集解之文遂亂矣。不可不知。又自虞翻以來。皆以二益五爲說。清儒皆宗之。不惟與象傳背。且與經背。經於九二言征凶。言利貞。言弗損。則二固不往五。況象傳明言自上祐。則十朋之龜指上也。弗克違。言五承上也。則以二益五爲說者。其誤益明矣。

上九。弗損益之。无咎。貞吉。利有攸往。得臣无家。

上之三則上損矣。不動則益上。故曰弗損益之。貞吉者卜問吉也。上乘重陰。故利有攸往。與頤上九同。坤爲臣。上據坤。是得臣爲助也。三者上九之家。上旣得臣爲助。卽不返三。故曰得臣无家。言公而忘私也。

象曰。弗損益之。大得志也。

坤爲志。上據坤。陽乘陰。故曰大得志。舊解皆以上返三爲說。非。

二二三

益。利有攸往。利涉大川。

貞我悔彼。以彼之陽。下來益我。故曰益也。歸藏曰。誠。說文。誠和也。書召誥。其不能誠于小民。注亦訓誠爲和。風雷同聲相應。和之至也。是周易以陽爻上下言。故曰益。歸藏合上下卦言曰誠也。利

有攸往。謂五。五既中且正。傳所謂中正有慶也。利涉大川。謂初。坤爲大川。震爲舟。初陽遇陰而通。故曰利涉。傳所謂木道乃行也。

彖曰。益。損上益下。民說无疆。自上下下。其道大光。利有攸往。中正有慶。利涉大川。木道乃行。益動而巽。日進无疆。天施地生。其益无方。凡益之道。與時偕行。

坤爲民。震爲樂。故曰民說。坤爲廣。故曰无疆。否四來居下卦之下。故曰自上下下。震爲玄黃。故曰大光。利有攸往。中正有慶。謂五。利涉大川。木道乃行。謂初。震爲舟。故曰木。古剝木爲舟。故謂舟爲木。渙曰乘木有功。中孚曰乘木舟虛。皆以木爲舟。利涉大川。故曰木道乃行。言舟行水上。舟楫之利用溥也。此純釋利涉之義。坤爲水。震爲舟。故曰木曰行。程子不知木卽爲舟。改木爲益。野文之害。至斯而極。陽自外來。故曰天施。震爲生。坤爲地。故曰地生。益者否之終。泰之始。太玄云。已用則賤。當時則貴。艮爲時。與時偕行者。言時而當益。不能不益也。

象曰。風雷益。君子以見善則遷。有過則改。

乾爲善。坤爲過。乾來初。得位得民。是遷善也。乾來初成震。坤象滅。是改過也。故學易之君子法之。

初九。利用爲大作。元吉无咎。

虞翻云。大作謂耕播耒耜之利。按虞書。平秩東作。注歲起於東。而始就耕。謂之東作。禹貢恆衛既

從。大陸既作。注二水已治。從其故道。大陸之地已可耕作。是作卽耕也。震爲春。爲耕。至春民盡耕。故曰大作。陽遇陰故利。乾元通。故元吉无咎。

象曰。元吉无咎。下不厚事也。

震健而決躁。故左氏以爲射。言其速也。厚餘也。行速故无餘事。坤爲事。言初雖在下。往利无阻。事无積滯。仍利涉大川之意也。

六二。或益之十朋之龜。弗克違。永貞吉。王用享於帝吉。

艮爲龜爲朋友。坤數十。故曰十朋之龜。二應在五。五艮故以十朋之龜益二也。二得陽應。故曰弗克違。二當位。故永貞於二吉。震爲帝。王謂五。震爲祭祀。故曰享。王用享於帝吉者。言五應二。則二吉也。

象曰。或益之。自外來也。

外謂九五。恐人疑爲初。

六三。益之用凶事。无咎。有孚中行。告公用圭。

三居坤中。坤爲凶。爲事。益之用凶事。言上來益三。爲五所阻。大畜初九所謂有厲也。故曰凶事。二三四陰爻皆承五。夬九五云。中行无咎。泰二云。得尚於中行。中行謂五。有孚中行者。言三與二四。同孚於五也。震爲言。故爲告。爲玉故爲圭。坤爲衆。故曰公。公共也。三震爲諸侯。告公用圭者。言

約同諸侯執圭。共往朝五也。圭者天子所錫予。今朝天子。故執以爲信。舊解以凶事爲凶喪。或爲凶荒。則告之天子。告之友邦。而受其賻襚。告必將儀。或執璧。或用圭。如臧文仲以紀獻玉告糴於齊。豈知告公用圭。卽申有孚中行之義。與上之凶事无涉。是皆以他經例易。不知易文。上下句。不必相屬也。

象曰。益用凶事。固有之也。

言陰遇陰。陽遇陽。近而不相得故凶。乃易理當然之事。故曰固有。

六四。中行告公從。利用爲依遷國。

中行謂五。震爲告。坤爲臣。爲衆。從謂順五。告公從者。言下三陰宜共同承五也。坤爲國。震動。故曰遷國。艮止故曰依。左傳隱六年。我周之東遷。晉鄭焉依。說文依倚也。利用爲依遷國者。言坤國播遷。至五艮而止。依以建國也。陰從陽故利。巽爲利也。

象曰。告公從。以益志也。

坤爲志。公從九五。陽益陰。故曰益志。自坤志象失傳。遂令某爻變成坎。以求志象矣。

九五。有孚惠心。勿問元吉。有孚惠我德。

爾雅釋言。惠順也。坤爲順爲心。有孚惠心。言五孚于下坤而順我也。震爲問。五震覆。故曰勿問。五位尊。故曰元吉。勿問元吉者。言五乘重陰而大吉也。乾爲德。有孚惠我德。言下三陰皆承順我而有

孚也。

象曰。有孚惠心。勿問之矣。惠我德。大得志也。

坤爲志。陽爲大。陽五下乘重陰。故曰大得志。管子度地。天下之人皆歸其德而惠其義。注惠順也。正說此也。

上九。莫益之。或擊之。立心勿恆。凶。

上與五爲敵。故曰莫益。言益三也。上應在三。然上若益三。則爲五所忌。而或擊之。五艮體。艮爲手爲擊也。坤爲心。上應在坤。下虛。處巽上。風隕。進退不果。故曰立心勿恆。凶。恆九三云。不恆其德。益上九與恆九三同爲巽上。故亦曰勿恆。緣巽下撓。故義同也。

象曰。莫益之。偏辭也。或擊之。自外來也。

恐其被擊。戒以莫益。故曰偏辭。左傳襄三年。君子謂祁奚舉其偏而不黨。注偏屬也。猶私也。外謂五。五爲上敵。下繫云。凡易之情近而不相得則凶。或害之。故上欲應三。五或擊之。五在外。言擊之者仍在外也。同人九三曰敵剛。中孚六三云。得敵。子夏傳。三與四爲敵。是陽遇陽。陰遇陰。愈近而愈不相得。舊解自虞翻以來。皆不知此爲周易根本定例。故說或擊之。皆不知擊上九者爲何爻。而无不誤矣。

按否泰者。天道之自然。爲運會所必有。故以次於上經十卦之後。損益者人事之進退。爲人爲之所

關。故以次於下經第十卦之後。十者數之終。終則變。變則否泰迭更。損益互見。此其義也。又損者泰之終。否之始。益者否之終。泰之始。以見否泰雖屬天道。而由否而泰。由泰而否。損之益之。推挽之權。則在人爲。有定而无定也。此上下經天人之分。動靜之別。非參育之聖人。固不能知其故也。故於上經之否泰。自爲一卷。下經之損益。自爲一卷。以見此四卦爲全經之樞紐。與他卦絕不同也。

周易尚氏學卷十三 下經

三三

夬。揚于王庭。孚號有厲。告自邑。不利卽戎。利有攸往。

王育云。夬卽古文玦字。按禮內則。右佩玦。釋文本又作決。詩小雅。決拾旣飲是也。而夬爲決。故夬與玦同。玦說文玉佩也。廣韻佩似環而有缺。夬乾爲玉爲圓。兌上缺。儼然玦形也。而決者絕也。左傳晉獻公賜太子申生玦。以示決絕。卦以五陽決一陰。故謂之夬也。歸藏以夬爲規。規圓也。夬重乾。乾圓故爲規。玦亦圓。然上缺。是周易取象。與歸藏同而更切也。乾爲王。伏艮爲庭。一陰履五陽之上。故曰揚于王庭。兌口爲號。厲危。孚號有厲者。言陰雖孚于陽。爲陽所說。然窮處於上。須危厲自警也。兌口故曰告。兌爲斧鉞。故曰戎。說文戎兵也。禮月令以習五戎。注弓矢矛戈戟。伏艮爲邑。告自邑。不利卽戎者。言一陰危處於上。告誠國人。不可妄動也。皆指上六言也。利有攸往。謂五。夬本陽息卦。五息而往則陰盡。夬者決也。決者絕也。陽決陰也。

彖曰。夬。決也。剛決柔也。健而說。決而和。揚于王庭。柔乘五剛也。孚號有厲。其危乃光也。告自邑。不利卽戎。所尚乃窮也。利有攸往。剛長乃終也。

下健上說。說故和。其危乃光者。危謂陰退。陰退則陽長。陽長故光。所尙乃窮。申不利卽戎之故也。陽長乃終。終謂陰盡也。

象曰。澤上於天。夬。君子以施祿及下。居德則忌。

祿謂恩澤。澤在天上无用。故君子思以下施。乾爲富。故爲德。德得同。荀子禮論篇。貴始得之本也。注得當爲德。居積也。下乾。二至四。三至五。皆乾。乾多故曰居德。居德則忌者。言蓄積太多。多藏厚亡。爲人所忌也。象辭每相反以取義。此亦其一也。

初九。壯于前趾。往不勝爲咎。

初震爻。震足故曰趾。震動故曰前趾。壯。傷也。陽遇陽得敵。故傷于前趾。故往不勝而有咎矣。趾荀子止。晁氏云止古文。按說文有止无趾。止卽足之象形字。加足者非也。

象曰。不勝而往。咎也。

前有重陽。所遇皆敵。不勝必矣。明知不勝而往。宜其有咎。

九二。惕號。莫夜有戎。勿恤。

乾爲惕爲言。故曰惕號。言有所警戒也。二應在五。五兌。兌爲昧谷。故爲莫爲夜。兌爲兵戎。故曰莫夜有戎。言有寇警也。然五不應二。故雖莫夜有戎。无憂也。乾爲惕故爲憂。舊解因不知勿恤之故而在。故用象皆誤。豈知隨象云。君子以嚮晦入宴息。嚮晦卽謂兌。然則兌爲莫夜。易有明象。而兌五

不應二。故雖有虛驚。實不足憂恐也。

象曰。有戒勿恤。得中道也。

乾爲道。二中位。

九三。壯于頄。有凶。君子夬夬獨行。遇雨。若濡。有愠。无咎。

頄面顴也。三居下卦之上。故曰頄。而四五皆陽。故傷及于頄。傷頄故凶。乾爲君子。承乘皆陽遇敵。故夬夬獨行。而應在上。上兌爲雨。故曰遇雨。曰若濡。濡。霑溼也。乾爲衣。衣濡故愠。然究爲正應。亦无咎也。

象曰。君子夬夬。終无咎也。

夬夬獨行狀。三於四五雖遇敵。於上獨有應。故曰終无咎。終謂上。

九四。臀无膚。其行次且。牽羊悔亡。聞言不信。

伏艮爲膚。爲尾。故爲臀。臀尾間也。艮伏故曰無膚。乾爲行。承乘皆陽。失位。故其行次且。次且。馬云却行不前也。兌爲羊。玉篇牽速也。姤九三云。行未牽也。亦以牽爲速。次且行緩。速則无悔。牽羊悔亡者。言四宜隨五。速進決陰。陰決則當位居五。故曰悔亡。舊說皆不知悔亡之故何在。則以牽字失詁也。兌爲耳。故曰聞。乾爲言爲信。兌口亦爲言。聞言不信者。兌言向外。與乾言相背。故不信也。兌耳象。鼎傳云。巽而耳目聰明。目謂上離。耳謂互兌也。

象曰。其行次且。位不當也。聞言不信。聰不明也。

兌爲耳。爲黯昧。故曰不明。不明猶不審。俗所謂不清。虞氏以離目當之。非。

九五。覓陸夬夬。中行无咎。

孟喜云。覓陸獸名。夬有兌。兌爲羊也。說文亦云覓山羊細角。諸家說此二字。人人異辭。獨孟氏於象密合。凡五皆謂中行。又夬夬於羊行貌獨切。鄭虞等訓覓陸爲草屬。草焉有夬夬之象哉。

象曰。中行无咎。中未光也。

兌黯昧。故未光。

上六。无號。終有凶。

一陰在上。爲陽所推。不能久也。兌爲口故曰號。无號終有凶者。言不必號咷。必消滅也。

象曰。无號之凶。終不可長也。

不可長。言不能長久。

三三

姤。女壯。勿用取女。

歸藏曰夜。古娶必以夜。故曰昏。姤陰遇陽。卽女遇男。亦婚姤也。是夜與姤義同也。女謂陰。虞翻云。壯傷也。陰傷陽。柔消剛。故曰女壯。勿用取女。戒詞也。

彖曰。姤。遇也。柔遇剛也。勿用取女。不可與長也。天地相遇。品物咸章也。剛遇中正。天下大行也。姤之時義大矣哉。

消息卦乾盈於巳。盈則必虧。故至午而一陰生於下。陰遇陽。故曰天地相遇。時當五月。萬物潔齊。而巽爲草木。爲高。爲長。故曰品物咸章。荀爽以南方夏位說品物咸章。於象亦切也。五剛既中且正。教化天下。命令大行。如風之溥遍。姤五月卦。故曰時。天地相遇。歲功方成。故曰時義大也。鄭玄謂姤一女當五男。非禮之正。故謂之姤。女壯以淫。故不可取。而朱子喜用其說。便謂女德不貞。於易理太不類也。

象曰。天下有風。姤。后以施命誥四方。

復冬至。姤夏至。易林復之履云。先王日至。不利出域。又晉之解云。二至之戒。家无凶禍。故復象云。先王以至日閉關。商旅不行。后不省方。至日。王弼孔穎達皆謂二至。又漢書薛宣傳。至日休吏。由來已久。注。至日夏至冬至也。蓋古時視二至最重。自周訖南宋。可考見者。至日皆停止工作。乾爲后。巽爲命。伏坤爲四方。后以施命誥四方者。言君以夏至之日。施命令止四方行旅也。後漢魯恭傳。說此。最合古義。詳焦氏易詁中。

初六。繫于金柅。貞吉。有攸往。見凶。羸豕孚蹢躅。

巽爲繩。故曰繫。巽木乾金。故曰金柅。馬融云。柅在車下。所以止輪。釋文廣雅云。止也。說文作柅。

云絡絲趺。按今本說文。趺訛爲櫛。云從木櫛聲。讀若柅。陶廬云。古從爾從柅之字。同音通用。毛詩飲餞于櫛。韓詩作柅。書典祀勿豐于昵。釋文引馬云考也。謂櫛廟也。然則柅櫛古通用。後儒必謂櫛是者非也。況馬君訓作止車木。可證古文原作柅。若爲櫛。馬君能有異說哉。按絡絲者。絡絲之器。王肅所謂柅織績之器。婦人用者是也。趺者橫木。安絡器下。以防欹側。在下似足。故謂之趺。唐陰宏道云。絡器。關西謂之絡噪。梁益謂之絲登。其下柅卽柅也。按陰氏所謂柅。卽說文之趺。故玉篇卽作絡絲柅。陳壽祺云。柅趺同字。絡縛也。與繫同義。繫於金柅者。言以絲縛於金柅之上。止而勿動。以喻陰不宜動而消陽。故下云往見凶。是其義也。貞吉者。卜問吉。往見凶者。進則凶也。巽爲羸爲豕。巽進退。故躅躅。羸釋文陸讀爲累。鄭力追反。是仍讀爲累。與大壯同。累纏繞也。羸累累音同通用。巽爲繩故爲羸。巽伏故亦爲豕。躅躅動也。羸豕乎躅躅者。言豕雖拘羸。然躅躅前進。信其必然。不可忽也。喻陰雖微。後必長也。巽豕象失傳。詳焦氏易詁易象補遺。

象曰。繫于金柅。柔道牽也。

玉篇。牽速也。下九三。象釋其行次且。曰行未牽也。是象傳亦訓牽爲速。柔道牽者。言柔之爲道。消陽甚速。故以金柅止之。諸家皆謂柔牽於二。失經旨。經旨恐陰進危陽。故止其動。象釋爲柔道牽。申繫于金柅之故也。牽速之象取風疾。兼取巽繩。

九二。苞有魚。无咎。不利賓。

苞今本作包。書禹貢草木漸包。釋文或作苞。是包包古通。故虞氏作苞。見釋文。虞云巽爲白茅。詩白茅苞之。巽爲魚。二據陰居中。故曰苞有魚。巽爲賓客。不利賓者。賓指上四陽。言初爲二所據。四陽不能及初也。子夏傳作庖。而荀爽則作胞。胞庖通。是皆以庖廚爲義。然卦无是象。故虞氏合也。象曰。苞有魚。義不及賓也。

二近。賓遠。故義不及。

九三。臀无膚。其行次且。厲。无大咎。

三居下卦之末。故亦曰臀。初陰爻。下爛。故曰无膚。乾爲行。三得敵。故次且不前。然三當位。故雖危厲而无大咎也。舊解皆不知次且之故何在。而以復震爲行爲說。失之遠矣。

象曰。其行次且。行未牽也。

行未牽。卽行未速。次且者却行未前。故曰未速。

九四。苞无魚。起凶。

四應初。疑於有魚。豈知初已爲二所據。實无魚也。无魚則勿動。動應初則爲二三所害。故凶。起作也。

象曰。无魚之凶。遠民也。

陰爲民。言四距初遠。故无魚也。

九五。以杞苞瓜。含章。有隕自天。

下巽爲杞。上乾爲圓。爲瓜。孟子告子曰。以人性爲仁義。猶以杞柳爲桮棬。說文桮。屈木也。以杞苞瓜者。言以杞柳之器盛瓜也。乾爲大明。故曰章。瓜爲杞所苞。故曰含章。五承乘皆陽。行窒。故含章自守。五天位。巽爲隕。有隕自天者。言不久陰消至二。五與爲應。有隕落之險也。知其險而預爲之備。則得矣。此聖人防微慮遠之意也。自荀虞以來。皆不知左傳有風隕象。因之清儒亦皆不知。於是虞氏令四隕初之說。沿襲至今。而經義全晦。復六五曰敦復无悔。待陽息至二。五有應而吉。此則慮陽消至二。五應之而凶。

象曰。九五含章。中正也。有隕自天。志不舍命也。

巽爲命。舍命謂任命也。志不舍命者。言知其後有隕落之險。不任命而預防之也。

上九。姤其角。吝。无咎。

乾爲首。上九居乾之上。角之象也。故曰姤其角。然亦无大咎也。

象曰。姤其角。上窮吝也。

處亢龍之位。故窮吝。

三三

萃。王假有廟。利見大人。亨利貞。用大牲吉。利有攸往。

萃聚也。坤爲萬物。聚于澤中。故曰萃。王謂五。艮爲廟。假格通至也。巽爲入。王假有廟。言王以至誠。格于宗廟而有事也。九五得位。故曰利見大人。二五應予。故曰亨利貞。兌爲羊。巽爲豕。坤爲牛。皆大牲。有事於宗廟用之而吉也。利有攸往。謂二應五。五天位。故傳曰順天命。

彖曰。萃。聚也。順以說。剛中而應。故聚也。王假有廟。致孝享也。利見大人亨。聚以正也。用大牲吉。利有攸往。順天命也。觀其所聚。而天地萬物之情可見矣。

五天位。巽爲命。坤順。順天命。謂二順五也。艮爲觀。坤爲萬物。天地萬物。陰陽而已。有陰陽卽有情感。可見而知也。

象曰。澤上於地。萃。君子以除戎器。戒不虞。

戎兵也。月令以習五戎。注五戎弓矢戈矛戟也。兌爲斧鉞。艮爲刀兵。除治也。君子觀於萃象。因以治戎器而戒不虞。坤爲亂。艮爲止。止亂。故曰戒不虞。言防意外也。

初六。有孚。不終。乃亂乃萃。若號。一握爲笑。勿恤。往无咎。

四有應。故曰有孚。乃初爲二三所阻格。難于應四。故曰不終。乃亂乃萃。坤爲亂。爲聚。言亂萃于下也。四巽爲號。艮手爲握。若號者。言四召初與相上下也。四下來初。則初四相握手。下卦成震。震爲笑。故曰一握爲笑也。坤爲憂。有應故勿憂。初之四得正。故往无咎。

象曰。乃亂乃萃。其志亂也。

坤爲志爲亂。

六二。引吉。无咎。孚乃利用禴。

引進也。禮檀弓。兄弟之子猶子也。蓋引而進之也。引吉无咎者。言進應五則吉而无咎也。禴薄祭也。二孚五。五兌爲享。而坤爲吝嗇。故曰孚乃利用禴。禴夏祭。互巽爲夏也。

象曰。引吉无咎。中未變也。

進應五仍中位。故曰中未變。

六三。萃如嗟如。无攸利。往无咎。小吝。

三无應失位。而巽爲嗟。故曰嗟如。巽爲利。失位无應。故无所利。三前遇重陽。故往无咎。然上无應。故往又小吝也。

象曰。往无咎。上巽也。

巽順也。上巽言上順四五。四五陽。故无咎。虞氏謂動之四故上巽。誤之遠矣。

九四。大吉无咎。

下乘三陰。故大吉。失位故无咎。无咎者僅免於咎也。

象曰。大吉无咎。位不當也。

繫辭云。无咎者善補過者也。故无咎非全美之辭。

九五。萃有位。无咎。匪孚。元永貞。悔亡。

得位居中。故有位无咎。五孚于二。乃爲四所阻。難于應二。故曰匪孚。然乾元永貞於五。居高臨下。亦无悔也。

象曰。萃有位。志未光也。

兌爲黯昧。艮爲光明。艮伏故志未光。巽爲志。

上六。齋咨涕洟。无咎。

兌爲口。故齋咨。釋文齋咨嗟歎之辭。鄭同。馬云。悲聲怨聲。兌爲澤。故涕洟。玉篇目汁出曰涕。說文。洟鼻液也。上乘陽。三无應。故悲哀若是。然當位亦无大咎也。虞翻作齋資。云齋持資賻也。卽持賻助喪也。非。

象曰。齋咨涕洟。未安上也。

言不安於窮吝。

三三

升。元亨。用見大人。勿恤。南征吉。

陽遇陰則通。故名曰升。歸藏曰稱。牧誓稱而戈。注稱舉也。又譽人曰稱揚。升者升而上。舉者亦揚之使上。故歸藏曰稱。周易曰升。其義並同。陽上升。故元亨。元謂乾元也。大人謂二。二爲三所阻

格。故不曰利見大人。而曰用見。言二宜升五也。坤爲憂爲恤。二升五大人得位。故曰勿恤。震爲南。爲征。三臨羣陰。故南征吉。左傳成十六年。晉筮遇復。曰南國臧。以震爲南。明夷九三曰南狩。亦以震爲南。自震南象失傳。清儒皆用虞氏法。以二升五互離爲南。

彖曰。柔以時升。巽而順。剛中而應。是以大亨。用見大人。勿恤。有慶也。南征吉。志行也。

二升五。故有慶。坤爲志。三臨重坤。故曰志行。

象曰。地中生木。升。君子以順德。積小以高大。

巽爲高爲長。故爲高大。坤爲小爲積。積小以高大者。言以坤陰柔順之德。積累以成其高大也。象卦形也。

初六。允升。大吉。

允施氏作執。說文同。云執進也。晉六三云。衆執。卽衆進也。茲曰執升。仍前進而升也。進遇陽。故大吉。

象曰。允升大吉。上合志也。

上謂二三。九家謂上爻。非。巽伏故爲志。

九二。孚乃利用禴。无咎。

二孚五。五坤爲吝嗇。故曰禴。禴夏日薄祭也。兌爲祭。巽爲夏。故曰孚乃利用禴。无咎矣。

象曰。九二之孚。有喜也。

升五故有喜。

九三。升虛邑。

馬云虛丘也。按左傳僖二十八年。晉侯登有莘之虛。詩衛風升彼虛矣。虛者高丘。巽爲高。故曰虛。坤爲邑。升虛邑者。言升邑之高處也。正巽上象也。與同人九四之乘其庸。取象正同。苟爽作空虛解。後來諸家。以虛爲坤象。多宗荀說。非。

象曰。升虛邑。无所疑也。

坤爲迷爲疑。陽遇陰。故无所疑。

六四。王用亨于岐山。吉。无咎。

震爲王。兌爲亨。震爲陵爲阪。而形上岐。故曰岐山。王用亨于岐山者。言望二升五。四得承陽。陰順陽。猶臣事君。望二升五。猶望王至岐山。而有所亨獻也。象曰順事。順承也。二若不升五。四如何得承陽哉。故望之也。此正文王服事殷之本旨。乃後儒謂文王作爻辭。不合自稱爲王。若爲殷王。又无至岐山之理。以爻辭爲周公作。此無論易辭皆由象生。故韓宣子不謂爲易辭。而曰易象。卽祇以人事言。紂尙能囚文王。何不可到岐山。且文王於此事數言之。服事忠誠。溢於言表。又豈必實有其事。乃謂王爲文王。无理甚矣。李過西谿易說云。若以此王爲文王。則王用三驅。王假有廟。亦文王耶。駁舊說至詳盡。

象曰。王用亨于岐山。順事也。

坤爲順。言二升五。四得承陽。故曰順事。

六五。貞吉。升階。

貞吉。卜問吉也。坤爲土爲重。故有階級之象。升階言二升五也。五陽。故象曰大得志。

象曰。貞吉升階。大得志也。

坤爲志。陽升五。故大得志。

上六。冥升。利於不息之貞。

坤爲晦冥爲夜。故曰冥升。得陽應。故曰利於不息之貞。與利永貞同愷。蓋上六爲同性之四五所格。不能應三。故有此象。

象曰。冥升在上。消不富也。

坤消故不富。

三三三

困。亨。貞大人吉。无咎。有言不信。

二五剛得中。處險能說。故亨。貞占也。二五爲大人。故貞大人吉也。兌口爲言。三至上正反兌。所向不同。故有言不信。此其義始見於左傳。左傳昭五年明夷之謙曰。於人爲言。敗言爲讒。謂謙上震爲

人爲言。下艮爲反震。故曰敗言。是以正反震爲讒。易林承其義。於訟之困云。心與言反。正釋此語也。坤之離云。齊魯爭言。離二至五正反兌。故曰爭言。爭言卽不信。離二至五。與困三至上同也。舊解皆誤。詳焦氏易詁。

象曰。困。剛揜也。險以說。困而不失其所亨。其唯君子乎。貞大人吉。以剛中也。有言不信。尙口乃窮也。

坎剛揜。三至上剛揜。陽陷陰中故困。困而不失其所亨。唯君子能之。君子卽大人。若小人卽不堪矣。兌爲口。三至上正反兌。故曰尙口。尙口乃窮者。言徒尙口說。必有相反而不信者。故窮也。

象曰。澤无水。困。君子以致命遂志。

水在澤下。則澤竭矣。故曰无水。巽爲命。而兌爲反巽。爲毀折。故曰致命。坎爲志。二入於淵不出。故曰遂志。學易之君子以之。

初六。臀困於株木。入于幽谷。三歲不覿。凶。

初在下。故曰臀。與夬九四同。株木謂坎。言初欲應四。坎陷爲阻。故困於株木。株幹也。韓非子守株待兔。而坎爲棟。故爲株木。坎爲幽。坎陷爲谷。初在下。故入於幽谷。離伏故不覿。三歲言其久。蓋初失位。處坎下。故其象如此。茹敦和以坎爲三歲。王昭素謂初至三三爻爲三歲。以坎上六證之。茹說是也。

象曰。入于幽谷。幽不明也。

離伏坎夜。故幽不明。

九二。困于酒食。朱紱方來。利用亨祀。征凶。无咎。

坎爲酒食。需九五需于酒食是也。二居坎中。故困于酒食。巽爲繩爲紱。坎爲赤。巽在二前。故曰朱紱方來。言將膺錫命也。博雅紱綬也。朱紱貴人所服。以祭宗廟者。故用以亨祀則利也。然五不應故征凶。得中亦无咎。

象曰。困于酒食。中有慶也。

居陰中。故有慶。

六三。困于石。據于蒺藜。入于其宮。不見其妻。凶。

巽爲石。坎爲蒺藜。三前臨巽。故困于石。下據坎。故據于蒺藜。石堅剛不可入。蒺藜刺人。不可踐也。巽爲入。坎爲宮。故入于其宮。巽爲齊。妻者齊也。故巽爲妻。巽爲伏。又上無應。故入宮而不見妻也。象而如是。凶可知也。巽石象。宋邵雍用之。後儒怪駭。豈知焦氏易林。同人之小畜云。戴石上山。步跌不前。小畜上巽爲石。下乾爲山爲首。石在首上。故曰戴石。餘證尙多。詳焦氏易詁卷一。象曰。據于蒺藜。乘剛也。入于其宮。不見其妻。不詳也。

釋文云。蒺藜茨草。虞翻謂爲木名似非。釋詁茨蒺藜。注布地蔓生。有子。三角刺人。詩鄘風。牆有

茨。傳茨蒺藜。孔疏蒺藜有刺。不可踐者是也。惟不可踐。故以喻乘剛。若爲木則不合矣。正義作藜。然爾雅及毛詩傳皆作藜。藜藜通用。阮校必謂藜是。似亦无確證。詳善也。

九四。來徐徐。困于金車。吝。有終。

來應初爲二所阻。故曰徐徐。二坎爲車。離色黃外堅。故曰金車。困于金車。申來徐徐之故也。仍阻于險。不得應初也。然與初爲正應。初吝終合。故曰有終。

象曰。來徐徐。志在下也。雖不當位。有與也。

坎爲志。志在下。言應初。

九五。劓刖。困于赤紱。乃徐有說。利用祭祀。

艮伏鼻不見。故曰劓。兌折震足象毀。故曰刖。坎爲赤。巽爲紱。故曰赤紱。乃二爻坎不應。故困于赤紱。上遇陰利往。故有說。兌爲食。故利用祭祀。

象曰。劓刖。志未得也。乃徐有說。以中直也。利用祭祀。受福也。

坎爲志。二无應。故志未得。坎五曰受福。茲與之同。傳所謂祭祀則受福也。

上六。困于葛藟。于臲臲。曰動悔有悔。征吉。

巽爲葛藟。三至上正反巽。而三不應上。故困于葛藟。臲臲危險不安之貌。上乘剛。无應。故有是象。兌爲口。曰者自警也。言處此臲臲之境。時時以動悔有悔自警。動悔者言動而應三。三不應故悔。

有悔者言下乘陽又有悔也。征吉謂三。言三往四。上得陽應而吉也。此二句向无的解。姑測其義如是。

象曰。困於葛藟。未當也。動悔有悔。吉行也。

未當者。言上不宜乘陽也。吉行者。三之四上得陽應。故吉也。

三三

井。改邑不改井。无喪无得。往來井井。汔至亦未繙。句井。羸其瓶。凶。

水在澤下。澤竭故困。水在澤中。汲之不窮。故兌爲井。易林復之旅云。井沸釜鳴。以旅互兌爲井。鄭玄以巽木爲桔槔。汲水以取井象。桔槔焉有在井下者乎。

兌爲井。坤爲邑。泰初往坤中。故改邑。二至四仍兌。與泰體同。故不改井。不改故无喪得。初至四正反兌。故曰往來井井。易林益之萃云。往來井井。卽以萃三至上正反兌。爲往來井井。荀云。汔竟也。汔至者。言綆繫至井底而盡也。繙繙也。亦未繙者。言巽繩在下。尙未繙瓶使上也。其以汔爲幾。謂瓶幾至井口而覆者非也。經明曰未繙。若至井口。則已繙矣。中爻離爲瓶。正當毀折之地。而巽爲繩。故曰羸。羸纍通。井羸其瓶者。言瓶爲井壁所拘羸鈎挂也。瓶旣爲井所挂礙。非覆卽破。故凶。揚子雲酒箴云。子猶瓶矣。居井之湄。不得左右。牽於縲微。一旦東礙。爲甕所輻。注東縣也。甕井以磚爲甕也。輻擊也。言瓶縣爲井磚所挂礙。而瓶受擊也。是揚子讀井羸其瓶。井不屬上讀。後荀爽襲子

雲。亦以井屬下讀。其以繻井爲句者。則下文之羸其瓶。莫詳其故矣。非也。羸易林家人之頤云。長股羸戶。長股卽蠪蛸。羸戶者。言以絲繼續繞於戶上也。是以羸爲繫。故荀訓爲拘羸。虞釋爲鈎羸。他若陸續蜀才作累。王肅作縲。其字雖異。其音皆同。其義如一。

象曰。巽乎水而上水。井。井養而不窮也。改邑不改井。乃以剛中也。汔至亦未繻。未有功也。井羸其瓶。是以凶也。句依荀讀。故汲古閣所刊李氏集解。及雅雨堂刊本。皆井字屬下。

坎在上故曰上水。巽入也。巽乎水而上水。言以瓶入水。汲水使上也。水所以養人。取之不竭。故養而不窮。二五皆剛。故不改。未繻故无功。井拘繫其瓶使水覆。故凶。汔至亦未繻。荀注云汔竟也。繻所以出水通井。今居初未得應五。故未繻也。不與井連文。井羸其瓶。荀注云。井謂二。瓶謂初。初欲應五。爲二所拘羸。以井屬下讀。與揚子同。故從之。

象曰。木上有水。井。君子以勞民勸相。

坎爲衆爲民爲勞卦。故曰勞民。釋詁相導也。兌爲言。故曰勸相。言以言語勸導。使有所勉也。

初六。井泥不食。舊井无禽。

初在井下。故曰泥。兌口爲食。兌覆故不食。井原以汲水。今无水而泥。其爲舊井無疑也。禽獲也。无水故无所得。其以禽鳥爲詁者非。又按舊井者廢井也。兌爲井。兌覆爲巽。故井廢。

象曰。井泥不食。下也。舊井无禽。時舍也。

舍棄也。

九二。井谷射鮒。甕敝漏。

二居兌體之下。故曰井谷。巽爲魚。故曰鮒。子夏傳蝦蟇也。伏震爲射。蝦蟇穴居水際。故曰井谷射鮒。伏震爲甕。巽下缺。甕无當。故敝漏。夫井內之穴。井矢所能加。甕漏則水洩。而失其用。以二前遇陽。應亦陽。故動靜皆不適也。

象曰。井谷射鮒。无與也。

言五无應與。

九三。井渫不食。爲我心恻。可用汲。王明。並受其福。

三應在上。上居坎水上。故曰井渫。漢書王莽傳。憤眊不渫。注渫徹也。通也。揚子方言。渫歇也。茲曰井渫。謂井水渾濁沈歇而清徹也。初爲泥則上爲渫。正上居坎水上之象也。夫水絜宜食矣。乃竟不食者。以五亦陽爲阻三不得應上也。兌爲食。爲使也。坎爲心爲憂。爲我心恻者。言三被阻。不能汲上。使我心憂也。然三與上究爲正應。上水既渫而清。三儘可汲。五豈能終阻之。王謂五。五坎爲隱伏。故不明。然王終有明時。王明則三上汲引。養而不窮。天下普受其福矣。凡爻有正應者。初雖有阻。終必相合。同人九五曰。先號咷而後笑。大師克相遇。言五克去三四之阻。終能遇二也。漸九五曰。終莫之勝吉。得所願也。言五終能勝三。與二相合也。茲害三者五。五君位尊。三不敢言克言

勝。祇冀王明而已。王明則三上終相遇也。文王服事忠誠。情見乎辭。因五爲阻。故呼王明。舊解不知不食之故。在五敵爲阻。又不知王明並受其福。卽言三上終能應與。特以五而變其辭耳。故无一得解者。

象曰。井渫不食。行惻也。求王明。受福也。

不食之故。其咎在五。故曰求王明。

六四。井甃无咎。

以瓦甃砌井曰甃。兌爲井。六四居兌上。則井將修成。故无咎。

象曰。井甃无咎。修井也。

甃修也。

九五。井冽寒泉。旬食。

冽甘也。坎爲寒爲泉。泉旣甘冽。故可食。

象曰。寒泉之食。中正也。

五雖无應。然位正中。故可食。

上六。井收勿幕。有孚元吉。

收成也。幕蓋也。覆也。坎爲隱伏。故爲蓋覆。六居坎上故勿幕。言井旣成。以出水爲功。不宜蓋覆。

也。三得陽應。故有孚而吉。

象曰。元吉在上。大成也。

成卽收也。

周易尚氏學卷十四 下經

三三

革。己日乃孚。元亨利貞。悔亡。

革改也。言水火更代用事也。離爲日貞己。故曰己日。己日謂二。二離主爻。承陽應五。故曰己日乃孚。王弼等謂卽日不孚。己日乃孚。訓己爲過往。不辭甚矣。顧炎武日知錄。謂朱子發讀爲戊己之己。當從之。按虞氏注云。離爲日。孚謂坎。四動體離。故己日乃孚。是虞氏亦以離爲己日。讀爲戊己之己明甚。而非始於朱子發。元亨利貞。卽春夏秋冬。彖傳所謂四時也。四時更代。乃革之最大者。卦巽居春夏之交。離爲夏。兌爲秋。乾爲冬。故曰元亨利貞。純取革義。辭雖與乾彖同。義則殊也。

彖曰。革。水火相息。二女同居。其志不相得。曰革。己日乃孚。革而信之。文明以說。大亨以正。革而當。其悔乃亡。天地革而四時成。湯武革命。順乎天而應乎人。革之時大矣哉。

息長也。言更代用事也。但兌離皆陰卦。易之道陰遇陽。陽遇陰方志得。若陰遇陰。陽遇陽。則爲敵矣。中孚六三曰得敵。艮彖曰敵應。是也。故其志不相得。巽爲志。二至上正反巽。故不相得。己中央土。仁義禮智信。信亦隸中央。故曰己日乃孚。革而信之。信故无悔。四時相代實相革。期无或爽。信

也。湯武革命。天人皆應。亦信也。不信則不能革。故時之所關甚大。此其義也。

象曰。澤中有火。革。君子以治歷明時。

歷者日月星辰之所歷。識其處以定四時。書所謂敬授民時。大戴記之夏小正。小戴記之月令皆歷也。卦上兌爲月。下離爲日。乾爲寒。離爲暑。兌雨巽風皆備。故君子法之。以治歷明時。

初九。鞏用黃牛之革。

離外剛故曰鞏。鞏固也。離爲牛。左傳曰純離爲牛。離六二云黃離。故曰黃牛。乃虞翻則謂離无牛象。干寶謂離爻本坤。故曰黃牛。皆非也。離外堅爲甲故爲革。革皮去毛者也。固莫固于牛革。言初當勿用之時。不可妄動。宜固守也。牛革所以喻其固也。

象曰。鞏用黃牛。不可以有爲也。

初潛龍勿用。故不可以有爲。又上无應。卽不信也。不信卽不可革。

六二。己日乃革之。征吉。无咎。

二離主爻。離貞己。故曰己日。二有應。故曰己日乃革。二遇陽。故征吉而无咎也。按二爲日中。王弼以過往詰己日。故決知其非是。

象曰。己日乃革之。行有嘉也。

乾爲嘉。行有嘉。謂二征則遇陽。遇陽故吉。

九三。征凶。貞厲。革言三就。有孚。

三臨重陽。陽遇陽則窒。故征凶。卜問厲也。然三應在上。上兌爲言。而兌爲毀折。故曰革言。就卽也。遇也。革言三就有孚者。言三雖得敵。不能應上。若上六卽三。則甚順利而有孚也。兌爲言。乾亦爲言。言多故曰三就。又三在三爻。損六三云。三人行。需上六云三人來。皆以在三爻。取數於三。三就者三遇也。謂革言來之多也。有孚者上孚於三也。易理失傳。舊解於征凶之故。莫有明者。豈知征凶貞厲。謂陽遇陽。下二句謂上應三。義不相屬也。

象曰。革言三就。又何之矣。

之往也。又何之者。言上六卽三。不必他往也。蓋革言日至則孚者衆。而事已審。革之而已。勿再猶豫不定也。

九四。悔亡。有孚。改命吉。

四失位。宜有悔。无應予則无孚。然九四居乾之中。乾爲信。故无悔而有孚。巽爲命。四至上巽覆。是改命也。易林大畜之夬云。太子扶蘇出於遠郊。倖成邪。改命生憂。卽以夬上兌爲改命本此也。改命則革也。蓋初以時未至而固守。二孚於天時。三孚於人事。至四遂實行改革矣。乾四云或躍在淵。與此理同也。自覆象失傳。舊解皆以四變陰成既濟爲改命。既濟者終止。何吉之有哉。非也。

象曰。改命之吉。信志也。

巽爲志。改命則實行革命。故曰伸志。言得行其志也。志行故吉。

九五。大人虎變。未占有孚。

乾爲大人爲虎。大人虎變者。喻大人履九五之尊。威德誕敷。崇高巍煥。改易舊觀。故曰虎變。下相應。故未占而有孚也。乾虎象失傳。後惟茹敦和俞樾知之。虞翻以坤爲虎。宋衷以兌爲虎。皆非。

象曰。大人虎變。其文炳也。

五應二。二離爲文。故其文炳。

上六。君子豹變。小人革面。征凶。居貞吉。

伏艮爲君子。爲豹。君子豹變者。謂革命後佐命之勳。皆得封拜而有茅土。尊顯富貴。易世成名。故曰豹變。陰稱小人。艮爲面。艮伏故革面。小人革面者。謂革命之後。除舊布新。小民皆改易其視向也。面向也。史記項羽本紀。馬童面之。是也。上六當位。不宜動宜靜。故征凶居吉。艮面象。易林遯之蒙云。雲過吾面。以蒙坎爲雲。艮爲面。虞氏謂面指四。非。

象曰。君子豹變。其文蔚也。小人革面。順以從君也。

下應三。離爲文。面向也。故曰順以從君。言下順乾也。

三三二

鼎。元吉。亨。

元謂五。得位有應。故吉亨。端木國瑚曰。鼎之象不在鼎。而在伏象屯。屯下震爲足。互坤爲腹。上坎爲耳。爲鉉。凡鼎之象无一不備。後人不知易於正伏象不分。謂下陰爲足。中三陽爲腹。五陰爲耳。易焉有巽足乾腹離耳之象哉。按端木氏說是也。二千年誤解。得是而正。其功甚偉。

彖曰。鼎。象也。以木巽火。亨飪也。聖人亨以享上帝。而大亨以養聖賢。巽而耳目聰明。柔進而上行。得中而應乎剛。是以元亨。

鼎之用。在亨飪。以木巽火。鼎之用也。乾爲聖人。離爲目。兌爲耳。六五爲離兌主爻。故曰耳目聰明。虞翻謂三動成坎離。以坎爲耳。後儒多從之。豈知三當位。焉能之不正。任意如此。何象不可得。按易林觀之中孚云。鼎煬其耳。以中孚下兌爲耳。比之豐云。李耳橐籥。亦以豐互兌爲耳。蓋坎之爲耳。以其陷。兌亦坑坎也。故亦爲耳。三爻鼎耳革。五爻鼎黃耳。象甚明也。

象曰。木上有火。鼎。君子以正位凝命。

鼎偏倚則勢危。故貴正。不正則鍊覆。鼎斂實於內。故貴凝。不凝則實漫矣。故君子取之。以正位凝命。

初六。鼎顛趾。利出否。得妾以其子。无咎。

震爲趾。震伏巽隕。故曰顛趾。巽爲臭腐。故曰否。否惡也汚也。初在下卑汚之地。出之四則各當位而利矣。四。兌爲妾。四來初是得妾也。初之四體震。震爲子。是得妾兼得子也。故利出也。

象曰。鼎顛趾。未悖也。利出否。以從貴也。

悖逆也。初陰順陽。故曰未悖。初承陽應四。故曰從貴。

九二。鼎有實。我仇有疾。不我能卽。吉。

乾爲實。仇匹也。指五。五乘陽勢逆。不能卽二。故曰有疾。豫六五乘剛曰貞疾。茲與之同。我謂二。二爲三四所隔。既不能卽五。五因乘剛有疾。亦不能卽二。然我與我仇。究爲正應。始雖阻。終必合也。故結之曰吉。象曰終无尤。卽謂二五終合也。

象曰。鼎有實。慎所之也。我仇有疾。終无尤也。

之往也。二前臨重陽。行不利。故慎所之。二五終合。故終无尤。按此爻舊解。鮮有當者。一仇字失詁。虞翻謂二據四婦。四爲仇。朱子以仇爲初。陽遇陽爲敵之義。自漢失傳。故慎所之三字。皆莫知所謂。清儒以漢爲步趨。漢儒誤遂无不誤矣。

九三。鼎耳革。其行塞。雉膏不食。方雨虧悔。終吉。

三至五兌爲耳。巽隕落。故曰耳革。行道也。易林復之中孚云。鼎煬其耳。熱不可舉。大路壅塞。旅人心苦。以行爲道路。蓋三承乘皆陽。陽遇陽故其行塞。上離爲雉。兌爲膏。雉膏在上。乃上不應三。故雉膏不食。兌爲雨。爲昧。故曰虧悔。虧悔不明也。吳先生云悔晦也。按易林復之鼎云。陰霧作匿。不見白日。不見白日。虧也。子虛賦日月蔽虧。江淹詩金峯各虧日。是也。陰霧作匿晦也。吳讀與易

林同也。終吉者。初之四則三臨重陰。陽得陰則通。故吉。

象曰。鼎耳革。失其義也。

義宜也。鼎之用全在耳。今耳革失其用。故曰失義。

九四。鼎折足。覆公餗。其刑剭。凶。

震爲足。三至五兌。兌二折震。震象毀。故曰鼎折足。巽爲餗。馬云餗也。鄭云菜也。乃三至五巽覆。四爲諸侯。三公之位。故曰覆公餗。刑剭王弼作形渥。古音同通用。管子心術下云。意然后刑。刑然后思。注意感其事。然後呈形。是刑形古通用。茲從各家。京云刑在頰爲剭。漢書敘傳。底剭鼎臣。師古注剭厚刑。又周禮秋官司烜氏。邦若屋誅。鄭注云屋當讀爲其刑剭之剭。剭誅謂不於市也。蓋四不當位。故象凶。如是巽餗之象。按易林未濟之无妄云。求麋耕田。以无妄互巽爲麋。而馬氏訓餗爲餗。與易林同。餗卽麋也。鄭氏訓爲菜。按韓奕之詩曰。其藪維何。維筍及蒲。疏引易曰鼎折足。覆公餗。是餗與藪通用。而鄭訓與詩合。蓋皆巽象。可從。九家云。三公調陰陽。猶鼎之調五味。足折餗覆。猶三公不勝其任。而覆天子之美。故受此重辜也。王弼以形渥爲沾濡。程子謂爲汗赧。豈知下繫云。德薄而位尊。鮮不及矣。謂及于刑辟也。卽讀爲刑剭也。王程所釋。皆望文生義。非也。

象曰。覆公餗。信如何也。

乾爲信。信如何者。言行爲如此。信仰失也。

六五。鼎黃耳金鉉。利貞。

兌爲耳。離黃中。故曰黃耳。乾爲金。故曰金鉉。鉉與局同。士冠禮設局罪。鄭注局今文爲鉉。釋文局鼎扛也。孔疏所謂貫鼎耳而扛之。是也。伏坎象也。六五得中。下有應。故利貞。利貞言二五應也。

象曰。鼎黃耳。中以爲實也。

乾爲實。九二云。鼎有實。五得中應二。故中以爲實。實指二。黃中色。故曰中以爲實。

上九。鼎玉鉉。大吉无不利。

乾爲玉。上九陽爲直。故象玉鉉。又上九以鉉舉鼎。動作自如。無有滯礙。故大吉无不利。與大畜上九義同。象釋曰剛柔節。以五陰爲承也。

象曰。玉鉉在上。剛柔節也。

上陽得五陰爲承。故曰剛柔節。諸家多以三變應上成未濟。爲剛柔節。豈知六爻獨三當位。胡可使其失正。且變而成未濟。六爻皆不安。胡能大吉。此自虞翻卦變伎倆。以濟其窮者。可復申述之乎。

三三三

震。亨。震來虩虩。笑言啞啞。震驚百里。不喪匕鬯。

震振也。動也。一陽伏二陰之下。陽必上升。故振動而爲雷。爲起。歸藏作釐。李過曰釐者理也。黃宗炎曰謂雷釐地而出以作聲。愚按震爲笑樂。爲喜。而釐與僖通。史記以魯僖公爲釐公。是其證。說

文。僖樂也。與喜同。又震爲生爲福。而釐亦爲福。前漢文帝紀祠官祝釐如淳曰福也。是釐與震義多同。故歸藏作釐。周易作震。陽得出故亨。兢兢恐懼貌。陽來居初。故曰震來。雷之發也。萬物震恐。故震來兢兢。陽遇陰則通。故笑言啞啞。啞啞笑貌。震爲百。艮爲里。坎爲棘。爲鬯。鬯秬酒也。震爲黍。坎爲酒。故曰鬯。震驚百里。不喪匕鬯者。言震雷雖威及百里。而不驚懼也。匕所以載牲。鬯所以降神。皆祭祀之用。故傳曰可以守宗廟爲祭主也。

彖曰。震亨。震來兢兢。恐致福也。笑言啞啞。後有則也。震驚百里。驚遠而懼邇也。出可以守宗廟社稷。以爲祭主也。

震爲福。故曰恐致福。則。法也。互坎爲法則。震爲後。後有則者。言陽復於下爲陰主也。震爲出。爲祭。爲主。艮爲守。爲社稷。爲廟。震爲長子。驚遠懼邇。能匕鬯不失。故可爲祭主。而長守宗廟社稷也。

象曰。洊雷震。君子以恐懼修省。

洊再也。上下震故曰洊雷。因震而恐。因恐而修省。

初九。震來兢兢。後笑言啞啞。吉。

陽在下。故曰後。言初雖兢兢恐懼。後則樂也。陽遇重陰故也。

象曰。震來兢兢。恐致福也。笑言啞啞。後有則也。

恐則修省。修省則致福。

六二。震來厲。億喪貝。躋于九陵。勿逐。七日得。

來者復也。震來厲。言陽復初。二乘之。故危厲不安也。億噫通。釋文云。本亦作噫。虞翻云。惜辭也。艮爲貝。震者艮之覆。故喪貝。古以貝爲貨幣。因厲喪貝。震爲言。故曰惜辭。鄭作十萬解。似不如虞義也。二至四艮。艮爲陵。艮陽在上。陽老故曰九陵。震爲躋。躋升也。而坎爲盜。在艮陵上。言有人持貝。躋九陵以去也。然不必逐也。震爲逐。數七。故曰七日。震爲復。勿逐七日得者。言所喪之貝。不必追逐。至七日自然來復也。舊解皆以離爲貝。易林剝之蒙云。齋貝贖狸。蒙上艮爲齋爲貝。又謙之蠱。訟之大畜。皆曰喪貝。亦皆以上艮爲貝。蓋艮堅在外。與離同也。

象曰。震來厲。乘剛也。

乘剛故危。

六三。震蘇蘇。震行无眚。

蘇蘇。鄭云不安也。坎爲疾病。故爲眚。蓋三不當位。故不安。然得陽爲承。亦无眚也。

象曰。震蘇蘇。位不當也。

虞以蘇爲死而復生。由象傳觀之。鄭釋爲當。

九四。震遂泥。

遂隧之省文。隧卽墜也。論語文武之道。未墜于地。石經作隧。又列子。矢隧地而塵不揚。皆以隧爲墜。遂古文隧之省。荀子理論篇。入焉而隊。楊倞注云。隊古墜字。故荀爽作隊。四坎爲泥。陷四陰中。故隧泥。震爲行。隧泥則行難矣。

象曰。震遂泥。未光也。

坎隱伏。故未光。

六五。震往來厲。億无喪有事。

往得敵。來乘陽。故往來皆危厲也。自陽遇陽陰遇陰爲敵之理失傳。於是虞翻不知往厲之故在陰遇陰。祇以乘剛爲說。乘剛則來厲。于往无涉也。五得中位尊。匕鬯之事。故无喪也。

象曰。震往來厲。危行也。其事在中。大无喪也。

行道也。大无喪卽億无喪。

上六。震索索。視矍矍。征凶。震不于其躬。于其鄰。无咎。婚妬有言。

索索。鄭云猶縮縮。足不正也。三在震上。蘇蘇不安。上亦同也。矍矍。鄭云目不正也。說文。佳欲逸走也。徐曰。左右驚顧也。震。目无上眚。故因恐懼而視矍矍也。易林訟之豫云。眇雞无距。與鵠格鬪。翅折目盲。爲鳩所傷。眇。說文目傷眚也。豫上震。目无上眚。故曰眇。曰盲。義卽本此也。虞翻不知易用象之妙。以卦无視象。命三變成離取視象。易取象无此迂曲也。三无應。故征凶。震不于其躬。

于其鄰。仍驚遠懼邇之意。艮爲躬。艮覆爲震。故不于其躬于其鄰。震爲鄰。易林蹇之噬嗑云。不利出鄰。疾病憂患。噬嗑下震爲鄰爲出。出卽與坎險遇。而有疾病憂患之苦。是明以震爲鄰也。鄰仍謂三也。言三蘇蘇。卽知其可懼而戒備也。知懼故无咎。卦二至上正反震。故有言。有言者爭訟。與困之三至上正反兌有言不信同也。卦三男俱備。无一女象。故不能婚媾。如婚媾則必爭訟也。自覆象失傳。此句舊解二千年无一當者。祇易林中孚之謙云。伯氏爭言。謙亦正覆震。與震二至上同。爭言卽有言。震爲伯也。

象曰。震索索。中未得也。雖凶无咎。畏鄰戒也。

在震上。故曰中未得。因畏而戒。故无咎。

三三三

艮其背。不獲其身。行其庭。不見其人。无咎。

歸藏作狠。狠廣韻很之俗字。說文很不聽從也。一曰行難也。艮鄭云艮之言很也。是很艮義同。艮止也。震爲行。震反故止。雜卦震起也。艮止也。卽言正反之義也。舊說以陽在上爲止。非其義也。艮爲背。身爲庭。爲人。艮其背。靜也。三至五互震。故又曰行其庭。行其庭動也。乃因无應與。靜則不獲。身上手足之用。動則不見。庭除應予之人。无動作无交際。故亦无咎也。

彖曰。艮。止也。時止則止。時行則行。動靜不失其時。其道光明。艮其止。止其所也。上下敵

應。不相與也。是以不獲其身。行其庭不見其人。无咎也。

艮爲時。下艮。故曰時止則止。三至五互震。故曰時行則行。止則靜。行則動。動靜隨時。故其道光明。艮爲道路。陽在上故光明。六爻无應子。故曰敵應。陰陽相遇爲朋爲類。若陽遇陽。陰遇陰。則皆爲敵。同人九三云。敵剛。以比應皆陽。故曰敵剛。以陽遇陽爲敵。中孚六三云。得敵。子夏傳云。四與三爲敵。而不釋其義。荀爽解之曰。三四俱陰。故稱敵也。以陰遇陰爲敵。此實易義之根本。明乎此則屯二之十年乃字。比三之比之匪人。頤六二之失類。六五之不利涉。大壯初九之征凶。解九四之解而拇。夬初九之往不勝。九四之其行次且。鼎九二之慎所之。震六五之往厲。皆可觀象而得其義。否則不知其所謂矣。此易義之所以終古長夜也。然觀子夏傳之解得敵。似此義韓嬰已知之。荀爽能釋之。然何以於上列各爻。任其失解。抑有解而采輯者不合其意而不錄歟。

象曰。兼山。艮。君子以思不出其位。

艮爲位。艮止故不出。坎爲思。得中唯心亨。亦不出。學易之君子法之。

初六。艮其趾。無咎。利永貞。

爻例在下稱趾。足止不動。故无咎。利永貞者。利於永遠貞定也。蓋初失位无應遇敵。故貴於无爲也。趾苟作止。止古文趾字。

象曰。艮其趾。未失正也。

利永貞。故不失正。

六二。艮其腓。不拯其隨。其心不快。

腓。脛肚也。義詳咸卦。腓之用在行。艮其腓。是不行也。拯。京房作折。舉也。釋文作承。曰馬云舉也。可證馬氏王氏本原作承。今作拯者。蓋開成以後所定。然折承拯音義並同。艮爲手。故曰拯。艮止故不拯。然陰以順陽爲天職。仍須隨陽。故曰不拯其隨。坎爲心爲憂。既不可動。又須隨陽。不能自主。故其心不快。

象曰。不拯其隨。未退聽也。

坎爲耳。故曰聽。聽從也。腓之用。在動而前進。不拯是不動不前。而退聽也。然陽在上。義必隨行。是不能退聽也。進退不克自主。故心不快也。

九三。艮其限。列其夤。厲薰心。

限。說文阻也。玉篇界也。卽脊骨界左右也。故馬荀鄭虞皆訓爲要。三居卦中。坎爲要。故取象於限。坎爲脊爲肉。故取象於夤。夤。馬虞皆以爲夾脊肉。脊骨居中爲限。脊肉左右分列。列裂同。墨子明鬼下云。生列兕虎。荀子哀公問云。兩驂列兩服入廄。注皆作裂。脊肉裂分左右。脊界其中。故曰裂其夤。皆坎象也。艮爲火。互坎爲心。故厲薰心。自坎肉象失傳。後儒皆不知噬嗑三四五三爻之肉象。及此夤象何屬。自艮火象失傳。虞翻以艮爲闔。讀薰爲闔。謂古闔作薰字。並云馬言薰灼其心。

未聞易道以坎水薰灼人者。豈知艮爲火。馬氏所詁。正與易合。至荀氏以薰爲勳。讀作動。來知德。又云以三十年之功。始悟薰字之由於伏離。由斯證一象之失傳。可使名家易人人異詞。眞可歎也。艮火坎肉象。皆詳焦氏易詁。易林艮之无妄云。頤覆不制。痛薰我心。是焦亦作薰。

象曰。艮其限。危薰心也。

厲危也。故曰危薰心。

六四。艮其身。无咎。

艮爲身。見上象。虞以坤爲身爲孕非也。初趾二腓。三要四身。按爻序自下而上。故象釋爲躬。得位故无咎。

象曰。艮其身。止諸躬也。

艮爲躬。躬卽身也。三四居卦之中。故曰要。曰身。並無他義。虞氏謂五動乘四則妊身。以止諸躬爲妊身。卦无離象。強命五爻變成離。惑亂後學。莫此爲甚。

六五。艮其輔。言有序。悔亡。

輔。說文人頰車也。在頰之上。與牙車相對。春秋僖五年。輔車相依。注云。車牙車。疏牙車。牙下骨之名。在頰之下。蓋凡物入口。皆賴牙車載之。故名曰車。人欲嚼物。或言語。則牙動而上與輔對。故曰輔車相依。輔在上不動。故艮爲輔。頤卽用以取象。三至五震。震爲言。上卦震反。故曰艮其輔。序

者次也。言不紊也。三至五震。時而當言則言。四至上。震反。時而不當言。則言止矣。故曰言有序。詩大雅序賓以賢。言賓之位次。與其賢相當。秩然不亂也。言行君子之樞機。時言則言。時止則止。有序如是。故无悔也。虞氏易序作孚。言孚于上也。

象曰。艮其輔。以中正也。

五中而不正。正字或疑衍。又或作正中。然未濟九二傳。中以行正也。大壯九二傳。大者正也。大謂九二。似亦不拘。

上九。敦艮。吉。

敦與頓通。頓止也。易凡言敦。皆有止義。待義。義詳敦臨敦復。敦艮者。頓止於上也。下履重陰。故吉。

象曰。敦艮之吉。以厚終也。

艮爲山。故曰厚。而艮爲終。故曰以厚終。唯厚故止也。

周易尚氏學卷十五 下經

三三三

漸。女歸吉。利貞。

上下卦皆陰承陽。陰承陽卽婦從夫。故曰漸。漸進也。次也。言陰次於是。宜進而承陽也。巽爲婦。艮止於下。有女歸之象。二五應。故利貞而吉。

彖曰。漸之進也。女歸吉也。進得位。往有功也。進以正。可以正邦也。其位。剛得中也。止而巽。動不窮也。

五得位故有功。艮爲邦。故曰正邦。

象曰。山上有木。漸。君子以居賢德善俗。

居積也。居賢德。卽積賢德也。坎爲積。艮爲賢。巽爲風俗。有賢德故以善俗。居賢德善俗。皆非猝然可能之事。皆漸義也。

初六。鴻漸于干。小子厲。有言。无咎。

鴻大雁也。艮爲鴻。周公時訓。以雁北鄉當屯卦。是以坎爲北。互艮爲雁。故易林師之萃云。鴻雁啞

啞。以水爲家。以萃互艮爲鴻也。需之遯云。去如飛鴻。亦以遯下艮爲鴻。干水涯也。二至四坎水。初在坎下。故曰鴻漸于干。艮少故爲小子。有言者爭訟。震爲言。艮爲反震。敗言。故曰有言。左傳云。敗言爲讒是也。有言故厲。然初爲士。潛伏在下。亦无咎也。

象曰。小子之厲。義无咎也。

初勿用。故義无咎。

六二。鴻漸於磬。飲食衎衎。吉。

磬大石也。三艮爲石。故漸於磬。二坎體。坎爲飲食。衎衎。和樂也。二當位得中應五。故象吉如是。象曰。飲食衎衎。不素飽也。

坎中實爲飽。應在五。巽爲白。故曰素飽。素飽猶素餐。不素飽。言得之以道也。

九三。鴻漸於陸。夫征不復。婦孕不育。凶。利禦寇。

馬云。山上高平曰陸。艮爲夫。在上。故不復。易林復之剝云。夫亡從軍。抱膝獨宿。以剝艮爲夫也。孕。妊娠也。育生也。震爲孕。左傳昭元年。武王邑姜。方震太叔是也。三震覆。故不育。郭璞洞林否之小過云。婦女胎反見華蓋。否三互巽。故知爲婦女。二四互艮。世變艮。艮爲反震。是胎反也。胎亦孕也。義卽本此也。巽爲寇。三下擁羣陰。而艮爲守禦。爲堅。寇在外。守禦在內。使外寇不入。故利也。舊解皆以坎爲寇。豈知坎之爲寇。以其隱伏。巽亦爲伏。故易亦以巽爲寇。且以坎爲寇。坎寇已

在內矣。如何能禦之。虞翻以坎爲寇。謂自上禦下。自上禦下。其利在上。於三何與。一象失傳。使經義顛倒錯亂。至於如此。真可喟也。

象曰。夫征不復。離羣醜也。婦孕不育。失其道也。利用禦寇。順相保也。

坤爲衆爲醜。醜衆也。詩小雅。執訊獲醜是也。離附離也。羣醜謂下二陰。言三陽係戀於下二陰。故不復也。諸家訓離爲去。與下順相保之義不合。非也。艮爲道。坎爲失。故失道不育。下二陰順三陽。以爲保守。故曰順相保。

六四。鴻漸于木。或得其桷。无咎。

巽爲鴻。九家逸象巽爲鸛。鸛鴻皆水鳥。故亦爲鴻。周公時訓以鴻雁來當巽卦。是以巽爲鴻。故易林中孚之同人云。鴻飛遵陸。以同人互巽爲鴻。又大畜之兌云。鴻盜我櫓。逃于山隅。兌互巽爲盜爲鴻。舊以離爲鴻非也。巽爲木爲桷。說文椽方曰桷。得桷言安也。四當位承陽。故无咎。

象曰。或得其桷。順以巽也。

言順承五上二陽。

九五。鴻漸于陵。婦三歲不孕。終莫之勝。吉。

巽爲高。五應在二。二艮體。五居艮上。故漸于陵。巽爲婦。震爲孕。震伏。下敵漏。故不孕。又五應在二。爲三所阻。不能應二。故三歲不孕。坎爲三歲。言其久。然五與二爲正應。二豈能終阻之。故終勝

三。得所願而吉也。莫之勝。言三不能勝五也。

象曰。終莫之勝吉。得所願也。

五終能應二。故得所願。舊解皆從虞氏以成既濟定爲說。強命初上變。非。

上九。鴻漸于陸。其羽可用爲儀。吉。

在卦上。與三同。故仍漸于陸。巽爲羽。儀飾也。其羽可用爲儀者。巽爲高爲白。言上居高明之地。羽毛鮮潔。故可用以爲儀。賁一切也。巽羽之象。易林隨之小畜云。奮翅鼓翼。以小畜上巽爲翼。又頤之兌六翻長翼。亦以兌互巽爲翼。

象曰。其羽可用爲儀吉。不可亂也。

儀型萬方。秩然不紊。故不可亂。

三三

歸妹。征凶。无攸利。

兌爲少女。故曰妹。震爲歸。婦人謂嫁曰歸。故曰歸妹。震巽長女從長男爲恆。則曰利有攸往。茲少女從長男。與恆同耳。乃彖義則與恆相反。曰征凶无攸利何也。曰恆下巽。巽陰承陽。與上震无一爻不相應。故利有攸往。歸妹則巽覆爲兌。陰乘陽。初三皆失應。故征凶。巽爲利。巽覆故无攸利。又中四爻皆不當位。貞靜自守。尙恐有咎。動則悔吝生矣。故征凶不利也。下繫云。其爲道也屢遷。變動

不居。周流六虛。上下无常。剛柔相易。不可爲典要。唯變所適。正謂此。恆與歸妹。上卦同也。下卦同爲二陽一陰也。乃巽則如彼。巽覆則如此。唯變所適也。唯變所適。謂甲卦與乙卦。一爻變動。則吉凶相反。非謂卦无是象。強命某爻變。以成其象也。自漢以來。因誤解變動不居。唯變所適二語。援爲護符。浪用爻變。以濟其窮。前有虞翻。後有焦循。其尤也。

彖曰。歸妹。天地之大義也。天地不交。而萬物不興。歸妹。人之終始也。說以動。所歸妹也。征凶。位不當也。无攸利。柔乘剛也。

歸妹而後有夫婦。天地者夫婦之義。天地交而後有萬物。故歸妹爲女之終。生人之始。中爻皆不當位。三五皆以柔乘剛。故征凶无攸利也。

象曰。澤上有雷。歸妹。君子以永終知敝。

女歸則永終。兌毀折。故以知敝爲戒。

初九。歸妹以娣。跛能履。征吉。

初在兌下。故曰娣。娣者嫡之女弟也。公羊傳。諸侯一聘九女。嫁者一娣一姪。媵者皆有姪娣。嫁者謂嫡。嫡及兩媵六姪娣共九女。兌折震故跛。然二升五則下成震。震爲足。故曰跛能履。征吉也。象曰吉相承。卽承二升五而吉也。

象曰。歸妹以娣。以恆也。跛能履。吉相承也。

按初无應。二陽爲阻。不能前進。有凶无吉。茲曰占相承。謂二升五下卦成震。初臨重陰。相隨而吉。相承者謂二升五吉。初承其後仍吉也。虞翻求其義而不得。強命初爻變陰承陽爲說。夫初當位。胡能使變。經義之不明。此等曲說亂之也。以恆蓋謂女嫁隨姪娣。乃娶婦之常道。說者動以恆卦爲解。非。九二。眇能視。利幽人之貞。

二三半離。故曰眇。說文。眇一目小也。然能視者。以互離也。二應在五。五震爲人。兌爲昧。故曰幽人。利幽人之貞。言利與五相上下。各當位也。

象曰。利幽人之貞。未變常也。

未變常。言二五相應與乃常道也。

六三。歸妹以須。反歸以娣。

須。說文面毛也。歸嫁也。歸妹爲娣。今以須之故。反嫁爲娣也。伏艮爲須。易林同人之否云。牽於虎須。否互艮爲虎爲須。虞氏訓須爲需。需待也。六三若有待義。與九四之有待義複矣。易林渙之歸妹云。妹爲貌慙。敗君正色。莊子田子方老聃新沐。方將被髮而乾。慙然似非人。慙言可怖也。是焦氏亦訓須爲面毛也。故曰貌慙。

象曰。歸妹以須。未當也。

未當言不宜有是惡象也。困上六當位矣。象曰未當也。義與此同。革傳曰革而當。義皆同宜。後雅雨

堂集解本見虞注作位未當。竟于象傳添一位字。豈知正文若作位未當。釋文早言之矣。今釋文无有。可證虞本亦无位字。雅雨本皆從惠棟校。改字甚多。昔人謂惠氏亂經。茲更添字。宜罪之者多也。

九四。歸妹愆期。遲歸有時。

震爲時。坎陷故愆期。愆過也。愆期故遲歸待時。待升五也。又下无應。亦愆期之一因。卦四時俱備。故曰有時。升五則時至矣。

象曰。愆期之志。有待而行也。

坎爲志。震爲行。有待而行者。待升五也。

六五。帝乙歸妹。其君之袂。不如其娣之袂良。月既望吉。

震爲帝。故曰帝乙。帝乙湯也。京房易載其嫁妹之辭。是湯曾嫁妹。故曰帝乙歸妹。震爲君爲袂。而震亦爲口。袂袖口也。袂在五震。故曰君袂。在二兌。故曰娣袂。皆取象於口。乃五陰二陽。故君袂不如娣良。坎爲月。爲中。震東兌西。坎月離日。東西相望。正望日也。惟五居坎末。時已過中。故曰既望。既望從孟荀讀。虞作幾。京作近。晁說之云。古文近既讀同。孟云既望者。十六日也。五得中有應。故吉。震君震袂震口象皆失傳。說詳焦氏易詁。

象曰。帝乙歸妹。不如其娣之袂良也。其位在中。以貴行也。

雖不正而得中。中五位尊。故曰貴。

上六。女承筐无實。士刲羊无血。无攸利。

下兌爲女。震爲筐。女在下。筐在上。故曰女承筐。乃上不應三。故无實。震爲虛。亦无實也。震爲士。兌爲羊。爲斧。爲毀折。故曰士刲羊。乃三不應上。故无血。坎爲血。三體離。坎伏。故无血。此與夬九二。因爻无應。卽就无應取義。舊解坐不知此。故說之永不能通。巽爲利。巽伏上下失應。故无攸利。震虛象失傳。虞翻用卦變成坤。取虛象。豈知震爲蒼筤竹爲葦。皆取其中虛。況象傳曰虛筐。亦以震爲虛。

象曰。上六无實。承虛筐也。

象明言震虛。故知虞氏非。

三三

豐。亨。王假之。勿憂。宜日中。

雷電皆至東。故豐。說文。豐豆之豐滿者也。四陽遇重陰。故亨。震爲王。假至也。王假之。言四宜上升至五也。震爲樂。故曰勿憂。離爲日。中謂五。宜日中者。謂四升五。當位如日中也。

象曰。豐。大也。明以動故豐。王假之。尚大也。勿憂宜日中。宜照天下也。日中則昃。月盈則食。天地盈虛。與時消息。而況於人乎。況於鬼神乎。

尚上也。大謂陽。尚大謂四宜上升五。四升五則日中。光照天下。兌月離日。日中則昃。月盈則食。言

豐之不足恃也。

象曰。雷電皆至。豐。君子以折獄致刑。

先天離東。後天震東。故曰皆至。離明故可折獄。震威故宜致刑。

初九。遇其配主。雖旬无咎。往有尙。

陰陽相配。配主謂二。二五爲卦主。故五曰夷主。配鄭作妃。義同也。離爲日。日之數十。十日爲旬。初居日之末。故曰旬。至旬則癸日也。後漢鄧禹傳。明日癸亥。匡等以六甲窮日。不出。是至旬當有咎。自古相傳如是也。雖旬无咎者。以初遇陰也。二陰。故往有尙。

象曰。雖旬无咎。過旬災也。

旬者盈數。過旬災。仍月盈則食之意也。

六二。豐其蔀。日中見斗。往得疑疾。有孚發若。吉。

二至五互大坎。坎爲隱伏。故中四爻象皆闔昧。蔀。虞翻云。日蔽雲中稱蔀。虞未申其義。然坎雲在離日之上。正日蔽雲中也。離爲星。故曰斗。又震亦爲斗。斗七星也。言離日有障蔽。日隱而星見也。

二巽體。巽爲疑爲疾。巽初六象曰。進退志疑是也。五不應。故往得疑疾。然二承重陽。孚于三四。發若者。言其順利也。陰孚陽故吉。離星巽疑象詳焦氏易詁。

象曰。有孚發若。信以發志也。

有孚故信。巽爲志。信以發志者。言陰孚于陽。得行其志也。

九三。豐其沛。日中見沬。折其右肱。无咎。

沛大雨貌。孟子沛然下雨。易林泰之豐云。龍蛇所聚。大水來處。滂滂沛沛。使我无賴。九家云。大暗謂之沛。沬。子夏傳星之小者。日中見沬者。言當日中而昏暗見小星也。三兌體。兌爲雨。故曰沛。兌爲晦。故曰見沬。艮爲肱。三應在上。上艮覆。故折其右肱。兌爲右爲折也。然三當位有應。故无咎。

象曰。豐其沛。不可大事也。折其右肱。終不可用也。

三遇敵。不利往。所應爲陰。陰小故不可大事。三雖有應而折肱。故終不可用。虞氏以二至五大過死解。似非。

九四。豐其蔀。日中見斗。遇其夷主。吉。

易林升之臨云。据斗運樞。以震爲斗。茲震在日上。以爲障蔽。故仍曰豐其蔀。日中見斗。主謂五。五柔爻。故曰夷主。詩周頌有夷之行。毛傳。夷易也。陽遇陰則通。故曰易。曰吉。

象曰。豐其蔀。位不當也。日中見斗。幽不明也。遇其夷主。吉行也。

兌爲昧。故幽不明。陽遇陰故志行。郭京舉正行上脫志字。宜從。

六五。來章。有慶譽。吉。

呼九四來五。當位居中。彖所謂日中也。故曰章。五得位。故有慶譽吉。或謂四往五不能曰來。豈知

六五呼四。當然曰來。況睽上九云。往遇雨則吉。是上來內。易有時亦言往也。需上曰有不速之客三人來。是三往上亦曰來也。蹇五大蹇朋來。是陽往五亦曰來也。此曰來章。又何疑乎。

象曰。六五之吉。有慶也。

慶謂陽升五得位。

上六。豐其屋。蔀其家。闔其戶。闔其無人。三歲不覿。凶。

屋家戶。後儒不知其象。穿鑿百出。愈說愈晦。此覆象失傳之故也。按虞注云。從外闔三。又九家說重門擊柝云。豫下艮。從外示之。上震復爲艮。豐上六從外示內。亦艮也。艮爲屋爲家爲戶。中爻大坎。故障蔽其家。艮爲觀。下視。故曰闔其戶。震爲人。上應在三。三巽伏。故闔寂無人。闔虞云空也。鄭云無人兒。震爲歲。數三。故曰三歲不覿而凶也。闔孟喜作室。室古與空通用。列子黃帝篇。玉人潛行不空。莊子達生篇引作室。然則孟虞之詁同也。

象曰。豐其屋。天際祥也。闔其戶。闔其無人。自藏也。

五天位。上在五外。故曰天際。說文祥福也善也。徐鉉曰。凡吉凶之先見其兆者。皆曰祥。故孟喜曰。天際祥。天降下惡祥也。自藏謂三。三宜應上。而巽爲伏。故曰自藏。釋无人之故也。祥從鄭本。正義作翔。翔祥音同通用。

此卦舊解。因易理失傳。不知二五爲卦主。於是遇其配主。遇其夷主。皆以震爲主。杈枒不合。因卦

象失傳。於是爻變卦變。雜然並用。以求其象。學者祇涵泳白文。或尙能明其一二。若卽舊解求之。則愈茫昧疑惑。眞可慨也。

三三三

旅。小亨。旅貞吉。

旅之卦義。先儒皆以行旅爲說。然卦名皆由卦象生。火山何以爲旅。侯果孔疏皆以火在山上。勢難久留。故爲旅。如所詁火在山上。不久卽滅耳。安見其爲行旅。按易林剝之旅云。居正不安。大盜爲咎。大畜之旅云。安其室廬。傳母何憂。是皆以居家爲說。於行旅之義正相反。履之旅云。鳥子鵲雛。常與母俱。願慕羣旅。不離其巢。又晉之旅云。逐旅失羣。是以旅爲伴旅。卦二陰。隨二陽。一陰隨一陽。陽前陰後。有若伴侶。疑焦氏所詁者。於卦象爲切。又釋詁旅衆也。卦離火。艮亦爲火。火多故衆。伴旅亦衆也。九三象云。以旅與下。以衆與下也。若作行旅。此句難通矣。又初爻旅瑣瑣。斯其所。斯離也。行旅往來。有不離其所者哉。於行旅之義尤不合。故疑焦義是也。六五得尊位。故小亨。貞吉。象曰。旅。小亨。柔得中乎外而順乎剛。止而麗乎明。是以小亨。旅貞吉也。旅之時義大矣哉。

六五上下皆陽。故曰順乎剛。離六五云。離王公。卽順乎剛也。旅五月卦。當中夏。故曰時。

象曰。山上有火。旅。君子以明慎用刑。而不留獄。

大象以相反見義。此亦其一也。離爲明。君子不敢恃其明。故用刑必慎。艮爲慎。兌爲刑也。艮爲止。

君子不敢怠於事。故不留獄。艮爲拘繫爲獄也。

初六。旅瑣瑣。斯其所。取災。

瑣瑣。陸績鄭玄皆訓爲小。馬云疲弊貌。按爾雅釋詁。瑣瑣小也。注舍人曰瑣瑣。計謀偏淺之貌。詩節南山。瑣瑣姻婭。蓋往來猥瑣。勞弊不安也。斯釋言離也。斯其所言離其所欲應四也。二得敵。故取災。離爲災。蓋初六不當位。而得敵。在下。宜靜不宜動。故易林復之旅云。二人輦車。徙去其家。井沸釜鳴。不可以居。徙去其家。卽離其所。井沸釜鳴。卽取災也。義詳焦氏易詁。

象曰。旅瑣瑣。志窮災也。

初不當位。二得敵。不能應四。故曰志窮。

六二。旅卽次。懷其資。得僮僕。貞。舉正作貞吉。宜從。

艮爲舍。次舍也。卽次。言就舍也。資財也。巽爲利居中。故懷其資。二得位承陽。故得僮僕。貞下宜依舉正增吉字。貞吉與下貞厲爲對文。

象曰。得僮僕貞。終无尤也。

卽次身安。懷資用足。得僮僕役使有人。故終无尤。艮爲終。

九三。旅焚其次。喪其僮僕。貞厲。

艮爲火。故焚其次。巽爲隕落。故喪其僮僕。貞。卜問也。虞翻以離火焚其次。並謂三動艮壞爲焚。夫

離火在外。上又不應三。焉能下焚。易林蹇之噬嗑云。火起上門。不爲我殘。噬嗑火在艮門上。故不焚下。旅火亦在上。其不能下焚同也。三當位。強命其變。以之不正尤非。艮火象詳焦氏易詁。象曰。旅焚其次。亦以傷矣。以旅與下。其義喪也。

兌毀折。故曰傷。以衆與下。威權下移。宜其喪失。下謂初二。言三於初二相得。以勢衆付之也。

九四。旅于處。得其資斧。我心不快。

資斧從王弼各家多作齊斧。資齊音同通用。按周書謚法解。資輔供就曰齊。言佐身之具。供張整齊也。而春秋元命苞云。斧之言輔也。是斧輔音義皆同。故資斧卽資輔。獨陽不生。孤陰不成。故陰陽互相資助。四遇陰故曰得其資斧。而兌爲斧。亦爲輔。張軌云。資斧蓋黃鉞斧。直以爲兵器。非也。毛奇齡云。處居也。旅于處得其資斧者。言於所居之處。而得此資輔也。然而不快者。以尙未升五得位。又四爲三所阻。不能應初。亦不快之一因也。巽爲志。故爲心。巽初象云。志疑也。卽以巽爲志。雜卦云。巽伏也。心志伏在內。故巽象之。舊解命四變成坎取心象。非。

象曰。旅于處。未得位也。得其資斧。心未快也。

凡九四比六五。例終升五。歸妹九四曰。有待而行。待升五也。豐九四曰。遇其夷主。吉行也。六五曰。來章。亦言四來五也。茲曰未得位。因未得五位。故處以俟也。下六五曰。終以譽命。卽謂四終升五也。六五。射雉。一矢亡。終以譽命。

離爲雉。兌毀折。故射雉。射必以矢。坎爲矢。乃坎伏不見。故一矢亡。坎數一也。譽令聞也。艮爲譽。命。爵命也。巽爲命。終以譽命者。言巽命在二。雖不應五。然四必得位升五。四升五。二應之。是譽命終及於五也。

象曰。終以譽命。上逮也。

逮及也。上逮謂二終上應五也。

上九。鳥焚其巢。旅人先笑後號咷。喪牛于易。凶。

離爲鳥。中虛故爲巢。巽風扇火於下故焚巢。上履陰。兌悅故先笑。三巽體。巽爲號。三不應上。故後號咷。左傳昭五年。純離爲牛。兌毀折。故喪牛。艮爲田爲易。易田畔也。牛在艮外。故喪牛於田畔。焚巢喪牛故凶。晁說之云。易古文場字。詩小雅疆場有瓜是也。

象曰。以旅在上。其義焚也。喪牛于易。終莫之聞也。

旅衆也。在上者衆。不自歛抑。則高亢爲禍。左傳隱四年。兵猶火也。不戢將自焚。是其義也。坎爲耳。坎伏故莫之聞。虞翻用爻變取震象。謂震爲筐故爲巢。後儒多從之。按易林離之需云。高木腐巢。需坎爲木。在上故曰高木。互離爲巢。在澤水中。故曰腐巢。訟之解云。南徙无廬。鳥破其巢。解上震。震爲南爲徙。下坎爲室。震在坎外。故曰南徙无廬。互離爲鳥。爲巢。而坎爲破。故曰鳥破其巢。以離爲巢。庶得眞解。

周易尚氏學卷十六 下經

三三

巽。小亨。利有攸往。利見大人。

初四皆承陽。故曰巽。巽順也。順陽故小亨。往遇陽故利。陽居二五得中。故利見大人。

彖曰。重巽以申命。剛巽乎中正而志行。柔皆順乎剛。是以小亨。利有攸往。利見大人。

巽爲命令。虞書申命義叔。傳申重也。重巽以申命者。謂王者一再宣布命令。以示鄭重也。巽爲風。行莫疾于風。命令一出。傳達天下。有若于風。故巽爲命也。二五中正。下陰順承。故志行。

象曰。隨風。巽。君子以申命行事。

重巽故曰隨風。隨繼也。從也。言後風之隨前風也。令出惟行。萬事以治。故君子以之。

初六。進退。利武人之貞。

初臨重陽得主。故宜於進。而四無應與。故進而又退。象釋曰志疑。疑四無應也。震爲武人。此巽卦也。何以利武人之占。因震巽相反復。巽究則爲震。易貴將來。故武人利也。

象曰。進退。志疑也。利武人之貞。志治也。

巽不果。故志疑。返震故志治。言得行其志以治天下。

九二。巽在牀下。用史巫紛若。吉。无咎。

巽爲牀。初順二。故曰巽在牀下。初至四正覆兌。兌口多。故曰用史巫紛若。按周禮內史云。凡命諸侯孤卿大夫。則策命之。凡四方之事書。內史讀之。儀禮云。辭多則史。又司巫云。男巫女巫。凡邦之大裁。則歌哭而請。是史巫皆以口舌爲用。而二居正反兌之間。故曰紛若。紛若言不一也。二得中故吉无咎。此義先儒无知者。祇茹敦和云。巽初之陰。伏于牀下。隱也。于是乎用史巫以祛之。史巫云者互兌也。象始大明。而茹氏仍不知初至三爲覆兌。故紛若不得解。

象曰。紛若之吉。得中也。

二无應。失位。遇敵。然下孚于陰得中故吉。

九三。頻巽。吝。

王弼云。頻。頻蹙不樂。按玉篇輦下云。易本作頻。是頻卽古文輦字。三居巽上。雖當位而下撓。故頻蹙不安而吝也。

象曰。頻巽之吝。志窮也。

巽爲心志。上无應。下乘陽。故曰志窮。

六四。悔亡。田獲三品。

當位承陽。故悔亡。伏震爲田獵。兌羊離牛巽豕。故田獲三品。離卦數三也。凡陰遇重陽多吉。

象曰。田獲三品。有功也。

有所獲。故有功。

九五。貞吉。悔亡。无不利。无初有終。先庚三日。後庚三日。吉。

九五得位。下孚於陰。故貞吉悔亡。巽爲利。故无不利。震巽相反復。无初者。言巽之初爲震。震納庚。一爻當一日。故曰先庚三日。今震究爲巽。故无初。有終者。言巽之究仍爲震。終卽後也。故曰後庚三日。以其終爲震。故曰有終。震陽復故吉。先庚三日。言巽之先。後庚三日。言巽之究。與蠱之先甲三日。後甲三日義同。无初有終。與蠱之終則有始義亦同。

象曰。九五之吉。位正中也。

九五既中且正。故吉。

上九。巽在牀下。喪其資斧。貞凶。

巽順也。謂四。巽在牀下。言順我者在下。上九失其輔助。故曰喪其資斧。斧輔通用。兌爲斧亦爲輔。上卦兌覆。故曰喪失也。說詳旅卦。

象曰。巽在牀下。上窮也。喪其資斧。正乎凶也。

九窮於上而下撓。故貞凶。象仍釋貞爲正。其義不協。

三三三

兌。亨利貞。

兌悅也。兌何以悅。以一陰見于二陽之上。陽得陰而悅也。剛中柔外。與泰義合。故亨。陰陽相遇。故利貞。

彖曰。兌。說也。剛中而柔外。說以利貞。是以順乎天而應乎人。說以先民。民忘其勞。說以犯難。民忘其死。說之大。民勸矣哉。

陰陽相遇故悅。悅故利貞。所謂保合太和。各正性命也。五天位。上順之。故曰順乎天。互巽爲順也。三人位。巽于二。故曰應乎人。互巽爲應也。三至上大坎。坎爲民。爲勞。爲險難。爲棺槨。故爲死。而三至上正反兌。坎民來往。皆在兌說之中。故役之而忘勞。犯難而不知死也。兌見在上。故曰先民。先民說。先使民悅也。故民勸。

象曰。麗澤兌。君子以朋友講習。

玉篇麗偶也。周禮夏官校人。麗馬一圉。注麗耦也。又士冠禮。主人酬賓。束帛。儷皮。注儷皮兩鹿皮。古文儷作離。離傳云。離麗也。是麗與儷通仍耦也。重兌故曰麗澤。猶重巽曰隨風。其以互離爲義者。非也。陰陽相遇相悅爲朋友。兌口故曰講習。初至五正反兌相對。正朋友互相講習之象。故君子法之。虞翻謂兌二陽同類爲朋。夫陽遇陽。陰遇陰。則爲害爲敵。艮與中孚皆言之。豈得爲朋友。

又云伏艮爲友。蓋取義于損六三。一人行則得其友。豈知艮之爲友。以一陽上行。遇二陰爲友。與兌之以一陰下降。遇二陽爲朋友同。皆取義于陰陽相遇。朋友之誥既誤。于是卦无艮兌而言朋者。必百計變動以求兌象。甚至用參同契納甲之法。謂八日兌象月見丁。以解坤象之得朋。凡易之言朋者。无不誤矣。

初九。和兌吉。

與二並行。故曰和。當位故吉。初與二本爲敵。卦以兌說爲義。和以處之。自然吉矣。

象曰。和兌之吉。行未疑也。

初得敵。故疑於二。和以處之。故行不疑。損三云。三則疑也。易於陽遇陽相疑相忌之故。言之至爲明白矣。乃竟失傳何哉。

九二。孚兌吉。悔亡。

孚於三。陽遇陰故吉。得中。故悔亡。

象曰。孚兌之吉。信志也。

陽遇陰故志得伸。巽爲志。三巽主爻。二遇之。故信志。

六三。來兌凶。

在內稱來。來就二陽以爲悅。行爲不正則有之。無所謂凶。但三本多凶。又不當位。來而不正遂不宜。

矣。

象曰。來兌之凶。位不當也。

來而不當位。故凶。

九四。商兌未寧。介疾有喜。

四不當位。無應。前又遇陽。似不吉。然而有喜者。以下履陰也。小畜九五曰有孚。履九四曰志行。皆以下遇陰而吉。此與之同。商量度也。商兌者以初至五正反兌相對。而四若與下對語者。故曰商兌。講習之象。亦以此也。三至五巽。進退不果。故未寧。互大坎爲疾。乃四獨履陰。志行。是疾去也。介助也。詩以介眉壽是也。介疾有喜者。言助疾使愈。兌悅故有喜也。

象曰。九四之喜。有慶也。

九四獨履陰。履陰故有喜。故曰有慶。

九五。孚于剝。有厲。

陽遇陰則通。故二五皆孚於三上。然吉凶不同者。兌爲秋。六三當正秋。萬物成熟。故二孚之而吉。若上六則爲季秋。其辰在戌。其卦爲剝。雜卦云。剝爛也。當此時萬物荒落。陽氣爲陰所剝將盡矣。九五若再孚於是。必爲所剝無疑也。故曰有厲。

象曰。孚于剝。位正當也。

以人事言。上六處悅之極。是小人佞倖之尤。九五當人君之位。而昵近此等小人。其爲禍有不可勝言者。象曰位正當。言正當人君之位。不可與上六近也。

上六。引兌。

引。開弓視的也。伏艮爲手。故引兌。言上六來就五陽以爲悅。猶射者之志于的也。

象曰。上六引兌。未光也。

兌闕昧。故未光。

三三

渙。亨。王假有廟。利涉大川。利貞。

舊解皆以風行水上。渙散爲說。然如渙王居。渙其躬等爻辭。散義皆不通。按太玄擬渙爲文。司馬光云。揚子蓋讀渙爲煥。案渙卽有文義。淮南子說山訓。夫玉潤澤而有光。渙乎其有似也。注文采似君子也。後漢書延篤傳。渙爛其溢目。注渙爛文章貌。是渙本有文義。故歸藏作奐。禮檀弓。美哉奐焉。釋文奐本亦作煥。是揚子之讀。與古訓合。卦坎爲赤。震爲玄黃。巽爲白。而風行水上。文理爛然。故爲文也。爲文則於爻辭無扞格矣。震爲王。艮爲廟。假至也。言王有事於宗廟。震爲舟。在水上。故利涉。皆中爻象。

彖曰。渙亨。剛來而不窮。柔得位乎外而上同。王假有廟。王乃在中也。利涉大川。乘木有

功也。

剛來居二。臨一陰則陷。二陰則通。故曰不窮。四當位。上承一陽固吉。承二陽尤吉。上同者與小畜六四。升初六之上合志同也。言孚於五上也。震爲舟。古剡木爲舟。五乘之。故曰乘木。乘木卽乘舟。象曰。風行水上。渙。先王以享於帝立廟。

享帝則禮儀繁盛。立廟則楹桷巍煥。皆屬於文。正釋卦義也。

初六。用拯馬壯吉。

震爲馬。初承之。故曰拯馬。鄭云拯承也。拯馬卽承陽。震健故壯吉。此與明夷六二象同。故辭同。故象傳皆以順釋之。拯順也。

象曰。初六之吉。順也。

言陰順陽。以順釋拯義也。

九二。渙奔其机。悔亡。

焦循云。漢百官公卿表。虎賁郎注。賁讀與奔同。據是奔賁古通。奔其机卽賁其机。按机卽几筵之几。廟中所用物。賁文飾也。艮爲几。震爲玄黃。故賁其机。得中。遇陰。故悔亡。

象曰。渙奔其机。得願也。

陽遇重陰志行。故曰得願。舊解无有知其故者。

六三。渙其躬。无悔。

艮爲躬。渙其躬。卽行有文也。得陽應。故渙其躬无悔。

象曰。渙其躬。志在外也。

巽爲志。應在上。故志在外。

六四。渙其羣。元吉。渙有丘。匪夷所思。

坎爲衆爲羣。四體艮。艮爲光明。在坎上。故渙其羣。承陽故元吉。丘陵所以設險。今去坎險而復遇山險。故曰匪夷所思。夷平也。常也。言爲恆常所不料也。

象曰。渙其羣元吉。光大也。

遇陽故光大。按象曰光大。亦釋渙爲文。

九五。渙汗其大號。渙王居。无咎。

吳先生曰。渙汗連綿字。愚按上林賦。采色滢汗。注玉石符采映耀也。渙汗蓋與滢汗同。與渙爛亦同。巽爲號令。渙汗其大號。卽頒布光顯其號令。如風之无不屆也。艮爲居。五君位。故曰王居。渙王居。言王居巍煥也。五履萬民之上。故光大如此也。得中故无咎。

象曰。王居无咎。正位也。

五位中正。故曰正位。五无應。然无咎者。以得中也。

上九。渙其血去逖出。无咎。

血古文恤字。逖與惕音同通用。小畜六四。血去惕出。與此同也。詰逖爲遠者非。應在三。坎爲憂惕。王國維云。古易狄同字。山海大荒東經并竹書皆云王亥託於有易。而楚辭天問作有狄。又簡狄古今表作簡媯。按漢書王商傳。卒無怵愁憂。師古云。愁古惕字。故虞翻注云。逖憂也。與小畜六四詰惕爲憂同。是虞卽以逖惕同字。上九應在三。三坎爲憂惕。而上九高出卦上。去坎險既遠。又不爲互艮所止。與大畜上九義同。渙其光明貌。渙其恤去惕出。言光明在上。憂患自免也。句法與論語渙乎其有文章同。

象曰。渙其血。遠害也。

坎爲害。上去三遠。故曰遠害。

三三三

節。亨。苦節不可貞。

坎居西方。兌又居西。合爲一處。故曰節。節信也。古剖竹爲符。合以取信。故說文云。節竹約也。序卦云。物不可以終離。故受之以節。節之用在合。故與離對文。又曰節而信之。是序卦卽以節爲符信也。凡卦名皆從卦象生。震爲竹。而二至五正反震。兩竹相合。則信成矣。而坎爲信也。苦節向无通詰。虞翻命三變成離。火炎上作苦。以說苦節。而後儒多從之。誠以詰苦爲甚爲過。皆不安也。按周

禮考工記。辨其苦良。史紀五帝紀。舜陶于河濱。器皆不苦窳。皆以苦爲惡。節所以取信。苦窳則難以持久。不能符合。故曰苦節不可貞。自先天象失傳。節字失詁。於是苦節之義。遂亦失矣。又坎爲破。兌毀折。按卦象節易苦窳。戒之所以慎始也。

彖曰。節亨。剛柔分而剛得中。苦節不可貞。其道窮也。說以行險。當位以節。中正以通。天地節而四時成。節以制度。不傷財。不害民。

艮爲道。艮止故道窮。荀子性惡篇。故善言古者必有節於今。節信也。四時往來。不差忒。故曰天地節而四時成。艮爲時爲成。震卦數四。故曰四時成。度丈尺也。度有制則民有信。信則不傷財。不害民。

象曰。澤上有水。節。君子以制數度。議德行。

數度皆所以取信於民。數紀於一。協於十。長於百。大於千。衍於萬。有數而度量衡以起。度十分爲寸。十寸爲尺。十尺爲丈。而度之生由於律。律竹管也。累黍黍九十爲九寸。以爲黃鐘之長。用以度量長短。虞書云。同律度量衡。誠以日久度量衡或差。同之以律。則不失毫釐。律者節也。人之德行。亦有定節。以取信於世。與數度同。故君子取以爲法焉。

初九。不出戶庭。无咎。

初應在四。艮爲戶庭。而二陽爲阻。故不宜出。不出則无咎。象曰知通塞。言二阻塞也。

象曰。不出戶庭。知通塞也。

初應在坎。坎爲通。二遇敵。不能應四。故曰塞。知其塞不出戶庭。以求通。故曰知通塞。吳先生曰。易以陽在前爲塞。陰在前爲通。初之不出。以九二在前。故曰知通塞。二則可出而不出。故有失時之凶也。

九二。不出門庭。凶。

互艮爲門庭。二比重陰。陽遇陰則通。通則利往。乃竟不出。是失時也。故凶。

象曰。不出門庭。凶。失時極也。

艮爲時。極中也。說文極棟也。棟居屋脊。當屋之中。故極爲中。失時極。卽失時之中也。

六三。不節若。則嗟若。无咎。

三失位不應。故曰不節。震爲笑。震反爲艮則嗟矣。離九三云。不鼓缶而歌。則大耋之嗟。與此象義並同也。王弼云。若辭也。語助辭也。順二故无咎。

象曰。不節之嗟。又誰咎也。

言其咎在己。

六四。安節亨。

得位有應。上承九五。艮止爲安。故安節亨。

象曰。安節之亨。承上道也。

言能承上不失其道。

九五。甘節吉。往有尙。

說文。甘美也。美甘也。而坎爲美脊。故坎有美象。甘節卽美節也。節而美善。方可用以取信。與下苦節爲對文。五當位居中。下乘重陰。正位居體。故甘節吉。爻在外爲往。往得尊位。居之不疑。故曰往有尙。虞氏強命二變應五。以釋往字。豈知爻在外卽曰往。泰否之大小往來可證也。

象曰。甘節之吉。居位中也。

艮爲居。五中位。

上六。苦節貞凶。悔亡。

甘爲美則苦爲惡。坎爲破。故曰苦節。節爲信約。竄惡則不能符合。故貞凶。得位故无悔。

象曰。苦節貞凶。其道窮也。

在上无應故窮。

周易尚氏學卷十七 下經

三三

中孚。豚魚吉。利涉大川。利貞。

上卦節。節信也。節何以爲信。以中爻兩震竹相合。中孚初至五象與節同。仍兩竹相合。而在中四爻。故曰中孚。孚信也。歸藏曰大明。大明者離日晉順而麗乎大明是也。是以小過爲坎。大明爲離。取義與周易微異也。巽爲豚爲魚。魚象人知之。豚卽失傳。豈知姤初云。羸豕孚蹢躅。卽以巽爲豕。易林大有之姤。牝豕无。豶旅之遯彭生爲豕。皆以巽爲豕。蓋坎爲豕以其隱伏。巽爲伏。故亦爲豕。而中孚正覆巽。豚魚合居於中。故吉。坤爲大川。震爲舟爲虛爲木。五履重陰。乘震舟之上。故曰利涉大川。傳釋曰乘木舟虛。按渙傳云。乘木有功。乘木卽乘舟。又益傳云。木道乃行。木亦謂舟。據王應麟所輯鄭注云。舟謂集板如今船。原作自。阮校詩谷風正義云。自當爲船。空大木爲之曰虛。卽古又名曰虛。總名皆曰舟。據鄭注木舟虛三者。平列爲義。皆船也。利貞。傳釋爲應乎天。五天位。三四皆陰爻。陽得陰則通。陰順陽故曰應乎天。

彖曰。中孚。柔在內而剛得中。說而巽。孚乃化邦也。豚魚吉。信及豚魚也。利涉大川。乘木

舟虛也。中孚以利貞。乃應乎天也。

中爻艮爲邦。艮邦震舟震虛象皆失傳。詳焦氏易詁。

象曰。澤上有風。中孚。君子以議獄緩死。

玉篇獄謂之牢。又謂圖土。中爻艮止爲獄。兩艮相合。則圖獄也。震爲言故議獄。兌爲毀折。故曰死。議獄緩死。欲孚及罪人而向善也。

初九。虞吉。有它不燕。

儀禮士虞禮注。釋虞爲安。初陽遇陽不宜動。與節初同。節初九不出戶庭无咎。卽謂安吉也。它謂四。四巽爲隕落。有它謂不安於初。不顧二阻。而它往應四。則不燕也。燕與宴通。亦安也。兌爲燕。四巽兌覆。故曰不燕。易林小畜之兌隨之萃。皆曰燕雀銜茅。則皆以兌爲燕。除易林外。他无用者。故易林爲易象藪。

象曰。初九虞吉。志未變也。

巽爲志。志未變。言安於初而不應四。

九二。鳴鶴在陰。其子和之。我有好爵。吾與爾靡之。

震爲鶴。爲鳴。爲子。陰山陰。二至五正反震。下震鶴。鳴于山陰。三至五震反。如聲回答。若相和然。故曰其子和之。其子謂覆震。非互震。判然二物也。易林大有之屯云。嚶嚶所言。嚶嚶對語也。屯初

至五亦正覆震相對。與中孚同。又同人之中孚云。衣裳顛倒。震爲衣。三至五震覆。故曰顛倒。渙之中孚云。聞言不信。震言。三至五震覆。故不信。不信取其相反。子和取其相對。仍同也。而二至五亦正反艮。艮納丙爲山陽。下二至四艮覆。則山陰矣。而二正當其處。故曰鳴鶴在陰。易林頤之中孚云。熊羆豺狼。在山陰陽。正覆艮故旣曰熊羆。又曰豺狼。上艮爲山陽。下覆艮爲山陰也。故曰在山陰陽。易林釋此語。可謂明白矣。山陰之義。知者甚鮮。後獨茹敦和以陰爲山陰。而取義於兌。兌者艮之反。艮山陽。兌山陰。義不本易林。而取義與易林同。故夫有清一代之易家。主張自己。不隨聲附和者。莫茹氏若也。爵。說文飲器。酒尊也。震爲尊爲爵爲嘉。故曰好爵。正覆震相對。故曰吾與爾靡之。孟喜云。靡共也。貞我悔彼。爾謂五。言二五共此爵也。

象曰。其子和之。中心願也。

巽爲心志。鳴和全在中四爻。故曰中心願。

六三。得敵。或鼓或罷。或泣或歌。

子夏傳三與四爲敵。故曰得敵。荀爽曰。三四俱陰。故稱敵也。中四爻艮震相反覆。震爲鼓。艮止故罷。罷疲通音婆。下與歌叶。諸家或作罷音非也。震爲歌。震反則泣矣。與艮爲山陽。艮反爲山陰義同也。蓋三不當位而遇敵。故不常如此也。得敵與頤二之失類。艮之敵應。爲易義之根本。所關甚大。乃得敵韓子夏與荀知之。失類則无知者。致陰遇陰陽遇陽之處皆失解。可喟也。

象曰。或鼓或罷。位不當也。

義見前。

六四。月既望。馬匹亡。无咎。

兌爲月。十五日日月望。乾象月盈甲。十六日平明。巽象月退辛。六四巽主。故曰既望。既王弼作幾。孟荀皆作既。孟云十六日也。作既於巽象方切。震爲馬。四匹在初。馬匹亡。言不應初而承上也。承陽故无咎。

象曰。馬匹亡。絕類上也。

陰陽相遇方爲類。舊解皆以陰遇陰爲類。故全易類字皆失詁。絕者決也。言四遇三敵。不能應初。類上卽承上也。

九五。有孚攣如。无咎。

五下乘重陰。得類。故曰有孚。言孚于二陰也。攣係也。戀也。前書李夫人傳。攣攣顧念我。有孚攣如者。言係攣三四也。五得位。故无咎。

象曰。有孚攣如。位正當也。

五既中且正。

上九。翰音登于天。貞凶。

曲禮曰。雞曰翰音。巽爲雞。爲高。居巽上又居卦之極上。故曰翰音登于天。上應在三。三震爲翰爲音也。巽下隕。故貞凶。王注翰高飛也。飛音者。音飛而實不至之謂也。居卦之上。華美外揚。虛聲無實。故不可久長。

象曰。翰音登于天。何可長也。

窮上失位。下虛。故不長。翰音取象皆在應。非祇巽雞。易无一字不由象生。觀此益信矣。震翰象失傳。詳焦氏易詁。

三三三

小過。亨利貞。可小事。不可大事。飛鳥遺之音。不宜上。宜下。大吉。

過之爲義。彖傳卽不明釋。故訖无定解。後儒于是有以經過爲說者。端木國瑚謂兌巽過乾之左右。故曰大過。艮震過坤之左右。故曰小過。有以過越爲說者。朱震謂大過陽過陰。大者過越也。小過四陰二陽。小者過越也。前一說祇見于端木氏。後一說則易家多從之。然尚有五陽五陰之卦。何以不言過。且漢人以大過爲死卦。陽過盛而反死。又何說乎。如謂四陽爲上下二陰所束縛故死。則小過四陰包二陽。胡以不謂之死乎。又四陽在中爲大過。四陰在中何以不謂爲小過。而必以四陰在外者爲小過乎。是皆可疑。而先儒无言者。按太玄擬大過爲失。云陰大作賊。陽不能得。言陽爲陰賊。而失其用也。擬小過爲羨爲差。云陽氣贊幽。推包羨爽。未得正行。言震陽本可直出。乃爲上下四陰所

包。推排曲抑。仍有羨爽。羨邪曲。爽差也。蓋大過按卦氣時當小雪。窮陰極寒。故陽氣極衰。小過時當立春。陽氣闢東。本可无阻。乃爲陰氣所包。仍不免小有回曲。大小過純以卦義言。不以陰陽多少言也。卦二五陰得中。二陰承重陽故亨。陰牝陽故利貞。陰得中故可小事。陽失位而不中。故不可大事。左傳昭五年。筮遇明夷之謙曰。日之謙當鳥。日之謙卽離變艮。變艮而曰當鳥。是以艮爲鳥。易林本之。以艮爲黔喙爲鳥。詳焦氏易詁小過下艮故曰鳥。上震故曰飛鳥。而震爲覆艮。是上下皆鳥。故傳曰有飛鳥之象焉。宋衷謂二陽在內。上下各二陰。有似飛鳥舒翮之象。虞翻則用卦變。云小過從晉來。晉上離爲鳥。惠士奇謂古飛非通用。小過卽非字象。故曰飛鳥。愈演愈奇。皆艮鳥象失傳之過也。遺送也。震爲晉。如敦和云。下艮爲反震。口向下若送晉於人者。故飛鳥遺之音。上謂五。五失位而乘陽。下謂二。二當位而承陽。故上不宜而下大吉也。

彖曰。小過。小者過而亨也。過以利貞。與時行也。柔得中。是以小事吉也。剛失位而不中。是以不可大事也。有飛鳥之象焉。飛鳥遺之音。不宜上宜下。大吉。上逆而下順也。

艮爲時。剛失位指四。不中指三。有飛鳥之象。謂上下卦皆艮也。非如宋衷之解。艮爲鳥。上艮覆故曰逆。下反是故順。又五乘剛故逆。二承陽故順。

象曰。山上有雷。小過。君子以行過乎恭。喪過乎哀。用過乎儉。

震爲行。恭或爲艮象。兌毀折故曰喪。震爲樂。震反爲艮。故爲哀。儉亦或爲艮止象。舊解皆用卦變。

无確詰。姑測其義如此。又三者皆過之微。卽詰小過之義也。

初六。飛鳥以凶。

艮爲鳥。四雖有應。二得敵。應予阻格。又失位。故凶。

象曰。飛鳥以凶。不可如何也。

言應四難。

六二。過其祖。遇其妣。不及其君。遇其臣。无咎。

艮爲祖。二承三。故過其祖。巽爲妣。二當巽初。故遇其妣。爾雅母曰妣。妣謂二。祖謂三。二應在五。五震爲君。乃五不應。故不及其君。艮爲臣。三艮主爻。二承之。故遇其臣。艮爲祖。巽爲母。震君艮。臣象皆失傳。故舊解无通者。義詳焦氏易詁。

象曰。不及其君。臣不可過也。

傳義未詳。舊說或昆侖。或浮泛。皆不安。

九三。弗過防之。從或戕之。凶。

四遇敵。故弗過。艮爲守爲堅。下有羣陰承之。利于防守。故曰防之。與漸九三。蒙上九利禦寇。義同也。三應在上。戕害也。從或戕之者。言三若應上。則四或害之也。艮爲刀劍。四艮反向下。故戕之。首曰防之。所以戒也。

象曰。從或戕之。凶何如也。

極言其凶。

九四。无咎。弗過遇之。往厲必戒。勿用永貞。

四臨重陰。利往。故无咎。四應在初。遇謂遇三也。三爲四敵。故戒以弗過。然而遇之。往厲者。謂往應初而厲也。往應初。則三戕之。故厲。厲則宜有所戒。勿用而貞定自守可也。无咎指上行。弗過指下行。昔賢皆泥於往外爲往。豈知需上云。三人來。是往外而曰來。睽上云。往遇雨。是來內而曰往。易固於往來不執定例也。

象曰。弗過遇之。位不當也。往厲必戒。終不可長也。

言之初仍勿用爲宜。終不可長。

六五。密雲不雨。自我西郊。公弋取彼在穴。

文言以坤爲雲。五上重陰。故曰密雲。兌爲雨。風火在下。故不雨。兌西震東。言此密雲起自西郊。而東行也。震爲公爲射。故曰公弋。弋者繫繩于矢以射鳥。乃不射鳥而以弋取彼在穴之艮狐。胡能得乎。蓋五應在二。二巽爲繩。艮爲矢。以繩繫矢。弋象也。而艮爲穴爲狐。艮手爲取。穴居之物。豈能弋取。言二不應五。有如此也。凡易取象。不於本爻必於應。應爻有應子。如明夷初爻應在四震。則曰飛。曰翼。曰攸往。曰主人有言。全取震象。而直言之。應爻无應子。亦往往取其象而明其不應。如

歸妹上六應在三兌。則曰女承筐。曰士刲羊。女與羊皆兌象。而三不應上。故又曰无實无血。及此爻皆是也。舊解不知此例。見象无著。則用卦變以當之。于是易義遂亡於講說矣。

象曰。密雲不雨。已上也。

已上與小畜之上往同義。

上六。弗遇過之。飛鳥離之。凶。是謂災眚。

弗遇言爲五所格。應三難也。乃竟過之。是无心相值。不虞之禍。蓋艮爲鳥。上卦艮覆。鳥首向下有墜象。而艮爲刀兵。正墜兵刃之上。離羅通。遭也。遭此意外之禍。故凶也。三巽體。巽爲疾病。故爲災眚。是謂災眚者。言禍非由己。致无妄之災。不可如何也。

象曰。弗遇過之。已亢也。

虞翻云。飛下稱亢。按說文。亢人頸。或從頁。是亢卽頤。古通爲一字。詩邶風頤之頤之。毛傳飛而上曰頤。飛而下曰頤。故前書揚雄傳解嘲。鄒衍以頤亢而取世資。頤卽作亢。師古云。頤亢上下不定也。亦訓亢爲下。上卦艮鳥覆有墜象。故曰亢。已亢者。言飛鳥離災而下也。李道平云。陽言亢。陰不言亢。故虞不從俗說。聞見錄云。唐張師爲贊皇尉。夢白鳥飛翔墮于雲際。召黃賀筮之。遇小過。曰。雷震山上。鳥墮雲間。聲迹兩銷。不可復見。委心順命可也。是亦以艮爲鳥。艮覆故曰鳥墮。互大坎故曰雲間。震爲聲迹。坎隱伏。故曰聲迹兩銷。不可復見。是亢之爲下。再見于唐人所釋。以艮覆爲

鳥墮。黃賀獨知也。

三三三

既濟。亨。小利貞。初吉終亂。

爾雅釋天。濟謂之霽。疏霽止也。說文同。歸藏作岑霽。霽卽霽字。上坎爲雨。下離爲日。雨過日出。故曰既濟。謙傳天道下濟。卽下止也。詩鄘風。不能旋濟。傳濟止也。莊子齊物論。厲風濟則萬竅爲虛。注濟止也。彖傳曰終止。雜卦曰既濟定。亦皆訓濟爲止。既者盡也。左傳桓三年。日有食之既是也。既濟者言六爻盡當位而止其所也。止其所而不遷。則道窮。故彖辭不許其終吉。釋文釋濟爲度。太玄釋爲成。惟彖傳曰終止。卽明釋既義。濟義。既者盡也。終也。終止卽既濟。後儒紛紜不已者。以忽略終止。卽說卦義也。

六爻皆當位有應。故亨。小利貞小字。俞樾云。衍文。卦辭祇曰亨利貞。故傳特以小者亨也釋之。如原有小字。則人人皆知。傳不如此釋矣。子夏傳虞翻皆以亨小斷句。似非。毛奇齡云。宜以既濟亨句小利貞句。小利貞與小利有攸往同。按毛說於句讀適矣。然傳曰剛柔正。是兼大小言也。今專以屬之小。於六爻當位之義不合。然則小字屬上下讀皆不安。徵之彖傳。其爲衍文無疑。俞氏之說。似爲可信。蓋易之爲道。以陽爲主。陰與陽絕不平等。故陰得陽應必吉。陽得陰應則不必吉。且有以爲凶者。如大過四爻。中孚初爻皆是。既濟二四承乘皆陽。又三陰皆有陽應。故小者亨。彖傳專以亨屬

小。亦謂大者不然。大何以不然。凡陽遇重陰必吉。一陰則否。既濟三五皆陷陰中。雖三陽皆得位有應。然所應者陰。固與柔爻異也。此傳之所以專以享屬之小也。既濟者終止。其在既濟之初。上下得所。民物咸宜。故初吉。然易之道以變通爲貴。无或休息。止而終于是。則易道窮矣。故終亂。

彖曰。既濟亨。小者亨也。利貞。剛柔正而位當也。初吉。柔得中也。終止則亂。其道窮也。

卦三陰三陽。二爲陰始得中。故曰初吉。上六則陰之終。故曰終止。則亂。坤爲亂也。五剛亦得中。不許其吉者。以陷于陰中。與柔得中異也。

象曰。水在火上。既濟。君子以思患而預防之。

治亂相循環。當治不可忘亂。坎爲患爲心。故曰思患。

初九。曳其輪。濡其尾。无咎。

初應在四。四坎爲曳。爲輪。爲濡。四居坎下。故曰曳。曰尾。所有象皆在應爻。舊解苦於本爻求。胡能合乎。曳濡當有咎。得正故无咎。

象曰。曳其輪。義无咎也。

得正有應。當然无咎。

六二。婦喪其茀。勿逐。七日得。

左傳昭五年。火水妃也。故離爲坎婦。茀車蔽也。詩碩人曰。翟茀以朝。疏婦人乘車不露見。車之前

後。障以翟羽。以自隱蔽。謂之萑。按周禮有巾車職。巾所以爲蔽。卽萑也。坎爲隱伏爲萑。乃坎在外。故喪其萑。蓋離爲光明。二承乘皆陽。無所隱蔽。如婦人之喪其萑也。盧兆鼈云。初曳輪。二喪萑。義實相因。其改字作紱作髻者。皆非也。震爲逐。半震故勿逐。七日得者。震爲復。數七。言至七日。自然來復。與震二同義也。

象曰。七日得。以中道也。

二得中故得。

九三。高宗伐鬼方。三年克之。小人勿用。

易林于既未濟。偶用半象。本之易也。三四形震。震爲帝爲主。故曰高宗。曰伐。坎爲三年。爲鬼方。高宗殷王武丁。鬼方西羌國名。范書西羌傳云。殷室中衰。諸侯叛。至高宗伐西戎鬼方。三年乃克。又曰周季歷伐西落鬼戎是也。坎爲艱爲勞。故三年乃克。小人謂上六。復上六云。反君道。比上六云。无首凶。師上六云。小人勿用。是上六反君道。无首。爲小人之尤。茲於三爻發之者。以三應在上六。故預戒也。

象曰。三年克之。億也。

坎爲勞。故曰億。億疲極也。

六四。繻有衣袽。終日戒。

此與解三用象同。繻說文糾采色。按繻說文帛也。三四震象。震爲衣。繻有言有帛衣也。四五巽象。巽爲帛。亦爲柶。柶敗絮也。繻有衣柶者。言雖有帛衣。衣敗絮以自晦。終日戒備也。離爲日。坎爲憂。故曰終日戒。蓋四居兩坎之間。坎爲盜。懼有所侵犯。故惡衣以自晦。柶說文引作絮。釋文云子夏作茹。茹柶絮音同故通用。又云京作絮。按絮卽絮之形訛字。太玄迎首云。裳有衣襦。裳者禮服。襦者短衣。乃有裳不用而衣襦。釋此句至爲明晰。又釋文繻子夏作襦。薛虞云。古文作繻。按繻繻古通。周禮羅氏注。鄭司農云。繻爲繻有衣絮之繻。弓人注。鄭司農云。智讀爲繻有衣絮之絮。是繻繻柶絮古通用。故各家讀不同。

象曰。終日戒。有所疑也。

坎爲疑。

九五。東鄰殺牛。不如西鄰之禴祭。實受其福。

離位東。故曰東鄰。坎位西。故曰西鄰。離爲牛。兌爲毀折爲斧。故曰東鄰之殺牛。坎爲飲食。故爲祭。禴薄祭也。坎爲薄。故曰西鄰之禴祭。乾爲福。殺牛而祭。當受福矣。然不如禴祭受福者。以坎當五。得中正之時也。此離東坎西之確證。鄭氏謂離日出東。故曰東鄰。坎月生西。故曰西鄰。而不知離卽在東。坎卽在西。則卦象失傳之故也。又漢人往往以紂與文王之事說此爻。非。

象曰。東鄰殺牛。不如西鄰之時也。實受其福。吉大來也。

受福故吉。

上六。濡其首。厲。

坎爲首。陰乘陽故濡其首。與比上六之无首義同。彖所謂終亂者此爻。

象曰。濡其首厲。何可久也。

荀爽曰。居上濡五。處高居盛。必當復危。故何可久。

三三

未濟。亨。小狐汔濟。濡其尾。无攸利。

濟止也。六爻皆當位。止其所而不動。故曰既濟。茲六爻皆不當位。不止。故曰未濟。終而止。則其道窮。終而不止。則其道不窮。故既未濟相續而循環。柔得五中故亨。艮爲小狐。卦有三艮形。故易林渙之未濟云。三虎上山。更相喧喚。是以未濟爲三艮。故曰三虎上山。茲曰小狐。是以艮爲狐。汔說文潤也。干寶云。小狐力弱。汔乃可濟。今水未涸。故濡其尾。艮爲尾也。濡尾故无攸利。按九家坎亦爲狐。茲曰小狐曰尾。艮爲小爲尾。故知取艮象。濟者濟坎水也。

彖曰。未濟亨。柔得中也。小狐汔濟。未出中也。濡其尾无攸利。不續終也。雖不當位。剛柔應也。

未出中。言二陷於坎中也。六爻皆不當位。无攸利。然剛柔相應。窮則宜變。變則通。故不續終。申不止之義也。

象曰。火在水上。未濟。君子以慎辨物居方。

乾陽物。坤陰物。陰陽各當位。是居方也。陰陽皆不當位。是聚而失其方也。辨而明之。慎其居而擇所處。則无咎矣。故君子以之。

初六。濡其尾。吝。

在下故曰尾。濡尾故吝。

象曰。濡其尾。亦不知極也。

極說文棟也。棟居屋中。故極者中也。濡尾故不知極。言初在下失中。

九二。曳其輪。貞吉。

坎爲輪爲曳。居中。故貞吉。

象曰。九二貞吉。中以行正也。

以位言。九二中而不正。茲曰行正。以正釋貞也。非謂位正。

六三。未濟征凶。利涉大川。

不當位。前遇險。故征凶。征凶則不能利涉。茲曰利涉大川。上下文義反背。朱子疑利上有不字。按象云位不當。則不利也。缺以俟知者。

象曰。未濟征凶。位不當也。

承乘皆險。動則必凶。柔居剛。故位不當。

九四。貞吉。悔亡。震用伐鬼方。三年有賞于大國。

坎爲鬼。易林觀之既濟云。班馬還師。是用半震。震爲馬爲反。既濟三半震。故曰班馬還師。茲易曰震用伐鬼方。亦以四五形震。爲易林之所本。震爲威武爲征伐。坎爲三年。故曰三年。有賞于大國者。言伐鬼方有功。以大國賞之也。蓋以五上半艮爲國也。貞吉卜問吉也。高士奇天祿識餘云。易震用伐鬼方。郭琛謂震乃摯伯名。程傳訓爲威武。則三年有賞于大國。何人也。以文理言。此說頗勝。而述之者少。

象曰。貞吉悔亡。志行也。

坎爲志。四承乘皆陰。故志行。

六五。貞吉。无悔。君子之光。有孚吉。

離爲光。五君位。故君子之光。下有應。故有孚吉。

象曰。君子之光。其暉吉也。

離爲大明。故其暉吉。暉。說文光也。

上九。有孚于飲酒。无咎。濡其首。有孚失是。

坎爲酒。爲飲食。上九下履重坎。故有孚于飲酒。有應故无咎。上應在三。三居重坎之中。故亦濡其首。六爻皆有應。故有孚。皆失位。故失是。然不續終之故。正以此也。

象曰。飲酒濡首。亦不知節也。

上艮爲節。節止也。過而不止。故不知節。

既未濟之卦形。卽異于常卦。故所取之象。往往爲本卦所无。如曰逐。曰高宗。曰伐。曰繻衣枷。曰殺。曰祭。曰福。曰大國。曰震。本卦皆无此象。于是虞氏用卦變以求其象。惛恍支離。莫可究詰。然經于九四曰震。且明以四五爲震矣。故知其他皆用半象也。易林本之。於觀之既濟云。班馬還師。震之既濟云。鬬鬬鬻鬻。兌之既濟云。積石爲山。旅之既濟云。逐鹿南山。恆之既濟云。三嫗治民。是皆於既濟取震馬震鹿巽嫗兌齒艮山象。又謙之未濟。千柱百梁。是以艮爲梁柱。未濟三艮形。故曰千柱百梁。又渙之未濟。三虎上山。亦以三艮爲三虎。又蹇之未濟云。一口三舌。亦以重兌爲三舌。凡易林取象。无不本於易。此用半象。必有所受之。而其詳不傳。由是證施孟梁丘三家易學。其取象皆尙有極繁瑣之口傳。徒以古人尙質。竹書艱難。其所爲易傳。皆疏其大義。而不詳其煩瑣。致使象數之細微。皆存之口授。不著竹帛。以傷其方雅。故漢時學易者必有師。非重師。重口授也。口授一絕。

後人雖欲知而莫由。幸焦氏易林未亡。吾人可按其辭。抽繹墜象。使易之晦辭。得以復明。易之誤解。俾以復正。不然且終古長夜矣。

上經終坎離。坎中爻震艮。離中爻巽兌。是舉坎離而六子具也。下經終既未濟。乾坤具備。而既濟一陽一陰。則震兌也。未濟一陰一陽。則艮巽也。是舉坎離而八卦備也。故以爲六十四卦之殿。其卦既无所不包。其象遂父母與六子俱備。故易與易林。于既未濟取象。獨不同歟。

周易尚氏學卷十八

繫辭上傳

繫辭噓吸經髓。挈舉元神。其難解蓋過于經。大抵深於易理者。望而知其所謂。易理不精者。愈讀注釋。愈不得要領。漢注皆以象。宋注皆以理。然辭有明指卦象者。離象而演空理則非矣。有泛言易理者。求解而必於卦象則執矣。茲擇其可解者略說之。其語意崑侖不易知者。則闕之。

天尊地卑。乾坤定矣。卑高以陳。貴賤位矣。動靜有常。剛柔斷矣。

首二句言聖人仰觀天。俯察地。因其尊卑而定乾坤二象。三四二句。言乾位南。坤位北。高卑不同。而貴賤以分也。動者乾之常。靜者坤之常。因其動靜之迹。而識其剛柔之性也。

方以類聚。物以羣分。吉凶生矣。

方。九家云。道也。所也。方以類聚。言萬物能聚於一方者。以各從其類也。陰陽遇方爲類。頤六二象曰行失類。言陰不遇陽也。坤傳曰西南得朋。乃與類行。中孚六四曰絕類上。言陰遇陽也。陰陽遇爲類。類則聚。聚則和合而吉矣。物者陰物陽物。純陽或純陰爲羣。乾曰見羣龍无首。以純陽爲羣。否

二象曰不亂羣。以純陰爲羣。純陽純陰則不交而陰陽分。分則類離。離則凶矣。九家注死生之說云。陰陽合則生。離則死。自類字失詁。舊解皆不知吉凶之故何在。可喟也。

在天成象。在地成形。變化見矣。

太玄玄攤云。日一南而萬物死。日一北而萬物生。斗一北而萬物虛。斗一南而萬物盈。按日月星斗天之象。象一轉移。則萬物隨以生死。而變化之形。應於地上。以上數者。皆易之原理也。

是故剛柔相摩。八卦相盪。

摩卽交也。乾坤初爻摩成震巽。中爻摩成坎離。上爻摩成艮兌。而六子以生。八卦全矣。八卦以一封盪八卦。而六十四卦備矣。盪猶推也。不曰重而曰盪者。言以一卦加於此卦。復加於彼卦。有類於推盪也。摩虞翻訓薄。薄卽交也。

鼓之以雷霆。潤之以風雨。日月運行。一寒一暑。

雷出自地。陽自下出上。故震爲雷。覆之則陽在上爲艮。靈自上下擊。故艮爲靈。自晉宋以來。有以靈爲電者。後焦循等從之。以靈爲陰象。豈知此四句。言六子之用。以靈爲離。則與下日象複。而六子不全。故靈爲電。于字書雖有本。而在此則非也。雷霆鳴而草木甲坼。故曰鼓。陰在下爲巽風。覆之則陰在上爲兌雨。自上下降者也。爲風則東風解凍。爲雨則草木華滋。故曰潤。日南至。月北至則寒。日北至。月南至則暑。坎月離日。對象也。震艮同體。兌巽同體。正覆象也。

乾道成男。坤道成女。乾知大始。坤作成物。

乾以初爻交坤成震。中爻交坤成坎。上爻交坤成艮。以生三男。故曰成男。坤以初爻交乾成巽。中爻交乾成離。上爻交乾成兌。以生三女。故曰成女。大始謂萬物資始。成物謂萬物資生。作虞姚作化。姚云。宜作作。故從孔本。

乾以易知。坤以簡能。易則易知。簡則易從。易知則有親。易從則有功。有親則可久。有功則可大。可久則賢人之德。可大則賢人之業。易簡而天下之理得矣。天下之理得。而易成位乎其中矣。釋文云。馬王肅作而易成位乎其中。他本皆无易字。茲從馬王肅本。

此言乾坤之德。純一不雜。易知易從也。乾之德剛健純粹。施仁育物而已。故曰易。坤之德收齋閉藏。順陽成事而已。故曰簡。

聖人設卦觀象。繫辭焉而明吉凶。剛柔相推而生變化。

古聖人仰觀俯察。象萬物萬事而畫卦。是卦者象也。故韓宣子適魯。不曰見周易。而曰見易象。誠以象者易之本。伏羲既畫卦以象萬物。文王遂觀象而繫易辭。是易辭皆由象生。象而吉則辭吉。象而凶則辭凶。辭有吉凶。皆象之所命。聖人祇明之而已。然則學易者。不先明卦象。而欲通其辭。是猶論布帛之良苦。而不知其質爲絲枲也。可乎。乃自王弼掃象。演空理。唐宋諸儒。以其易而從之。易學遂亡矣。范寧謂其罪浮桀紂。彼實有所見。非故爲苛論也。剛柔相推而生變化。如消息卦互相推

盪是也。以卦變爻變言者。失之遠矣。

是故吉凶者。失得之象也。悔吝者。憂虞之象也。變化者。進退之象也。剛柔者。晝夜之象也。六爻之動。三極之道也。

吉則得。凶則失。知悔吝則知憂虞。知憂虞則可趨吉避凶。陽生於復。進而推陰。則萬物化生。陰生於姤。退而消陽。則萬物變死。乾剛坤柔。乾大明。晝。坤黑。夜。說文。極棟也。逸雅。棟中也。陸績曰。初四下極。二五中極。三上上極。按初四卽地極。二五卽人極。三上卽天極。故鄭注云。三極三才也。蓋陰陽者。天之極。剛柔者。地之極。仁義者。人之極。六爻之動。以此爲法。隨時通變。不偏不畸。胥合乎中。故曰三極。

是故君子所居而安者。易之序也。所樂而玩者。爻之辭也。是故君子居則觀其象而玩其辭。動則觀其變而玩其占。是以自天祐之。吉无不利。

居安觀象。靜也。觀象玩辭。玩象辭也。所謂七八占象也。若爻動則爲九六。九六觀變。而玩其爻辭。以爲占。故无不利也。

象者言乎象者也。爻者言乎變者也。吉凶者言乎其失得也。悔吝者言乎其小疵也。无咎者善補過也。是故列貴賤者存乎位。齊小大者存乎卦。辨吉凶者存乎辭。憂悔吝者存乎介。震无咎者存乎悔。是故卦有大小。辭有險易。辭也者。各指其所之。

七八不變。故占象。九六變。故占爻。吉則得。凶則失。疵病也。凡言无咎者。原有咎也。知悔而改。則无咎矣。故曰善補過。

五乾位。君南面位貴。二坤位。臣北面位賤。齊正也。陽卦大。陰卦小。卦列則大小分。例如泰小往大來。爲大卦。否大往小來爲小卦也。又全經陽爻一百九十二。陰爻亦一百九十二。陰陽齊等。毫无偏畸也。介音憂。介者觸也。豫六二云。介于石是也。謂心有所感觸而憂懼。能憂懼悔吝自能免也。震懼也。懼則悔。悔則无咎。吉則辭易。凶則辭險。之往也。辭也者各指其所之。言凡易辭。皆視其爻之所往。而定吉凶也。此有二義。一。初之四。二之五。三之上。其爻在此。而其辭往往指應爻。應爻卽所之。例如蒙六三曰見金夫不有躬。指上爻象也。泰九二曰朋亡得尚于中行。指六五言。有應故所之皆利。無應則不利也。又凡言志在外。志在內者。亦指所之也。二。凡爻之所比。得類失類。所關最大。例如頤六二。前遇重陰。象傳曰行失類也。中孚六三。前亦遇陰。爻辭曰得敵。皆以陰遇陰爲敵。爲失類。故所之不利也。又鼎九二曰慎所之。革九三曰征凶又何之矣。皆以陽遇陽。敵剛。所之不利。繫辭指出。故曰各指其所之。餘卦類推。其第一義虞翻不知。而誤解。朱震又謂之爲之卦。後獨焦循知之。其第二義訖无知者。故失類慎所之各辭。解无不誤。于是此句亦鮮得解矣。

易與天地準。故能彌綸天地之道。仰以觀於天文。俯以察於地理。是故知幽明之故。原始反終。故知死生之說。精氣爲物。游魂爲變。是故知鬼神之情狀。

準同也。彌綸包絡也。幽明卽陰陽。乾始於坎終於離。坤始於離終於坎。故云原始反終。始終卽生死。九家云。陰陽合則生。離則死。故知死生之說。宋衷云。說舍也。蓋讀如召南召伯所說之說。鄭云。精氣謂七八。游魂謂九六。七八木火之數。九六金水之數。木火用事而物生。故曰精氣爲物。金水用事而物變。故曰游魂爲變。按七八生。神也。九六死。鬼也。精氣謂之神。物生所信也。游魂謂之鬼。物終所歸也。言木火之神。生物東南。金水之神。終物西北。知其情狀。故不違。

與天地相似。故不違。知周乎萬物而道濟天下。故不過。旁行而不流。樂天知命故不憂。安土敦乎仁故能愛。範圍天地之化而不過。曲成萬物而不遺。通乎晝夜之道而知。故神无方而易无體。

八卦盡萬物之象。故曰知周萬物。過差也。旁行九家謂指六日七分圖。以一爻值一日。一月值五卦。至歲終而周合无餘。故曰不流。流溢也。凡物皆生於二氣之中。故曰曲成萬物而不遺。乾大明晝。坤蕃閉夜。无方无體。謂周遍也。

一陰一陽之謂道。繼之者善也。成之者性也。仁者見之謂之仁。知者見之謂之知。百姓日用而不知。故君子之道鮮矣。顯諸仁。藏諸用。鼓萬物而不與聖人同憂。盛德大業至矣哉。富有之謂大業。日新之謂盛德。生生之謂易。成象之謂乾。效法之謂坤。極數知來之謂占。通變之謂事。陰陽不測之謂神。

道无他。卽一陰一陽也。繼統也。乾統天生物。故曰善。坤順乾成物。故曰性。仁者見道。謂道爲仁。知者見道。謂道爲知。不免有偏。百姓顛蒙。日由其道。而不知其所以然。故能體君子之道者甚少也。道難見。見諸生物。故曰顯諸仁。然不見其作爲。故曰藏諸用。聖人成務故憂天下。若陰陽造化鼓鑄萬物。无聲無臭。无方无體。故不與聖人同憂。盛德謂天。大業謂地。物无不備。故曰富有。變化不息。故曰日新。陽極生陰。陰極生陽。轉相生。故曰生生之謂易。乾三畫象三才。故曰成象。坤效乾而兩之。故曰效法。生數極于五。成數極于十。故大衍之數五十。及其撰著也。祇用四十有九。參天兩地。循環往復。然後得此七九八六之數。故曰極數。數極然後理盡。理盡然後能知來。占得其吉凶也。陰陽鼓萬物。萬物不覺知。故曰不測。曰神。

夫易廣矣大矣。以言乎遠則不禦。以言乎邇則靜而正。以言乎天地之間則備矣。夫乾。其靜也專。其動也直。是以大生焉。夫坤。其靜也翕。其動也闢。是以廣生焉。廣大配天地。變通配四時。陰陽之義配日月。易簡之善配至德。

遠謂乾天。邇謂坤地。復陽動北。南行推陰。左傳謂之射。故曰其動也直。直故大。姤陰動南。下虛。虛則能容。故曰其動也闢。闢故廣。乾坤配天地。乾坤交成震兌離坎。故變通配四時。荀爽云。乾舍于離。同日而居。坤舍于坎。同月而居。故陰陽配日月。

子曰。易其至矣乎。夫易。聖人所以崇德而廣業也。知崇禮卑。崇效天。卑法地。天地設位。

而易行乎其中矣。成性存存。道義之門。

知謂乾效天崇。禮謂坤法地卑。上天下地中間人。故易行乎其中。乾爲道。坤爲義。出乾入坤。故道義爲乾坤之門戶。乾成始。坤成終。成之者性也。往來循環。无或間斷。故曰成性存存。

聖人有以見天下之賾。而擬諸其形容。象其物宜。是故謂之象。聖人有以見天下之動。而觀其會通。以行其典禮。繫辭焉以斷其吉凶。是故謂之爻。言天下之至賾而不可惡也。言天下之至動而不可亂也。擬之而後言。議之而後動。擬議以成其變化。

議之而後動。釋文鄭姚桓玄荀柔之皆作儀之。按釋名。儀宜也。漢書外戚傳。皆心儀霍將軍女。作儀義味實深長。但下文云擬議以成其變化。承上文言。鄭玄等上作儀。下又作議。非。又按惡荀讀作亞。亞次也。按惡亞古同字。史記盧縮傳縮孫他人。封爲亞谷侯。漢書作惡谷。又語林。有得漢印者。文曰周惡夫。劉原父謂卽周亞夫印。而嘖與賾通。左傳定四年。會同難。嘖有煩言。注嘖至也。疏至于會時。有煩亂忿爭之言。然則嘖有煩亂意。言天下之至嘖而不可亞者。卽言天下之物。至爲繁賾雜亂。而難以次第也。

鳴鶴在陰。其子和之。我有好爵。吾與爾靡之。子曰。君子居其室。出其言善。則千里之外應之。況其邇者乎。居其室。出其言不善。則千里之外違之。況其邇者乎。言出乎身加乎民。行發乎邇見乎遠。言行君子之樞機。樞機之發。榮辱之主也。言行君子之所以動天地也。可不

慎乎。

中孚二至四互震。震爲言爲善。三至五震反。若相和答者。故曰應之。震爲善。三至五震覆。故曰不善。震覆爲艮。正與震相反。故曰違之。艮爲里。震爲千萬。故曰千里。艮爲君子。爲居爲室。樞戶樞也。主閉。機弩牙也。主發動。艮爲樞。震爲機。

同人先號咷而後笑。子曰。君子之道。或出或處。或默或語。二人同心。其利斷金。同心之言。其臭如蘭。

此明同人九五爻辭。同人旁通師。乾爲君子爲道。故曰君子之道。師震爲出。爲語。坤爲默。同人互巽爲處。故曰或出或處。或默或語。九五與六二應。伏坎爲心。故曰二人同心。巽爲利。乾爲金。離斷金。故曰其利斷金。乾爲言。巽爲臭爲蘭。故曰同心之言。其臭如蘭。

初六藉用白茅无咎。子曰。苟錯諸地而可矣。藉之用茅。何咎之有。慎之至也。夫茅之爲物薄。而用可重也。慎斯術也以往。其无所失矣。

此大過初六爻辭。錯置也。巽爲茅。在下故曰錯諸地。曰藉。茅之爲物雖薄。然香潔可薦於宗廟。用以縮酒。其重爲何如哉。術道也。言持此卑退謹慎之道。則悔吝不生。而无所失也。

勞謙君子有終吉。子曰。勞而不伐。有功而不德。厚之至也。語以其功下人者也。德言盛。禮言恭。謙也者。致功以存其位者也。

釋謙九三爻義。坎爲勞。震爲言語。爲功。艮爲位。

亢龍有悔。子曰。貴而无位。高而无民。賢人在下位而无輔。是以動而有悔也。

釋乾上九。

不出戶庭。无咎。子曰。亂之所生也。則言語以爲階。君不密則失臣。臣不密則失身。幾事不密則害成。是以君子慎密而不出也。

節初九爻辭。節二至五亦正反震。故曰言語。而兌爲口舌。二至四震言。三至五如言而反。故曰不密。震爲君。艮爲臣。爲身。兌毀折。故曰失。曰害。升九五云。升階。以震爲階也。故曰言語以爲階。艮爲慎密。此與上中孚節。皆演正覆象。而注家无知者。

子曰。作易者其知盜乎。易曰負且乘。致寇至。負也者小人之事也。乘也者君子之器也。小人而乘君子之器。盜思奪之矣。上慢下暴。盜思伐之矣。慢藏誨盜。冶容誨淫。易曰負且乘。致寇至。盜之招也。

解六三爻辭。坎爲盜。爲寇。艮爲背。故爲負。上卦震爲覆艮。故曰負。坎爲車。六三下據坎。故曰負且乘。古在上之君子。方得乘車。故曰君子之器。若負戴則小人之事也。今而乘車。是君子也。乃又負戴。是以君子而行小人之事。故致寇至。震爲言。故曰誨。于邕云。招者射之的也。呂氏春秋本生紀云。萬人操弓。共射其一招。高注云。招埒的也。又盡數紀云。射而不中。反修于招。注。反修其標。

的。畢校云。招一作的。按的的同。說卦的類。說文作的類。是其證。而的古音勺。與招聲近。故通用。盜之招卽盜之的。言負且乘與盜以的也。虞翻命二變成艮。取艮手釋招義。非。冶。釋文鄭陸虞姚作野。言妖野容儀。愚謂治野音義並同。故通用。漢學家必謂野是非也。

大衍之數五十。其用四十有九。分而爲二以象兩。卦一以象三。揲之以四以象四時。歸奇於扚以象閏。五歲再閏。故再扚而後卦。

此言揲著之法。並用數之根本也。凡占必極數。方能知來。五者生數之極。不能再生。又一二三四五五數皆无偶。于是由五加一爲六。以與一偶。加二爲七。以與二偶。加三爲八。以與三偶。加四爲九。以與四偶。加五爲十。以與五偶。故十者成數之極。不能再加。衍鄭云演也。干云合也。蜀才云廣也。五十旣爲極數。故大衍以此爲本也。太玄玄圖云。一與六共宗。二與七共朋。三與八成友。四與九同道。五與五相守。正五十也。孔子曰五十以學易。正謂此也。然五十居生數成數之極。極則窮故不用之。用五十之次數四九。由四十九方能衍出六七八九。然六七八九之生。仍由於一二三四。虛用一也。分二用二也。掛一用三也。象四用四也。揲餘不一則二。不三則四。本一二三四。衍出六七八九。而六七八九。无不含五。十仍五也。非果不用也。此所以爲大衍也。象兩者天地也。挂一者。別以一策挂于左手之小指。象三者三才也。揲之以四。謂每揲四策。一策象一時也。奇者揲餘之策。虞翻云。不一則二。不三則四也。扚。馬云指間。范望云。并之於兩手指間。歸奇於扚者。言將揲左揲右之

所餘。并挂一。統歸於兩小指間。以爲一扚。卽一變也。一變既已。將過揲之策合之。如式再分挂揲。并扚之於次小指間。以爲二變。二變既已。仍合正策。如式再分挂揲。并扚之於第三指間。以爲三變。故曰再扚。再者相續之詞。至三扚則卦矣。故不言三扚。三變既畢。視每變所餘策數。少則四。多則八。如三變皆少數。則三十二策。合挂一策。共十三策。則正策爲三十六。四數之得九。賈公彥周禮太卜疏所謂三少爲重。爲九。爲老陽也。如三變皆多數。則三十八二十四策。合挂一共二十五策。則正策爲二十四。四數之得六。賈公彥所謂三多爲交。爲六。爲老陰也。如三變兩多一少。則爲二十策。合挂一共二十一策。則正策爲二十八。四數之得七。賈公彥所謂兩多一少爲單。爲七。爲少陽也。如三變兩少一多。則十六策。合挂一共十七策。則正策爲三十二。四數之得八。賈公彥所謂兩少一多爲坼。爲八。爲少陰也。求七八九六之法既得。三變後視所得而畫于版。故曰再扚而後卦。卦者挂也。說文挂畫也。言畫其所得之一爻于版也。閏者一歲之餘。左傳文元年。履端於始。歸餘于終。歸餘于終。與歸奇于扚同也。每月必有閏。至年終而計其餘。大率一年閏十日。每揲必有奇。至一變終而并歸於扚。天時積至五歲。約盈五十餘日。閏二月以爲結束。揲著扚一變之餘。二變之餘。至第三變再扚之。并合前扚。總計其數。視所得而畫出一爻。以爲結束。故曰再扚而後卦也。虞氏云。初扚挂於小指間。再扚挂於次小指間。三扚挂於第三指間。必挂於指間者。須知古人多立筮。又无高几憑撫。以存放著策。故必暫挂于指間。以待三變之終也。卦從京氏。實虞氏曰。則布掛之一爻。虞

亦作卦。掛字皆後人妄改。卦挂本通。孔疏引易緯云。卦者挂也。言懸挂物象以示人也。而挂與掛尤通。惟掛爲後出之字。故每以卦訛掛。求爻之法。至再扚而後卦已畢。後人誤以揲左爲初扚。揲右爲再扚。因疑卦爲二變之掛一。改卦爲掛。誠如是。是求爻之法未竣也。未竣人胡能明。且揲半不能謂爲一扚。謂爲一扚。則一變終也。

天數五。地數五。五位相得而各有合。天數二十有五。地數三十。凡天地之數五十有五。此所以成變化而行鬼神也。

此以天地數明大衍數之本也。一三五七九。天數。二四六八十。地數。五位謂奇耦之位。一與六合爲北方水。二與七合爲南方火。三與八合爲東方木。四與九合爲西方金。五與十合爲中央土。故五位相得而各有合。此全以數位言。天地數爲大衍數之本。而大衍數卻不用天地數。變之化之。其妙通於鬼神。

乾之冊二百一十有六。六乘三十六坤之冊百四十有四。六乘二十四凡三百有六十。當期之日。二篇之冊。萬有一千五百二十。當萬物之數也。全經陰陽爻各一百九十二。以三六乘百九十二。得六九一二。以二四乘百九十二。得四六〇八。

十二月爲一期。乾坤策正三百六十。故曰當期之日。

是故四營而成易。十有八變而成卦。八卦而小成。引而伸之。觸類而長之。天下之能事畢

矣。顯道神德行。是故可與酬酢。可與祐神矣。

分二。挂一。揲四。歸奇。故謂四營。四營成一變。三變成一爻。十有八變成六爻。九變成一卦。故曰八卦而小成。

子曰。知變化之道者。其知神之所爲乎。易有聖人之道四焉。以言者尙其辭。以動者尙其變。以制器者尙其象。以卜筮者尙其占。是故君子將有爲也。將有行也。問焉而以言。其受命也如響。无有遠近幽深。遂知來物。非天下之至精。孰能與于此。

以上言易之神。釋文。響亦作響。朱子云。響古文響字。言易受筮者之命。如響之應聲。而告以來物之吉凶也。

參伍以變。錯綜其數。通其變。遂成天地之交。極其數。遂定天下之象。非天下之至變。其孰能與於此。

爻數至三。內卦終矣。故曰必變。乾四云。乾道乃革是也。此從三才而言也。若從五行言。至五而盈。故過五必變。乾上有悔。泰上城復于隍是也。故曰三五以變。一二三四。與六七八九同。而陰陽則異。故一與六相錯。二與七相錯。三與八相錯。四與九相錯。綜者來往上下也。數至三而終。終則復始。故三變成一爻。至五而盈。盈則返初。五加一爲六。加二爲七。加三爲八。加四爲九。故曰錯綜其數。錯則陰數與陽數相合。相得。故曰成天地之交。綜則陰陽往復。循環不窮。而四象以出。此明易

用六七八九之所以然。古今說此者。人執一辭。訖无定解。姑申其本原如此。

易无思也。无爲也。寂然不動。感而遂通天下之故。非天下之至神。其孰能與于此。夫易。聖人之所以極深而研幾也。惟深也故能成天下之志。唯幾也故能成天下之務。唯神也故不疾而速。不行而至。子曰。易有聖人之道四焉者。此之謂也。

四謂尚辭尚變尚象尚占。

天一地二。天三地四。天五地六。天七地八。天九地十。子曰。夫易何爲而作也。夫易開物成務。冒天下之道。如斯而已者也。

如斯而已者。言易道盡包括于十數之中也。本義從程氏。置于大衍章之前固謬妄。卽據漢書置于天數五之上。仍未得也。如在彼處。則冒天下之道如斯而已數語。尙何指哉。須知如斯二字。卽指天地數。

是故聖人以通天下之志。以定天下之業。以斷天下之疑。是故蓍之德圓而神。卦之德方以知。六爻之義易以貢。聖人以此洗石經作先。諸家訓先爲盡。實先洗古通用。莊子德充符不知先生之洗我以善邪。與此洗義同。心。退藏於密。吉凶與民同患。神以知來。知以藏往。其孰能與於此哉。古之聰明睿知。神武而不殺。衰也者夫。是以明於天之道。而察於民之故。是興神物。以前民用。聖

人以此齋戒。以神明其德夫。是故闔戶謂之坤。闢戶謂之乾。一闔一闢謂之變。往來不窮謂之通。見乃謂之象。形乃謂之器。制而用之謂之法。利用出入。民咸用之謂之神。

陽生於復。齊於巽。萬物相見。故曰闢戶。陰生於午。閉藏於亥。萬物收縮。故曰闔戶。一闔一闢。往來不窮。故曰通。卽消息卦之理也。貢釋文告也。京陸虞作工。荀作功。工功古通。

是故易有太極。是生兩儀。兩儀生四象。四象生八卦。八卦定吉凶。吉凶生大業。

說文。極棟也。中也。從坎至離。南北正中。中卽極。極以東萬物生。是爲陽儀。極以西萬物終。是爲陰儀。陽少於子。老於巳。陰少於午。老於亥。四象生矣。四象卽四時。春少陽。夏老陽。秋少陰。冬老陰也。老陽老陰卽九六。少陽少陰卽七八。故四象定則八卦自生。

太極者中。天地定位則陰陽分。兩儀也。坤下一陽生震。少陽也。二陽生兌。三陽乾則老陽矣。老陽之下生一陰巽。少陰也。二陰艮。三陰坤則老陰矣。六卦備矣。而水火則橫互於中。水火者乃交後之乾坤也。豎則爲天地。東陽西陰。橫則爲日月。南陽北陰。是故坎下震上艮。離上兌下巽。乾坤生六子。離坎兼四隅。故四象生八卦。

是故法象莫大乎天地。變通莫大乎四時。縣象著明莫大乎日月。崇高莫大乎富貴。備物致用。立成器以爲天下利。莫大乎聖人。探賈索隱。鈎深致遠。以定天下之吉凶。成天下之亹亹者。莫大乎蓍龜。是故天生神物。聖人則之。天地變化。聖人效之。天垂象見吉凶。聖人象

之。河出圖。洛出書。聖人則之。易有四象。所以示也。繫辭焉所以告也。定之以吉凶。所以斷也。

天地者乾坤。四時者離坎震兌。離坎又爲日月。艮山爲崇爲貴。巽爲高爲利市。故爲富。合乾坤離坎。震兌艮巽。而八卦之用全。故下曰備物致用。左傳定四年。會同難嘖有煩言。注嘖至也。嘖嘖通。探賾者。探其深至也。隱者伏也。索隱者言正象之旁。尚有伏象。須索之也。河出圖。洛出書。自然屬於感應符瑞之事。故與神物並言。以見易之所自出。而聖人則之也。惟圖書究爲何物。集解引孔安國注云。河圖八卦也。按五行志云。劉歆以爲伏羲繼天而王。受河圖。則而畫之。八卦是也。又禮運河出馬圖。鄭注。龍馬負圖而出。疏引中侯握中紀云。伏羲有天下。龍馬負圖出于河。遂法之作八卦。是伏羲則河圖作八卦。漢人多如此言。然曰則之法之。則河圖別爲一物。非河圖卽八卦明甚。若河圖卽八卦。尙胡云則之法之乎。孔說非也。惟河圖究爲何狀。莫有言者。至宋人以五行數當之。一六北方水。二七南方火。三八東方木。四九西方金。五十中央土。共五十五數。此數之見於古籍者。如太玄云。三八木。二七火。四九金。一六水。五五土。月令其日甲乙。其數八。其日丙丁。其數七。其日庚辛。其數九。其日壬癸。其數六。其日戊己。其數五。墨子書迎敵。其方數東方八。南方七。西方九。北方六。大戴禮。孤子朝。孤子八人以成春事。司馬爵士之有度者七人。以成夏事。食農夫九人。以成秋事。司空息國老六人。以成冬事。黃帝素問。其方數東方八。南方七。西方九。北方六。其方。

其時。其數。皆與此圖同。而墨子在春秋時卽言之。可謂古矣。然各家祇言其數。不言其名。不知宋人以此數當河圖。究何所據。至於洛書。孔安國謂卽九疇。五行志。劉歆謂禹治洪水。錫洛書。法而陳之。洪範是也。並謂自初一日五行。至畏用六極。凡此六十五字。皆洛書本文。是孔劉皆以洛書爲九疇。然鄭注引春秋緯云。河龍圖發。洛龜書成。河圖九篇。洛書六篇。論衡云。河圖洛書。言興衰存亡。是又皆以爲書名。與今宋人所傳戴九履一之數大異。其說戴九履一之數者。乾鑿度云。一陰一陽合十五。太一取其數以行九宮。四正四維。皆合於十五。則正與今書數合。又大戴禮。明堂者九室。二九四。七五三。六一八。卽今書之橫圖數。九室卽九宮。又孫星衍云。北周甄鸞注數術記遺九宮算云。九宮者卽二四爲肩。六八爲足。左三右七。戴九履一。五居中央。又鄭注太一下行九宮云。太一行始坎。次坤。次震。次巽。復息於中宮。按坎數一。坤二。震三。巽四。中宮五。是太一之行。按一二三四五之序也。又云自中宮至乾。次兌。次艮。次離。一周畢矣。按乾西北數六。兌西數七。艮東北數八。離正南九。是太一之行。又自五而六七八九也。故曰四正四維。數合十五也。然則今洛書。據大戴禮乾鑿度鄭注甄鸞注。皆名曰九宮。不謂爲洛書。其謂爲洛書者。祇北周盧辯注大戴禮云。記用九室。謂法龜文。然他古籍皆不如是言也。河圖洛書旣茫昧難明。至宋人以五行數九宮數當之。誠不知其何所據。然孔劉以九宮數爲九疇。獨不思則之者。則以畫卦。畫卦者伏羲。洛書禹時出。伏羲安能則之。不尤誤乎。按禮緯含文嘉云。伏羲德合上下。天應以鳥獸文章。地應以河圖洛

書。乃則以作易。又河圖挺輔佐云。黃帝問道於天老。天老曰。河出龍圖。洛出龜書。所紀帝錄。列聖人之姓號。據是則洛書亦出伏羲時。出於伏羲時。方能則以畫卦。後漢學家襲孔劉之說。定謂洛書出禹。皆誤也。四象。或云指七八九六。或云指上神物變化垂象圖書四者。又有謂指分二掛一揲四歸奇者。愚按指七八九六者是也。七八九六卽南北東西。卽春夏秋冬也。

易曰。自天祐之。吉无不利。子曰。祐者助也。天之所助者順也。人之所助者信也。履信思乎順。又以尚賢也。是以自天祐之。吉无不利也。

此釋大有上九爻義。或言是錯簡。宜在前七爻之下。大有六五承陽。五天位。承順也。是天以順祐上也。乾爲人爲信。二應五。五孚于上。故曰人之所助者信。上履信思順。又二應五得尚于中行。是尚賢也。故无不利。

子曰。書不盡言。言不盡意。然則聖人之意。其不可見乎。子曰。聖人立象以盡意。設卦以盡情僞。繫辭焉以盡其言。變而通之以盡利。鼓之舞之以盡神。

意之不能盡者。卦能盡之。言之不能盡者。象能顯之。故立象以盡意。設卦以盡情僞。

乾坤其易之緼耶。乾坤成列。而易立乎其中矣。乾坤毀則无以見易。易不可見。則乾坤或幾乎息矣。

六十四卦。皆乾爻坤爻所積而成。故乾坤爲易緼。緼藏也。

是故形而上者謂之道。形而下者謂之器。化而裁之謂之變。推而行之謂之通。舉而措之天下之民謂之事業。是故夫象。聖人有以見天下之賾。而擬諸其形容。象其物宜。是故謂之象。聖人有以見天下之動。而觀其會通。以行其典禮。繫辭焉以斷其吉凶。是故謂之爻。極天下之賾者存乎卦。鼓天下之動者存乎辭。化而裁之存乎變。推而行之存乎通。神而明之存乎其人。默而成之。不言而信。存乎德行。

是故夫象下九句與前複。故知繫辭。乃門人雜記孔子之言。非出一人之手。

周易尙氏學卷十九

繫辭下傳

八卦成列。象在其中矣。因而重之。爻在其中矣。剛柔相推。變在其中矣。繫辭焉而命之。動在其中矣。

天地定位。乾坤列南北。日月縣象。離坎列東西。山澤通氣。艮兌列西北東南。雷風相薄。震巽列東北西南。三畫畢而八卦全。凡萬物之象。无不包括于八卦之中。故象在其中。因八卦重八卦。兼三才而兩之故六。六方有爻。說文爻交也。一與四交。二與五交。三與上交。故三畫祇有象。六畫始有爻。相推指消息。

吉凶悔吝者。生乎動者也。剛柔者立本者也。變通者趨時者也。吉凶者貞勝者也。天地之道。貞觀者也。日月之道。貞明者也。天下之動。貞夫一者也。

貞勝姚信讀作貞稱。貞常也。言吉凶之道。无不與陰陽相稱也。按勝稱音近古通。考工記角不勝幹。幹不勝筋。謂之不參。注。勝或作稱。晉語曰。中不勝貌。韋注。勝當爲稱。天地謂二五。二五中正。中

正以觀天下。故曰貞觀。坎月離日。大明終始。故曰貞明。一者神也。神也者。妙萬物而爲言者也。故動貞于一。

夫乾確然示人易矣。夫坤隤然示人簡矣。爻也者效此者也。象也者像此者也。義皆與前復。以非一人所記錄。爻象動乎內。吉凶見乎外。功業見乎變。聖人之情見乎辭。天地之大德曰生。聖人之大寶曰位。何以守位曰人。何以聚人曰財。理財正辭。禁民爲非曰義。

內內卦。外外卦。乾鑿度云。易氣從下生。故動於地之下。則應乎天之下。動於地之中。則應於天之中。動於地之上。則應於天之上。故曰爻象動乎內。吉凶見乎外。守位曰人。人王肅桓玄等作仁。仁人古通。禮器碑四方士仁。士仁卽士人。論語問管仲。曰人也。卽仁人也。又仁者雖告之曰。井有仁焉。其從之也。有仁卽有人。何晏注謂仁人墮井。誤。

古者包犧氏之王天下也。仰則觀象於天。俯則觀法於地。觀鳥獸之文。與地之宜。近取諸身。遠取諸物。於是始作八卦。以通神明之德。以類萬物之情。

近取諸身。如乾首坤腹震足等是。遠取諸物。如乾馬坤牛艮狗兌羊等是。凡物皆有陰陽。有陰陽則相感而有情。有情則相聚相合而爲類。故曰以類萬物之情。

作結繩而爲罔罟。以佃以漁。蓋取諸離。

離中爻巽爲繩。離重目故爲罔罟。罔罟皆目也。以罔罟取獸於陸曰佃。取魚於澤曰漁。

包犧氏沒。神農氏作。斲木爲耜。揉木爲耒。耒耨之利。以教天下。蓋取諸益。

益巽爲木。震爲足故爲耜。耜耒頭金也。震爲耕故爲耒。耒耕具也。中爻艮手。故曰斲曰揉。耜所以刺地。故斲木使銳。而冒以金。使人地易耒形曲。故揉之使曲。

日中爲市。致天下之民。聚天下之貨。交易而退。各得其所。蓋取諸噬嗑。

噬嗑離在上。故曰日中。互艮爲市。坎爲聚。爲衆。爲民。震爲貨爲歸。故曰交易而退。

神農氏沒。黃帝堯舜氏作。通其變使民不倦。神而明之。使民宜之。易窮則變。變則通。通則久。是以自天祐之。吉无不利。黃帝堯舜垂衣裳而天下治。蓋取諸乾坤。

乾爲衣。坤爲裳。上衣下裳。乾上坤下。故曰取諸乾坤。自黃帝以前。祇短衣蔽體。以禦寒暑。無所謂威儀。至黃帝始服冕垂衣。襟袖寬博。彬彬下垂。至堯舜更象日月星辰山龍華蟲作服。而衣裳之文采大備。

剡木爲舟。揆木爲楫。舟楫之利。以濟不通。致遠以利天下。蓋取諸渙。

渙上巽爲木。下坎爲楫。說文楫舟櫂也。中爻震爲舟。艮手故曰剡曰揆。剡說文判也。玉篇空物腸也。剡也。古之時無鋸。故剡木使中空以爲舟也。震舟象失傳。虞翻等皆以渙爲舟。杭辛齋謂日本易家以震爲船。按易林大有之謙云。方船備水。以謙互震爲船也。震爲虛。故爲舟船。歸妹上六承虛筐也。以震爲虛也。

服牛乘馬。引重致遠。以利天下。蓋取諸隨。

服牛卽駕牛。說文牛部犗牛乘馬。而不言犗義。陳壽祺曰。玉篇犗皮秘切。服也。以鞍裝馬也。集韻犗用牛也。通作服。據此服牛卽駕牛也。易林歸妹之比云。申酉脫服。牛馬休息。脫服卽弛駕也。隨互艮爲牛。下震爲馬。艮爲引。巽爲利。謂以牛馬引重致遠。以利濟天下也。艮牛象見无妄解。

重門擊柝。以待暴客。蓋取諸豫。

豫艮爲門。坤亦爲門。故曰重門。又九家云。從外視之艮。故曰重門。是以正反艮爲重門也。震爲柝。艮爲擊。故曰擊柝。震爲客。而決躁。故曰暴客。重門深密。擊柝警戒。皆所以備盜。中爻坎爲盜也。斷木爲杵。掘地爲臼。臼杵之利。萬民以濟。蓋取諸小過。

小過中爻巽爲木爲杵。兌毀折。故曰斷木爲杵。震中虛爲臼。艮爲掘。掘地爲臼。蓋以蜃灰。堊之使堅。盛穀於中。舂之以杵。而民食濟也。

弦木爲弧。剡木爲矢。弧矢之利。以威天下。蓋取諸睽。

睽中爻坎爲弧。爲矢。弦說文弓弦也。弧說文木弓也。弦木爲弧。言以弦牽木使曲成弧也。剡削也。剡木使直成矢也。離爲威如。兌毀折。故曰威天下。

上古穴居而野處。後世聖人易之以宮室。上棟下宇。以待風雨。蓋取諸大壯。

大壯通觀。觀艮爲穴爲野。爲宮室。巽爲棟。在外卦。故曰上棟。艮爲宇。在巽下。故曰下宇。宇今俗所謂廊簷也。巽爲風。兌爲雨。舊解不用旁通。用正象。宜其不合也。

古之葬者。厚衣之以薪。葬之中野。不封不樹。喪期無數。後世聖人易之以棺槨。蓋取諸大過。

大過乾爲衣。巽爲薪。管輅以坎爲棺槨。大過中實亦坎象。故亦象棺槨。漢儒以大過爲死卦。蓋本此也。

上古結繩而治。後世聖人易之以書契。百官以治。萬民以察。蓋取諸夬。

夬上兌爲覆巽。巽爲繩。上古結繩紀事。今巽覆爲兌。兌爲斧。故曰書契。契刻也。呂氏春秋。契舟求劍是也。考工記。桀氏爲削。合六而成規。注今之書刀。蓋古用簡須以刀刻字。今殷墟掘出之甲骨文是也。故曰書契。兌爲刀。斧。乾爲圓。書刀合六以成規。故取於夬。

是故易者象也。象也者像也。

此總明上取象之故也。凡易辭无不從象生。韓宣子適魯。不曰見周易。而曰見易象與魯春秋。誠以易者象也。象者像也。言萬物雖多。而八卦无不像之也。像俗字。釋文。孟京虞姚董。還作象。

彖者材也。

材猶言行能。阮元訓彖爲分。材與財裁通。言用此彖辭。說卦象而分之。

爻者效天下之動者也。是故吉凶生而悔吝著也。

動發也。爻交也。卦至六畫始有爻。動於下。應於上。故曰效。效之而當則吉。不當則凶也。

陽卦多陰。陰卦多陽。其故何也。陽卦奇。陰卦耦。其德行何也。陽一君而二民。君子之道也。陰二君而一民。小人之道也。

韓注少者多之宗。一者衆之歸。陽卦二陰。故奇爲之君。陰卦二陽。故耦爲之主。後漢仲長統曰。易曰陽一君二臣。君子之道也。陰二君一臣。小人之道也。然則寡者爲人上者也。衆者爲人下者也。專以貴賤言。愚謂陽道行則世治。世治則一君二民而君權一。陰道盛則世亂。世亂則二君一民。而君權墮。管子霸言云。使天下兩天子。天下不可理也。一國而兩君。一國不可理也。一家而兩父。一家不可理也。不可理則亂。故曰小人之道。

易曰。憧憧往來。朋從爾思。子曰。天下何思何慮。天下同歸而殊塗。一致而百慮。天下何思何慮。

釋咸九四爻義。吾道一以貫之。朋從爾思。則百慮也。憧憧往來。則殊塗也。然塗雖殊而同歸于一。慮雖百亦終致于一。天下事貞于一而已。何思何慮哉。

日往則月來。月往則日來。日月相推。而明生焉。寒往則暑來。暑往則寒來。寒暑相推。而歲成焉。往者屈也。來者信也。屈信相感。而利生焉。尺蠖之屈。以求信也。龍蛇之蟄。以存身

也。精義入神。以致用也。利用安身。以崇德也。過此以往。未之或知也。窮神知化。德之盛也。

咸互乾爲日。上兌爲月。至夕則日往而月來。至晨則月往而日來。往收藏也。乾爲寒。坤爲暑。乾息自復。至姤而藏。坤陰用事。坤消自姤。至復而藏。乾陽用事。寒暑互相推。而歲功以成。往則收藏故曰屈。來則用事故曰信。尺蠖。屈信虫也。見說文。又爾雅疏。蠖又呼步屈。言其以尾就首。屈而後信。舉步之形也。埤雅云。今人布指求尺。一屈一信。如蠖之步。謂之尺蠖。按詩小雅。螟蛉有子。果羸負之。螟蛉食槐葉虫。色綠與葉若一。夏日細腰。以泥砌窠成。銜螟蛉入。螟蛉卽尺蠖。咸九四巽體。巽爲虫。蠖行以尾就首。先屈後信。故以爲喻。咸艮位戌亥。互乾爲龍。伏坤爲蛇。乾坤合居於戌亥數无之地。故曰蟄。惟能蟄故能存身。乾傳所謂保合太和也。乾爲神。坤爲義。精義入神。謂乾坤合德於戌亥。易林云。乾坤利貞。乳生六子。六子生然後能致用。用利然後身安。身安則德自崇。蓋陰陽屈信。循環无端。不屈則不能信。不蟄則无以爲存。陰陽往來。定理本如是也。

易曰。困於石。據於蒺藜。入于其宮。不見其妻凶。子曰。非所困而困焉。名必辱。非所據而據焉。身必危。既辱且危。死期將至。妻其可得見邪。

坎隱伏故名辱。坎險故身危。坎爲棺槨。故曰死。困六三爻義。

易曰。公用射隼于高墉之上。獲之无不利。子曰。隼者禽也。弓矢者器也。射之者人也。君子

藏器於身。待時而動。何不利之有。動而不括。是以出而有獲。語成器而動者也。

解上震爲器。爲人。互坎故藏器。震爲時。爲動。動故不括。解上六爻義。

子曰。小人不恥不仁。不畏不義。不見利不動。不威不懲。小懲而大戒。此小人之福也。易曰。履校滅趾无咎。此之謂也。

此釋噬嗑初九爻義。震爲動爲威。

善不積不足以成名。惡不積不足以滅身。小人以小善爲无益而弗爲也。以小惡爲无傷而弗去也。故惡積而不可掩。罪大而不可解。易曰何校滅耳。凶。

此釋噬嗑上九爻義。

子曰。危者安其位者也。亡者保其存者也。亂者有其治者也。是故君子安而不忘危。存而不忘亡。治而不忘亂。是以身安而國家可保也。易曰其亡其亡。繫于苞桑。

此釋否九五爻義。

子曰。德薄而位尊。知小而謀大。力小而任重。鮮不及矣。易曰鼎折足。覆公餗。其形渥。言不勝其任也。

此釋鼎九四爻。形渥。鄭虞皆作刑剭。言因覆餗而被大刑也。古字音同通用。王弼程傳以形爲形體。王謂形渥爲沾濡。程謂爲汗赧。皆望文生義。不惟不審通假之例。且於經義顯違。以折足覆餗之罪。

祇汗赧而已乎。本義多從程傳。獨此不從。誠以其陋也。觀此曰鮮不及矣。謂及於刑辟也。此可以定其是非也。

子曰。知幾其神乎。君子上交不諂。下交不瀆。其知幾乎。幾者動之微。吉之先見者也。君子見幾而作。不俟終日。易曰介於石。不終日。貞吉。介如石焉。寧用終日。斷可識矣。君子知微知彰。知柔知剛。萬夫之望。

此釋豫六二爻義。左傳昭五年。于人爲言。敗言爲讒。謙下艮。震反。故曰敗言。豫與謙同體。亦正反震。故曰諂曰瀆。蒙曰瀆則不告。以二至上正反震相對。言多故曰瀆。豫亦正反震。故亦曰瀆。繫辭與左傳之用正覆象。除易林外。无有喻者。故解左氏而誤。解易而誤。而諂與瀆之故。皆莫知其所自來矣。介。介於之省。硬也。故曰介如石。

子曰。顏氏之子。其殆庶幾乎。有不善未嘗不知。知之未嘗復行也。易曰不遠復。无祇悔。元吉。

此釋復初爻義。

天地絪縕。萬物化醇。男女構精。萬物化生。易曰。三人行則損一人。一人行則得其友。言致一也。

損六三爻義。少男少女。爻无不交。艮爲天。坤爲地。爲萬物。震爲生。未交則陰陽分。既交則陰陽

合。德。所謂同聲同氣也。故曰致一。

子曰。君子安其身而後動。易其心而後語。定其交而後求。君子修此三者故全也。危以動。則民不與也。懼以語。則民不應也。无交而求。則民不與也。莫之與則傷之者至矣。易曰莫益之。或擊之。立心勿恆。凶。

益上九爻義。二至四艮爲身爲安爲求。震爲動爲言。坤爲心爲民。易。平也。言平易其心而後語也。

子曰。乾坤其易之門邪。乾陽物也。坤陰物也。陰陽合德。而剛柔有體。以體天地之撰。以通神明之德。其稱名也。雜而不越。於稽其類。其衰世之意邪。夫易彰往而察來。而微顯闡幽。開而當名。辨物正言。斷辭則備矣。其稱名也小。其取類也大。其旨遠。其辭文。其言曲而中。其事肆而隱。因貳以濟民行。以明失得之報。

陰陽合德。而萬物乃生。各有其剛柔之體。體剛者得天數。體柔者得地數。九家云。撰數也。天數九。地數六。言萬物形體。皆受天地之數也。撰與算。音近通用。夏官羣吏撰車馬。鄭注撰讀曰算。謂數擇之。茲與之同。萬物變化。通于神明。其名雖雜。然系之爻卦各有其序。不相踰越。故曰雜而不越。凡吉凶悔吝皆所以備憂患。故曰衰世之意。若盛世則無所謂憂患也。彰往如先甲三日。先庚三日。察來如履霜堅冰至。至于八月有凶是也。卦名祇八耳。而萬物皆象於其中。故曰其稱名小。其取類

大。肆極也。周語下。藪澤肆既。注。肆極也。貳輔也。卦有內外有上下。初爲主則四貳之。二爲主則五貳之。三爲主則上貳之。其吉凶得失。皆以此爲度。故因貳以濟民行。

易之興也。其於中古乎。作易者其有憂患乎。是故履。德之基也。謙。德之柄也。復。德之本也。恆。德之固也。損。德之修也。益。德之裕也。困。德之辨也。井。德之地也。巽。德之制也。

虞氏曰。中古謂庖犧。庖犧始畫卦。以前爲上古。上古之人無憂患。九卦者防憂慮患之本。柄本也。所以持物辨別也。遭困之時。君子不改其常。小人必失其度。以此爲別。井以水養人。取不竭。用不窮。故曰德之地。巽爲命令。人君申命用事。宰制天下。故曰德之制。此陳九卦之德。

履和而至。謙尊而光。復小而辨於物。恆雜而不厭。損先難而後易。益長裕而不設。困窮而通。井居其所而遷。巽稱而隱。

此中九卦之性。以明其重要。履下兌爲和。上乾爲至。謙下艮爲光明。爲山。故尊而光。復陽雖微。然陽物。坤陰物。陰陽各別。故復小而辨於物。辨別也。恆六爻皆交。故雜而不厭。挹損人情之所難。故先難。久則人諒而服。故後易。虞氏以上失位爲難。誤之遠矣。益陽歸內。內爲貞。貞爲我。設陳也。天施地生。言不必設施爲作。自然裕也。困下坎爲通。井所居不移。而澤施於人。故居所能遷。巽爲命令。舉國稱揚。然民可使由。不可使知。故稱而隱。又稱者銓衡之總名。鄭注月令云。稱錘曰權。由是以推。稱幹曰衡。後儒動謂稱卽權者非也。謙傳云。稱物平施。月令云。分繭稱絲計功。是也。上巽

下巽。內外平。故曰稱。巽伏故隱。

履以和行。謙以制禮。復以自知。恆以一德。損以遠害。益以興利。困以寡怨。井以辨義。巽以行權。

此言九卦之用。履乾爲行。兌悅故行和。凡禮以謙爲主。故以制禮。恆不易方。故一德。損互坤爲害。泰初往坤上。害不能及。故遠害。富貴易爲人忌。困則无忌者。故寡怨。風進退。故行權。

易之爲書也不可遠。其爲道也屢遷。變動不居。周流六虛。上下无常。剛柔相易。不可爲典要。唯變所適。其出入以度。外內使知懼。明於憂患與故。无有師保。如臨父母。初率其辭而揆其方。既有典常。苟非其人。道不虛行。

正義云屢遷。謂乾初潛龍。乾二見龍是也。變動不居。若一陽生爲復。二陽爲臨。无或停息。是也。六虛六位也。上下无常如二五相上下。泰二得上於中行是也。適往也。如乾初得九。則往姤也。乾元亨利貞。姤則天地相遇。卦德迥不同。故曰不可爲典要。往外爲出。來內爲入。往來出入。皆有一定之度數。不能混淆。如初與四相往來。二與五相往來。三與上相往來。倘不能相往來。則中必有疾。如鼎二曰我仇有疾是也。疾則懼矣。懼則知所防矣。故曰明於憂患與故。率正也。揆度也。方道也。言正其初首之辭。而度其終末之道。盡有典常。故非文王不能明其道也。

易之爲書也。原始要終以爲質也。六爻相雜。唯其時物也。其初難知。其上易知。本末也。初

辭擬之。卒成之終。若夫雜物撰德。辨是與非。則非其中爻不備。噫。亦要存亡吉凶。則居可知矣。知者觀其彖辭。則思過半矣。

原始如乾初九潛龍勿用。是原始也。上九亢龍有悔。是要終也。質本也。物陽物陰物。六爻剛柔相雜。然爻各有其時。各有其物。時物當則吉。否則凶也。本末初上也。初則事微故難知。上則事彰故易知。初擬議之。卒終成之。假如噬嗑初九。善惡在擬議之間。至上九則凶災彰徹。一成不變也。故曰卒成之終。雜物。言陰陽相雜也。撰數也。撰德者。言數合陰陽之德。而別其是非也。中爻謂中四爻。二至四互一卦。三至五互一卦。京氏所謂一卦備四卦之用也。吉凶是非。初引其端。上考其成。至其詳盡。則在中四爻。故曰非中爻不備。中爻之是非既明。則吉凶已著。居處也。處乾吉則存。處坤凶則亡。故曰居可知。

二與四同功而異位。其善不同。二多譽。四多懼。近也。柔之爲道。不利遠者。其要无咎。其用柔中也。三與五同功而異位。三多凶。五多功。貴賤之等也。其柔危。其剛勝邪。

二四同爲坤位。故同功。而二位在內。且居中。故異位。三五同爲乾位。故同功。而五在外。且居中。故異位。近謂二在內卦。遠謂四在外卦。柔之爲道不利遠。二近故多譽。四遠故多懼。其謂近五故懼者非也。三五皆陽位。故柔爻居之危。剛爻居之勝。

易之爲書也。廣大悉備。有天道焉。有人道焉。有地道焉。兼三才而兩之故六。六者非他也。

三才之道也。道有變動故曰爻。爻有等故曰物。物相雜故曰文。文不當故吉凶生焉。

文不當謂不當位。干寶云。等羣也。爻中之義羣物交集也。

易之興也。其當殷之末世。周之盛德邪。當文王與紂之事邪。是故其辭危。危者使平。易者使傾。其道甚大。百物不廢。懼以終始。其要无咎。此之謂易之道也。

言易辭憂危慮患。或爲文王事紂。囚於羑里時所爲。干寶何安等。便指某卦爻辭指周某事。其因皆緣誤釋此二語。與虞翻之誤解不可爲典要。唯變所適。浪用卦變爻變同也。易平易也。危者使平。如否上先否後喜是也。易者使傾。如泰上城復于隍是也。

夫乾天下之至健也。德行恆易以知險。夫坤天下之至順也。德行恆簡以知阻。能說諸心。能研諸侯之慮。定天下之吉凶。成天下之亹亹者。

居易不忘險。行簡知有阻。阻險阻也。知有險阻。然後可免於患難。能研諸慮。諸下衍侯之二字。亹亹王肅云勉也。

是故變化云爲。吉事有詳。象事知器。占事知來。天地設位。聖人成能。人謀鬼謀。百姓與能。

詳祥音同通用。朕兆也。言吉凶必有先兆也。象事知器。此言占驗之事。如郭璞洞林。遇兌知有銅鐸。遇坎知有銅鐸六枚也。唯聖人能盡天地之性。故曰成能。人謀鬼謀。言易道深至。百姓與能。言

其庸近。所謂夫婦之愚可以與知也。

八卦以象告。彖象以情言。剛柔雜居。而吉凶可見矣。變動以利言。吉凶以情遷。是故愛惡相攻而吉凶生。遠近相取而悔吝生。情僞相感而利害生。凡易之情。近而不相得則凶。或害之。悔且吝。

凡萬物之象。皆包括於八卦之中。筮得某卦。必有四象。上下卦並上下互是也。至於卦爻辭則明卦情。占者以象爲本。以情爲用。如公子完生。筮得觀之否。觀上風下地。而坤爲國。互艮爲山。告之以象矣。觀國之光。利用賓于王。爻則言其情也。變動以利言。如觀六四動成乾。風爲天於土上。愈變而利愈明。益動而其情益吉。故曰變動以利言。吉凶以情遷。攻摩也。愛惡相攻卽剛柔相摩也。陽遇陰陰遇陽則相求相愛。復朋來无咎。革六二征吉是也。陽遇陽。陰遇陰。則相敵相惡。如頤六二行失類。征凶。鼎九二慎所之是也。愛則吉。惡則凶。故愛惡相攻而吉凶生。遠近相取而悔吝生者。遠謂應。近謂比。例如同人六二。遠取五爲正應。近又比三。故吝。咸六二亦然。故遠近不能兼取。中孚六四曰絕類上。近取也。近取上則不遠取初。故曰馬匹亡也。情者陽。僞者陰。陰陽相感。有利有害。絕不相同。例如益初九感四則利。上九感三。則五爲敵而害之矣。下曰近而不相得則凶。或害之。正申其故也。

將叛者其辭慙。中心疑者其辭枝。吉人之辭寡。躁人之辭多。誣善之人其辭游。失其守者其

辭屈。

荀爽以易辭爲解。虞翻謂指六子。按易之本在乾坤。而其用在六子。虞氏之說。似爲得之。以六子測人之情僞。不得於此必於彼。無有遁形矣。故於下繫終言之。示人以涉世之方。離正覆兌相反。叛者反也。而中虛。故其辭慙。坎上下兌口相背。故疑。坎爲中爲心。故曰中心疑。水性枝溢。故其辭枝。震爲言。震反爲艮。故言寡。艮爲人。艮止而靜。故曰吉人。震爲決躁。似兌而長舌。故辭多。兌爲口舌。陰掩陽。故曰誣善。柔乘剛。故其辭游。風進退不果。故失其守。陰伏在下。故其辭屈。

周易尚氏學卷二十

說卦

昔者聖人之作易也。幽贊於神明而生著。參天兩地而倚數。

案參兩之說。先儒不同。馬融王肅。並云天數五。地數五。五位相合。以陰從陽。天得三合。謂一三與五也。地得兩合。謂二與四也。鄭玄云。天地之數。備於十。乃參之以天。兩之以地。而倚託大衍之數五十也。必三之以天。兩之以地者。天三覆。地二載。必極于數。庶得吉凶之審。虞翻云。謂分天象爲三才。以地兩之。立六畫之數。倚。馬融訓依。虞王訓立。按參兩者乃數之本原。馬王謂一三五爲參天。二四爲兩地。夫一二三四五乃生數。故數止于五。五數既立。以此爲本。加一爲六。二爲七。三爲八。四爲九。而著數乃出。然則六七八九之成數。皆原於一二三四之生數。故曰倚數。言數皆依此立也。馬王之說是也。天奇地耦。大衍五十。兩地也。用四十有九。參天也。分二。兩地。挂一參天。揲四兩地。歸奇參天。三變得三奇。三三而九。參天也。三變得三耦。一一得六。兩地也。三變而兩奇一耦。則爲八。兩地也。兩耦一奇則爲七。參天也。蓋欲知來。必先極數。而極數之法。必參兩回互。以

此爲本也。

觀變於陰陽而立卦。發揮於剛柔而生爻。和順於道德。而理於義。窮理盡性以至於命。昔者聖人之作易也。將以順性命之理。是以立天之道。曰陰與陽。立地之道。曰柔與剛。立人之道。曰仁與義。兼三才而兩之。故易六畫而成卦。分陰分陽。迭用柔剛。故易六位而成章。

一三五陽。二四六陰。柔爻居陰位。剛爻居陽位。則當位。否則失位。以此爲用。虞翻曰。和順謂坤。道德謂乾。以乾通坤。謂之理義。以乾推坤。謂之窮理。以坤變乾。謂之盡性。性盡理窮。故至于命。巽爲命也。

天地定位。山澤通氣。雷風相薄。水火不相射。八卦相錯。數往者順。知來者逆。是故易逆數也。

此先天卦位也。天地定位。言乾位南坤位北也。薄入也。射厭也。錯雜也。交也。言八卦方位。陽錯陰。陰錯陽。無一卦不相對。無一爻不相交也。此純指先天八卦之方位形式。故特申之曰八卦相錯。太玄玄告準說卦者也。玄告云天地相對。日月相剋。山川相流。輕重相浮。又曰南北定位。東西通氣。萬物錯處于其中。按天地相對。南北定位。卽謂乾南坤北也。曰日月相會。東西通氣。謂離東坎西也。天地水火。四正卦也。曰山川相流。輕重相浮。萬物錯處于其中。卽謂四隅卦也。正釋此也。又乾鑿度曰。其位也天在上。地在下。君南臣北。父坐子伏。易若以坤西南乾西北爲定位。尙得謂天在

上。地在下乎。尙得謂君南臣北乎。當然別有所指。乾鑿度又云。天地之道立。山澤雷風水火之象定矣。其散布用事也。震生物于東方。離長之于南方。兌收之于西方。坎藏之于北方。與下帝出乎震之方位同。夫曰散布用事。則震東兌西。離南坎北。未用事之先。不在此也明矣。乾鑿度于乾南坤北。變爲離南坎北之故。言之可謂悉矣。數往者順。謂四陽卦。知來者逆。謂四陰卦。陽性強健其動直。自內往外。順行。故曰數往者順。陰性斂齊閉藏。自外來內。逆行。故曰知來者逆。逆迎也。陽往陰來。自然相遇。相遇然後相交。易道乃成。故曰易逆數也。言陽逆陰。陰逆陽。故能定位通氣相薄不相射也。此仍言八卦相錯之理。相錯故陰陽能相逆。不相錯則陰自陰陽自陽。胡能相值而相交哉。雷以動之。風以散之。雨以潤之。日以暄之。艮以止之。兌以說之。乾以君之。坤以藏之。

匹耦對舉。與前節位同。不過先六子後父母耳。

帝出乎震。齊乎巽。相見乎離。致役乎坤。說言乎兌。戰乎乾。勞乎坎。成言乎艮。

馬國翰曰。此連山易文。見于寶周禮注引。按此言後天卦位。周易用之。恐人不知。故下節即連山易文。逐字逐句。而詳釋其義。並明指其方位。以見與上文所言方位。絕不同也。帝神也。卽主宰萬物者也。舊解皆忽畧下節乃解釋此節。致此節皆成贅文。

萬物出乎震。震東方也。齊乎巽。巽東南也。齊也者。言萬物之潔齊也。離也者明也。萬物皆相見。南方之卦也。聖人南面而聽天下。嚮明而治。蓋取諸此也。坤也者地也。萬物皆致養

焉。故曰致役乎坤。兌正秋也。萬物之所說也。故曰說言乎兌。戰乎乾。乾西北之卦也。言陰陽相薄也。坎者水也。正北方之卦也。勞卦也。萬物之所歸也。故曰勞乎坎。艮東北之卦也。萬物之所成終而所成始也。故曰成言乎艮。

歸藏也。至冬則萬物皆歸命於坎。故曰勞卦。坤象傳云。乃終有慶。終謂亥。萬物終於亥。艮先天居之。故曰成終。萬物生于寅。艮後天居之。故曰成始。其以丑爲歲終。寅爲歲始。說此者雖巧合。然違易理。易之計歲。以冬至爲界。過冬至兩月。而猶曰終萬物可乎。

神也者。妙萬物而爲言者也。動萬物者。莫疾乎雷。撓萬物者。莫疾乎風。燥萬物者。莫燥乎火。說萬物者。莫說乎澤。潤萬物者。莫潤乎水。終萬物始萬物者。莫盛乎艮。故水火相逮。雷風不相悖。山澤通氣。然後能變化既成萬物也。

來知德曰。此專明六子之功用。然孤陽孤陰。不能生物。必依先天卦位。使六子相錯相交。然後能變化既成萬物也。

乾健也。坤順也。震動也。巽入也。坎陷也。離麗也。艮止也。兌說也。

此言八卦之性情。

乾爲馬。坤爲牛。震爲龍。巽爲雞。坎爲豕。離爲雉。艮爲狗。兌爲羊。

此所謂遠取諸物。巽爲雞。九家云。應八風也。風應節而變。變不失時。雞時至而鳴。與風相應。杭辛

齋曰。雞善伏。按巽爲伏。然上兩解皆未必協。則謂其義至今未明可也。兌爲羊。純取其形似。舊解謂羊性狠者非也。

乾爲首。坤爲腹。震爲足。巽爲股。坎爲耳。離爲目。艮爲手。兌爲口。

此近取諸身。坎腎也。故爲耳。經以兌爲耳。皆取其形。舊解謂坎北方屬腎。腎主耳。又謂坎北方主聰。故爲耳。皆非。以上二十四象。昔人謂之本象。

乾天也。故稱乎父。坤地也。故稱乎母。震一索而得男。故謂之長男。巽一索而得女。故謂之長女。坎再索而得男。故謂之中男。離再索而得女。故謂之中女。艮三索而得男。故謂之少男。兌三索而得女。故謂之少女。

索求也。陰與陽互相求。文言曰。同聲相應。同氣相求。是也。陽求陰得三男。陰求陽得三女。而以初中上三爻爲次序。實經之所用。不與盡同。如隨以震爲小子。艮爲丈夫。大過以巽爲女妻。以兌爲老婦。與此正相反。蓋以二人言。先生者爲長。次爲幼。而以一人言。則初爻爲幼。至上而老矣。此其理除焦氏易林外。餘无知者。易林以兌爲老婦。巽爲少齊。初讀之皆莫明其義。後乃恍然知其悉本於易也。朱子謂說卦之象。求之於經。亦不盡合。誠哉其有不合。蓋說卦乃自古相傳之象。至周易愈演愈精。故經所用象。不盡與說卦同。虞翻等必執說卦以解經。至大過創爲二應上。初應五之惡例。以求其合。其誤遂不可言矣。

乾爲天。爲圓。爲君。爲父。爲玉。爲金。爲寒。爲冰。爲大赤。爲良馬。爲老馬。爲瘠馬。爲駁馬。爲木果。爲龍。爲直。爲衣。爲言。依九家本增。下同

金玉象其純粹。西北不周風。陰寒之地。故爲寒冰。乾舍於離。南方火。故爲大赤。乾健故爲馬。凡物皆有初壯究。故由良馬而老而瘠而駁。木果形皆圓。无他義。其以駁爲食虎豹之獸。或又本陸機詩疏。謂駁爲木皆非。乾上故爲衣。

坤爲地。爲母。爲布。爲釜。爲吝嗇。爲均。爲子母牛。爲大輿。爲文。爲衆。爲柄。其於地也爲黑。爲牝。爲迷。爲方。爲囊。爲裳。爲黃。爲帛。爲漿。

坤德徧布萬物以致養。故爲布。外府注云。布泉也。凡錢藏者曰泉。行者曰布。取名於水泉。其流行無不徧。按此本爲水。故象泉布。萬物資地成熟。故爲釜。坤閉故吝嗇。不擇而生故爲均。坤爲牛。地生生不已。今之童牛。不日又生子而爲母矣。故爲子母牛。萬物依之爲本故爲柄。坤文故爲帛。坤爲水。故爲漿。

震爲雷。爲龍。爲玄黃。爲專。爲大塗。爲長子。爲決躁。爲蒼筤竹。爲萑葦。其於馬也爲善鳴。爲馵足。爲作足。爲的顙。其於稼也爲反生。其究爲健。爲蕃鮮。爲玉。爲鵠。爲鼓。

龍駢通。而駢與虬通。說文虬多毛犬也。鄭作虬。云取日出色。虞作駢。云蒼色。案周禮秋官夫人。掌犬牲。凡幾珥沈辜用駢。注。故書駢作龍。疏雜色性。卽雜色犬牲也。又春官牧人職。用駢。御史職駢

車。注皆云。故書駢作龍。是駢古作龍。清儒依虞說。多從駢。豈知龍駢音同通用。龍卽駢。非誤字也。特詰爲龍或祇詰爲雜色。不詰爲犬牲則誤耳。又易林夬之屯云。龙吠有威。行者留止。巽寡髮。震多毛。震爲威。爲鳴。故爲龙。是鄭讀與焦同。專干寶云。專爲花貌。易林亦以震爲花。此象卦形。餘說皆誤。九家云蒼筤青也。震爲周爲虛。歸妹上六承虛筐也竹與萑葦皆有節。下陽象之。上二陰象其圓而中空。馬足白爲馬。陽在下故足白。的類白顛也。初陽生。故曰反生。宋衷曰。陰在上。陽在下。故爲反生。謂臬豆之類。皆戴甲而生。按宋注最爲精切。格物入微。取象之妙入微。而經生知之者寡。陽息至三。乾健。反復成巽。巽爲垣墉。故爲蕃。蕃藩通。詩小雅營營青蠅。止于蕃。是也。巽爲寡。故爲鮮。詩終鮮兄弟。傳鮮寡也。玉色白或青。故爲玉。有謂爲王之訛者。證以易林象。非也。鶴鶴古通。爲聲音故爲鼓。

巽爲木。爲風。爲長女。爲繩直。爲工。爲白。爲長。爲高。爲進退。爲不果。爲臭。其於人也爲寡髮。爲廣顙。爲多白眼。爲近利市三倍。其究爲躁卦。爲楊。爲鶴。

陸績云。風。土氣也。巽坤之所生。故爲風。故易林亦以坤爲風巽柔故爲繩。巽風故直。工。說文巧飾也。象人有規矩。徐鍇曰。爲巧必遵規矩法度。然後爲工。按巽爲順。能順規矩。遵循法度。故爲工。風可進可退。故不果。經歷以巽爲疑。同此也。臭。氣也。風散則氣至。故爲臭。巽隕落。故寡髮。震爲髮。反巽故寡髮。廣顙取上二陽象。多白眼。按離爲目。中爻陰。黑睛。上下陽目中之白。今二陽皆在上。

睛伏在下。故多白眼。利市三倍。似取流通。或取入義。究爲震。故曰躁卦。

坎爲水。爲溝瀆。爲隱伏。爲矯輳。爲弓輪。其於人也。爲加憂。爲心病。爲耳痛。爲血卦。爲赤。其於馬也。爲美脊。爲亟心。爲下首。爲薄蹄。爲曳。其於輿也。爲多眚。爲通。爲月。爲盜。其於木也。爲堅多心。爲宮。爲律。爲可。爲棟。爲叢棘。爲狐。爲蒺藜。爲桎梏。

爲隱伏。爲憂。爲心病。爲美脊。爲亟心。爲通。爲堅多心。皆以陽在陰中而取象。以乾闢坤。故爲溝瀆。曲者使直爲矯。直者使曲爲輳。水性可曲可直也。可曲故可爲弓輪。水在地。猶人之有血。乾大赤。坎得乾之中爻。故亦爲赤。月者水之精。故坎爲月。爲憂故下首。下首猶低頭也。坎隱伏。故爲盜。坎爲屋極。故爲宮。爲棟。坎陽在中。健而直。故爲棘。爲蒺藜。坎陽陷陰中。不能移動。如法律之固定。如桎梏之在手足。故爲法律。爲桎梏。

離爲火。爲日。爲電。爲中女。爲甲冑。爲戈兵。其於人也。爲大腹。爲乾卦。爲鼃。爲蟹。爲羸。爲蚌。爲龜。其於木也。爲科上槁。爲牝牛。

取火之明。故爲日爲電。中虛故爲大腹。餘象皆取外堅。離中枯故科上槁。經皆以艮爲龜。亦外堅故。

艮爲山。爲徑路。爲小石。爲門闕。爲果蓏。爲閭寺。爲指。爲狗。爲鼠。爲黔喙之屬。其於木也爲堅多節。爲鼻。爲虎。爲狐。

震爲大塗。反之則爲徑路。爲山。故爲石。外堅故也。門闕闔寺皆象形。指能屈伸制物。與手同義。故爲指。狗。虞翻云。上已有狗。當爲拘字之誤。按拘亦音鉤。禮曲禮若僕者降等則自下拘之。注拘取之也。釋文。拘古侯反。是拘與狗音同。故通用。而其義爲取。仍由手取象。狗拘亦猶龍驪羊陽之通用。不可謂龍羊之爲誤字也。凡經書字如此者。必有其故。詳細推考。自能得其故。不必遽爲改字。艮爲穴。鼠穴居。故爲鼠。黔喙。易林作黔啄。說文啄口也。啄鳥食也。馬鄭皆謂爲虎豹之屬。實虎豹无黔喙者。若啄則專屬之鳥。鳥之剛在喙。艮剛在上。故爲黔喙。凡鳥之驚者。无不黔啄。易林以艮爲鷹鸛鵬隼。本此也。剛在外故堅多節。鼻者面之山。故艮爲鼻。乾爲虎。艮得乾上爻。故亦爲虎。狐穴居故亦爲狐。

兌爲澤。爲少女。爲巫。爲口舌。爲毀折。爲附決。其於地也。爲剛鹵。爲妾。爲羊。爲常。爲輔頰。

巫以口舌用事。故爲巫。上缺故爲毀折。陰下附於陽。故爲附。爻絕於上故爲決。兌之附決。猶巽之進退也。朱仰之云。地不生物曰剛鹵。按釋名地不生物曰鹵。左傳襄三十五年楚子木使表淳鹵。注淳鹵塉薄之地。蓋剛者地不柔和。鹵者磽确。故不生物。與毀折義合。許慎謂鹵爲西方鹹地。非也。兌爲少女故爲妾。兌爲羊。鄭謂羊養音同通用。養炊婦。更賤于妾。似較虞作羔爲近。輔頰取卦形。常。九家云西方神也。

右所增象。依九家本。漢人注經。十八九皆用之。何逸之有。先儒以他本皆无。獨九家有之。不敢列入。乃謹慎之意。豈知經若本无。九家何敢擅增。況證以易林及漢魏人注。幾人人知之。爲說經者所不可離。不得名曰逸象。經文之字。各本多寡異同者多矣。茲何足異。故揀擇而從則可。謂爲逸象。則名不副實。

序卦

上經始乾坤。終坎離。而以否泰爲樞紐。下經始咸恆。終既未濟。而以損益爲樞紐。其間次序。皆有深意。聖人慮後世妄人。或有亂其卦序者。故爲此以綰轂之。其意義可不深求也。

有天地然後萬物生焉。盈天地之間者唯萬物。故受之以屯。屯者盈也。屯者物之始生也。物生必蒙。故受之以蒙。蒙者蒙也。物之穉也。物穉不可不養也。故受之以需。需者飲食之道也。飲食必有訟。故受之以訟。訟必有衆起。故受之以師。師者衆也。衆必有所比。故受之以比。比者比也。比必有所畜。故受之以小畜。物畜然後有禮。故受之以履。履而泰。然後安。故受之以泰。泰者通也。物不可以終通。故受之以否。物不可以終否。故受之以同人。與人同者。物必歸焉。故受之以大有。大者不可以盈。故受之以謙。有大而能謙必豫。故受之以

豫。豫必有隨。故受之以隨。以喜隨人者必有事。故受之以蠱。蠱者事也。有事而後可大。故受之以臨。臨者大也。物大然後可觀。故受之以觀。可觀而後有所合。故受之以噬嗑。嗑者合也。物不可以苟合而已。故受之以賁。賁者飾也。致飾然後亨則盡矣。故受之以剝。剝者剝也。物不可以終盡。剝窮上反下。故受之以復。復則不妄矣。故受之以无妄。有无妄然後可畜。故受之以大畜。物畜然後可養。故受之以頤。頤者養也。不養則不可動。故受之以大過。物不可以終過。故受之以坎。坎者陷也。陷必有所麗。故受之以離。離者麗也。

離麗者。言一陰麗於二陽之間。

有天地然後有萬物。有萬物然後有男女。有男女然後有夫婦。有夫婦然後有父子。有父子然後有君臣。有君臣然後有上下。有上下然後禮義有所錯。夫婦之道指咸卦不可以不久也。故受之以恆。恆者久也。物不以久居其所。故受之以遯。遯者退也。物不可以終遯。故受之以大壯。物不可以終壯。故受之以晉。晉者進也。進必有所傷。故受之以明夷。夷者傷也。傷於外者。必反其家。故受之以家人。家道窮必乖。故受之以睽。睽者乖也。乖必有難。故受之以蹇。蹇者難也。物不可以終難。故受之以解。解者緩也。緩必有所失。故受之以損。損而不已必益。故受之以益。益而不已必決。故受之以夬。夬者決也。決必有所遇。故受之以姤。姤

者遇也。物相遇而後聚。故受之以萃。萃者聚也。聚而上者謂之升。故受之以升。升而不已必困。故受之以困。困乎上者必反下。故受之以井。井道不可不革。故受之以革。革物者莫若鼎。故受之以鼎。主器者莫若長子。故受之以震。震者動也。物不可以終動。止之。故受之以艮。艮者止也。物不可以終止。故受之以漸。漸者進也。進必有所歸。故受之以歸妹。得其所歸者必大。故受之以豐。豐者大也。窮大者必失其居。故受之以旅。旅而无所容。故受之以巽。巽者入也。入而後說之。故受之以兌。兌者說也。說而後散之。故受之以渙。渙者離也。物不可以終離。故受之以節。節而信之。故受之以中孚。有其信者必行之。故受之以小過。有過物者必濟。故受之以既濟。物不可窮也。故受之以未濟終焉。

伏羲未定婚禮以前。人皆知有母。不知有父。故曰有夫婦然後有父子。節者符也。以竹爲之。各持其一。合之以爲信。周禮地官掌節是也。物不可終離。故受之以節。節之用在合。故與離對文。合而符則信。故曰節而信之。全指符節言。舊解皆誤。

雜卦

十翼以雜卦終。與六十四卦以未濟終義同也。蓋六十四卦卦序皆文王所定。其起訖皆有深義不可

動搖。然易道以不窮爲義。六十四卦至既濟而六爻定。定則窮矣。故殿以未濟。使之復通。六十四卦。上經始天地。下經始夫婦。此不易者也。故雜卦仍之。而以井困居上經之末。以損益爲樞紐。以未濟夬居下經之末。以否泰爲樞紐。損益否泰。後先互易。明文王之意。先天道。後人事。孔子之意。先人事。後天道也。先人事。井取其不窮。困而不失其亨。故以爲上經之殿。聽天道。則事之濟不濟命也。剛健果決。自強不息。終焉以赴之耳。故以未濟夬終。仍窮變通久之義也。謂之爲雜者。言雜糅各卦。使上下經互易。不與文王卦序同。非孔子不敢有此改作。亦非孔子無此神化之筆也。彼七十二賢固不敢創制如斯也。

以上所言。雜卦殿十翼之義也。至其所言。必錯綜對舉者何也。以見卦象正則如此。反則如彼也。正象說卦舉其端。說卦所未言者。可類推也。至覆象則无言者。然如大過九五枯楊。人尙知爲反巽。獨正覆象相雜。如蒙匪我求童蒙。童蒙求我。初筮告。再三瀆。瀆則不告。則以二至上。正反震也。如左傳以謙爲敗言。則以謙下艮。與震相反也。如困曰有言不信。則以三至上。正覆兌也。如震曰婚媾有言。則以二至上正覆震相背也。如中孚曰鶴鳴子和。則以二至五正反震相對。如相應也。鳴鶴在陰者。則以二至五正反艮。正則爲山陽。反則爲山陰也。又六三云。或鼓或罷。或泣或歌。則以二至五正反艮震。震則或鼓或歌。艮則或泣或罷也。如此之類。經內甚多。除焦氏易林外。二千年說者无不誤。夫子蓋預知之。故於最後之雜卦申其義。

乾剛坤柔。比樂師憂。

比五雖坎。然當位居尊。故樂。師二入淵。故憂。

臨觀之義。或與或求。

臨二陽撫臨萬民。有施惠之意。震往。故曰與。反之爲觀。則萬民仰五。有乞求之意。故曰求。艮爲求也。

屯見而不失其居。蒙雜而著。

屯二陽皆當位。故不失其居。蒙二陽皆失位。故曰雜。物相雜則文生。故曰著。

震起也。艮止也。損益盛衰之始也。

震動故起。反則止矣。泰損下一陽以益上。故損爲衰之始。再三損則成否。否移上一陽以益下。故益爲盛之始。再三益則成泰。

大畜時也。无妄災也。

王引之云。古時與待通。恐天災至。畜以待饑。義本坤靈圖。无妄互艮。艮爲火。故災。焦京皆以无妄爲大旱卦。自艮火象失傳。虞氏卽不知其義。

萃聚而升不來也。謙輕而豫怠也。

陽上升。故不來。謙不自滿。故輕。豫自足。故怠。怠虞作怡。按怠怡皆從心。本一字。故古常通用。史

記始皇本紀。視聽不怠。劉歆烈女贊。言行不怠。注并作怡。怡則自足。與謙輕反。

噬嗑食也。賁无色也。兌見而巽伏也。

頤中有物。故曰食。火在山下。與明夷同。故曰无色。兌陰在上故曰見。巽陰在下故曰伏。故巽亦爲盜賊。爲寇戎。爲豕。與坎同象。

隨无故也。蠱則飭也。剝爛也。復反也。晉晝也。明夷誅也。

志在隨時。不執其故。廣韻。飭整備也。蠱則飭者。亂極思治也。爛自姤始。至剝而極。復則陽反。日在上故晝。誅傷也。明傷則夜矣。

井通而困相遇也。

井養而不窮。故通。困剛掩。陽陷陰中。不通。

自乾坤至此仍三十卦。合上經數。自咸恆至夬。仍三十四卦。合下經數。

咸速也。恆久也。渙離也。節止也。

感則无遠近。无弗屆。故事莫速於感。反之爲恆。則不速而久。渙者散也。故曰離。反之爲節。則合而不離。故曰止。

解緩也。蹇難也。睽外也。家人內也。

緩則和矣。和則易矣。反之則難。睽離女在上卦。故曰外。反之在內。故曰內也。

否泰反其類也。

陰陽交爲類。否陰交陽。泰陽交陰。故曰反。

大壯則止。遯則退也。大有衆也。同人親也。

止則不退。反之則退。衆則不親。反之則親。

革去故也。鼎取新也。小過過也。中孚信也。

革更改舊有。故曰去故。鼎亨飪待熟。故曰取新。過失也。失則不信。反之則信。

豐多故也。親寡旅也。離上而坎下也。

多與寡相反。上與下相反。豐雷電皆至故多。旅互巽爲寡。艮爲鰥。故親寡。火炎上。水潤下。

小畜寡也。履不處也。需不進也。訟不親也。

小畜巽爲寡。履者行也。故不處。需險在前。故不進。訟天水違行。故不親。寡則獨處。反之則不處。

矣。不親則異行。與需之不行。亦正相反。

大過顛也。姤遇也。柔遇剛也。

顛隕也。下巽隕落。頂滅澤中。故顛。姤坤遇乾。乾剛坤柔。

漸女歸待男行也。頤養正也。既濟定也。

漸陰皆居陽後。故待男行。頤求口食。得養之正。既濟六爻當位而止其所。故曰定。

歸妹女之終也。未濟男之窮也。

女終夫家。故以嫁爲終。既濟三陽皆比陰。內剛外柔。與泰理同。故不窮。未濟三陽皆居陰前。內柔外剛。與否理同。故窮。程子謂三陽不當位故窮。豈知三女亦不當位。豈獨三男。然而不窮者。以三女皆承陽也。程子謂求之多年。不得其義。後得之於成都籩桶者。蓋託辭也。

夬決也。剛決柔也。君子道長。小人道憂也。

沈善登云。雜卦以乾剛坤柔始。以夬剛決柔。還復爲乾終。是舉全易渾成一乾。按此說最得夬卦居終之義。自大過以下。不兩卦反對。宋儒頗疑爲錯簡。然曰女之終。男之窮。上下對文。似非錯簡。惟義仍反對。大過死。反之則得養。姤柔遇剛。反之則剛決柔。漸女有待而行。反之則不待而嫁矣。既濟定。窮則不定。雖不對舉。而義仍反對。虞翻謂大過死。大過下姤。故次以姤。上夬故以夬終。亦可參考。

附錄

左傳國語易象釋

緒言

易之爲書。以象爲本。故說卦專言象以揭其綱。九家逸象孟氏逸象一再引其緒。而象學宏深博大之義。唯繫辭能發揮之。繫辭云。易者象也。八卦成列。象在其中矣。是故夫象。聖人有以見天下之賾。而擬諸其形容。象其物宜。故謂之象。象也者。像此者也。按像此者。不惟萬物像之。卽萬事亦无不像之。說卦所言。乾健坤順諸事是也。故又曰象事知器。又曰立象以盡意。蓋天下萬物萬事之意。无不包涵於易象之中。故能盡意。此言立象之本也。所本維何。本於仰觀俯察也。又曰聖人設卦觀象。繫辭焉而明吉凶。夫曰觀象繫辭。則今之易辭。固皆古聖人瞪目注視卦象而爲者也。易之卦爻辭。旣由象而生。後之人釋卦爻辭。而欲離象。其不能識卦爻辭爲何物。不待智者而決矣。朱子云。先見象數。方說得理。不然事无實證。虛理易差。惜哉此種定識。在其晚年。於其本義无補也。繫辭又云。八卦以象告。辭而吉。非繫辭者命

其吉也。辭而凶。亦非繫辭者命其凶也。皆象所告。不得不然也。又有上句吉。下句忽凶。上句方說甲。下句忽說乙。此尤非繫辭者語。无倫次如是也。亦易象所告。不得不然也。設使繫辭者。專務怪奇。而不觀象。不有類顛狂乎。易安得與他經並列。使孔聖學之終身乎。朱子云。古聖王以詩書禮樂教世。而不及易。看來別是一箇道理。某枉費許多年工夫。此等徹悟。此等認識。爲二千年以來所未有。且不自護其非。真不欺之大儒也。而後之解易者。其觀察往往與他經同。胡能合乎。蓋易之爲學。至王弼爲一轉關。王弼以前注易者。无不言象。而焦氏易林。則无一字不從象生。且於易用正象用覆象伏象之法。无不依樣揭出。雖不明注易。愚以爲能注易者。莫詳於焦氏也。再溯之春秋人言易者。亦无一字不根於象。且於易用正用互用覆之法。亦无不依樣揭出。而以謙爲譏。爲有言。於是周易正覆象並用之妙。爲二千年人所誤解者。遂劃然冰釋。開易林神妙之門。處處取法。自王弼掃象。避難就易。學者喜之。其道大行。漸不識易爲何物。至有宋演爲空談。而易遂亡矣。故夫自王弼以來。无論其談老莊。言王道。說聖功。不以象解易者。皆與繫辭背馳者也。其唐之李鼎祚。宋之朱漢上。吳草廬。明之來矣鮮。及清之講漢易者。无論其詳略深淺。皆能認識易象。語不離宗。與繫辭所言之大本大源相合者也。此其大略也。其漢人易象注解之者。有李道平之周易集解疏。焦氏易林愚曾注之。其春秋人談易象者。盡在左氏國語。恨其注不能解。或解之而誤。拙輯焦氏易詁。曾略及之。而不全。茲再以次注之。以爲象學之助。

一 筮公子完生

莊三十二年。陳公子完奔齊。其少也。周史有以周易見陳侯者。使筮之。遇觀三三之否三三。曰是謂觀國之光。利用賓于王。

觀六四動。故取六四爻詞以爲占。左氏恆例也。坤爲國。互艮爲觀、爲光。故曰觀國之光。巽爲利、爲賓客。乾爲王。故曰利用賓于王。艮爲觀、爲光象皆失傳。詳焦氏易詁。

此其代陳有國乎。不在此。其在異國。非此其身。在其子孫。光遠而自他有耀者也。

遇卦爲貞。貞我。之卦爲悔。悔彼。故遇卦之坤爲陳國。之卦之坤爲異國。而之卦有乾。乾爲大爲君。故知其將代陳有國。坤爲身。非此其身者。言所應不在遇卦。艮爲子孫。在其子孫者。言所應在之卦也。乾爲遠、爲大明。故曰耀。乾在之卦。故曰自他。

坤土也。巽風也。乾天也。風爲天、於土上。山也。有山之材。而照之以天光。居土上。故曰觀國之光。利用賓於王。

巽變乾。故曰風爲天。在坤上。故曰於土上。遇卦三五之卦二四。皆互艮。故曰山。巽爲木。故曰材。之卦乾在上。故曰照之以天光。乾爲王。巽之乾。故有朝王之象。

庭實旅百。奉之以玉帛。天地之美具焉。故曰利用賓於王。

艮爲庭。庭實者。言諸侯朝王。貢獻品物。陳列於王庭也。坤爲品物。與艮連。故曰庭實。旅衆也。詩小雅。旅力方剛。毛傳。旅衆。又書牧誓。亞旅。傳亦訓旅爲衆。旅百者。言庭實衆多也。坤爲衆。爲百。爲帛。乾爲玉。艮手。故曰奉之以玉帛。否上天下地。故曰天地之美具。

猶有觀焉。故曰其在後乎。

此下杜注孔疏。皆不能釋其義。而誤測。猶有觀者。言之卦初至五。仍風地觀。故曰猶有觀。其在後者。言所應在之卦也。

風行而著於土。故曰其在異國乎。

遇卦有坤。之卦仍有坤。坤爲國。貞我悔彼。故之卦之坤爲異國。

若在異國。必姜姓也。姜大嶽之後也。

巽爲齊。故爲姜。猶震爲周。亦爲姬也。艮爲山嶽。因遇卦之卦皆有巽。故決其在姜姓之國。又皆有艮嶽象。爲姜所自出。故益知其爲姜也。

山嶽則配天。物莫能兩大。陳衰此其昌乎。

艮與乾連。故曰山嶽配天。坤爲國。遇卦之坤陳國也。之卦之坤異國也。乾爲大。之卦有乾。而遇卦无乾。故曰物莫能兩大。而遇卦上爲巽。巽隕落。故曰陳衰。之卦上乾。乾爲大爲昌。故曰此昌。後之人昌言易理。而憚於觀象。于是詫此筮爲神異者有之。謂左氏事後造作此筮者有之。豈知周史所

談。皆卦象所明示。彼不過觀象深。用象熟。故有此微悟耳。豈有其他技巧哉。自野文出。象學隱。哆口空談。以輔嗣伊川爲宗主。豈知皆避難就易之一念誤之也。觀左氏所談。可恍然矣。

按此筮爲言互卦之祖。但互艮杜注知之。之卦互巽。卽不詳。故誤解猶有觀三字。此句旣誤解。於是陳襄此昌。卦象所明示者。遂不能察其所以然之故。而哆口談空者。遂妄疑之矣。又爲五字互之祖。否初至五仍爲觀。故曰猶有觀。後儒謂一卦互八卦。觀此其例亦創于左氏也。

二 筮畢萬仕晉

閔元年。初。畢萬筮仕於晉。遇屯三三之比三三。辛廖占之曰。吉。屯固比入。吉孰大焉。其必蕃昌。

按杜注云。屯險難。所以爲堅固。比親密。所以得入。皆浮泛。於卦象不切。屯固者。因初至五。正反皆艮。艮爲堅。故曰固。卽坎彖傳云。天險不可升。地險丘陵。王公設險。以守其國。其義亦在坎中爻之正覆艮。故曰丘陵。坎二至五。與屯初至五同也。比入者。言陽入居坤五。五尊位。入居之。故下云蕃昌。杜注言親密所以得入。誰入乎。詰太疏矣。

震爲土。車從馬。足居之。兄長之。母覆之。衆歸之。

震變坤。故曰爲土。故曰從馬。震爲足、爲兄、爲長子。坤爲母、爲衆。震爲歸。此六句杜注皆當。惟屯

爲遇卦。遇卦貞也。貞爲我、見在也。比爲之卦。之卦悔也。悔爲後來。以見在之兄長。變而爲衆歸母覆之象。而坤爲土地。則後此之有國。可斷言也。

六體不易。合而能固。安而能殺。公侯之卦也。公侯之子孫。必復其始。

此下杜注皆誤。坎數六。遇卦之卦皆有坎。居五位。故曰六體不易。杜注謂六體。指上六義。非也。上六義何謂不易乎。不易者。坎始終不變也。坎爲合。合而能固。謂屯也。坤爲安爲殺。安而能殺。謂比也。杜注謂震爲殺。震爲武則國語有明文。爲殺則无此易象也。孔疏引左傳昭二十五年。子太叔對趙簡子云。爲刑罰威獄。以類其震曜殺戮。據是謂震爲殺戮。豈知子太叔乃論禮之言。非謂震有殺戮之象。震曜殺戮。平列二義。胡得卽以震爲殺乎。益支離矣。震爲公爲諸侯。故曰公侯之卦。震變坤。坤爲國。則諸侯有國之象也。故曰公侯之子孫。必復其始。震爲復、爲子。艮爲孫。公侯之子孫者。以萬爲畢公高之後。復始者。言又將爲公侯。此皆據之卦而推及其後。與周史據之卦否。推公子完之於齊。一理也。稍明卦象者。皆足知之。稍知貞悔之義者。皆能斷之。乃野文家不知卦象。如耳提面命。而總疑其造作也。如之何哉。

三 筮季友生

閔二年。成季之將生。筮之。遇大有三三之乾三三。曰同復於父。敬如君所。及生。有文在

其手。曰友。遂以命之。

按大有之乾。是離變乾也。乾爲君爲父。故曰同於父。敬如君。此杜注之所釋也。而傳文復曰所曰復何哉。所者位也。復者復其君父之位也。因乾位南。離亦位南。故人之敬離位。同於乾位也。乾若不在南。但言敬如君可矣。胡言所乎。此先天乾南之確證。爲易林之所本。彼夫不承認乾南者。於所字如何釋乎。況九家及荀爽。皆言乾舍於離。如何能滅其證。清惠棟謂荀爽用鬼易。以乾歸合離爲解。夫京房所謂鬼易。於乾南何涉。又乾之歸魂爲大有。而荀所注者爲同人。於乾歸何涉。乃惠氏若一言鬼易。言歸魂。學者卽茫然不解爲何物。便可滅此先天之確證。亦徒自形其誤耳。

四 秦筮與晉戰

僖公十五年。秦伯伐晉。卜徒父筮之。吉。涉河。侯車敗。詰之。對曰。乃大吉也。三敗必獲晉君。其卦遇蠱三三。曰千乘三去。三去之餘。獲其雄狐。夫狐蠱必其君也。

按蠱互震。震爲千爲車。故曰千乘。震爲奔馳。數三。故曰三去。去者驅也。詩小雅。風雨攸除。鳥鼠攸去。君子攸芋。音吁去讀爲驅。與除芋韻。去者。卽驅除鳥鼠也。又易比九五。王用三驅。此三去卽三驅。皆言田獵。且驅與餘狐爲韻。與詩同。若作去。卽不協。古經籍通用之字。如此者正多。不足異也。顧氏炎武。引邵氏說。謂去卽算法之除。恐不然也。艮爲狐。陽卦故曰雄狐。艮爲拘繫。故曰獲。

蠱者敗也。壞也。左傳昭元年。女惑男。風落山。謂之蠱。夫女惑男使男病。風落山使山敗。二者皆敗壞之義。今狐旣被獲而敗壞。故曰狐蠱。然曰必其君者何也。三至四震爲君。上艮爲覆震。震君旣覆。故知所獲者必其君。此句爲自來注疏家所不能解。豈知易象固明白易見也。自震君象失傳。於是歸妹六五之君。小過六二之君。及此皆不能解。自覆象失傳。於是以兌爲覆巽。如大過九五之楊。以震爲覆艮。如重門繫柁之取諸豫。人知之。至象覆卽於覆取義。如蒙之彖詞。困之有言不信。中孚之鶴鳴子和。或鼓或罷。或泣或歌等易詞。遂都不知所謂矣。易旣不解。左傳與焦氏易林模易之辭。遂都不解。

蠱之貞風也。其悔山也。歲云秋矣。我落其實。而取其材。實落材亡。不敗何待。

此處杜注仍不免疏。歲云秋矣者。以兌爲秋。仍取卦象。非泛言也。杜注謂周九月。卽夏七月孟秋也。而不言兌。又易林以震爲歲。歲亦卦象。艮爲果臝。故曰實。震艮皆爲木。故曰材。巽隕落。故曰實落材亡。實與材皆在悔。落之取之者在貞。故我勝彼也。

周時筮人三易並占。此卦六爻皆靜。盡七八也。周易占九六。歸連占七八。疑千乘三去。爲二易之詞。至易象則三易盡同。非歸連一易象。周易又一易象也。孔疏謂此筮了无周易片意。又謂筮者若引周易。則其事可推。豈知此筮。無一字不從象生。杜征南承掃象之後。艮狐震君諸象。卽已不知。至唐而象學幾盡失。益茫昧矣。此李鼎祚所以有野文之歎也。學者苟能觀象乎。必知左氏筮案。皆

平易近人。无一神奇之語。其詫爲神奇者。皆野文家之見。不知詞從象生也。

五 晉獻公筮嫁伯姬於秦

左傳僖十五年。初。晉獻公筮嫁伯姬於秦。遇歸妹三三之睽三三。史蘇占之曰。不吉。其繇曰。士刳羊。亦无益也。女承筐。亦无貺也。

此歸妹上六爻詞。杜注大致得之。而用象稍誤。震筐之象。除易林外。獨虞翻知之。杜征南不知也。又震爲周、爲竹、爲箏。故亦爲虛。女承筐無實。震虛故也。震虛之象。只易林知之。并虞翻亦不知矣。不知而用卦變。強命四爻變成坤。爲虛。以解无實。若杜注。則祇以上六无應爲說。益浮泛矣。查此爻。自來注家說之。所以不能透徹者。以不知易之恆例。爻在此。而所繫之詞。往往在應。應爻有應予。固以有應予取義。應爻无應予。卽以无應予取義。又易之恆例。象伏卽於伏取義。敢本此義。爲重說之。

震爲士。上六應在三。三兌。兌爲羊。又爲斧。故曰刳羊。坎爲血。益血也。坎伏。故曰无益。昔賢以三至五。明有坎象。如何曰无。故无血二字。永不得解。豈知經用伏坎。三爲離主爻。卽爲坎主爻。離見坎伏。故曰无血。三與上爲正應。故取伏坎。若互坎。則與上无涉也。兌爲女。震爲筐。筐在女上。故曰承筐。无貺卽无實。小象曰。承虛筐也。卽以震爲虛。震虛故筐空。又震變離。離虛益空。上句言上

求三。三無應。故无益。此句言三求上。上无應。故无貺。象如此也。

西鄰責言。不可償也。歸妹之睽。猶无相也。

此二句杜注皆无當。兌爲西。互離爲鄰。故曰西鄰。兌爲口。口向上。故曰責言。說文。責求也。震爲言。變離言敗。故不可償。歸妹之睽。睽上九曰睽孤。孤則无相。相助也。之卦亦占動爻。左氏恆例也。

震之離。亦離之震。爲雷、爲火、爲羸敗姬。車說其輹。火焚其旗。不利行師。敗于宗丘。

前四句杜注得之。惟不知姬羸象。按震爲周。周姬姓。故亦爲姬。猶巽爲齊。亦爲姜也。詳前筮公子完生。兌西。故爲秦。秦羸姓。故亦爲羸。爲羸敗姬者。兌如故。而震象毀。故曰敗姬。

後四句杜注皆誤。車說其輹者。震爲車爲輹。震爲車。見閔元年傳。人尙知之。爲輹。則自東漢迄今无知者。孔疏引子夏傳云。輹車下伏兔。今人謂之車屐。夫震爲履屐。又屐在箱下。儼然足形。則輹爲震象。似子夏傳已知。但子夏傳久亡。孔疏引祇數語。傳是否卽以輹爲震象。疏未明言。然由車屐二字。而左傳得解。凡易之言輹者。皆得解。則古注之可珍。爲何如也。震變離。車毀。故曰說輹。輹說。則箱與軸分離。車不能行。震爲旗。見焦氏易林。蓋旗之翻動飛舞。惟震能象之。詳焦氏易詁。而清何楷以坎曳爲旗。於以見象學之宏深。不易識也。震爲旗。旗變火。故曰火焚旗。震爲征伐。故爲行師。震毀。故不利行師。震爲主。故爲宗。爲陵。故爲丘。宗丘猶宗國也。震爲木。火所自出。今火還

害之。故知不利於晉。仍爲羸敗姬之旨也。

婦妹睽孤。寇張之弧。姪其從姑。六年其逋。逃歸其國。而棄其家。明年其死于高梁之虛。

首二句。睽上九爻辭。兌爲姪。姪兄弟之女也。古之貴族。嫁女必以姪娣從是也。震爲從。伏巽爲母。故曰姑。杜注以震爲姑。震无此象也。焦氏易林每以震爲年。震主爻互坎。坎數六。故曰六年。坎爲隱伏。故曰逋逃。坤爲國。言九四隱伏於坤中。猶訟九二之入淵也。艮爲家。艮伏兌見。故曰棄家。震爲年。變離。故曰明年。伏巽爲高。艮爲梁爲虛。故曰高梁之虛。坎爲棺槨。故曰死。棺槨象見三國志管輅傳。

總之此爻辭自來不得解者。以象之失傳者太多也。羸象。姬象。輶象。旗象。巽母象。自東漢迄宋。祇朱漢上知一巽母象。餘盡遺失。故夫毛西河、李剛主、何楷、顧復諸鉅儒。迭爲講明。乃愈講愈晦。賴有焦氏易林。失傳之象。一一復出耳。不然烏從索解哉。

六 晉筮與楚戰

成公十六年。晉楚遇于鄢陵。公（晉侯）筮之。史曰吉。其卦遇復三三。曰南國蹙。射其元。王中厥目。國蹙王傷。不敗何待。呂錡射共王。（楚王）中目。楚宵遁。

按此爲左傳乾南之證。杜注只知離在南。謂離受咎。故目傷。不知乾亦在南。乾爲首爲王。元者首

也。左傳歸先軫之元。歸國子之元是也。乾亦受咎。故射中王元也。南國蹙者。震爲南。坤爲國、爲喪。故曰南國蹙。震爲射。故乾首離目之在南者。均受咎也。震南、震射、乾南之象。皆失傳。祇焦氏易林知之。故杜注皆不知而不釋。

七 穆莊叔筮叔孫穆子生

昭五年。初。穆子之生也。莊叔以周易筮之。遇明夷三三之謙三三。以示卜楚邱曰。是將行。而歸爲子祀。以讒人入。其名曰牛。卒以餒死。

按此杜注不詳釋。殊覺昆侖。遇卦之卦皆有震。震爲子爲行。故曰是將行。震爲歸、爲主器長子。故曰歸而爲子祀。遇卦爲貞。貞見在。之卦爲悔。悔將來。以讒人入。其名曰牛。謂謙卦也。謙震爲人。正反震。故曰讒人。震爲反。故曰入。艮爲名、爲牛。故曰其名曰牛。坤虛故餒。坤殺故死。

明夷日也。日之數十。故有十時。亦當十位。自王以下。其二爲公。其三爲卿。日上其中。食日爲二。旦日爲三。明夷之謙。明而未融。其當旦乎。故曰爲子祀。

此處杜注皆當。惟明夷之謙三句。祇就謙道卑退爲說。似未明瞭。明夷之謙。卽離變艮。艮爲黔。黔黑也。故曰明而未融。初爻應在四。四體震。震爲旦。旦爲卿。而遇卦之卦皆有震。震長子主祭。故曰爲子祀。祀亦震象也。

日之謙當鳥。故曰明夷于飛。明而未融。故曰垂其翼。象日之動。故曰君子于行。當三在旦。故曰三日不食。

日之謙卽離變艮。艮爲鳥。故曰當鳥。杜注不知艮鳥象。以離爲鳥。卽離當離矣。於變艮何涉乎。其誤可知也。震爲翼。坤下故垂其翼。下離上震。故曰象日之動。震爲君、爲子、爲行。故曰君子于行。震爲旦數三。故曰當三在旦。震爲口、爲食。坤閉故不食。

離火也。艮山也。離爲火。火焚山。山敗。

此處杜注甚當。

於人爲言。敗言爲讒。故曰有攸往。主人有言。言必讒也。

此處杜注皆誤。於人爲言。謂震也。震爲人、爲言。敗言爲讒。謂艮也。艮爲反震。故曰敗言。此專就謙象言。謙正覆震相背。故曰讒。易林本之。凡遇此等象。不曰爭訟。卽曰讒佞。於是凡易之小有言。有言不信。聞言不信。昏姤有言等易詞。二千年不知所謂者。至此皆得解。以易原皆正覆象並用也。昏姤有言以震二至上。正反震相背。有言不信。以困三至上。正反兌相背。聞言不信。以夬兌言與乾言相背。需之小有言。亦以初至四。兌言與乾言相背。訟初之小有言。則以坎上下兌。口相背。而傳卽以謙釋明夷。其神妙匪夷所思矣。繫辭云。聖人觀象繫辭。誠以所有易辭。无不從象生也。自象學失傳。於是易辭多晦矣。震爲往、爲主、爲人。故曰主人有言。

純離爲牛。世亂譏勝。勝將適離。故曰其名曰牛。

此處杜注仍誤。適敵同。禮燕饗君獨升立席上。西面特立。莫敢適之義也。史記田單傳贊。始如處女。適人閉戶。後如脫兔。適不敢距。皆以適爲敵。適離者。言與離相同也。離爲牛。艮亦爲牛也。艮陽在上爲名。故曰其名曰牛。自艮牛象失傳。於是易无妄六三之牛。遯六二之牛。大畜六四之牛象。皆无着。不用虞仲翔強變之法。不能解也。豈知左氏固明白言之。焦氏易林遇艮卽言牛也。

謙不足。飛不翔。垂不峻。翼不廣。故曰其爲子後。吾子亞卿也。抑少不終。

震爲後。遇卦之卦皆有震。故曰爲子後。

八 崔杼筮取棠姜

襄二十五年。崔武子見棠姜而美之。使偃取之。筮之。遇困三三之大過三三。史皆曰吉。示陳文子。文子曰。夫從風。風隕不可取也。

按困之大過。困三爻變也。三在困爲坎體。變則成巽。文子曰夫從風。是明明以坎爲夫。以巽爲風也。曰風隕不可取。是明明以巽爲隕也。乃坎夫風隕之象。竟爾失傳。於是易比卦之後夫凶。漸九三之夫征不復。正以坎爲夫者。皆莫知所指。而虞仲翔竟命初爻變。再命三爻變成震。以震爲夫矣。後姚氏配中。謂坎爲中男。故曰夫。江氏藩以坎爲丈夫。取象較仲翔爲勝矣。而訖不知左氏卽以坎爲

夫也。豈不異哉。

至於風隕之義。如鼎初六云。鼎顛趾。鼎初爲巽。故曰顛。顛卽隕也。九四鼎折足。折仍隕也。以四應初也。而虞翻不知其故。以初應在四。四體大過。以大過顛爲說。九四則命四變爲震。震折入兌爲說。全以卦變爲敷衍。不變不能解也。

他若大過棟橈。說卦橈萬物者。莫疾乎風。橈者敗也。仍風隕之義也。諸儒說之。皆有未當。

凡左傳失傳之象。爲杜注所不能解。或解之而誤者。以上皆補而釋之。其餘杜注所釋。而無疑義者。遂皆略焉。

九 國語重耳筮得國

公子（重耳）親筮之。曰尙有晉國。得貞屯䷂悔豫䷏。皆八也。

韋注云。震在屯爲貞。在豫爲悔。八謂震兩陰爻在貞在悔皆不動。故曰皆八。按震在屯兩陰爻未動。若在豫祇上六未動耳。若六五正由屯九五變來。坎之震。亦震之坎。胡言未動乎。觀下云是在周易。則所謂皆八者。用二易可知也。杜征南云。二易占七八。其占法蓋久已失傳。而左國用八者。又只有三事。无以會其同。故不能解也。說詳周易古筮攷中。

又曰震車也。車有震武。衆順而有威武。

震車之象。兼見於左傳。人尙知之。震武之象。祇此一見。遂爾失傳。於是殷六三之武人。巽初六之武人。皆不得其象。而解遂晦矣。豈知履六三之武人。以伏震也。震爲人、爲武、爲大君。象曰。武人爲于大君。志剛也。志剛者。言三欲承陽也。象則用伏震也。易辭正象與伏象並用者多矣。不獨此也。巽初六。進退利武人之貞者。進退卽往來。言震巽相往來。得此爻者。武人占則利也。亦兼伏震言也。

易象之用伏。人知之。而能貫徹者甚少。如泰初九之茅茹。則用伏坤象。大有六五之厥孚交如。及小象之信以發志。則用伏坎象也。而易家知者甚鮮。武人象亦其一也。武人象於焦氏易林遇之久矣。而總莫知其所謂。後於國語遇此象。再由國語證周易。而易林之武象。始完全得解。其詳盡在焦氏易詁第十卷中。

至此筮之韋注。皆詳而且明。獨及此者。以韋注於車有震武。云車聲隆隆象有威武。其義頗有未備。震爲武者。威武莫過於雷。而震又爲決躁、爲健。皆武象之根本。又此象自東漢迄今失傳。致易之武人。永不得解。故備論之。

十 晉筮成公歸國

晉孫談之子周適周。事單襄公。襄公有疾。召頃公而告之曰。必善晉周。其行也文。天地所

祚。可以得國。成公之歸也。吾聞晉筮之。遇乾三三之否三三。曰配而不終。君三出焉。一既往矣。後之不知。其次必此。

此占詞。韋昭注、所釋皆誤。按董因筮公子重耳返國。遇泰之八。曰是謂天地配享。小往大來。天地配享者。言泰天地均平。陰陽適相配也。茲曰配而不終。言否亦天地均平。陰陽相配。配謂卦象。非謂先君。配而不終者。言所配者三爻。應有三君往就國。今纔成公一人。不終者。言所應未畢也。下云一既往矣。後之不知。卽申不終之意也。韋注謂配爲配先君。不終謂子孫不終爲君。誤之遠矣。簡言之。乾君也。坤國也。乾之坤。卽君往就國也。而乾九五不變。是君而之國者。咸出自周天子之下也。而坤之爻數三。故決其必三往也。

滋溪老人傳

滋溪老人。姓尚氏。名秉和。字節之。世居行唐縣城西南滋河北岸之伏流邨。自前明以來。家世無甚貧。亦無甚富。世世耕。亦世世讀。父中憲公。幼有聲於庠序間。乃六應鄉舉而不第。卒以貢生終老。有二子。長式和。字遜臣。次卽秉和。乃縱令遊學。曰。是或能成吾志。初肄業邑龍泉書院。從安州魏奉宸先生遊。歲己丑鄉試。遜臣中謄錄。分國史館。人言可敘官。時年少氣盛。棄而不顧。繼而又赴真定恆陽書院肄業。時桐城吳輦父先生方主講保定蓮池書院。以詩古文爲北方倡。心慕之。乃復遊學於保定。遜臣於歷史地理。及諸家古文。素所服習。尤擅長制藝。既至蓮池。頗爲吳先生所賞拔。乃六應鄉舉。每高薦而不第。最後二科主司擬中者再。仍不第。後乙酉科取中拔貢生。非所好也。乃絕意進取。祇秉和一人。在外遊學。歲乙亥。丁生母張太宜人憂。遂屏棄制藝。專致力於詩古文。凡歸方姚梅曾張。並吳先生所評點詩古文諸子。前四史。五代史。或假之於吳先生。或索之同門。日夕移錄者數年。由是於班馬韓歐。敘事虛實。詳略簡括。微妙之旨。略得於心。而歎晉唐以來史傳。其敘述每與其人之精神。不能相稱。後昌黎能之矣。而不作史。歐陽能之矣。而於新唐書。祇作志不作傳。祇新五代史爲一手所成。班馬遺法。賴以復明。外此則陳

陳相因。有若簿籍。未嘗不讀之而倦也。光緒壬寅。受知於學使陸伯葵先生。取優貢第四名。是年舉於鄉。翊年癸卯成進士。分工部。光緒三十年入進士館。學習法政。三十一年十二月巡警部尚書徐公。聞名調入巡警部。三十二年補主事。翊年升員外郎。以軍機章京記名。宣統二年丁父憂。始巡警部設立二年。易名民政部。至是又易名內務部。復浮沉部中者十餘年。自通籍後。處京師。出入於各座師之門。凡王公貴人。及當世宰相。莫不親接其顏色。習見其晉接僚屬承奉輦轂之勞。而爲時勢所拘。皆不克行其志。慨然於崇高富貴者如斯。至四五品以下朝士。能酬應奔走。趨附形勢者。即可超遷。否則庸碌不足數也。其煩勞其情狀。自料非屠軀所能堪。而文學者。吾所素習也。始欲以著述自見矣。然不能枵腹爲。又不能去通都大邑。以與文人學士遠也。東方生云。避世金馬門。揚子雲云。下者祿隱。遂師其意。如訥如愚。不顧譏笑。博升斗以自溷。乃集古文講授談十二卷。凡文章家講求義法傳授心印之言。靡不輯錄。而於敘事之法講論尤詳。蓋文章之道。以記事爲最難。八家之中已不盡能矣。明清兩朝儒者。儘有文名橫絕一世。乃一敘事則蹶足不起。且鄰於小說者多矣。則以義法不詳。雅俗之辨未審也。獨歸熙甫方望溪兩氏。能摧伏外道。力扶雅音。故備錄其說。以爲古文者導。自此書出。河北大儒王晉卿先生。桐城姚仲實姚叔節諸名士。皆叩門來訪。引爲同氣。至辛亥革命。國體變更。私付此變爲數千年所未有。蹶然興曰。是吾有事之日也。乃搜集傳記。存錄報章。凡百七十餘種。以十年之力。成辛壬春秋四十八卷。繼又思中國歷史。皆

詳於朝代興亡。政治得失。文物制度之記載。至於社會風俗之演變。事物風尚之異同。飲食起居之狀況。自三代以迄唐宋。實相不明。一讀古書。每多隔闕。初學固病之。卽通人學士。偶有所詢。瞠目不能答者多矣。然一物有一物之歷史。一事有一事之歷史。卽細而至於拜跪坐臥。牀榻几席。更衣便旋。亦莫不有其歷史。因卽經史百家。及晉唐宋以來小說。凡人所習焉不察。而於事物之歷史有關者。詳細輯錄。解說原委。連綴成篇。成歷代社會風俗事物攷四十四卷。時政府已南遷。則授讀於遼東以自給。年已垂垂老矣。老而學易。自古如斯。亦不知其所以然也。欲學易。先明筮。而古筮法皆亡。乃輯周易古筮攷十卷。羅古人筮案。以備研尋。象者。學易之本。而左傳國語爲最古之易師。乃著左傳國語易象釋一卷。漢人說易。其重象與春秋人同。然象之不知者。浪用卦變或爻辰以當之。初不敢謂其非。心不能無疑也。初在蓮池時。讀焦氏易林而愛之。繼思卽一卦爲六十四繇詞。必有所主其詞者。無如易林所用之象。與漢魏人多不同。故仍不能通其義。久之閱蒙之節云。三夫共妻。莫適爲雌。子無名氏。翁不可知。知林詞果由象生。又久之閱剝之巽云。三人同行。一人言北。伯仲欲南。少叔不得。中路分道。爭門相賊。巽通震。由是易林言覆象者亦解。又數年讀大過。九五曰。老婦得其士夫。大過上兌。而恍然於易林遇兌卽言老婦之本此也。大過九二曰女妻。女妻。少妻也。九二巽體。又恍然於易林遇巽卽言少齊之本此也。他若易林遇艮卽言龜。而恍然於頤損益之龜之指互艮。遇兌卽言月。而恍然小畜歸妹中孚之月之指兌。若此者共百餘象。

非易林之異於漢魏人。乃漢魏人之誤解易。尤異者。困之有言不信。以三至上正覆兌相背也。中孚之鶴鳴子和。以二至五正覆震艮相對也。凡舊解無不誤。亦皆賴易林以通。先天卦象。清儒謂爲宋以前所無。闢之數百年矣。乃易林無不用之。邵子所傳一二三四五六七八之先天卦數。及日月星辰水火土石之八象。清儒尤譏其無理。易林亦無不用之。於是著焦氏易林注十六卷。焦氏易詁十二卷。以正二千年周易之誤解。卦氣者卜筮之資。乃必與時訓相附。初莫明其故。久之知七十二候之詞。皆由卦象而出。如中孚曰蚯蚓結。上巽爲蟲。故曰蚯蚓。中孚正反巽。相對於中。故曰蚯蚓結。於復曰麋角解。震爲鹿故曰麋。艮爲角。艮覆在地。則角落矣。故曰麋角解。初以爲偶然耳。既求之各卦無不皆然。且用正象覆象半象靡不精切。凡易林所舉失傳之象。如以艮巽爲鴻雁。以兌爲斧爲燕。求之卦氣圖往往而在。於周易所關至巨。乃著周易時訓卦氣圖易象攷一卷。文王演易。本因二易之辭。而改易舊卦名者。約二十餘卦。其舊名略見於宋李過西谿易說。乃說之不詳。至清黃宗炎朱彝尊馬國翰等迭攷之。於某卦當今之某卦。略得矣。而皆未詳其義。又二易繇詞。雜見於傳記者。其卦名雖異。其取象則同。可攷見周易之沿革。乃著連山歸藏卦名卦象攷一卷。易理之真解既明。易象之亡者復得。於是由漢魏以迄明清。二千年之誤解。遂盡行暴露。非前人知慧之不及。乃易象失傳之太久也。因之及門諸友環請注易。乃復成易注二十二卷。以其與先儒舊說十七八不同。而又不敢自匿其非也。因名曰周易尚氏學。以二千餘年之舊解。今忽謂其多誤。以一人之是。

謂千百人皆非。無乃駭衆。然而易象易理。如此則協。如彼則整。一經道破。明白易知。以天下之大。千百年學士之多。果無一人同我者乎。乃復汎覽易說。至數百家之多。果得會稽茹敦和。乾隆進士。著周易大衍。其發明失傳之象。與我同者十有五。如以坎爲矢。震爲輶。艮爲牀等是也。得歸安卞斌。嘉慶進士。著周易通釋。以巽爲豕。以坤爲魚。以坎爲矢。其取象與我同者三。得安仁盧兆敖。嘉慶進士。著周易輯義。以乾爲日。以鳴鶴在陰之陰爲山陰。說龍戰於野云。天地之大德曰生。生生之謂易。故天地不交則萬物不通。以戰爲交接。說與余同者三。得黃岡萬裕雲。嘉慶舉人。著周易變通解。謂左氏風行而著於土。山嶽則配天。川壅爲澤。震之離亦離之震。荀爽注家人。謂離巽之中有乾坤。同人謂乾舍於離。同日而居。坤舍於坎。同月而居。皆明言先天卦位。說與余同者六。得宛平李源。道光舉人。著周易函書補義。說西南得朋。乃與類行。朋卽類。類卽朋。陰以陽爲朋。復曰朋來無咎。謂陽來也。陰以陽爲類。頤六二曰行失類也。謂往不遇陽也。說天地變化。草木蕃云。蕃者掩閉。說大過以巽爲女妻。以兌爲老婦。謂既濟以離爲東。坎爲西。說與我同者九。得江寧沈紹勛。著周易示兒篇。言焦氏易林爲言易者所不解。其學遂絕。苟有深明象數者。一一詮注。可以發無窮之義蘊。乃注易林乾之隨艮之離二卦。皆原本象數。又謂左傳同復於父敬如君所。及南國臧舍其元王中厥目等辭。皆明言先天卦位。說與我同。此六人者。其說易雖不皆善。而各有二三說與余符合。可見真理之在天壤。久而必明。孔子曰德不孤必有鄰。豈不然乎。乃

引以自證焉。獨左氏與易林所用正覆象。迄無一人用以解易者。則余說之賴以證明者。不過百分之五六耳。其有待於後者尚多也。汎覽既久。乃成易林評議十二卷。年老健忘。偶有所得。不卽書之。轉瞬卽逝。力矯其病。成讀易偶得錄二卷。讀書偶得錄四卷。太玄說易。與易林等重。乃太玄筮法。人與人殊。從無論定。乃著太玄筮法正誤一卷。凡說易之書約有十種。其立說與取象十七八與先儒不同。其譽我者。王晉卿先生謂。將二千年來。儒者之盲詞鑿說。一一駁倒。使西漢易學。復明於世。孟子所謂其功不在禹下。陳散原先生謂。此書千古絕作。今世竟有此人。著此絕無僅有之書。本朝諸儒。見此當有愧色。其謗我者。謂鄭虞舊注。爲歷代易家所尊重。今忽謂其多疵。豈有清一代如惠氏父子張惠言姚配中諸人之尊崇鄭虞者之皆誤乎。是則妄誕之甚。然而我所舉之易說易象。皆周易所固有。我不過舉左傳易林等書。用以證明。以貢獻於學者之前耳。至於毀之譽之棄之取之。在其人之功力如何。庸足計乎。此外著查勘明陵記四卷。燕京城垣沿革考一卷。燕京歷代宮殿攷一卷。灌園餘暇錄六卷。槐軒見聞錄二卷。客餘隨筆一卷。文集四卷。詩集四卷。槐軒說詩十二卷。二十六年講學蓮池書院。爲毛詩說二卷。始吾以易象失傳。故易說多晦。乃瀏覽毛詩新舊各說。其晦黯與易同。惜余年老。不獲終業。只說召南周南二篇耳。老人資性魯鈍。幼讀書日不過十餘行。訥於言。見事遲滯。今年七十矣。迴憶生平所歷。如科名如學問。無不艱苦既久。而後得之。年十八入邑庠。二十一補廩膳生。乃七應鄉舉。始舉於鄉。成進士時年已三十三。先母張太宜

人歿已三年。又外祖育堂公。有知人鑒。見余兄弟文。謂必騰達。吾當見其成。乃鄉舉報捷。先一月而公歿。科第之榮。世俗所重。二老人期望終身。竟不得目睹。以博一笑。此則生平所最痛心者。及通籍爲官。不三年得補主事。又二年遷員外郎。得京察一等記名軍機章京。軍機章京卽唐宋之中書舍人。據形勢之地。最爲清要。乃將任職。而清室鼎革。其爲學。當少年精力強壯之時。爲制藝所困。不得專致力於詩古文。乃通籍後始專意爲之。而吳先生已歿。乃問法於吳北江常稷笙賈佩卿劉莘西諸同學。凡有所作。無不就正。遂門徑粗通。而易學十種。其伏根在二十年前。其考求遺象而成書。則在二十年後。其念茲在茲之艱苦。有非言語所能形容者。蓋易林既通。以易林注易。而易林未通以前。實以易注易林。嗚呼困矣。老人生平足跡所至。昔赴汴應試。值河水大漲。得觀黃河威勢。民國三年奉部檄。往熱河查避暑山莊古物。因得遍觀莊內七十二勝境。及園外八大處之名蹟。康熙乾隆兩帝之墨跡。徜徉於山水湖石之間者約一年。五年從塔宣撫使爲參贊。遍遊張家口大同歸化城諸邊塞。九年因賑至漢口。登黃鵠磯。覽大江。陟晴川閣。訪琴台。復乘江輪至九江。冒雨登匡廬絕頂。北望大江。如長虹掛天。東眺鄱陽湖。波浪春天。十年查賑河北。遊薊門百泉。登嘯台。訪邵子安樂窠。東至黎陽。陟大伾尋禹跡。瞻佛圖澄所刻石佛像。高十丈。撫端木子手植榆。十五年至蚌埠。駐徐州。登雲龍山。訪東坡遺跡。拜亞父冢。迴至濟南。泛大明湖。登歷亭。得李北海杜工部宴處。十八年赴瀋陽。過碣石山海關。東望大海波濤作黑色。平生足跡止此。

老人自幼遊佛廟則喜。道院則否。殊不知其所以然。初讀佛經。懵不知落處。後閱五燈會元。遠觀禪師云。禪是經綱。經是禪綱。提綱正綱。了禪見經。乃窮覽禪說。久之。知唐宋以來禪家大師。道齊諸聖。其寥寥數語。能括盡經教精華。其大自在處。已入吾儒聖境。凡吾儒謗佛者。皆不知佛之實際與吾儒同。且不知吾儒中庸之道與佛無異也。蓋自唐之王維白居易裴休。宋之楊億李遵勗張九成李邕馮楫。十數人外。鮮有知此者矣。禪語既會。再讀諸經。立知歸宿。然仍不能解脫也。十四年冬。因時局兀臬不能去懷。偶閱馬祖與百丈觀野鴨因緣。遂脫然放下。因說偈曰。參得江西過去禪。應無所住得真銓。森羅萬象飛飛過。不許些微把眼穿。因廢棄時事。安心著書。後讀僧璨信心銘曰。大道無難。惟嫌揀擇。但莫愛憎。洞然明白。又曰。纔有是非。紛然失心。凡著書不能無揀擇。無是非。於是著書之念亦放下。放下再放。回思舊夢。盡是雲烟。歷歷數之。真多事也。

右係先君七十歲時所寫自傳。先君生於一八七〇年（同治九年）七月廿七日。歿於一九五〇年四月十日。享年八十一歲。寫此傳時約爲一九三九年。正當華北淪陷時期。憂國心傷。無以自遣。書此述懷。聊作一生總結。然先君事蹟之足可稱述者。當不祇此。卽以著述而論。自傳中未經提及者尚多。如諸子古訓考十八種。洞林筮案。郭璞洞林注。易卦雜說。槐軒雜著。（易筮）卦驗集存。周易導略論。國學概論。雲烟過眼錄。避暑山莊記。河北省通誌（兵事篇）等

二十餘種。或自以爲零星小品。無足稱述。或爲七十歲後所寫。未及完成。先君自九一八事變。由東北返京後。卽在京寓爲生徒講易。院內有老槐二株。因名屋曰槐軒。先君於學無所不窺。除著述外。對於方術醫藥。無不精通博洽。凡家庭婦孺。以及鄰舍老幼。偶患病症。一經診治。無不手到病除。或勸懸壺以濟世。先君未允。北京中醫學會遂聘爲顧問。又精於鑒賞金石文玩。工於繪事。所繪山水。介乎雲林子久之間。名畫室曰無聲詩室。自號石煙道人。教子驤以畫法。因號驤爲小煙。元配盧氏。早亡。無所出。繼配王氏。生子二。長駿。幼殤。次卽驤。女三。長蘭。適行唐傅氏。次桐雲。適長垣焦氏。三女章雲。適東鹿李氏。驤工科大學畢業。歷任重工業部建築工程部工程師。孫澧輔仁大學畢業。供職北京電業局。孫女慧娟。適北平席氏。曾孫四。曾孫女一。俱幼讀。一九六二年三月尚驤謹記。

統一書號：2018•107

定 價：1.40 元